



6

10-e

46

J. $\frac{12}{34}$.



Ex Bibliotheca
majori Coll. Rom.
Societ. Jesu

22-e-29

6-10-e-10

100

LVDOVICI
CELLOTII
PARISIENSIS
E SOCIETATE IESV,
PANEGYRICI
ET



ORATIONES.

SECUNDA EDITIO,
ab Authore recognita.




PARISIIS;

Apud CAROLVM ROÜILLARD, via
Iacobæa, sub signo Floris Lilij,

M. DC. XLI. +





REGI



CHRISTIANISSIMO

LVDOVICO XIII.

HENRICI M. FIL.

D. Ludouici N. Ecclesiæ
primogenito.



RBIS GLORIÆ. MVN-
DI ORNAMENTO.
PACIS CLYPEO.
BELLI FVLMINI. BE-
NEHARNICO. BRI-
TANNICO. RVPEL-
LANICO MAX. POLIORCETÆ
MAX. VICTORI CLEMENTISSI-
MO. RESTITVTORI RELIGIONIS.
EXTINCTORI HERETICÆ REBEL-
LIONIS. SERVATORI CIVIVM.
PATRI PATRIÆ.



PIO. IVSTO.

FELICI. SEMPER INVIC.
SEMPER AVG.

QVOD MAXIMORVM AB OMNI ÆVO
PRINCIPVM SANCTITATEM FORTI-
TUDINEM CLEMENTIAM FELICITA-
TEM GLORIAM ÆMVLATVS. SEMPER
CONSILIS PRVDENS. IN OPERE
STRENVVS IN PACE PROVIDVS. IN
BELLO FORTIS. IN VICTORIA CLE-
MENS. IN SECVNDIS MODERATVS. IN
ADVERSIS CONSTANS. IN ÆSTIMAN-
DIS SVBDITORVM MERITIS IVSTVS.
NVMINIS SIBI CONIVNCTI DIVINI-
TATE FORTITER FELICITERQVE
VSVS.

PIETATE DVCE.
COMITE IVSTITIA.

REBELLES DOMVERIT. BLASPHEMOS
COERCVERIT. DVELLA SVSTVLERIT.
HOSTES SVPERAVERIT. IRREQVIETI
SIDERIS MORE PROVINCIAS LVST-
RANDO. RELIGIONIS SVÆ BONA
DIVINARVMQ; VIRTVTVM EXEMPLA
CIRCVMFERENDO DE VITIIS OMNI-
BVS TRIVMPHARIT,

PANEGYRICOS
ET ORATIONES IN EIVS
Henricæo tum recens tum
olim dictos,

OFFEREBAT
LVDOVICVS CELLOTIVS,
Parisiensis è Societate Iesu.

D. N. M. Q. EIVS.

I N D E X.

*Panegyricus I. Ludouico XIII. iusto
pioque Principi dictus. ad vii. Kal.
Decemb. Anno 1628. pag. 1.*

*Panegyricus II. Ludouico XIII. Fran-
corum & Navarra Regi dictus. ad
xv. Kal. Nouembr. Anno 1620.
pag. 49.*

*Panegyricus III. Regi Christianissimo
dictus. ad xv. Kal. Nouembr. Anno
1621. pag. 88.*

*Gratiarum actio pro impetrata per Lu-
dovicum XIII. &c. pag. 116*

*Litteræ summi Pontificis ad Regem Chri-
stianissimum. pag. 137*

*Litteræ Regis Christianissimi ad sum-
mum Pontificem. pag. 143*

*Gregorius Papa XV. Dilecte in Chri-
sto fili noster. pag. 148*

Dom. du Bellay V. I. Ludon. Rex. 150

*Oratio V. In sola scriptura sacra histo-
ria veritatem reperiri. pag. 152.*

Oratio VI. In scholis utilius quàm do-
mi iuuentutem erudiri. pag. 191

Oratio VII. Vtrum res literaria plus
scriptis libris an viua voce promouea-
tur. pag. 236

Oratio II X. Vetus pronuntiatum ora-
torem esse virum bonum solis orato-
ribus Christianis conuenire. pag. 228.

Oratio IX. Actio in Histriones Panur-
gus orat pro histrionibus vt in vrbe ad-
missi fabulas docere permittantur. 299

Oratio X. Modestinus pro latarum con-
futatione rationum histriones cum fa-
bulis suis procul amandandos esse de-
monstrat. pag. 325

Oratio XI. Philologus publicis priva-
tisque profanorum hominum testi-
moniis grauitè histriones urget ac
premit. pag. 333

Oratio XII. Gratianus Canonum Ec-
clesiasticorum & sanctorum Patrum
dictis atque decretis histriones peni-
tus profligat. pag. 392.



Facultas R. P. Prouincialis
Societ. IESV.

IOANNES FILLAEVS Prouincialis Societatis
IESV in Prouincia Franciæ, potestate ad id mi-
hi facta ab admodum R. P. Præposito Generali
Mutio Vitellesco, facultatem concedo, vt *P. Lu-*
donici Cellotij Societatis nostræ Sacerdotis *Pane-*
gyrici, & Orationes, eruditorum ex eadem Socie-
tate nostra virorum iudicio probata, typis excu-
dantur.

IOANNES FILLAEVS.



PANEGYRICVS
LVDOVICO XIII.

IUSTO PIOQVE PRINCIPI
DICTVS.

Ad vij. Kal. Decemb. Anno 1628.



I QUAM subito recens victo-
ria latitiam in omnium ani-
mis excitauit, tam facile rei
magnitudinem declarari pa-
teretur: non minus hoc loco
expectationi vestrae satisfacere
me posse considerem (Viri

Clariſſimi) quam in priuatis sermonibus, pro-
certi cuique afferebatur nuntij, triumphauimus.
Verum cum res illa talis ac tanta fuerit, vt eam
optando potius, quam sperando attingere fas ef-
set: mirum nemini videri debet, si in tam felici exi-
tu, gaudij sensum imperet, eloquendi adimat
facultatem. Sic enim arbitror, esse modò incon-
sideratum, illud exiguo temporis spatio, nullo no-
strorum periculo, infinito hostium damno perfe-
ctum, & planè absolutum, persequi velle dicēdo;
quod paucis ante annis vel reapse aggredi, vel so-
lū cogitatione tentare, temerarium videbatur.

Quamquam reflecto ipse me, & orationem meam
 reuoco. Nam si maximi Regis virtute felicitatē-
 que confectum est, quod ante fieri non posse
 putabamus: quid est cur desperem commemo-
 rando recenseri posse quod factum est? Nisi for-
 tē impeditissimi belli narratio: officilior est, quā
 gellio: aut carius constant Oratori verba, quā
 Imperatori victoria. Nec verò parū ad hanc
 rem momenti adfert omnium ordinum alacritas,
 & singularis in Regem Optimum amor, qui
 veras laudes exprimente naturā, secundum artis &
 industriam non requirit. Imo verò sic Rupellam
 captam Principi gratulamur omnes, quasi singu-
 li ceperimus: & in Regis vnius prædicatione
 nostram quoque gloriam contineri putamus. Ip-
 sa autem rerum, quæ me ab hoc consilio magno-
 perē deterrebat amplitudo, nescio quem cupidi-
 tati meæ stimulum admouet: persuadetque in
 tam vberi segete, si magna in oratione posuero,
 posse maiora in eorum qui viderunt recordatio-
 ne relinqui. Itaque quod me publicæ gratulatio-
 nis aura, & vestri consensūs frequentia nouitasque
 inuitat, in altum admirabilis huius obsidionis
 pelagus nauigium impellam: eò certē confiden-
 tius, quod perdomitum mare, & refrænata furio-
 sissimi elementi natura, maior pars est victoriæ.
 Sed ne quid à veritate, vsūque communi alic-
 num narrare videar, propositum mihi est ita ora-
 toris personam tenere, quam tempus & modera-
 torum voluntas imposuit, vt Theologi fidem,
 auctoritatem, sanctitatem non deponam. Vt
 enim Deum nemo laudauit sanctius, quā qui
 castē simplicitérque nominauit: & Serum popu-
 lus merces olim pretiosissimas solis oculis æsti-

*In hac lau-
 datione
 plus histo-
 rica fidei,
 quā elo-
 quentia
 adhibēdū.*

inabat : ita diuinas tuas , LVDOVICE Regum
 Maxime, virtutes dicendo æquauit, qui facta tua
 sine fūco & mendaciis more maiorum comme-
 morando recensuit. Quamobrem non comple-
 ctar oratione incredibilem rebellionis in ipsā
 exitij sui procliuitate impudentiam : non insul-
 tabo victorum conditioni, quam ipsi calamita-
 tem appellant : non amplificabo incomparabilis
 Principis dicta factaque omnia : sed historicā in-
 tegritate quædam hoc bello gesta proferam : vos
 si videbitur, Audit. tacitā cogitatione laudabitis,
 Quod si fortasse occurrit aliquid, quod à naturā
 causam habere non videatur, permittetis, opi-
 nor, à me illud origini suæ, hoc est, bonorum om-
 nium fonti, regnorum moderatori, domino exer-
 cituum restitui.

Atque vt inde initium dicendi faciam, vnde
 totum belli periculum, & magnitudo ducitur,
 considerate, per Deum immortalem, hostium
 ipsorum genus & potentiam : quorum alter ius
 quoddam emortuum, suis in Galliam irruptio-
 nibus prætendit : alter occupatā Regum no-
 strorum iniuriā libertatē per vim & scelus pro-
 pugnavit : vterque hæresi velut teterrimæ furie
 se permisit agitandum, & ad Regni Christianissi-
 mi perniciem impellendum. Ac Britannus qui-
 dem tantum olim in Galliā crudelissimi belli
 excitauit incendium, vt illud trecentis & quin-
 quaginta annis non Prouincialium plusquā
 barbaris incursionibus vexatorum lacrymæ, non
 Ducum nobilissimorum sanguis tot præliis effu-
 sus, non icta reuouataque centies & vicies fœde-
 ra extinguere potuerint. Hic Angli sæpè victi,
 sæpius ingentibus præliis victores, Franci Regis

*Hostium
 hoc bello
 superatorū
 potentia.*

*Anglus
 regnū Gal-
 liæ crude-
 liter olim
 vastauit.*

ditionem ferro flammâque delere : Francus è di-
 uerso iis, quas in Galliâ possidebat Anglus pro-
 uinciis, extremam asferre vastitatem : neque ad-
 modum referre vter vinceret, cùm eadem Gal-
 lia vtriusque esset præda victoris. Quid hîc ego
 præsidium Ebroicense per summam perfidiam
 ab Angelo Principe trucidatum conquerar? Quid
 Gessoriacum Portum Francis annuâ obsidione
 ereptum, vidente Philippo Rege, commemo-
 rem? Quid Cadomensẽ irruptionem, Mima-
 tensẽ deprædationem, Rotomagensẽ dedi-
 tionem, stragem Santonensem: quod oppidorum
 Lutetiæ adiacentium cõflagrationem persequar:
 cùm priuata sint ea damna & Cadmæa licet vi-
 ctoriâ, magnâ ex parte pensata? Clades verò
 publicas quis possit sine lacrymis recordari, cum
 aliquos Regum nostrorum (suâ, an Francorum
 militum è quibus exercitus suos conflabat, virtu-
 te? nihil attinet dicere) numero impar, loco non
 superior, regiâ potestate inferior vicerit, fugarit,
 ceperit. Quæ autem calamitas illi maiorum no-
 strorũ contumeliæ potest æquari, cum Principem
 Anglum in Procerum Francorum conspectu, in
 Regis ipsius aulâ, in solis huius luce, Franciæ
 Regem, expuncto legitimo hærede, viderunt
 declarari? O tempora! ô regnum! quod ab ho-
 ste importunissimo vexatum, laceratum, discer-
 ptum, in eius demum potestatem sine cæde ac
 sanguine, improborum ciuium factione transfe-
 rebatur Vestram hîc fidem, maiores nostri, ve-
 stram, antea cta secula, probitatem appello: cre-
 di-ne potest, an historia nobis imposuit, Henri-
 cum Quintum Angliæ Regem ductâ in matri-
 monium Caroli Regis nostri filiâ, viuo & spiran-

te Franciæ Delphino dotale regnum accepisse? Anglum aliquem Regni Gallici hæredem designatum, posteaquam Guillelmus, à quo isti genus suum propagant, Roberti Nortmanni spurius Francorum viribus & virtute in Regum Anglorum solio est collocatus? posteaquam Ludouicus noster Philippi Augusti filius, Londini à Regni proceribus Rex Anglorum est consalutatus? Posteaquam Ioânes à Philippo Augusto supplex petiit vt se aduersus fratrem Richardû tueretur, & in Regni Britannici vsurpatione retineret: Sed hæc verè gesta esse credantur, vt appareat quàm Regno exitiosus hostis ille fuerit, qui Regis specie alienam hæreditatem dissipabat

Has tamen tùm diuturnitate temporis, tùm Caroli Septimi, & Consequentium Regum virtute obductas feliciter cicatrices, refricauit alter hostis: cuius quò memoria recentior est, prociētior audacia, impietas crudelior, eò plura in deplo ratissimo regno impressit latrocinij sui vestigia, non ad exigui horrorem temporis, sed ad execrationem posteritatis sempiternam. Quis enim bellum illud appellet quo euersæ vrbes, desolatæ prouinciæ, templa spoliata & incensa, truncatæ per ludibrium Sanctorum imagines, & quod est in Catholicâ Religione augustissimum, modò hominum pedibus attritum, modò equis canibusque appositum? Fuit tùm temporis stupiditas pietatem profiteri; aut esse aut videri Sacerdotem, perduellio: Regum auctoritatem vindicare, insania putabatur. Infelix Gallia in filiorum suorum sanguine turpificata volurabatur, illa vna tot tragœdiarum theatrum, quibus aulzum Religio, furor & rebellio vehiculum mi-

*Civile in
Galliâ hæ-
reticorum
bellum
atroxolim,
& luctuo-
sum.*

nistrabat. Atque ille furoris & amentia torrens regno vndecunque vastato, vbi bonis omnibus spem mirificæ tranquillitatis è cælo vidit affulgere, tumultuosos fluctus deonerat, & in Rupellam traiecit, mari opportunam, substructionibus suprâ omnes Europæ vrbes munitam, armis, opibus, cîuibus audacissimis redundantem. Ea verò suis agitata furiis, externorum instinctu & e cordiâ, nostris locupletata spoliis, secunda tumultibus, armata discordiis, arripit auidè atque ardentè factionis hæreticæ principatum, libertatem vsurpat, & sui tandem domina tantum in se iuris Regibus concedit, quantum machinandæ aduersus ipsos prodicionis ratio exigere videatur.

*Rupella
nostris Re-
gibus olim
fidelissima,
rebellionē
hausit cum
hæresi.*

*Anglorum
perniciosa
fraus Ru-
pellam
Francis
primum
tradidit.*

Eam Urbem conperio ab antiquo in Anglorum Regum potestate fuisse, cum ij Santonas, & totam Aquitaniam possiderent: quo tempore Philippus ille verè Augustus, Anglorum hostis & victor, eam irritò conatu oppugnauit. Eius deinde filius Ludouicus fatale nomen, & florentissimum exercitum ad Rupem illam admouet, ad quam Franci nominis potentia & gloriâ naufragium factura videbatur. Sed cum oppidani qua crebris eruptionibus, qua omnia alia militari virtute regios impetus propulsarent, & ancipitem obsidionis exitum vtrorumque fortitudo redderet, intempestiua fraudis Anglicanæ occasio litem dirimit, & Rupellam Franco Regi adiudicat. Anglus enim vrbis conseruandæ studio nobilibus æquè ac militibus stipendia mittere se dicebat: iam diuitem se, & beatulum quisque iactabat: abirent Franci, nihil in loricas argento tectas Anglicano sagittas posse aut lanceas. Ape-

riuntur arcæ magna spectantium auiditate, & in
lucrum imminuentibus omnibus, ingens illud au-
ri pondus atque argenti, in saxa & lapides dege-
nerasse præpostero Anglicanæ industriæ miracu-
loprehenduntur. Hic nimirum indignari Ru-
pellani, & ludum illum contumeliosis carò ven-
dere, seque in Francorum potestatem tradere.
Atque eam rebus ipsi suis tam sunt commodam
fauentemque experti, vt cum Ioannes noster in
Anglia libertatem suam non auro tantum, sed
etiam multarum vrbium deditioe redemisset;
Rupellani annum totum importunis flagitatio-
nibus Regis aures, Aulicos, Consiliarios fatiga-
rint, ne se in transmarinam dominationem relabi
paterentur: vt Rex ipse proposita publicæ neces-
sitatis ratione vix ab eis impetrare potuerit, vt ad
Anglum transfirent. Verum quia nihil ab inuitis
extorquendum est, quod diuturnum esse velis,
statim Ioannis filio Carolo Sapiente opera ma-
gni illius Bertrandi Guesclini, Anglos ab Aquita-
nia submouente, Rupellani vrbis suæ arcem
decepto Anglorum præsidio funditus euertit, &
ea conditione Franco se restituit, nulla vt vn-
quam aut fœderis, aut matrimonij lege, aut causæ
cuiusuis obtentu ab eius Imperio & Coronæ di-
tione reuellantur. Vereor vt inuiti laudes à me
suas audiant, quas velut aliqua præuicatione
commemoro, ne sui iuris numquam fuisse, aut
immeritò ad Anglos defecisse videantur. Opi-
nor etiam historiæ lucem, publicam antiquita-
tis memoriam, præclara maiorum suorum faci-
nora obscurabunt homines ad audendum proie-
cti, vt iustissimi Principis victoriæ litem inten-
dant, qui rem suam, quando ex iure manu con-

sertum vocare non potuit. ferro repetiuit. Illa tamen, quam dixi, fides magna eorum gloria turbulentissimis temporibus velut eximium sidus eluxit, cum Carolus Septimus tyrannidis Anglicanæ ioco Rex Biturigum appellatus, Rupella, in quam per amanter admissus est, Pictauos adiit, regiam afflicti, vastati, perdit Regni coronam malè hærentem capiti impositurus. Erant tum in Anglorum potestate nobilissimæ Regni prouinciæ, ipsa ciuitatum vertex Lutetia Henricum Sextum Franciæ & Angliæ Regem acclamatam audierat: videbat patienter (quid enim ius & lacrymæ contra v. m. & Principum ipsorum factionem potuisset?) videbat, inquam, publicas Cancellariæ literas cum Henrici Angli effigie in liliato throno sedentis, & duplex sceptrum manu gestantis: tolerabant vrbes munitissimæ ad portas arcesque suas Anglorum præsidia: Rupella autem cum paucis, præstanti in Regem fide spectabat, non quid iniquitas temporum patretur, sed quid lex æquitatis, & officij sui ratio postulare. Atque vtinam ea virtus nostro etiã seculo ad posteros deriuata perseuerasset! haberes pulcherrima Ciuitas perpetuam in Religione pacem, in Rege præsidium, emporium in portu, in mœnibus ornamentum. Verum ex quo te pestilens Caluini sidus afflauit, ex quo Batauis & Britannis nauicatoribus non minus erroris, quàm mercaturæ societate, coniuncta es: ex quo illa libertatis dulcitus, & factiosi principatus personata maiestas sensus tuos delinuit, è ciuitate Gallorum, tanquam circea virgula, derepentè vesaniæ sedes, arx seditionis, propugnaculum perfidiæ, scelerum, flagitiorum.

que sentina extitisti: Tu hæreticę factioni signum ad rebellionem, ad tumultus, ad cædes, incendia, rapinas sustulisti; Tu in vmbilico iustissimo principatus, statum popularem; in Regni Christianissimi visceribus, impietatem; in moderatissimis Dei Regumque decretis, libertatem fundasti: Tu omni diuino humanoque iure violato, peruicaciam in consilio, furorem in satellitio, perfidiam in executione tanquam legitimos dominos amplexata es, nullis subiecta legibus, nisi quas ipsa fecisses.

Habetis, Audit. acerbissimos Gallix hostes separatim propositos, quos simul iungere refugit animus & formidat: ne, qui singulis impares sæpè visi sumus, repentina inter utrosque armorum viriumque conspiratione opprimendi videamur. Dicam tamen fortiter & animosè, & periculi nostri memoriam renouabo: eorum more qui magna ac turbulenta tempestate iactati, metum suum horroremque in portu audientibus amicis iucundè retractant. Neque verò putandum est ita esse neruos Gallicæ virtutis elisos, vt illis duos Imperatores inuictissimos, quos isti nefariè prodiderunt, opponere non potuerimus, Deum, & Ludouicum, vtrumque imperij Gallici conseruatorem: quorum ille sic belli nostri curam suscepit, vt huic satis esse posset mereri victoriam: hic vigilantiam, laborem, industriam talem ad tantum opus constantissimè adhibuit, vt ab illo nihil optandum videretur; vterque coniunctis in communes hostes animis & potentia, audaciam, impietatem, rebellionem gloriosissimè profligauit. Quod si ea signa quæ hominibus à Deo portenduntur diligenter attendere vo-

Hostis vterq; coniunctis viribus Galliciam aggreditur.

Reges Ludouici nūquam aut ab Anglis, aut ab hæreticis superati.

luisſent, certam eius calamitatis coniecturam in ipſo Regis diuino nomine perlegiſſent: quod ut regno ſalutare, ſic Anglis & hæreticis exitioſum ſemper fuiſſe multorum bellorum exitus declararunt. Audacter enim pronuntio, neque præteritorum temporum memoriam reformido, è tot Regibus, quibus eximium Ludouici nomen obtigit, neminem vnum ab Anglis iuſto prælio ſuperatum eſſe. Potuit Anglus è diuerſo meminifſe, eum à quo ingenti ſtrage proſtigatus eſt, eodem ipſo die quo ad Bouinas Otho Imperator à Philippo, quique poſtea Rex Angliæ declaratus eſt, fuiſſe Ludouicum. Hæretici autem Clodouzum Ariani Attilæ, Ludouicos Octauum & Nonum Albigenſium victores debuerant recordari. Nam quod ipſi oculis capere potuerunt non replico, ſuperiore ſæculo iniquiſſimis Eccleſiæ temporibus cum Caluini miniſtrorum furor & amentia Galliam inflammaret, alia Principibus noſtris placuiſſe nomina, ne ſacrum iſtud calamitates publicæ funeſtarent. Quod ſi ab hoſtium neutro violata vnquam eſt diuina illa nomenclatio, tam ne fuerunt à ratione dereliſti ut eum laceſſerent, qui vnus maximè illam ſi labaret, ſuſtinere, ſi iaceret, excitare potuiſſet? Neque verò tam parum erat generoſa reſponſio ut non colligi, neque tam vetus ut effluere ex hominum animis deberet, quam Ludouicus noſter Rupellanos eximè compeſcuerat aliquando petentes ſalua ciuitati ſuæ iura conſeruari, quæ Henricus Tertius non violafſet, Quartus etiam auxiſſet: nimirum, ſtatim ſubintulit, ea tum fuit temporum calamitas ut vos Henricus Tertius metueret, Quartus amaret: ego autem vos nec

Pia & generoſa Regis ad Rupellanos reſponſio.

timere possum, nec amare debeo. Regia profecto vox, & omnibus virorum fortissimorum dictis comparanda, quæ iniquis precibus iusticiam, potentiam fidentiam, rebellionem fortitudinem, varietati fortunæ diuinæ mentis conscientiam opposuit. Quid ab eo Rege sperabunt gratiæ scelerati cui neque vitia blanditiis suadere possunt ut amentur, neque impetrare terroribus ut hæresis timeatur? in omnes se facies Rupella vertat, obsequium offerat, fingat obedientiam: quem verè dominum non agnoscet, eius amorem non experietur. Muris ergo se fortissimis communit, concitabit externos, suos armabit, ut ipso tumultuum apparatu terribilis in Regis timore secunda dominetur: sed eum bello prouocabit. qui timorem nunquam vidit nisi in vultu tergoque Rebellionum. Verum quando is fuit hominum stupor ut nullam exitij sui præsentionem admitterent: id qua tandem ratione sit factum, vobis hoc loco breuiter exponendum est, Audit. Et quoniam hæc oratio rerum infinitate obruitur, neque quicquam augere dicendo potest, quin etiam præclara multa reticeat necesse est: vos accres & attentos postulat, ut ad quos & regiarum virtutum, & cœlestium prædignorum fontes digitorum intendet, quos nimium festinanter præteruolabit, quos raptim delibabit, ita mecum prætereatis, ut tamen intuentes & respectantes relinquatis.

Iam ante leuioribus tentata obsidionibus Rupella pactis quibusdam conuentis pacem à Rege optimo non semel impetrauerat: Rex ipse per aliquas imperij sui prouincias circumuectus admirabili prouidentia præpotentis syderis more

rebellionis vapores, qui ex animis concoctis excitari poterant, feliciter dissipauerat: externi Principes inita nobiscum fœdera, seu rerum suarum imbecillitate, seu nostra tranquillitate permoti religiosè colebant: traducta ad pacis artes ingenia earum suauitatem summa cum voluptate degustabant: cùm ecce derepentè ingens ab Aquilone malum panditur, & instructissima classe bellum in ipsa quiescentis Gallix viscera deportatur. Gemit sub immanibus nauigiis Oceanus, & ingentes velorum sinus venti laborantes impulerunt; vt hinc scires inuita rerum natura nauigare piratas. Hic omnibus rei expectatione suspensistetra illa nubes Reacensis insulæ littus opacat, & in nobilitatis Pictonicæ caput horribili fragore detonat. E centum & viginti longis nauibus exscensum faciunt duo lecta hominum millia: accurrunt nostri, licet numero & armis impares, interque mille & quingenta tormenta bellica, quibus continuè verberabantur, magna hostium, ipsorumque ducum strage edita, vexillis duobus captis, non tam victi, quàm fatigati recedunt. Promouet deinde hostis, & Sanmartiniam arcem nondum munitam, com meatu destitutam, nobilitatis flore qui primo aditu succisus fuerat imminutam, quinque erectis aggeribus obsidet: atque vt nihil mediocre minari se ostendat, bellicum canit maioribus tibiis, & plus octingentis vno die grandiorum tormentorum ictibus adesse se denunciat. Nostri autem non magis hæc tonitrua, quàm veteres Galli cœli ruinam veriti, locum ædificare, saxa terramque comportare, lunulas excitare, propugnacula hosti obijcere, nullo inter eos ordinis, nullo

*Anglus
Rupellanus
presidio
fuerunt in
Reacensem
insulam
inuasit.*

conditionis discrimine, nisi quod gloria superior erat, qui se ad operum infima demittebat, & felicius cæteris laborare, nobilitas putabatur. Nihil eiusmodi animo Anglus præceperat: quippe qui in aula Luparensi purpuratos & matronas familiariter nouerat. Duces nostros in castris, milites in armis, nobiles in acie nunquam viderat. Sed quoniam fama terroreque constant bella, & in vtramque partem futuri prærogatiua est successus initij; statuit ad arcem illam pertinaciter adhærescere, donec fracti debilitatique obsessi sua sponte in victoris potestatem venirent. Iam multum est quod sedet qui præteruolando rapere sperabat, quod subsistit in carceribus, qui metas tangere videbatur, quod spem victoriæ non in sua virtute, sed in militum, & quidem Gallorum, imbecillitate collocat. Et ea quidem mora magnum ad salutem nostram momentum attulisset, si quis apparatus expediri facili negotio potuisset: verum Gallia lethali Regis intenta morbo, nauium penuria, militum paucitas, paucæ facti animi, vetus rerum bellicarum incuria spem obsidentis augebat, & desperationem obsessorum. Et quoniam summa cum diligentia & sollicitudine mittebantur ad omnes portus cum Regiis mandatis nuntij, qui naues, qui lembos, qui lintres vnde cunque adueherent: id ubi olfecit Anglus, sapienter sanè nostris aditum omnem ad Insulam intercludit. Nam qua sola parte aspirare poteramus, eam grandibus illis nauigiis prætexit, quæ inuicem oblongis trabibus connectit: vt solis sub aqua piscibus, in aëre volucris iter ad Insulam relictum esse videatur. Iam verò quasi ad imparatos opprimendos non sufficeret fortis &

valens aduersarius, tentatur ab eodem hoste Principum externorum fides, sollicitantur socij & amici: quod si nulli Regni proceres hac corruptela deprauati sunt, lætitiis certè omnibus palam incedebat Rupella, & vbique in bonorum timore & gemitu hæretici triumphabant. Ego certè non aliam huius Regni faciem tum fuisse arbitror, cum Ioannes Rex Anglus Othōnem Imperatorem, Guillelmum Brabantiae, Henricum Lotharingiae Ducem, & innumeròs alios aduersus Philippum Augustum commouebat: qui omnes virium suarum fiducia Galliam inter se diuidebant, & Philippo Regi, ne post mortem quidem sepulchrum relinquebant.

*Gallia in
summo dis-
crimine
constituta.*

In hac rerum nostrarum perturbatione, sociis iam suspectis, ne dicam mouentibus, dubiis animi foederatis, hæreticis apud Narbonenses iustum exercitum constantibus, cæteris tota Galliarum rerum nouarum spe incredibiliter accensis, Rupella egregiè instructa & munita, florentissimo exercitu arcem ex luto & gleba conflatam oppugnante, intercluso mari, obsessos vndique prementibus hoste, fame, morbo, omni auxilij spe intercepta, quis putet humanis viribus non dicam Insulae, & obsessis, sed toti Galliae, de cuius summa decretorio ictu agitur, posse subueniri? Si quis tot inter pericula remotiorum prouinciam sibi postulet, recipiatque facturum se, ne externi velint, ne hæretici possint quicquam moliri, nã is profecto magnam à nobis gratiam inibit. Promittat alius aliquis exultantem sua multitudo Anglum, atque ipsi præfidentem Rupellam, tanquam in gyrum rationis ducere, sic quidem ut hæc securalibetate, ille arce Insulae-

que in deditiōem recepta, contenti, à reliqua Gallia abstineant: illum certè Soterem nostrum appellabimus. Quidni enim? cum Ludouicus XI. Regum nostrorum prudentissimus, auro bella sēpè redemerit, quibus vincere satis inutile fuisset, vinci penitus luctuosum. Existat verò alius tam securæ felicitatis vt polliceatur erepturum se hosti tempus & operam, neque pedem nostris in Insula periturum quem ille suum appellare possit: eum omnino vt aliquem Deum, aut è coelo delapsum hominem intuebimur. Quod si confidentissimus aliquis contemptas amicorum infidelitates, prostratos rebellium exercitus, Anglum ingenti clade profligatum, Rupellam captam vaticinetur: furere profectò atque inter sapientes insanire iudicabitur. Et tamen sic res habet, Audit, hunc exitum adeò lætum ac felicem implicatissimi tragœdiarum aditus inuenerunt. Qua gratia? quo consilio? qua conuersione? hoc iam non dico; viderint homines bello præfecti suæ ne industriæ, vigilantia, curæ, labori, quæ certè summa in illis fuerunt omnia, promittere potuerint victoriam vlla ex parte cum ista conferendam.

Iam enim aduenerant vnde vnde extricata *Insula læ-*
cum cibariis naiculæ: sed quis Britannici latro-*boranti*
cini scopulo superaret? Obsidebatur Rupella, *Regis pro-*
sed insula hostium libidini erat obnoxi: stabant *uidentia*
in littore decem armatorum millia, sed imminens *militū vir-*
sociorum naufragium oculis vsurpare cogeban-*tute suc-*
tur. Rex ipse, magni instar exercitus, vix è mor-*curritur.*
bo recreatus, hærebat in ripa diuisus à suis, prohibitus ab Insula, iratus Oceano, qui cum sua consilia frangeret, ardorem inflammabat. Quam

sapè tentauit diuisam mari terram sua suorumque fortitudine velut admouere, & quicquid intercedit spatij audacia militum contrahere, fluctibus congredi, fortunæ conuiciū facere, si aduersus virtutem pergeret pro perfidia militare? Quæ tum illum ægritudines exederunt? quæ curæ, quæ vigilæ, qui labores exanimarunt? cum suorum amantissimus Princeps ad singulos nuntios pallefceret, ad cormentorum tonitrua, quibus insula assidue concutiebat, toto corpore contremisceret, & in obsessorum periculis suum peti caput, suum latus hauriri putaret? Inter hæc Toyracius insulæ Gubernator, vir omni prædicatione ad posteritatis memoriam transmittendus, qualibet fortuna maior, virtute admirabili, fide singulari, quem ea prouincia dignum fecit Ludouici gratia, elegit prudentia, Regem periculi sui admonendum decernit: sed nullas aues edocuerat literas pennis alligatas in castra volatu deferre, quod aliquibus in bellis scimus vsurpatum. Tres igitur homines rem alex plenam suscipiunt, & nando, piscium instar, ad oppositum litus euadere pollicentur. Sed eorum vnus hauritur vorticibus: alter ad hostium naues dum fatigatus quiescit, occiditur: tertium scaphæ hostiles diu insectæ deserunt, ratæ marinum piscem: sed is eo magis se virum præstat quod arrosis incursum piscium ipsis genitalibus & extremis digitis, tres tandem leucas feliciter emetitur. Exponit ergo quæ sibi mandata fuerant, paratus eandem viam nulla præmii spe, solo Regis Imperio sine mora iterum conficere.

*Obsessorū
in insula.*

Narrabat autem obsessos opera interdium moliri, hostium impressiones arcere, noctem in excubiis

cubiliis agere, iniurias cœli perferre, laceros, tel- *singularis*
 los, ieiunos, pane & aqua à primo obsidionis die *patientia*
 contentos milites victitare, si panem appellate *& fortitu-*
 fas est commoliturum cum paleis furfurem quo ca- *do.*
 nes venatici nutriuntur: & hoc ipsum quaecun-
 que foret genus commeatus ad duos dies exten-
 di non posse: defecisse necessaria omnia: mortem
 superesse aut deditionem, in altero gloriam, in
 altero necessitatem inesse: vtrumque regni ra-
 tionibus obesse quamplurimum. Quid expectas
 Rex Maxime? quas obsessorum incolumitat, &
 tuæ victoriæ moras interponis? Hispanos? tar-
 dum negotium: tuas naues? Bataua? sed eas
 proditor ignis exussit: instructam classem? at vir-
 tute melius quàm numero vincitur. Eant forti-
 ter, & iuuante cœlo, Rege imperante, naues obi-
 ces, maria peruadant: Francorum est ire per in-
 uia, & conspirantibus in ipsos periculis bellorum
 prouocare fortunam. Itaque soluunt è portibus
 contratæ nauiculæ, & hostium non nauigia, sed
 maritima castella lintricoli perumpere molun-
 tur. Itur in medios obices, & quàm maximè oppi-
 latus est aditus, stricto ferro rudentes cæteræque
 nauium compages abscinduntur. Id penè cele-
 rius nostrorum virtute confectum est, quàm mea
 oratione narratum, attonitis hostibus, & aut au-
 daciam in aggrediundo, aut in perficiundo nego-
 tio facilitatem mirantibus.

Atque illi ex hoc fortitudinis specimine futurū
 successum prudenter æstimantes, cum nondum
 quicquam nihil agendi arte promouissent, ex-
 cusso veterno, excitatis animis, machinis omni-
 bus, viribusque arcem luteam oppugnare mo-

liuntur. Fit impressio sanè violenta, admoventur
scalæ, fossæ occupantur, innumeripaucos, recen-
tes fatigatos, valentes infirmos adoriuntur: sed
illi belluarum more inconsideratum inipetum:
nostri supra vires animum, cum animo dexterita-
tem, ab utroque felicitatem asserunt. Reperti
sunt qui semineces audito classico discedentem
animam reuocarent, de lectulo se proriperent, è
murorum pinnis aut bombardam æneam explo-
derent, aut inhærentem scalis hostem vibrata in
caput hasta deiicerent: ipsi deinde in alteram par-
tem exanimis conciderent, læti & alacres, quod
hoc factò postremum vitæ actum clausissent. Ne-
mo hîc quærit quàm strenuè cæteri pugnarent,
vbi etiam mortui vincebant. Hoc loco te à me
laudari oportet, Lacon fortissime: tu enim verè
dicebas non muris, sed ciuibus; non portis, sed ar-
mis; non turribus, sed animis ciuitates esse muni-
tas. Enimuerò cum ei Regi qui Angliam, qui Sco-
tiam, qui Hiberniam summa cum potestate possi-
det, qui fœderatis, & propinquis Principibus flo-
ret, qui quantas potuit ex omni dominatu tuo
copias collegit, quibus incautos, & otiosos o-
brueret, caducum vnum cespitem, glebas è terra
extantes, tumultuarium opus, præcisum & im-
politum laborem obiecimus, num exemplo mul-
tis ante sæculis inaudito dicti tui veritatem Gal-
lia comprobauit? Fac illud qualecunque propu-
gnaculum natura manuq; fuisse munitissimum:
quid? saxi & lapidibus, non inuictis propugnan-
tium animis ipsam fati necessitatem cessisse pu-
tabimus? quid? Toyracius claro quidem, sed non
Regum, aut Principum genere natus, totam

Regis Anglicani potentiam cum nobilibus aliquot Volonibus, à muris, quàm à Franco robore constantiaque paratior sustinuit, debilitauit, infregit? Vos hìc appello nationes exteræ, quæ Francis leuitatem animi & inperferendis incommodis corporum molliitudinem obliuiscitis: quid fecissetis tali re ac tempore, cùm victus omnis, & spes ipsa præsentium lenimentum deficeret, corpora laboribus, vigiliis, hostium congressionibus exhausta essent, inclementi cœli tempestate, grassante morbo, vastata insula, hostibus ad delicias instructis, eorum Duce humano certè, & magnifico viro magnis pollicitationibus miseros homines ad ditionem, id est, ad vitam & salutem inuitante, cum satis gloriæ, satis erga Regem fidei, vel æmulis testibus, factum esset, quod ad eam necessitatem res deducta foret, quid, inquam, in illo spei omnis naufragio fecissetis? an egestatis ultimæ fluctibus obrui, quàm arrepta tabula ad littus appellere maluissetis? Videtè quid contra nos gloriemini: nam ex duabus obsidionibus quas nuper vidimus, neque Bredæ obseffi, neque Verrucam obsidentes in pares angustias reducti fuerant, cum illi hostem intra urbem acceperunt, isti obsidionem soluerunt.

Sed vt eo reuertar vnde deflexit oratio, fractus nostrorum patientia, & armis superatus Angelus, hoc ultimo conflictu sexcentis suorum nostrorum autem vix quindecim desideratis, de omni spe sua & expectatione deiectus, fugere decernit ex insula. Verùm cùm eius victoriæ quid omnino rerum illic ageretur ignorantia Regis animum mira sollicitudine vexaret, is ex-

*Magna
strage pro-
figatus
Angelus
fugit ex
insula.*

trema omnia tentanda ratus Polemarchum Schombergium, virum singulari prudentia, consilio, fortitudine, cum valida auxiliatorum manu, quos Rex ipse, ut singulos bellè nouit, elegerat, mittit in insulam. Addicit se auctoramento voluntario purpurata nobilitas, tanto numero, ut iam Rex se solum relinqui penè quereretur, ea porro alacritate ut in omnium oculis & vultu belli periculum, & certæ mortis gloria legeretur. Sed hæc profectio nauale hostium non fefellit, qui mox se nauigaturis opponunt: tum ventus ex aduerso vehemens, iratum mare, hyems frigida, imbres perpetui, nobilitas maritimæ iactationis insolens, tuos, Rex providentissime, conatus intercipit. Obfirmatus tamen in incæpto Schombergius de vita quàm de obedientia periclitari mauult: audita e iam ab eo vox. Romanæ illi non absimilis, Illuc, Commilitones, ire necesse est, vnde redire non est necesse. Sciebat ille fortasse habere se in comitatu Imperatoris felicitatem, & præmissam ab eius pietate victoriam in littore præstolari Remigat igitur fortuna Galliæ, &, fauente, an indignante rerum natura? lembi nostri ab Britannicis nauibus aberrant, & ad insulam qua maximè importuosa erat, qua nemo vnquam mortalium exscenderat, ad insulam tamen salui omnes nocte appellant. Vix confirmatis viribus, non tamen satis armis instructi, quorum partem nauigiis, quæ fluctuum adhuc ludibria iactabantur, imposuerant, in hostem ordinatè recedentem impetum faciunt, & disturbato equite, impedito pedite, non iam pugnam, sed cædem inchoant. Ex animi tui sententia,

Schombergi, potes ne dicere quod olim Cæsar, venisse te, vidisse, vicisse? Eiectum te potius ab inquietis fluctibus, quam peruenisse in insulam fateris: visos à te hostes, vix lucescente die, celo turbido, ipsis latebras in fuga caprantibus, nescio an possis affirmare: hoc vnum Galliæ Angliæque constat, cæsam à te extremam aciem, quæ sola restabat in insula, deletum internecione equitatum, superfuisse pedites paucos quos fugientes fluctus absorbere neglexerunt, quadringenta & amplius signa capta, eam cladem & Rupellæ, & inauratis Anglorum nauibus comploratam.

Patieris opinor, si benè pietatem tuam noui, in prudentiæ virtutisque tuæ commemorationem diuinam interponi potestatem: cum nihil tibi gloriosius esse possit quàm vt te à Deo & Ludouico, summis hoc bello Imperatoribus, electum tantæ victoriæ non auctorem, sed ad iugum recognoscas. Vos verò, Audit. quoniam quod dicturus sum pro certo vindicare non audeo, tamen hoc loco reticere non debui, rem ipsam suis momentis penditote. Quendam Gallum hominē qui tum in Hibernia morabatur cum reliquæ fracti & dissipati exercitus sunt in Angliam reportatæ, audiui dicentem, Hibernos ipsos, in quorum præcipuè caput postrema hæc procella defæuiit, referre solitos, vidisse se candidum Equitem, armis illustribus, augusta forma, & humana sanctiore, qui nostros ordines raperet, cuius ipsi armorum splendorem, & virium impetum sustinere non potuerint. Id si verum non est, equidem non video cur mentiri & affingere vo-

*Non sine
caelestibus
prodigiis
parta vi-
ctoria.*



luerint. Sin autem ea illis obuersata verè species est, cum præsertim eorum nemo qui illi prælio interfuerunt, humanis viribus victoriam assignet, & à Regis pietate, causæque æquitatè nihil abhorreat; quænam illustriora quærimus miracula, quàm quæ Deus heroïcis Machabæorum, Constantinorum, Theodosiorum temporibus reservauit? Sic igitur is qui spe & cogitatione totam Aquitaniam, & Normaniam deuorauerat, ad arcem luteam gentis gloriam allisit: & qui ad occupandas nobi issimas Galliæ Prouincias velis remisque aduolarat, septem suorum millia in insula Reacensi reliquit, vt quam viuì capere non potuerant, corpore tenerent vel sepulti. Euenire autem singulari diuini numinis prouidentia, decuit, vt quæ classis bellum sine iustitia inferebat, pateretur sine tempestate naufragium.

*Anglo sic
fugato,
Rupella
extructis
aggeribus
obsidetur.*

Anglus ergo in orbis angulum ventis non sibi, quàm nobis secundioribus renauigat: ille ab antiquo terror & carnifex Gallorum, & alio quolibet, præterquam nostro sæculo metuendus, suam in insulam dedecoris & ignominia plurimum reportat: Gallia autem hoste a Iuentitio liberata in Rupellam mali causam totum belli pondus incumbit. Quod si in oppugnatione Reacensi diuina Francorum virtus Anglis opposita enituit, quanto admirabilius in Rupellana debet elucescere, quæ hinc & inde Gallos vidit, hos consilio, illos tolerantia, vtrosque constantia inuictos? Factor equidem ciuile bellum Reipublicæ vulnus esse, neque honorificam videri posse victoriam, quæ ex imperij contemptu nascitur: verùm suas

inuicem vires experiri debuerunt Galli, vt ediscerent quid in vtramque partem possint: quò conspirantibus in posterum animis orbi vniuerso demonstrent, nihil Francis in agendo & patiendo extremum esse, nisi mortem & gloriam. Securum est enim ad vsum secundorum per aduersa conscendere: neque vlli magis timendi sunt aliis, quàm qui aliquando timuerunt. Itaque si dicam hoc in negotio renouata vtrinque obsidionum facinora, quæ vlla præteritorum sæculorum memoria infinitis bellis acciderunt, verendum non est ne me vetus historia vanitatis accuset. Sic enim mihi persuadeo nihil esse ab obsidentibus vigilantia, impensæ, consilij, artis, industriæ: nihil ab obsessis solertia patientia, virtutis, & constantia prætermisum. Nam honestis illis nominibus in ipsa seditiosorum factione vti me sine-rit, Audit. quoniam, si rebellionem excipimus, Galli erant, & illa ipsa tam pertinax, tam diuturna, tam secreta famis & laborum omnium tolerantia in Gallis animis corporibusque prodigiorum numerum amplificat.

Hic ego non commemoro extructa cum fossis & aggeribus propugnacula quibus obsessi coërcerentur in terra: hoc enim iam ab aliis occupatum est nuper in obsidione Bredana ab Hispano Duce, antea apud Iccium portum ab Eduardo Anglo, qui vrbis urbem opposuit vicos, & plateas, fora, priuata, publica tecta continentem: nec aliter olim Cæsar Alexiam in edito monte positam expugnauit. Venio ad portum quem sibi liberum fore nullus obsessorum vnquam dubitauit. In eo mari admirabilem video aggerem è flucti-

Regijs castris admirabili opere terra marique circumcungitur.

bus extantem, grandibus constratum saxis, ad omnes circumlatrantium vndarum insultus immobilem, frænum Oceani, æstus retinaculum, Anglicanorum conatuum scopulum, Rupellæ domitorem. Contempsit hostis tanti laboris initia, quia inutilis videbatur: & meminerat Alexandrum in mari pacatissimo simile nescio quid tentantem fluctibus, & obsessis ludibrium dedisse: iniectas etiam Neptuno compedes ab insano Rege, non imperitus vndecunq; Ministellus, qui est hominum eiuscemodi lepos, vrbanius deridebat cum inter cauillationes & ludos inexpectato illo vallo circumdatus, sensit denique se portu suo inclusum esse, sibiq; illud ipsum mare quod tangebat, creptum. Proh Deus immortalis! quid hîc primum mirer, quid extremum? inuentorem, an inuentum? artificem, an auctorem? potuisse hoc aliquem excogitare, an perficere? iubere, an parere? Nullo tempestatum metu, spreta procellarum violentia, contempto formidolosi æstus incremento, inter ventorum turbines, inter decumanorum fluctuum impressiones ædificatum pelagus, vortices saxea substructione diuisos, compressum lapideis vinculis omnia soluentis elementi furorem, mare militum pedibus ambulatum? Quis ille est mortalis Deus qui participata cum supremo numine potestate iure dicere audeat: Circumdedit mare terminis meis, & posui vectem, & ostia, & dixi; vsque huc venies, & non procedes amplius & hîc confringes tumentes fluctus tuos? Quis est ille rerum Dominus qui iugum fluctibus imponat, & leges dicet Oceano? Quamquam volenti frænum iniicere minus

fuit operosum : nam ipsa Rupellanoꝝ indignatione , & Anglorum confessione scimus nunquam antea solidi anni spatio mare fuisse tranquillius , ipsosque fluctuum accessus depressiores : vt aggerem illum suum excitanti Ludouico , non solum militares operæ non artificum industria , sed etiam venti tempestatesque seruiert. An sentiebat Oceanus eo se Principis inuicti gloriæ largiorem fluere , quo parcius alueum suum tingeret ? An meruebant venti laudum Regum acroamatis , quæ orbe toto personabant , inuicibilis obstrepere ? Dicam hoc loco , anticipato rerum ordine , paucis post obsidionem solutam diebus , tempestate persanè modica intumuisse mare , & aggerem antea inuictum ingentihiatu aperuisse , transcendisse quin etiam , & vnam è Regis nauibus superata mole ad Rupellanz catenæ fauces appulisse . O nouum atque insolens prodigium ! O altum cœlestis Imperatoris consilium ! O naturam Regis maximi rationibus obsequentem ! Quo toto tempore necessitas atque vsus fuit , mitis affluxit Oceanus , estuum furori moderata tempestas vix summam operis crepidinem libauit , classem Anglicanam moles inconcussa prohibuit : vrbe autem dedita , oppugnatione confecta , quasi venia impetrata redeunt ad ingenium fluctus , exæstuat mare , illa , vt sic dicam , saxorum acies veluti dato signo , & peracta statione dilabitur . Et erit qui dubitet æquitate pietatēque sua coniunctum supremo Numini Ludouicum ipsam in consilio habere naturam ?

*Agger
maris
mus paulo
post vrbis
deditiōe
maris tē-
pestate ali-
qua parte
disturba-
tus, quod
idem olim
Constantio
in Galliis
accidit.*

Sed extremis non anteuerto , dum me in sui Mira in

*castris Re-
giis disci-
plina mi-
litaris.*

contemplatione retinent castra quæ illius aggre-
ris ductu perpetua quadam indagine obfessos
circumsedent. In iis quæ legionum dispositio,
quis ordo laborum, quæ disciplina militum, quæ
Volonum concordia, quæ ciborum copia etiam
ad delicias, quæ omnibus è regionibus accurren-
tium visendi gratia hospitem securitas, cum ne-
mo vnus è tot hominum millibus sibi inter mili-
tares cuneos nocte pergenti, vel teruncium vi
aut furto periisse conqueratur? Iam quanta in
armatis pietas, qui rerum diuinarum sensus, quæ
aduersus Religiosos & Deo dedicatos homines re-
uerentia? Non ibi blasphemæ voces audiri, non
prætextata verba: nulla in animo cupiditas, nul-
lum in corpore flagitium, ne in castris quidem li-
bidinis incentiuum. O castra sui nominis appel-
lationem sub pio Rege tandem aliquando conse-
cuta! O verè christianissimus exercitus cui san-
ctus Imperator, legatus Cardinalis, Duces inte-
gerrimi præesse, Religiosi adesse nō dedignentur!

*Magna
providen-
tia & con-
silio depre-
hensi ho-
stium co-
natus &
litera.*

In eas virtutes intentis omnium animis, & ad-
mirabili in optimum Principem charitate inflam-
matis; quantum putatis, Audit. obfessis aut per-
uicaciam ad repugnandum, aut ingenium ad fa-
ctiones toto regno excitandas, aut pecuniam ad
reparandam Britannorum classem profuisse?
Nimirum elapsi per paludes & nota viarum di-
uerticia, per ipsos etiam fluctus nuntij, dum cu-
stodes omnes fefellisse se putabant, in capacem
illā Ducum solertissimorum providentiam incur-
rebāt. Quam quidem commissorū cognitionem,
illā literarū deprehensionem quo nomine dignam
existimetis, nescio: ego certè exercitus sine

periculo dissipatos, partam sine prelio victoriam, pacatam vno momento Galliam, factiosos vno oculorum coniectu, vna voculæ prolatione sedatos, appellare consueui. Sic est, Audit. quot eiusmodi li.eras intercepimus, tot hostium coplas profligauimus: quot nuntios deprehendimus, tot tumultus compressimus: quot proditores transire vetuimus, tot belli ciuilibus incendia restinximus. Nisi forte tunc tantum victi putantur aduersarij quando Marte ipsis victoribus luctuoso dimicarunt: aut minus est stirpem ac semen malorum omnium resicare, quàm occupato semel agro, & adulta messe perditos ciues magna bonorum strage demerere. Et verò pauci illi qui vigilum diligentiam eludere potuerunt, vidimus quantos toto Regno motus pœnè concitarint, quanta eorum ductu & hortatu hæreticorum factio in Nortmania tantum non coërit, quàm proximè periculum fuerimus ne coniuratorum exercitus paratis in agro Pictonico aliquot seditiosorum millibus se adiungeret, & Regem in aggere propugnando occupatum, à tergo adoriretur: quæ conspirationes non nisi furtiuo nunciorum comiteu colligi, non nisi eorum comprehensione dissolui potuerunt.

Itaque dum Rupellani alias ex aliis coniurationum telas exordiuntur, nostris è diuerso retextentibus, & velut Sisyphei saxum versarent, nihil quidem proficiunt, abijt magna pars anni, obaria vsu deteruntur; tenuiores primum, mox etiam non pœnitendæ fortunæ homines occupat indigentia. Illi ergo nè, quia vitam suam deploratam videbant, alienæ domini

*Extrema
Rupellano-
rum fa-
mes, & in
vrbe con-
seruanda
solertia.*

fierent, nè quam in primores seditionem desperationem rerum extunderet, primum omnium exarman-
 tur, & crescente nocendi voluntate potestas
 omnis eripitur. Tum deinde publica res ad pau-
 corum cōsiliū cognitionemque reducitur, qui
 euentuum periculorumque veritatem pro libi-
 dine aut silentio tegerent, aut in vulgus profer-
 rent; vt mirum non sit ab iis qui clanculo ex vrbe
 profugerunt, certi nihil exprimi potuisse. Ma-
 gnis interim pollicitationibus ab Anglis, à con-
 iuratis reliquis implentur, vt futurorum spe sen-
 sum mali præsentis obtundant. Sed moras tra-
 hunt auxilia, fames vrget inclusos, morbus inua-
 dit, mors imminet: eiiciuntur ex vrbe fœmina-
 rum greges, & imbecilles, ac debiles alij fruges
 consumere nati, quos dum Regij vetant com-
 meare, sui recipere negligunt, ad pomœrium fun-
 gis, & alga, & insulsis radicibus pecudum instar
 pasci coguntur. Intra muros autem equis cani-
 busque, & obscœnis eiusmodi animâtibus, quasi
 & ipsæ pro Rege facerent, bellum internecinum
 edicitur: coria & lora aqua macerata vel iuris in-
 star sorbentur, vel insolatione durata in aliquam
 panis imaginē pinsuntur. Ditiorem autem epu-
 lā cauliculi folio quarta aurei nummi parte, ouo
 francis septem & amplius, canis capite duode-
 cim redempto: panis libra duodecim aureis non
 cara: onæ macra & exili ducentis, vacca eaque
 non tota bis mille francis comparata instruun-
 tur. Hæc sūt Lacōnū nostrorū phiditia, hæc sapiē-
 tum symposia incredibili frugalitate temperata:
 sic furor & rebellio perditos ciues crudelius pu-
 niuntur, quam esset hostis iratissimi postulare,

Nam inter tot incommoda circiter quindecim
 mortalium millia fame pereunt : in vrbe amplif-
 sima mille & quingentæ domus omni familia
 priuantur, sparsis hinc inde cadaueribus refertæ :
 languidæ matres hinc maritos efferunt hinc filiis
 præparant pollinctores : iuuenes animis quàm
 corporibus robustiores labentem parentum se-
 nectutem demensio suo fulcire conati, mor enti-
 bus denique incumbunt, & spiritum inuicem
 ore accipiunt, redduntque : miles ciui amicus,
 militi ciuis supremum in funere præstat officiũ,
 mox ipse secuturus : nullum Galli; nullum Angli
 in morte discrimen; nisi quod ille patriam secum
 ruentem deplorat, hic urbem quam sibi seruare
 non potest, dominis perire lætatur. Quæ domus
 vacauit funere? quæ familia lacrymas siccauit? &
 licet exequiarum iam esset periculosa occupatio,
 flere tamen semper sub casside vacauit in specu-
 la. Itaque mors vltimum tot malis remedium
 afferat. Non dabit omnibus. Est ne aliquid vltra
 quo rebellio suos auctores punitura progredi
 possit? Reperietur. Nam posteaquam expiraue-
 rint, ne eorum quidem carne temperabitur, sale
 condientur membra mortuorum, & ciuium mor-
 ticinorum adipe ciuium corpora sustentabuntur.
 Proh Deus immortalis! vbinam gentium versor?
 de quibus, & apud quos hæc enuntio? Gallos ne
 vobis ad omnem humanitatis rationem modera-
 tos, an gentes quibus nihil humanum est præter
 cibos, appono spectandas? In exercitus numero-
 sissimi conspectu & luce, in orbis tum temporis
 theatro, in ipso Galliarum sinu renouatas esse Thy-
 estas epulas, violata dentibus humana cadauera,

*Ab obse-
 sis huma-
 na cadaue-
 ra deno-
 rantur.*

deuoratis canibus homines in canum degenerasse rabiem, & excusso dominorum iugo contra suam met ipsorum rebellasse naturam? O furem! ô portentum omni aruspicum disciplina procurandum! Prætermittite tam tetrum scelerratumque facinus miserrimorum temporum testes historiarum, neque ad reliqua sæculi nostri flagitia hoc etiam propudium additote, nesciat simplex & innocens posteritas sub optimo Principe Gallorum aliquos tam fuisse crudeles. Quod si rem tantam vel leuiter perstringi cogit ratio veritatis, ferendum erit, & ad cladem declarandam sufficiet, si suppressis cæteris id ab infante puero factum narrabitis, qui cum matris inhæretet vberibus, eaque inter dulcissimos amplexus animam exhalasset, ore licet nondum armato dentibus mammam arrosit: cumque nihil aut ad sugendum humoris, aut ad deuorandum virum superesset, in materno sinu vitam non reus teterri mi post hominum memoriam facinoris, deposuit. Quæ rerum perturbatio, Deus sancte! quæ labes naturæ! quam noua, quam inaudita perduellionis supplicia! Benadabo quidem Samariam obsidente mater filium sibi vicinæque apposuit epulandum: Tito Hierosolymam oppugnante monstrum idem apparuit, famosa gentis vniuersæ vbique terrarum extirpatione, vrbis vrbium euersione, amoenissimæ regionis vastatione infelicitè expiatum: Calaguritani urgente Pompeio vxores filiosque suos in alimentum verterunt: deuoratam autem à filio matrem quis legit? quis audiuit? quis somniavit? Non habebat misera parens vnde vitam quam filio dederat

cueretur: dent, inquit, pœnas suæ fecunditatis
vterus, sterilitatis vbera, conserua te mei parte
pars mei, & si mea potes anima viuere, vitam
iuge post sanguinem. Sic moritur infelix mulier
cui parere vacauit, vbi viuere non licebat: sic in-
fans vltimæ calamitatis exemplum, nihil in ma-
tris corpore nisi mammam vbi moreretur, inue-
nit.

Iamdudum, vt arbitror, vobis prodigio simile *Auxilia*
videtur quod in hac rerum desperatione nemo *ris Anglo*
desperet, quod in humanorum ciborum vsu hu- *rum classis*
manifestus nihil recuperent, quod vitæ ferinæ *Rupellam*
pertæ deat neminem qui prodita, si ita loqui, licet, *commeatu*
vrbe victoris clemenciâ mereatur. Nimirum obsti- *instruere*
natos animos spes auxilij Britannici sustentat, & *conatur.*
cum aliud nihil poterunt, posse mori delectat,
quod est triste solatium desperatis. Adest igitur
tot votis expetitus Anglus, & se iam iterato vi-
ctum non immemor, præteriti temporis ignomi-
niam hac vna victoria delere cōfidit. Tum enim-
vero hæreticæ factiones tota Gallia renouan-
tur: excitant se coniurati, & in Piçtones exerci-
tum deportare conantur. Rupellani verò an-
guibus perfimiles qui hiberno frigore stupéfatti
ad ignem, aut vèrni solis teporem extremam cau-
dam circumferunt, caput attollere, parere ad mu-
ros, plures immenso labore globum ferreum in
tormentum immittere, atque illud ipsum nimis
feliciter explodere. Diceres ad salutare nauium *Ea tertio*
Anglicanarum sidus vitam mortuis restitutam. *à nostris*

Nostris igitur ex aduerso & in mari nauigiis, & *repulsa lō-*
inaggere militibus dispositis, hostes cum ingenti *gins sece-*
tormentorum terrore, quorum oppido liberales *dit.*

semper fuerunt, semel atque iterum naues promouēt bitumine ac sulphure illitas, quæ nostram in classem delatæ conceptum incendium vnde-
cunque diffunderent. Id inuentum Tyriis olim aduersus Alexandrum perinde vt optabant, successit: nostri autem oppositis obicibus, & iniectis vncis machinamenta illa in Regis conspectu è tanto terrore & minis, in commune gaudium propriis ignibus mutauerunt. Sub aqua etiam natatiles (ô artificium!) cuniculos immittūt, qui nauium nostrarum carinis suppositi aut violenter perfoderent, aut si minoribus lembis occurrerēt, disruptos in altum eiacularentur. Huic quoque nostri occurrunt periculo, & terribiles illas machinas cogunt Oceani fluctus ictu luforio perforare. Certatur vtrinque validissimè tertio impetu: sed Anglus cum nobis nihil incommodaret, & ipse sibi timere inciperet, longius extra teli iactum recedit, negatque se ad pugnam, sed ad pacem faciendam aduenisse. Frigida vox, & quæ totum aut maritimi æstus, aut belli Rupel-
lani ardorem potuit extinguere.

*Regis in-
conflictu
virtus &
fortitudo
militaris.*

Non dubitabo vobis audientibus, Viri Clarissimi referre quæ hoc in prælio gessit Rex inuictissimus: Alacritatem singularem ad hostis aduentum: Vigilantiam qua illum Sol oriens semper vidit in littore: Artem militarem qua manipuli omnes perfectè collocati erant: Diligentiam verè imperatoriam, qua fiebat vt quacun-
que illi imperum facturi videbantur, semper occurrerēt Ludouico. Dicam etiam illam periculorum contem-
ptionem, qua supra circumque volitantes cum horribili stridore igneas è maioribus tor-
mentis

mentis glandes ; & in paucos à se passus incidentes aspiciebat intrepidus. Equidem si id apud eas nationes referrem quarum Reges imperant bella, & in epulis suas audiunt victorias, pauescens exclamarem : quid agis Rex maxime ? quò regni fortunam præcipitas ? quid tibi cum militaribus officiis , cum eorum fato qui soli percutunt ? Tam tuo capite regitur , quàm illud tegit exercitus ; tua salus omnium est vita ; omnes tibi quietem suo emunt discrimine , tu omnibus tua quiete securitatem : solus periculi tui metus si victoriam non eripit , minuit : abi late, spectata eminus ; benè pugnat Imperator qui vincit in suis. Hoc, inquam dicerem ignauis illis, & qui nunquam castra nisi alienis oculis viderunt. Sed Franci Regis longè alia est quàm cæterorum ratio , qui victoriam nisi quam ipse manu faciat, suam non putat : nec enim meretur vincere qui nihil egit vt vinceret. Nam vt desint cætera, vnum illud , idere milites & videri , adesse in illo gloriæ theatro spectatorem virtutis, nihil fortiter factum auribus , sed oculis credere ; quis non videt quàm sit illo in rerum periculo exercitui utile , Principi gloriosum ? quàm multi dum fortes videri volunt à Rege, fiunt ? quàm multos pudor in gradu retinet , & qui præsentem Imperatorem fugere non audeant, vincere coguntur ? Iam Nobilitas , iam qui gloriæ stipendiis militant quæ pericula non prouocant, quas acies non irrumpunt, quam in eius oculis securitatem non habent, quo spectante vicit quisquis gloriôsè mortuus est ? Sed quasi de otioso loquor , ac non de eo Rege qui ordines ipse instruxit , qui omnibus adfuit,

qui cum extra periculum consistere rogaretur
inter balistas laborabat, dirigebat in hostem tor-
menta, & destinatas naues vix irrita explosione
feriebat. O ingens & eximium laboris bellici præ-
conium, quod ei assuetas imperiis manus Prin-
ceps adinouere non refugit! ô vehemens ad ope-
ra quæque aggrediunda incitamentum, quod il-
la laureatæ tot victoriis manus exercuerunt! Ma-
cte Rex fortissime, vbi validior est hostium clas-
sis, accurre: euge: vbi crebrius tonat, insiste: eia:
vnde hosti maior perniciēs comparari potest ful-
minas feliciter: periculum habes commune cum
omnibus, fructus victoriæ totus erit tuus: vides
quantum ab armato & pugnante Rege roboris
miles accipiat, momenti prælium, regnum glo-
riæ, victoriæ gratiæ. Si tantum vt pugnares, vt
pericula prouocares, vt te præteruolantibus glo-
bis opponeres, vt Ducem consilio, exemplo mi-
litem ostenderes, hinc rebellauit Rupella, inde
centum & triginta nauium classem armavit An-
glia, propè est vt exclamem, Tanti fuisse! Hæc
ego Scipionum & Camillorum sæculo in tuis
laudibus non posuissem, cum imperia sudoribus,
victoriæ periculis parabantur: cum Imperatores
de militibus non tam stipendia quàm vulnera fa-
ciebant: cum prodigio simile fuisset imperatu-
rum omnibus non esse fortiorem omnibus. Nunc
verò cum militaris gloria à castris ad aulam, à so-
le & puluere, ad otium & delicias translata est:
nemo iure reprehendat si in virtutibus tuis com-
memoro non tantum veram illam, & tua partam
industria victoriam, sed etiam umbratilem in ex-
ercitatione campestri militiam. Tu enim paucis

ante deditionem mensibus cum pulcherrimum exercitum in opportuna valle lustrares. quàm peritè aciem dirigebas, quàm solerter & ingeniosè nouas phalanges & cuneos excogitabas? Quis veteranorum non obstupuit superesse sibi aliquid à Rege iuvene discendum quem ætatis prærogatiua docere debuerat? Quis tyronum gaudius non est obtigisse sibi magistratum, qui noua omnia in re militari præter se ostenderet? Stabant distincti armis, distincti locis ordines: tu solà maiestate armatus, & grandem illum exercitum mente complexus, hinc peditem, hinc equitem lustrabas, arma explorabas, hortabare nominatim, stare, progredi, ferire, cauere, dextrorsum, sinist'orsum ferri exercitata voce iubebas: ad quam ita mouebatur exercitus quasi ad victoriam duceretur. Quid tum animi fuisse putamus obsessis, si tamen se tum obsessos sentiebant, cum sol armorum illorum fulgorem in editissimas turres, vnde paratam sibi pompam spectabant, iacularetur? quid spèi concipiebant generosi illi duces militesque tuos vnius exemplo ad pertinenda quæque mirum in modum animati? Tu verò, Ludouice, illum Nobilitatis florem, robur iuuentutis, animorum alacritatem, ardorem gloriæ, mortis contemptionem quo vultu, qua mente spectabas? Quid tibi de tua dicebas potentia? quas tum Prouincias, quæ Regna his militibus te duce optasti, sperauisti, promissisti? Neque enim si propiè loqui volumus, legiones illas occupauit Rupella, sed exercuit; & tamen urbem imperij capacem pars quòta Francorum militum penè otia subegit?

Angli pacē petunt.

Sed reutenio ad hostem, quem nisi consequor elabatur. Is verò ad hunc modum repulsus, & ab euincendi aggeris spe deturbatus, pacem rogat: vt olim Richardus Anglus, Philippo armatus armato se submisit. Admittitur ad colloquium, quia supplicat. Nam recenti adhuc eius aduentu cum Rupella tantæ classis superba præsidio pacem à Rege peteret, respondit ipse fortiter quod olim Appius Clodius Pyrrho, pacem sibi cum armatis non esse, post superatos Anglos eorum preces auditum iri. Anglo igitur leges dantur à Rupellanorum rebus penitus auulsæ & distractæ. Hoc istis dolet; & spes omnes præcisas, & se à sociis proditos, & suo comœatu viuere infideles. Hic tandem aliquando causæ suæ iniquitatem agnoscere, rebellionis pudere, in Regis clementia Gallicam sperare mansuetudinem, Insularium perfidiam execrari, & vicissim prodere, proditores. Itaque quem sceleris adiutorem adsciuerant. Britannum, eundem faciunt summa ipsius infamia deditiois spectatorem. Ad Regis inuicti pedes accidunt, orant, supplicant per quicquid ipsi sanctum est, amentia suæ, perduellionisque veniam, vt à domino victi, à Rege subditi, à patre filij, licet rebelles, & modis omnibus profligati.

*Rupellani
sua spe de-
lusi Regi
se dedunt.*

*Veniam
rebellionis
supplices
postulant.*

Vides, Regum illustrissime, quod maiorum tuorum plurimi ambierunt, nemini tam beato esse licuit vnquam vt obtineret, deditam supplicantemque Rupellam. Hæc illa tot seditionum flabellum, tot tumultuum auctor & parens, quæ pro vicini elementi natura tam assidue turbata fuit, atque agitata; vt ab ipso portu suo tempestates inchoaret, ferocientes animorum fluctus

ad maiestatis tuæ pedes frangit, & allidit. Exciderunt antiquæ illæ vocēs superbię contumacięque plenissimæ, quibus præcedentes Reges, quibus te ipsum ad iustissimam iracundiam prouocauit. Obstupescunt perduelles superari potuisse suam audaciam tua virtute, peruicaciam constantia, perfidiam consilio, urbem fortitudine: vix satis crederent munitiones suas, quas edificauerant æternitati, vnius anni spatio expugnatas esse, nisi te illi parem operi coram intruerentur. Nunc ergo victi, abiecti, sordidati, cuius potentiam debilitare non potuerunt, implorant clementiam. Vide quid hinc agas, quid consilij capias, quid supplicibus respondeas? quod Galliæ, quod Europæ, quod posteritati, quod cælo, vnde victoria, probetur: ne committe, per Deum immortalem, vt cum cæteræ belli partes eximie fuerint, extremus hic actus, tanquam ab inerti poëta neglectus esse videatur. Habes in consilio duas illas actionum tuarum omnium comites, affeclasque virtutes, Pietatem, & Iusticiam: Hæc victos illa supplices, vtraque te tibi repræsentat: debetur perduellibus terror si oderunt, filiis charitas vt diligant: Iusticia metu comprimere, Pietas allicere beneficentia, ex eplo nō hæc minus quàm illa continere desiderat. Fecit victoria de rebellibus supplices, supplicatio de hostibus ciues; tu, licet arma circumstrepant, classicum perfonet, muri tormentis quatiantur, in ipso præliorum conflictu Pater es Patriæ. Quindecim ciuium millia iam tibi iustitiæ rigor eripuit, in quæ nullum ius est pietati: eos etiam qui supersunt incommodis, torminibus, morbis afflixit: reliquam sorori partem ne dene-

get. Quicquid in prostrata corpora decernitur belli metas transilit, usque ad crudelitatem Omnia in rebelles posse integrum supplicium est, quando qui totis viribus hoc egerunt ne quid contra se posses iam supplicare coguntur ne velis. Atque id quod petitur, nemo non potest eripere; donare, Rex solus & victor. Quid in hac virtutum Regiarum controuersia, si eius arbitri essetis constituti, decerneretis, Auditores? Quam in illa tam ancipiti contentione rationem sequeremini? Nam ut verum de me fatear in hac causa aqua mihi hæret; quod enim alteri concedetur, id alteri pareat necesse est. Vtraque ius suum prosequetur? At res in medio relinqui non potest. Neutri seruabitur integrum? at diuidi nequit: nisi fortasse inter pœnam & veniam, inter vitam & mortem esse aliquid medium censeatur.

Regis mira clementia in salute rebellibus danda.

Veniat, opinor, sapientissimi Regis diuina mens, & inter suas ipse virtutes iudicium inclutum iudicet. Liceret vtinam omnes quotquot sunt vbique nationes in hanc aduocare concionem, ut admirabilis grauissimæ litis sententia non Galliæ tantum, sed humani generis auribus exciperetur! Adeste saltem animis qui hic adestis corporibus, & Regem iuuenem, offensum, victorem, aduersus rebelles olim, nunc genua prensantes, abiectos ad pedes, subditos tandem suos pronunciantem audite. Urbem deditis, inquit: Accipio. Bellè Iuratis æternam fidem & submissionem: Audio. Præclare. Quid tum postea? Sed ut rebellasse pœniteat, vobis vitam, fortunas, libertatem redono? Quid est auditores? Qui vos repentinus stupor oppressit? de suo statu

dimoræ sunt cogitationes vestræ? Nescitis Francos Reges ita vincere solitos vt nemo se victum sentiat? Regis optimi mansuetudinem sæpè aliàs non estis admirati? Quid? Clementiæ Regiæ non benè conuenit cum virtutis bellicæ prodigiis? Quid? Naualem ab Anglis Obsidionem à Rupella coronam merebitur, à suo ipse genio Ciuicam non impetrabit? Quanto autem minus est hostes exterminare, quàm ciues seruare? quantò gloriosius mortuos ad vitam reuocare si potuisset, quàm paucos ad mortem damnare, quod inopia, quod fames, quod morbi, quod, si omnia cessent, faciet ætas imbecilla. Felicitatis Syllanæ pars fuit seruata vrbs pulcherrima, etiam interemptis ciuibus: quis inuideat felicem esse omni ex parte Ludouicum? Hæc est vera perpetuæ de perduellibus victoria hostes semel bello, bonitate sine fine superasse Regem ætimate de Deo, qui proximus est: num is salutem dat hominibus dum vitia profliguntur?

Atenim res erat exempli, iustitiæ aliquid donare, non totum clementiæ. Nondum, vt video, regiæ vobis sententiæ perspecta est, & explicata significatio: vos nimia facilitate dissolutam putatis: ego contra clementiæ paululum eius grauitati seueritatiq. aspersum esse contendo. Nam è duobus & viginti hominum millibus qui ineunte obsidione Rupellam incolebant, vix tria superfuisse millia: ex epulis & delitiis ad mures, ad coria; ad ipsa hominum cadauera deuoranda esse compulso: ex vrbe opulentissima munitissimaque, disiectis mœnibus, exhaustis opibus, vastata regione despectum fieri oppidum, indicto

*Eiusdem
in iis pu-
niendis in-
stituta.*

perduellionis crimine si quis vnquā de reiiciendo sermonem inferat : & quod superbis & rebellibus omni morte intolerabilius esse solet , supplicare victori , quantæ acerbitalis essent hæc omnia, nisi lenitate condirentur ? Quid autem illis concessum est , nisi quod quia durum videbant , neutiquam rogauerunt ? Sinuntur viuere qui mortuis inuidebant : iubentur spirantia trahere cadauera vt diutius moriantur : coguntur oculis ipsi suis spectare victorem exercitum intra mœnia, quem si potuissent , hæud sanè paulò libentius quàm ciues suos dentibus lacerassent. At certè solum exilio commutent. Imò verò subsistant in patria, incolant substructiones suas dirutas, habeant in conspectu quotidie quod lugeant, ex cruciet illos antiquæ felicitatis recordatio, & suam ipsi miseriam circumspeciant. Perniciosa saltem falsæ credulitatis libertas ab eorum animis euellatur. Primùm, illud humani non est imperij. Deinde non video quod funestius supplicium in sceleratos Deus ipse constituat, quàm vt maleficiorum suorum conscientia dedantur. Ad virtutem, honestatem, sanctitatem cogere, clementissimæ necessitatis est : libera peccandi potestas voluntarius est tortor & carnifex. Hæbeant igitur sibi libertatem quæ eos perdidit : videant in vrbs suæ ruinis præmia libertatis, & si satis domiti non sunt, fruantur iterum libertate concessa. Videtis, Audit. quæ in hoc iudicio clementiæ, iustitiæque partes fuerint, atque hanc temperationē à Regis optimi natura profectam. Quam certè non sensisses Rupella, si te fortuna illa cui vota feceras Anglo Regi prodidisset. Te-

stis Gessoriacum nauale, testis Rothomagum & Cadomum, & sexcentæ vrbes aliæ, ne clades nostras commemorando renouem. Incidisti in Regem qui tantum vincere nouit vt parcat, & laborum suorum fructum putat salutem miserorum. Quin illum ad te inuitas? quin portis patentibus excipis? propè est vt experiare quod luscitiosi, qui postquam se diuturnis tenebris mulctauerunt, fenestris tandem apertis solem statim admittunt, & illud noctis supplicium non benigni sideris, sed morbi sui culpa sentiunt irrogatum.

Itaque quod orbi Christiano faustum felixque sit delectæ ab Rege ipso cohortes urbem ingreditur, & perpurgatam vicino eius aduentui præparant. Quacunque incedunt domos, vicique insepulta cadauera, solitudo plateas, triste iustitium tabernas, ferale silentium totam ciuitatem occupauit: ad fores non crebras cadauerosæ facies, ad rariores fenestras vultus ariditate contracti, reptantes in angiportis homulorum larvæ, quas sanè in tenebris tibi nolles occurrere. Iam vides miserrima ciuitas, iam sentis quid in furore tuo atque amentia cõsiliij, quid in externorum perfidia præsidij, quid in coniuratorum impotentia fuerit adiumenti. Tu cum alluentis Oceani referta commodis, beatarum copia circumfluens, plena mercatoribus opulentissimis, ciuibusque fortissimis, muris supra omnes Europæ vrbes ad miraculum munita rebellionis principatum admisisti, non sperabas fore aliquando ciuium tuorum sepulchrum; non præuidebas imminere tibi pro frequentia raritatem, pro abundantia egestatem, pro affectata tyrannide, du-

*Regis in
urbem de-
ditam so-
lennis in-
gressus.*

ram, si Victori Domino placeret, seruitutem. Non sentiebas hos esse rebellionis euentus, neque quorum insaniam superabas, eorum exitus recordabare. Tibi iam hæc imputa, quæ in pace sub Rege felix esse noluisti, cui iustissimo bello captæ reuiniſcere licuit per victorem. Sic igitur exhaustam, desolatam, afflictam suo scelere ciuitatem salutaris Christianissimi Regis ingressus non pristinae tantum incolumitati, sed etiam splendori restituit. O Kal. Nouembres! ô diem illum tibi, Rex Maxime, tuæque Gallia glorioſum! quo die victor exercitus acie per te disposita, signis explicatis, tubis tympanisque concrepantibus, te medium auro, armisque radiantem complexus, in subactam urbem poenè dicam humeris intulit; cum tibi ad portam subsistenti illusterrimus verè Cardinalis Richelæus urbis clauus obtulit; cum ad pedes tuos iterum ac tertio se Rupella demisit, & illud suum quod tanta difficultate perdidicerat, Viuat Rex qui nobis peregit, humiliter succlamauit. Qui tum plausus! quæ acclamationes! quæ festiua vndique victri-cium tormentorum tonitrua! urbs castris regiis, agger classi dat signum ad lætitiā, & dum loci illi distantes certatim gaudij significationem explodunt, admirabilem laudum regiarum concentum efficiunt. Ipsa etiam Rupellani semimortuam v oculam ex imis pulmonibus reuocant, & manante lacrymula, ô bonum Regem! tenui aspiratione susurrant, ita leniter vt soli audiri mereantur.

*Cardinalis
Richelæi
verbis cla-
ues Regi
offerentis
oratio.*

Et quoniam quo sunt ampliores victoriæ, eo maioribus auxiliis comparantur; illarum autem

gloria sic est Imperatoris tota, vt absque diminutione in alios deriuari possit : si te hoc loco compellauero Cardinalis Richelæ, nihil committam à dignitate regia, vt opinor, alienum. Nam vt olim Palladis clypeo ita Phidiæ nomen erat insertum vt eo saluo non posset euelli : sic in optimam partem nobilissimæ post homines natos victoriæ, maximæ quæ post fundatum Imperium Gallicum amplitudinis vocante ipso Rege venisti. Scimus enim quo te ille vultu aspexerit cum tua potissimum operat triumpharet : qua consiliorum factorumque tuorum fiducia ad Urbis portas illi occurreris : quibus verbis claues quastradidisti subsecutus sis. En tibi, inquebas, Rex inuictissime, Rupellæ claues à me diu iam ante promissas. Quid ais Purpuratorum illustrissime? Rupellam tu Regi diu ante promiseras? cum terra marique munitissima, cumulata diuitiis, ruta fœderatis, de Regum clementia, de bonorum gemitu, de Catholicæ fidei reliquiis intolerabili superbia triumpharet, eam Regi promittebas? Tantum fore putabas aut in Rege felicitatis, aut in Ducibus animi, aut in militibus audaciæ, aut in Gallia vitium aut in te consilij vt sperares vel posse tentari? Ausus es mente complecti desperationem Hæreticorum, ambitionem Anglorum, fœderatorum perfidiam, vires Imperij, artes Hispaniæ, tumultus Italiæ, ipsam elementorum naturam pro vrbe sua sponte inexpugnabili conspirantem : vt hæc quæ singula terrere debuerant, vniuersa inflammarent? quis te in illa rerum perturbatione tanto ante vatem quis diuinum effecit? Florens Galliæ status? at erat exhausta pecu-

niis. Hostium imbecillitas? at nunquam confidentius libertatem, tyrannidemque suam in tuto collocauerant. Sociorum auxilia? at usu iam ante compertum erat vtrum alteri quam nobis salutem nostram deberemus. Rupellam igitur illam quæ tum digito cælum tangebatur, duabus omnino rebus, Regis fortitudine, & ingenio tuo inferiorem videbas cum eam promitteres: Sentiebas nimirum aut cingi obsidione, aut impressione expugnari debere: illic consilia tua, hic exercitus fortitudinem, vtrisque Regem superfuturum, Vallata est. Nihil incurrit quod non præcepisses: nihil mouit, quod non animo composuisses: nullus tentatus est exitus, quem non ante clausisses. Venisti ad Rupellam pulcherrimorum operum certus, castra positurus quæ cum Rege descriperas, aggerem erecturus quem Regi persuaseras, hostem submoturus ut præuideras, urbem traditurus cui promiseras. Atque ne dubium esset domo allata tua consilia, eo loco, inter tonitrua tormētorum, clangores tubarum, sonitus tympanorum, vociferationes militum, professus es nullum tibi diem periisse, quo die artis implicatissimæ librum non perlegeres; in eoque nullam tibi hæcenus salebram occurrisset, quæ lectionis tuæ cursum retardaret. Quis id de homine ullo crederet, nisi diceret? Scripsit quidem in expeditionibus Iulius Cæsar, declamauit Octavius in obsidionibus, noctes totas pœnæ in ipso procinctu Brutus legendo traduxit. Sed ea quæ interdum feceris in commentarios referre, scribere est non ineruditi: inanes autem sententias aptis verbis enunciare, diligentis est scho-

*Dionysij
Petanij
opus de
Doctrina
temporum.*

lastici: Philosophum denique de rebus pulcherrimis differentem audire non facilius esse quam iucundius nemo non videt. Sed rem otiosissimi studij, contentionis infinitæ, obscuritatibus impeditam, computationibus molestant, disputationibus subtilem, non artem, sed ingeniorum equuleum, non præcepta, sed studiorum scopulum, non regulas, sed temporis voraginem, in illa negotiorum mole, præsentibus periculis, futurorum sollicitudine, importunitate hostium assidue atque expedite commentari, diuini cuiusdam ingenij est, & hominis de sua virtute securi. Profecto si tu tam obscura ante Rupellam cepisti, capiendam opera tua Rupellam vaticinari potuisti.

Quod si hostis externus æquè aut in peruidendo sagax, aut in aggrediendo strenuus, aut in diuinando felix, atque acutus ille & acer nostri Regis oculus extitisset: nunquam certè rebellium societatem se induisset, vnde sine summo dedecore & ignominia non potuit emergere. Nam illo tempore ad communem Gallorum, piorumque omnium exultationem, quasi iustum corollarium accessit Anglorum desperatio, qui non ante senserunt se ab iis quos reliquerant, derelictos. Quam diuersæ discrepantesque ab ea classe voces prodierunt, vt non se dedidisse Rupella, sed Angliam perdidisse videretur. Erat autem gloriosa illa classis tanto apud nos contemptui, vt nisi præsentiam suam tumultu & vociferatione declarasset, nemo tum illam esse triumpho nostri ferculum aduertisset. Et paucas tum quidem naues aut à nostris depressas, aut à se incensas amiserant: sed ingentem aliquam cladem,

*Classis
Anglicana
triumphi
regij spe-
ctatrix in
reditu nau-
fragium
passa.*

& dignum perfidia sua supplicium aliqua velut prælagitione sentiebant. Habet quippe commercium cum fluctibus procellisque Ludouicus, & prælibatam à se classem ventis tradidit tempestatique debellandam. Redeat igitur in Angliam cum libuerit officium suum tam generose perfuncta: sciat tamen se Aremoriceis cautibus debere naufragium.

*Regis erga
Deum pie-
tas admi-
rabilis.*

Hac ergo pompa victor religiosissimus in sacrum templum deducitur lauream in Dei Opt. Maximi gremio depositurus; cui tantam victoriam intimo pietatis sensu gratulari non contentus, dat vrbi diem solenni supplicatione lustranda. Is autem vbi ordinibus omnibus, ipsique ciuitati latissimus illuxit per vndantes aulæ vicos, inter dispositas militum cohortes procedit auro gemmisque resplendens pompa, & Imperatorem suum in Hostia triumphantem aperto capite, demisso in terram vultu, candida ad manum facula sequitur Ludouicus. Si nos, Rex Christianissime, in campestri meditatione, & laborum tolerantia qua milites exæquas: si in hac vrbis expugnatione, quæ fortasse alteri contingere poterat: si in clementiæ testificatione qua cæteris quidem excellis, sed ea Regibus Francis omnibus communis est, latuisses: in hac tamen te supplicatione, in hac pietatis religionisque exhibitione te ipsum deprehendissemus. Agnosco enim tu ille es qui Bencharnenses vrbes ingredi olim recusasti, quia locus in iis sacer nullus erat, qui te de rerum tuarum successu gratias Deo referentem exciperet: qui cum Nauarrinum victor intrares oblatam tibi vmbellam, Augustissimæ quæ

re præcedebat Hostiæ intactam consecrasti. Tu ille es qui à Deo aduersus suos-met hostes virtutem toties postulasti: qui nihil vnquam difficile & arduum inconsulto numine aggressus es: qui perennem felicitatis tuæ cursum vni Deo acceptum referre soles

Quod si vlla vnquam in re vim tibi suam potestatemque inpendit, totam hanc quantacunque est, victoriam miraculorum crebritate sibi vendicent. Tu quidem morbo difficillimo conflictabare cum tibi est iniectum ardens desiderium, & magna spes affulsit vrbs expugnandæ, quod affidentibus magno cum animi sensu referebas: ille tibi Deus Rupellanam expeditionem, quando minimè opportuna hominibus videbatur, quasi sacrum bellum demandabat, qui Diuum olim Ludouicum aduersus Saracenos eodem modo instigauit. Ille coniunctas duorum potentissimorum hostium vires dissipauit: ille Anglum Insulæ Reacensis obsessorem eiecit: ille, hostium tibi consilia patefecit, & paci totius Regni consuluit dum tu in angulo bellum gerebas: ille fluctus Oceani ad nauium tuarum cursum, & aggeris tui momenta temperauit: ille Rebelles longa & horribili fame castigatos ad tuos pedes abiecit. Tot tamque illustribus beneficiis quam gratiam aut habebis aut ages, nisi vt eadem beneficia pro uoces amplius & attrahas? Paria cum Deo non facies nisi maiora semper optando: ab eo enim qui solus donare potest, omnia postulare, est ipsum sibi obligare. Vide quibus te à pueritia gradibus ad hoc gloriæ culmen adduxit. Non es in summo; superest aliquid post Rupellam. Alias

*Non sine
Dei numinis
ne suscepta
hæc &
perfecta
obsidio.*

quære terras quando iam te non capit Oceanus.
Non sunt opus alia miracula vt apud exteras na-
tiones maioribus tuis felicior existas, quam quæ
te illis in regno tuo fecere maiorem. Si vis vti
victoria, si gloriam tuam non defraudas, si Deum
sequeris, Orbis Imperio Rupella prælusit.





PANEGYRICVS

LVDOVICO XIII.

FRANCORVM ET NA

VARRÆ REGI DICTVS.



Ad xv. Kal. Decemb. Anno 1620.

QUOD in locandis vestigalibus Romæ Censores, in conscribendo exercitu Consules obseruarunt, ut à bono nomine rerum gerendarum initia caperent; id quanquam superstitionis habuit plurimum, fuit tamen ad excitandos hominum animos satis idoneum. Cum enim peragendi negotij cupiditas ex futurorum spe pendeat, ad quæ humanæ mentis acies hebescit & retunditur: fit nescio quomodo ut in omnem diuinandi occasionem intenta mortalitas, ad ipsam rerum umbram, futilitatemque; nominum adhærescat. Huic verò coniecturæ fidem fecit nonnullorum curiosa, & diligens obseruatio, quibus

A nominibus indicia futurorum.

*non absir-
de peti pos-
sunt.*

si quid feliciter, aut secus eueniret, quod omeni
vocabuli præ se ferret, id continuò quasi certum
characterem actionibus cæteris adprimebant.
Fuerunt & quibus mediocritatis inimica super-
stitio inesse persuaferit: fatalem nominibus pote-
statem; vt eo se necessitate rapi dicerent, quo syl-
labarum nexus. & fortuita vculæ vnius signifi-
catio inclinaret. Horum insaniam vt omnis sa-
pientum natio semper explofit, ita priorum sent-
entiam, si prudentiæ ciuilibus ponderibus exami-
netur, momentum in vtramque partem non inu-
tile habiturâ putauit. Christiana certè pietas sæ-
pè diuinam in eiusmodi nomenclationibus agno-
uit prouidentiam, vt quod antea nomen inditum
temerè videbatur, id postea diuino planè confi-
lio vsurpatum appareret. Enimuerò si vana est, &
inanis omnis eiusmodi animaduersio, cur ipse re-
rum & hominum molitor Deus Abrahamo, cur
eius nepoti Iacobo, cur Ioanni, cur Petro, & sex-
centis id genus, aut noua nascentibus nomina in-
didit, aut adultis yetera commutauit? Quo mi-
nus laborandum mihi video, vobis vt consilium
meum probetur, Auditores, quod de Regis lau-
dibus hodierno die dicturus, eas ab ipso nomine,
tanquam à capite arcessendas putauerim.

*Diuino cõ-
silio non te-
merè Regi
Christian.
Ludonici
nomen in-
ditum.*

Nolite enim existimare, vt cæteris hominibus,
ita Regum filiis vix in lucem editis, ex vnius arbi-
trio susceptoris, die lustrico nomen imponi Lon-
ga multorum annorum interualla, quæ priuatam
lustralis aquæ insperfectionem, & solennem sacro-
rum rituum accessionem distinguunt, nonne satis
apertè declarant explorari diligenter quid ætas il-
la tenerior spei faciat ad virtutem sui generis imi-

tandam? Quid enim aliud spectari potuit eo die,
 Rex Christianissime, quo die sacro delibutus o-
 leo, cœlo terraq; plaudentibus, dulcissimam illam
 pulcherrimamque Ludouici nomenclationem re-
 uocasti? In susceptoris nomen adoptatus es? At
 is & Paulus fuit Pontifex, & quem vice sacra le-
 gauerat, Franciscus dicebatur. Primum illud vo-
 cabulum in mentem venit; estque tam repente
 prolatum, quàm fortuito cogitatum? At eorum
 rituum veneranda, sanctaque maiestas, & diutur-
 na tot annorum expectatio quibus iam te vlu-
 re, hominemque esse sentiebas, casus atque for-
 tunæ suspicionem omnem amoliuntur Parenti-
 bus gratificari volebat? quibus? ut Henrico patri,
 ut auo Antonio, ut abauo Carolo, quibus (si sic vi-
 sum fuisset superis) mirum quantum exhilaras-
 set non minus nominis, quam sanguinis atque
 virtutum hæres clarissimus. Fuit igitur illa tua
 profectò, Ludouice (Nonum illum verè Ma-
 gnum, verè Ludouicum appello) in Nepotem
 charitas, in patriam olim tuam pietas, in Impe-
 rium Gallicum prouidentia, ut eum tuo potissi-
 mum nomine illustrares, quem tui aliquando si-
 millimum & esse, & facere cupiebas? Qui tum
 plausus hominum fuit, quæ gratulatio, quum in-
 terceptam per octo Reges, annis pendè centum
 appellationem, quasi postliminio in pristinum
 dignitati gradum reuocares? Cucurrit id nomen
 admurmuratione gratissima per ora multitudinis
 infinitæ, quæ ad id spectaculum ex orbe vniuerso
 conuenerat, & prælagiente animo, tua (Regum
 Sanctissime) laudum decora, virtutumque insi-
 gnia tuo illi Nepoti destinabat. Atq; hi clamores

*Francis-
 cus à Ioyo-
 sa postea
 Cardinalis
 Ostiensis
 sacri Col-
 legij De-
 canus.*



nondum, vt opinor, satis deferbuerunt, nec vquam in eorum qui tum præsentes erant, memoria consenescent. Nos autem ad quorum aures leuiorem aliquam lætitiæ significationem rumor ille propagauit, quis vetet, Auditor. eandem voluptatis partem regustare hoc loco, in ipsis Regiæ domus penetralibus, vt confessus hic vester, qui quantus quantus est, Regis beneficium loquitur, in suauissimo Ludouici nomine, Regiisque laudibus acquiescat? Quæ vt penitus vestris in animis memoriaque infideant, conficiendum mihi esse video, Regem Christianissimum hac ætate, his rebus gestis, atque virtutibus omnem granditatem, maiestatemque sui nominis impleuisse. Et verò seu vim illius significationemque perscrutamur, seu ex vetere Annalium memoria replicamus Francorum Principes eo nomine honoratos, vno, altero-ve, nimis dixi, exceptis, vel reliquorum nemo tantum nomen æquauit, vel hic noster superauit.

*Nomina
ex hominū
moribus
imponenda.*

Quo die Reipublicæ gubernacula suscipiebant Imperatores Romani, eos Senatus crebris acclamationibus, magnoque ambitu, in Antoninorum nomen adoptabat: vt præclaro illo nomine & boni principes ad virtutem impellerentur, & mali à flagitiorum dedecore auocarentur. Verum vt illorum pietati suscepta appellatio parum addidit, sic neque de istorum flagitiis, & crudelitate quidquam diminuit: cum eam illi etiam antequam deferretur, hi ne post admissam quidem, mererentur. Est enim honorifica nominatio non causa morum, sed dignitatis argumentum: neque aliud effecit nomen Imperatoris Op-

timi, nisi ut in alteris falsum appareret, quod erat in utrisque alienum. Et hæc quidem appellatio qualiscunque tandem fuit, fragili nixa fundamento, præsentem rerum statum in anxietate, futurum in voto, utrumque in obscurissima rerum ignoratione habebat. Tutiores itaque nominis imponendi viam reppererunt: qui? Poëtæ; quales? dicendum enim uerò est, Comici. Ita enim præcipiunt scribendæ comædiæ magistri, esse Poëtæ illi primum omnium excogitandam simillimam veris fabulam, quæ in priuati alicuius factis, moribusque consistat; tum demum illi homini nomen persimile moribus imponendum. Neque desunt qui in eam classem reiciant Poëtarum Deum Homerum, qui, quem bello Troiano primum occubuisse finxit, Protefilaum; quem de hostibus filij cadauer pretio redemisse, Priamum appellauit. Facturus ne sum quidquam impiè, si te hoc loco, Deus Optime, Maxime, cum hominibus eiusmodi comparauero? Num tu enim magnus Poëta es, ut cum viro sanctissimo loquar, effectus omnis molitorque naturæ? Tuæ uerò menti ut omnia præsentia sunt, & eximium illum anticipatæ cognitionis oculum, per ea quæ nos homines futura vocamus, circumfers, si quem ab omni æternitate designas victurum rato tempore, quem in aliqua statione singulari, tanquam tui exemplar homines intueantur? eius absolutionem, perfectionemque omnem, deinde apto & conuenienti nomine dotes, earumque usum, & finem complecteris. Unus è numerosa Noëmi posteritate proquisus est, qui diuinitus electus præter cæteras

genti daret originem : eum Abrahamum , multorum videlicet patrem , placuit appellare. Executiat seruitutis Ægyptiæ iugum infinita Hebræorum multitudo , & medias Erythræi maris arenas illis numero comparanda , sicco terat vestigio : vnus tot millia in Regionem illam omni copia redundantem introducet , atque is Iosue vocabitur. Regum duorum armis & bellica fortitudine assertum , amplificatumque est Iudaicum imperium ; quis potentiam illam præsidio satis firmo stabiliet , si diuturna pacis , & otij tranquillitas aberit ? Rex ergo pacificus imperet , qui iustitia subditos coercet , hostes auctoritate contineat , externos sapientiæ fama conciliet , omnes diuitiarum magnitudine antecellat , atque is Salomon nuncupetur. Francorum gentem moribus candidam , Religione conspicuam , Ecclesiæ præsidium , Regnorum gemmam , Orbis delicias , multis bellorum procellis & tempestatibus iactatam , impositus derepentè naui gubernator pristinæ restituat tranquillitati , portum faciat ubi libuerit , anchoram iaciat quocunque venerit sit ipse anchora ubicunque fuerit , iustè pieque imperet ; quid multa ? Ludouicus appellatur.

Ludouici nomen virtutum Regiarum significationem continet. Ad hanc tam præclari commemorationem nominis quis sit vester , Auditores , sensus , placere permittitis , ea vos interius perfundi voluptate arbitror , quæ potest esse maxima. Sic enim habete , nihil ad præsentium virtutum , quas in Rege Christianissimo rairamur , com-

mendationem illustrius, nihil ad spem futurorum facinorum certius hoc vno nomine dici & excogitari potuisse. Nam Germani veteres maiores nostri Regiæ magnitudinis formam, quam an mo comprehendam habebant, huius vocabuli compositione complexi sunt; quo & Reges suos ornauerunt: vt non Antoninos ab hominis vnius imitatione; non Augustos ab aliqua maiestatis specie; non Ptolemæos ab vna officij Regij parte; sed à virtute numeris omnibus absoluta Ludouicos nominarent. Est eni in eius nominis (Litauicum Cæsariana tempora; Luduic siue Lodoic, Gothica; Leodeuicum siue Leudeuicum Annales Francici vocarunt) bipertita fictio: nam Leodes, siue Leudi vetere lingua Populos significant, Vvyk autem Refugium, aut Viam: vt collecta significatione Ludouicus Populi Asylum, vel Populi Via nuncupetur. Equidem non lo esse hoc loco syllabarum auctors, & cantor etymologiarum: sed tamen eorum hominum qui magna facere, quàm dicere malebant licet admirari, sapientiam, qui omnes Regij muneris partes tam aptè paucis syllabis colligarunt. Nam cum eius officij cæterarum gentium Reges communi agnomine commonerentur, suum voluerunt ipso prænomine excitari; vt quoties se Regem cogitaret, toties Ludouicum esse meminisset: sentiretque se frustra Ludouicum appellari nomine, nisi Regem officio repræsenteret. Neque verò alias in Rege virtutes, quàm quæ Augusto illo nomine continentur, Deus ipse desiderauit, cum ab omni æuo sic homines

Verum nominis Ludouici etymone est Populi Asylum, aut Populi Via.

gubernari voluit , vt vnus cæteris dignitate antecelleret , penes quem rerum summa eſſet : vt quemadmodum diuina illa mens per hanc mundi aſpectabilis fuſa naturam : ſic iſte propagato in partes omnes prouidentia , potentiaque numine , orbem bonis & neceſſariis legibus temperaret. Hominis autem illius thronum eſſe iuſſit , arcem bonorum , improbitatis ſcopulum , propugnaculum innocentia , inopia perſugium , virtutis ſcholam , iuſtitia adytum , bene beateque viuendi officinam , pacis atque otij fundamentum. Huic inter homines Deo beatam ciuium vitam propoſuit , vt ea opibus firma , copiis locuples , gloria ampla , virtute honeſta ſit : viuat ipſe aliorum commodis , oblitus ſui ; admittat in animum totam Reipublicæ curam , tamque ſe pro ſubditis , quàm ſuprà ſubditos eſſe cognoſcat.

*Ludouicus
populi A-
ſylum.*

Hæc cum de Regibus dico , conuerti me animo , & cogitatione ſentio ad Ludouicum noſtrum , tualque , Rex Chriſtianiſſime , virtutes , quarum prima hac ætate tam illuſtria ponis fundamenta non leuiter adumbrare. Enimverò quid eſt tam Regium , quàm ſubditis fruendam dare iuſtitiam ? Iuſtus eſt Ludouicus. Quid eſt tam Regium quàm ſalutem hominibus dare , benignitate & clementia imperium temperare , Religionem patriam , quam à maioribus noſtris accepimus , colere diligenter , & retinere ? Pius eſt Ludouicus. Quid eſt tam Regium quàm innocentibus aſylum , ægris ſolacium , inopia ſubſidium , virtuti præſidium

præbere? Populi perfugium est Ludouicus. Sic enim cogito totam in Regis nostri sinum effuisse se Rempublicam; cum primum ad eius accessit gubernaculum, & apprehenso clauo maximum ab vniuerso naufragio auertit periculum. Certè post funestissimum illud parricidium cuius meminimus vt excremur, quo desperati hominis præcipiti furore & amentia, Sol de mundo, id est è Gallia, è viuis sublatus est Henricus ille Magnus; meministis, Audit. quæ hominum consternatio, quæ ordinum confusio, quæ rerum perturbatio fuerit: quanti externorum bellorum turbines nauem præcipitantem iam & inclinantem euersuri, qui ciuiliū tumultum vortices hausturi timerentur: dum homines metus suos stupendo magis, quam loquendo nunciarent, inque communi desperatione perire cum omnibus, singulis esset solatium: scitis illo die Regem in Senatu cum salutarent Patres Conscripti Ludouicum, & sequenti, cum in magna Principum, & Procerum corona spectandum se præberet, cum arma de manibus poni edicto iuberet, ne quis publica trepidatione ad priuatam audaciam abuteretur: tantam derepentè pacem, tantam tranquillitatem extitisse, vt non ereptus hominibus Henricus, sed mutatus; neque eo motu labefactata esse Respublica, sed vt staret firmitus, titubasse videretur. Latè per urbem quacunque incederet acclamationes, sublatus ferale iustitium, apertæ officinæ, festi per plateas, vicosque ignes de morte, de luctu, de fortuna triumphabant; remotioribus oppidis prius

gaudij seges, quam doloris materia, antepacata omnia quam timoris causæ nuntiabantur. Atenim fuit hoc Regis, non Ludouici fatum, vt patiens Imperij populus Principem sine discrimine sumeret, tanquam de manu naturæ. Istud cum dicitur, quis non videt nominis nostri dignitatem stabiliri, quodque alius quilibet Franciæ Delphinus perfecisset, hoc istum & potuisse vt Regem facere, & debuisse vt Ludouicum? Deinde traductus est in Germaniam exercitus qui Patris fidem exolueret, qui socios atque amicos Principes manu, consilioque adiuuaret: missi in Lotharingiam Legati, qui dissidentes periculose Fratrum voluntates adpiam, & æternam pacificationem adducerent; alij qui ardentes pestifero bello Italiæ citerioris prouincias lustrarent, pacem inter Principes redintegrarent, redditisque veteri domino Vercellis bellum penitus profligarent. Quæ res omnium oculos mentesque ita deuinxit, vt Romanus Pontifex ex illa rerum humanarum arce, ex qua veluti specula præclara omnium facinora contemplatur, duo in illa Regis ætacula mirari satis non posset, Beneharensis Ecclesiæ res (vt tunc putabatur) compositas; & captam iure belli urbem, loco opportunam, opibus nobilem hosti ab victore restitutam. Horum vel vnum cogitare, fortis esse animi; aggredi, magni & exaggerati; perficere verò tam paruo labore, perfectæ demum cumulatæque felicitatis. Quis enim credat puero adhuc tantam vim & auctoritatem fuisse, vt fidei & bonorum hostes terrore, vicinos Principes

reuerentia, Imperio subditos contineret? Sentio me impressa vbique terrarum virtutis illius vestigi à consecretantem, euectum longius quam propositi necessitas desideraret: Ex hac tamen peregrinatione domum illud saltem referemus, non vnus Francorum populi, sed præcipuarum orbis vniuersi gentium, atque nationum in Ludouico perfugium reperiri. Prætermitto audita sæpè subditorum vota, vestigalia attritis Prouinciis aut imminuta parte maxima, aut penitus condonata: pacem toto regno priuatis incommodis, bono p'iblico sæpe confirmatam; & sexcenta vobis non ignota, quæ Regi cuiuslibet Asyli popularis nomen mereantur, stabiliant Ludouico. Venio iam ad alteram regalis huius vocabuli potestatem, qua ex Ludouici nomine datam diuinitus populo viam auguramur.

Magnam (Auditores) virtutis necessitatem Regibus Deus imposuit, quibus solis esse malis in ipso cordis recessu non licet; nedum in aperto palatij. Dicta omnia, factaque Principum rumor excipit: cumque paruam habere non possint famam, eniti debent atque contendere, bonam vt habeant. Sic animo comparati nescio quibus vinculis subditorum animos ad imitationem sui rapiunt, & eos rectè facere docet, iubentque, faciendo. Quid enim est Regis vita nisi censura? quid vox nisi viua lex? quid actiones nisi præcepta? quid exempla nisi Imperia? Cum hæc agigaret Ludouicus, simulque statueret omnibus imperaturum, meliorem esse debere omnibus; quod ad terrenæ dignitatis apicem eueheretur, fortunæ esse non virtu-

*Ludonicus
populi via
& exem-
plum.*

ris, casus non iudicij, felicitatis non bonitatis: eam ipse sibi legem dixit, ut cum in summa potestate licere videret omnia, libere tantum vellet optima. Itaque gentis lege ortus ipsius meruit imperium, sed legi virtus addidit suffragium: illa fecit ut oporteret, hæc ut deceret imperare Ludouicum. Quanta priuatam vitam agat innocentia, testes sunt diurna pietatis officia, quibus sibi numen tanta Religione demeretur, ut eum non in summa fortuna natum, non in aulica educatum licentia diceret, sed inter mediæ sortis homines, sub coactoris alicuius adoleuisse disciplina. Vetus est in Rege optimo non tardari somno, non detineri negotiis, non auocari venationis voluptate, ab incruento altaris sacrificio quotidie frequentando: nemo miratur festis diebus concionum, aliarumque precum celebrata solennia: vsitatum est post solis occasum ponere cum conscientia rationes, & de singulis factis, dictisque in iudicium venire. Quid dicam de crebra, & plusquam menstrua peccatorum, quæ in hac naturæ fragilitate obrepere necesse est, expiatione? cuius sacramenti usu professus aliquando est, sancteque audientibus Purpuratis pluribus confirmauit, se non iuari modo, verum etiam magnopere delectari. Eant nunc extortæ pietatis homines, quos scelerum conscientia annuæ eorum confessioni tanquam catastæ & eculeo admouet; qui sic agunt ut nolint, sic loquuntur ut contemnant, sic sentiunt ut non audeant aperire medico vulnera, & salutarem curantis seueritatem experiri.

Timeant iudicem i), quorum ab oculis libido, facinus à manibus, flagitium à toto corpore nunquam abfuit : ad æquitatis tribunal, sanctitatis recuperationem, messëm gratiæ lætus atque alacer ibit Ludouicus, sistet se Deo vt iudici non seuerò, vt parenti non irato : committeret vnus hominis auribus, quæ omnium oculis explicare non erubescat. Iam quanta inter Regiæ mensæ delicias victus temperantia, quanta in ipso adolescentiæ feruore continentia, quæ rerum omnium præterquam honestissimi laboris moderatio ? Quis ab eo toleratus vnquam est alienæ laudis inimicus obtrectator ? Quis dulce adulationis venenum in eius aures securus infudit ? In quos seuerius iracundiam virtutis suæ cotem distinxit, quam si quibus prætextatum aliquid temerè excidisset ? Hoc est, Audit. viam populo ad virtutem facere, hoc est blandè ad honestatem cogere, hoc est pietatē volētibus imperare. Nam vt flexibiles sunt animi nostri quæcunque in partem ducimur à Principe, dominique moribus viuit familia, scitum est illa Regis consuetudine, magnum aulicæ licentiæ frenū iniici, vt malos aut esse, aut parere sub bono Principe pudeat. Testes frequentia iubilæa, quæ Parisiis, quæ Rothomagi, quæ Fôte Ebaldi tâta religione celebravit Curia, vt ciuibus spectaculo, exteris miraculo esset, omnibus ardētes ad pietatē faces admoueret. Regis exemplo pedites destinata precibus templa frequentabant Principes, & venustula illa palatinorum trosculorum turma; Matronæ opulentæ, optimates, quæ ante illud tempus vsum pedum amiserant, atque ipsæ Regis Sorores, puellæ te-

nerrimæ, lutulentas pede intrepido vias calcabāt, cum quas ante sordes, execrabantur, imitandi Regis ardor faceret pretiosas. Quis hoc alius lege, pœnaque extorfisset? Quis rem si ab vno fieret difficillimam, fieri ab omnibus impetrasset, qui prior ipse non fecisset?

*Eorum
Gallie Re-
gum qui
Ludouici
nuncupati
sunt virtu-
tes Ludo-
uicus no-
ster repræ-
sentat.*

Atenim populi a ylum, & viam vt nomine, sic officio, vita, moribus exæquat Ludouicus; an etiam gentilium maiorum virtutes in quorum sceptrum & nomen hæres fortasse non dignissimus allectus est? Alexandro militi dicebat olim Magnus Imperator, Eia, commilito, Alexander es, caue quicquam timidè gesseris aut ignauè. Quam sæpè illud sibi dixisse Ludouicum putatis (Auditores) seu cum in ingenti Luparæ aula dispositas maiorum imagines intuetur, seu res ab eis præclare gestas ex Annalium vetustate erui, sibi-que à sacræ memoriæ magistris enarrari iubet.

*A Iustitia
sibi agno-
mene elegit
Ludoui-
cus.*

Quo enim spectat diuina illa vox cum sub ipsis regni auspiciis quæ fuit ex hominibus sapientissimis, quibus censeretur cognominibus, qui olim Reges sub Ludouici nomine floruisent? Vbi accepit Transinarinos à loco, Hutinos à moribus, Crassos à corpore, Desides à vita, Pios à clementia, Leones à fortitudine nuncupati: Est ne inquit, quem pacis bellique facinora Iustum appellarint? Minimè omnium; licet enim sanctitate Nonus, sapientia Vndecimus, patriæ charitate Duodecimus illustres fuerint, quod assequi sine iustitia non potuerunt, nemo tamen vnus in illa domina, atque Regina virtutum peculiare studium collocauit. Quod ergo mihi, subiunxit Ludouicus, Regnoque benè vertat, Iustus & esse

volo, & appellari. Magnifica vero vox, & excelso animo digna, qua humanæ coniunctionis vinculum, officij Regij finem vnicum, virtutum omnium summam vno complexus desiderio, in eo culmine puer adhuc, & iam tum aliquid sapere incipiens fixit vestigium quo maturæ ætatis homines vix tandem gradatim perueniant.

Videor mihi videre sedentem ad maiorum imagines Ludouicum, & singulorum acta, titulosque curiosè perlegentem, hæc secum diuina illa mente cogitare. Natus es, Ludouice, quo istorum optimi euaserunt: illi Regnum è paruo facere magnum, tu à Regno magnitudinem accepisti: dederunt illi periculis & laboribus, quod tu conseruares. Habet & ars regendi gloriam suâ. Fortes illi fuerunt; tu esto iustus: facile nomē, quod miror nullū aut meruisse, aut accepisse: quis autem è subditis non dedisset si meruissent? Quæcunque sparsa per hanc Regum tabulā virtutum insignia video, diuino isto nomine continentur. Tu quidem Clodouæ Merouingiorum stemma Ludouici nomine illustrasti, tu Remis inaugu-ratus es, tu liliatum scutum prætulisti, tu si dei perduelles magno animo domuisti: illis rebus ego meas video respondere, nisi quod diutius ab gratia diuina extorris mancipium dæmonis perstitisti: ego non terreni prius quam cœlestis Regni hæres destinatus, in adoptionem filiorum Dei sum vocatus. Quis ille autem in secunda Carlouingiorum stirpe obesus, semisonnus, cultu muliebri? Quis, malum! isti Ludouici nomen indidit? quid pugnantia aut loquitur, aut viuic? Ludouicus qui sit, deses esse potest? ô labem nominis! ô Regni dedecus! tu illa tua in-

Ad maiorum nimirum imitationem se vehementius incitat.

dignitate cæterorum coloribus umbram præstisti, ut eminent. Quam turpe omnium utilitati natum regię parietibus includi; aliorum oculis videre subditos, quos ad fruendas voluptates tuas menditate oneraris, alienis auribus cœli terręque de te querelas exaudire? An si tu bubulcus, aut militaris lixa natus esses, hac apud posteros infamia laborares? Quid hic tibi animi Ludouice? In hunc excandescis? eum liberè non tu solus, sed & subditorum quilibet conuicio verberat: Quid agis? Libera est posteritas, quod est, sentit, quod vult, loquitur: illi labora, viue æternitati. Apage mihi verba ista byssina quę blandiloquentia suffocant; ite vos tinea, soricesque palatij, titillando proditis: siquidem meę fortunę alij, ego amicus animo meo fuero. Nihil sapit cui nemo verum fateri audet; stultus est qui neque ipse sibi. Famę, Ludouice, seruias oportet, & consequenti seculorum memorię. Latere non magis tibi, quam Soli contingit: tua dicta, factaque auriti vocalesque reddunt parietes: numeris omnibus absoluta sint oportet, quę ab omnibus probari debeant. Excitent te ad summum decus, tum maiores ceteri, tum superfusa omnibus tria illa lilia, insigne regiarum virtutum symbolum: Fidem excole laudatarum actionum fundamentum: adde Sapientiam rerum omnium moderatricem: muniantur hæc duo Militari gloria; quid multa? Deum, animum, nomen sequere: Ludouicum te iustum & sentiant homines & prædicent. Hęc & similia cum solus in conclauis meditatur Ludouicus, seque ad regnandū exercet, num vobis obuersatur ob oculos, animosque architectus aliquis,

aliquis qui splendidissimā exstructurus non Regi
cupiam, sed ipsi felicitati basilicam, nobiles or-
be toto regias explorat, ut constantem vnam, &
absolutam perfectionem ex aliarum quasi adum-
bratione constituat? Inspiciamus si placet, Aud.
quantæ substructionis fundamenta iecerit, quam
altè extulerit, quibus è Regiis præcipuas sibi par-
tes descripserit.

Scio equidem, Audit. nihil non lentè, non pa-
rum gratè sine comparatione laudari: sed illi mi-
hi malo publico, & virtutis damno facere viden-
tur. qui principum laudationes suis se partibus
absoluisse autumant, si eos collatione cum malis
facta dissimiles ostenderint. Atque ille ipse vir-
tutis, iustitiæque princeps Traianus incompara-
bili illo Panegyrico sic laudatus est, ut sola pessi-
morum comparatione optimus videatur. Ergo-
ne Regum felicitas est malus antecessor? aut in
summo honorum apice constituti satis sunt boni,
si absunt à pessimis? Panegyricum instituis: cui?
Principi: quo agente? utilitate publica: quo fi-
ne? ut bonus quæ facit, malus quæ debet facere
cognoscat. Eos igitur ad quorum exemplum ipsi
se forment, profer in medium: prætermitte si-
lentio quæ alter commemorata non amet, alter
etiam execretur. Quare iure mihi imprimis læ-
tandum esse video, quod hoc loco, hac laudatio-
nis forma, solos bonorum optimos cogar produ-
cere. Cum enim constet in nobilissima Regum
Francorum serie, quibus diuinum Ludouici no-
men contigit, eos & numero, & rebus gestis an-
tecellere; paucos de illis, quanquam omnium
virtutes complexus est, nullo ordine seligam, ut

*Cum opti-
mis Fran-
corum
Principi-
bus com-
parandus
est Rex
optimus.*

& mihi definendi libertas sit aliqua, & vobis nullaneceffitas audiendi.

*Ludouicus
Magno
Patri si-
millimus
filius.*

Mihi sanè (Auditores) Ludouici Oâtaui elo-
gium præter cætera semper arrisit, quo patris
optimi filius, optimi filij pater fuisse dictus est.
Is enim patrem habuit Philippum Augustum,
quem Adeodatum sua sæcula vocitarunt; filium
vero Ludouicum Nonum, quem virtus, religio,
pietas consecrauit. Hoc præconio quid Regi fe-
licius, quid populo dici potest optabilius: à patre
virtutis exemplum habebat; in filio stabilitatem
Imperij; uederat ille ut priuatim bonus; facie-
bat hic, ut etiâ subditis esset commodus: pul-
cherrimam virtutis, felicitatisque hæreditatem à
patre acceperat, quam filio integram reseruauit.
Potuit-ne hinc atque inde suos spectare bonos,
non ipse optimus? Vellem Deus immortalis
fecisset, ut idem de te, Ludouice, prædicare
possemus! utinam paruulus aula luderet Ludo-
uicus, qui te tantum ore referret! pangeres
sceptrum Gallicum firmiore illa columna, Li-
lium Francicum bulbo singulari adaugeres.
Ætas non postulat, inquires: Certè; sed subdi-
torum, sed amantium, sed cupidè appeten-
tium votis nihil est præmaturum. Alterum au-
tem quam tibi liberaliter Deus contulerit non
dico, ne Solem ipsum facibus videat adiuuare.
Alexandro Philippus pater non satisfacit: ita-
que Iouem ipsum in illud nomen adsciuit di-
gnissimus Ammonis cornibus filius Philippum
Augustum patrem Ludouicus Oâtauius non
æquauit: itaque filium sustulit, qui superaret.
Tu autem, & Henrico verè Magno beatissimus

es, & Henricus qui non nisi ingentia vt facere, sic amare potuit, in vultu tuo, atque moribus acquieuit. Itaque non est quod aut eumentum supponas patrem tibi æqualem, aut vilius filij humeris incumbas, quibus altius subueharè. Nam si verè dixit ille, (atque vtinam verè non dixisset!) tam exiguum esse bonorum Principum numerum, vt in annulo vno possint describi: eius certè annuli gemmam (absit verbo inuidia) faciet Magnus Henricus, quem militari gloria veterum paucissimi superarunt, Clementia, Fide, Religione, Regiis virtutibus nullus æquauit. Huic autem eius filio quis neget acceptam referri oportere præclarorum quæ ipse inchoauerat operum perfectionem? Exeunte pueritia miles fuit Henricus; Ludouicus etiam Imperator: per vniuersam Galliam bella circumtulit Henricus; pacem, salutem, felicitatem Ludouicus: ille multa oppida vi ferroque expugnauit; huic ad abruptos pontes, ad vrbes munitissimas, ad arces inexpugnabiles venisse, vicisse fuit: ille Orbem terrarum nominis sui, armorumque terrore compleuit; decem ante huius ortum diebus, terra multis Europæ locis tremuisse dicitur, quasi præsentiret Galliam sibi dominum parturire, qui decimo regni anno formidabilem se hostibus reddere inciperet. Ille diram singularem certaminum carnificinam, & ingens illud duellorum incendium, quod opinione gloriolæ quasi flabello ventilatum nobilissimam regni partem fœda depopulatione vastabat, edicto repressit; hic eodem maiore in suos charitate renouato sæpius, & oppor-

tuna seueritate atque constanti stabilito, paucorum ruina, omnium metu sustulit, suffocauit, extinxit. Ille hæreticos, quorum furiosa Religio, sanguine & cædibus; audacia, bellorum licentia; opes, rapinis & sacrilegiis creuerant, tolerandos putauit; hic odit quibus nihil debet; contemnit qui nocere non possunt; lacessit quos perdomat: quique armatis ante precibus nihil non posse videbantur, Regesque ducebant non suæ libertatis dominos, sed voluntatem administratos, nunc victi supplicesque caput fortunasque suas redimere coguntur. Ergo deuotæ iam illæ publicæ tranquillitati victimæ à Rege Optimo seruantur, vt clementiæ exemplum, vt gloriæ seges, vt perennis materia triumphorum. O non degenerem sanguinem! ô sanæ radices vegetum surculum! ô maiorem fonte suo fluuium! ô filium parente optimo meliorem!

*Ludouici
robur &
habilitas
in exercitiis
militariis.*

Has vero virtutum infulas quibus tandem artibus meruerit Rex Christianissimus, si quis à me quærat, duas potissimum recensebo, fortitudinem, & sapientiam; quarum alteram à Ludouico Caroli Calui fratre: alteram ab eiusdem filio Ludouico altero hausit, & expressit. Sic enim referunt historiæ Ludouicum Secundum Lotharii filium, comptos & delicatos milites execrari solitum, vt qui armis potius & laboribus, quam deliciis, & choreis delectaretur. Deus Immortalis quam breui penicilli ductu totum Regem expressimus! Quid enim aliud est Ludouicus, quam voluptatum odor, somni parcissimus, laboris tolerantissimus, hostis otij? quis illum vnquam in quiete vidit? quis in lecto matutina sa-

lutatione occupauit noctes solidas dormientem? Iter aut negotium confecturo solenne est punctum temporis quo sit illud aggressurus designare: quis non diu ante horam paratum conspexit sordescere excitare, instare pigritantibus, expeditis præstolari? Quid dicam de admiranda laboris tolerantia, cum ipso meridiani solis æstu vibrante, apertas camporum planities non pedibus magis quam cursibus peragrat, custodiæ suæ paucos qui subsequi possunt non ducit, sed rapit, turbinisque in morem ubi fuerit, qua transierit, quatenus progressurus sit explicari non valet: Quis è tota aulicorum cohorte feruentes arenas, ô hiulca siti arua rapientem comitari potest? quis attingere? quis non longo subsequi interuallo? Pulchrum est generoso puluere sordere venantem, & neglectæ vestis lacinias per senticeti asperitates trahere, fossas transcendere, siti confectum anhelare. Atque hæc ipsa venatio quam laboriosa quies est, quam idoneum iusti præli simulachrum, quam negotiosa species otiandi. Itur in inuia humanis lustra vestigiis, obsepti dumis horrentibus aditus perrumpuntur, pendentia rupium, montiumque iuga superantur, excutuntur cubilibus feræ natura immanes, passi sanguine, periculo quod præsens sentiunt furi-bundæ. Hîc quod Persarum Regibus mos & lex id Ludouico dedit habilitas atque industria, vt primus venationem feriat: prodiisse prædam, latebris ictus admonet, priusque Regis solertis glande transfixit, quam canum sagacitas videri nunciarit. Quod si aucupium est, quam elegeris auiculam in ipso aëre securè volitantem, notato

etiam quod soli vestigium cadendo cruentatura
 fit, assequitur. Placet interim laborum muta-
 tio, ne aut vires violenti, aut salutem periculosi,
 aut sanitatem continui exhauriant. Nunc pro-
 fertur in flumina corporis robur, & magno re-
 morum impetu fragoreque obstantes aquarum
 franguntur vortices; nunc in ipsa regionum ne-
 morum amœnitate castella munitissimas arces
 imitantia extruuntur: primus in opere Ludoui-
 cus terram ligonibus aperit, fundamenta exca-
 uat, fossas prætendit, muros terrestres excitat,
 perfectisque omnibus, ipse propugnantium op-
 pugnantiumque vices partitur, ordines disponit,
 & in simulata illa oppidorum aggreffione dat ar-
 dorem pugnantibus, à quibus accipit discipli-
 nam. Illis nimirum gradibus ad eam rei milita-
 ris peritiam ascendit, quam nuper ingenti cum
 voluptate Flexiensis ager aspexit. Dispositi per
 signa ordines, iam non ludicri, explicatus appa-
 ratus, instructæ legiones: illi cataphracti hastas
 vibrare, hi tormentarios sclopos amittibus incu-
 bantes quasi explodere, hinc decurrere equites,
 illinc imaginaria pugna pedites velitari: Ludo-
 uicus autem vnus tot corporum animus, certè
 inter tot virorum fortissimorum miracula, vni-
 cum spectaculum, flagrante cœlo, emînens in
 equo, cursitare per cuneos; salutare manipulos,
 aciem explorare: modo spectante exercitu equum
 admittere; admissum sustinere, leui & pœnè nul-
 lo freni ductu gyrare in orbem; quæque sessor pe-
 ritissimus in campestri meditatione ab nobilibus
 discipulis raro exprimat, ea per sese Imperator
 adolescens exequi. Quis tibi disciplinam illam

campiductor tradidit Ludouice? An vt Alexander quæ ad regiam dignitatem faciebant sine magistro solus, sic tu quæ ad bellum gerendum, & arma tractanda, à natura tua eiulque ad omnia gloriosa propensione didicisti? An Martios tibi animos infudit parens ille tuus, cum ipso ortus tui puncto tenerum corpusculum amore paterno circumferens, tibi in delicatas manus ensem dabat, vt non prius spirare, quam ferrum tractare non prius viuere, quam ensem stringere inciperes? Quid tum emeritis ducibus, quid veteranis militibus quid ipsis etiam tyronibus animi fuisse putemus cum & Regem viderent, à quo videri beatum erat, eundemque Imperio Ducem, manu, operaque commilitonem spectarent? Quam sæpè his se vocibus ad periculorum contemptio- nem incitarunt; quid moramur? quid hanc Regis alacritatem perdimus? classicum est, canit commissionem, eamus pugnemus: Rex est qui virtutem & nouit, quam incitat; & amat, quam exercet; & compensat, quam preuenit.

Iam vero quantum à superfluo corporis cultu, & munditia non virili absit Rex noster, nisi qui eum nunquam viderit, ignorat nemo. Impexum illud capillitium, cincinnus in humerum temerè proiectus, squalida sudore & puluere facies, neglecta vestis, gladius è zona decussatim obliquata pendulus, quid aliud indicant, nisi virum esse, fortem, militem, quid plura? Regem Francorum. Equidem sic inter historicos constare video magnis olim ducibus commune illud fuisse, vt communia cum militibus haberent omnia, nihilque eos à cæteris, præter virtutem, & Imperium

*Superfluum
corporis
cultum ne-
gligit.*

discerneret. Laborant Panegyristæ veteres, qui narrare nihil sciunt, nisi vt in maius extollant, vt credamus simillimam illi ipsi, quam nuper omnes oculis nostris in Rege spectauimus, formam & habitum fuisse Constantini, cum is adhuc adulescens Cæsaris titulo Rempub. in Gallis administraret. Aliam vobis vt cuique collibitum fuit imaginem efformastis; mihi certè persuadere non possum dissimilem admodum fuisse Alexandrum, quando Philippo patre mortuo, Græciam vniuersam non passibus, sed victoriis peragrabat. Quam lepidum erat sciri ab omnibus Regem in hoc suo Collegio esse: quis, aut vbi esset à plerisque ignorari? quam multi in auras temerè salutationes, gratulationes, acclamationes iaciebant, in Regem vbicunque esset, casuras: dum alter in interiora septa volentem ingredi, turbæ metu, obiecta ianua prohiberet: alter à socio cui Rex innitebatur, & penè ab ipso Rege quæreret, vbi Rex? Nimirum scenicos Reges videre soliti pueri, plaudamentum purpureū, coronam gemmatam, sceptrum aureum, basilicum incessum, cothurnata imperia sesquipedalia verba requirebant, Regem iis rebus æstimantes, quas si semel in scena gestarint, beatuli videantur.

*Ludouici
prudentia.*

Sed quoniam plura in Reipub. administratio-
ne consiliis, quam omni isto militari apparatu
geruntur, sano Ludouici Tertij consilio vltus est,
qui, vt accepimus, sopitis ineunte Regno discor-
diis, sapientibus regendum se commisit. Supera-
uit etiam parte non minima noster Ludouicus,
qui in illis componendis, non suo impetu, sed
alieno ductu; non ex arbitrij sui cupiditate, sed

aliorum maturitate versatus est. Enimvero licet Princeps diuinæ sit particeps potestatis, & æqualiter in gerendis rebus fusa esse debeat prudentia; quemadmodum Deo nihil est aut longinquitate obscurum, aut obscuritate incertum, aut incertitudine difficile: habet tamen limites suos quibus definiatur humana mens, nec eo perducit prouidentiam, quò spem proiicit. Quare adminiculis alieni consilij nitendum est, & querendi Consiliarij sapientiæ antistites, mundi lumina, ingens boni imperij instrumentum. Eos ergo delegit Ludouicus, quos verè delibatum prudentiæ florem possis dicere, quos veterum exemplis doctrina instruxit, documentis suis, sæpè & nocumentis vsus erudiit, senectus feruore animi temperato notandis, quam nouandis rebus fecit aptiores. Has Consilium medullas, sapientiæ corcula, cum humeris patriam sustentare inciperet, priuatim sic affatus dicitur Ludouicus. Fideles vos mihi date factorum duces: ego me strenuum, constantemque consiliorum vestrorum profiteor administrum. Audieras, Ludouice magna negotia magnis auctoribus egere? An per te vnius hominis mentem tantæ molis esse imparem prospexeras? Didiceras ex litteris, quas prima ætate, quantum Regi sat est, delibasti, sapientem principem fieri sapientum commercio, securum præsidio, iustum consilio. An illud naturalis tibi iudicij bonitas suggerebat? Ex vsu fortasse procedit illa tua in eximia rerum omnium felicitate moderatio, qua imperandi gloriam, ipsa velut obsequendi potestate temperas: neque successus vllos bonos existimas nisi

*Egregia
Ludouici
vox ad
suos consi-
liarios.*

quorum semina & initia à viris consultissimis ac-
cepisti. Quantum autem propè sis vt ipse tibi
consultere noueris, vel hinc apparet, quod è di-
uersis sententiis quæ in illo sapientiæ ciuilis ady-
to à pluribus proponuntur, earum optimam tua-
pte sponte deligis, quam sequare. Itaque disces-
sione opus non est, sed ea pars quæ tuo proba-
tur assensu, maior est: eandemque consiliorum
euentus solet facere meliorem. Quid hîc potissi-
mum miremur, Audit. quo nomine virtutes istas
nuncupemus? in Regia potestate ab alieno pen-
dere arbitrio; vtilis administrandæ Reipublicæ
vias primum peruidere, postremum eloqui: lau-
de sapientiæ subditis velle cedere: audire patien-
ter quod probari non possit, probare prudenter
quod solum audiri debuerat: ius illud delicatum
Regiæ vocis in Regni specula exuere, & id tan-
tum aliis imperare quod aliundè sibi persuaferit
imperandum? Quàm longè ab Augusti superba
ostentatione discedit Rex modestissimus, qui vt
se iuuenes senem audirent postulabat, quem iu-
uenem senes audiissent Egregiam verò iuuentu-
tem! in qua ab ira, ab impetu, ab ambitione confi-
lium sumpserat, quod maturæ ætatis homines
sæuis adulationibus probare cogeabantur, non vt
veri copiam facerent, sed vt impotentis pueri eu-
piditati velificarentur. Præclaram adolescentiam!
qua duodeuicesimum vix egressus annum, iam
pugiones in sinu amicorum absconderat, insidiis
M. Antonij Consulis latus perierat, proscription-
nis edictum inter cœnam dictauerat, Perusi-
nas aras hominum innocentissimorum sanguine
cruentarat. Tam fuit vecors & amens Octavius,

vt sine execratione ad tempus illud oculos retorqueret? vt non miraretur viuere se, qui simplici & incauta ætatula, consiliarios audiisset tam malos, tamque præcipientes?

His atque talibus rectè factis quam sibi apud *Ludouicæ* exteros famam, apud malos terrorem, apud *in Regum,* bonæ existimationem confecerit, nemo est qui *& subditos* non sentiat. Videamus modò quantum sibi sub- *charitas.* ditorum omnium amorem conciliarit? Quid? Ludouicus Primus, Pius, Duodecimus, Patet populi ob mitioris animi dotes vocati sunt; eam illis Ludouicus bonitatem & appellationem non inuidébit? Enimuerò quæ res cum potius ad Reipublicæ administrationem impulit, quàm summa rerum perturbatio; & impendens in omnes horas Regno periculum? Prius quidem Patris magisterio ad artem illam artium informari cupiisset: & si res sortis fuisset, non naturæ, arbitrij, non originis, emensis omnium ordinum gradibus, ad fastigium istud maiestatis ascendisset. Verùm subita tempestate deprehensa Gallia, in eius se fidem ac clientelam posuit, quem diuinitus sibi nouerat destinatum. Non potuit resistere Ludouicus patriæ parentis optimæ imperio, & inuitus, vt fama fert, iis se fluctibus, in quibus nihil certum est præter incertam salutem, commisit ac tradidit. Quanta deinde cura ac solitudine rem administrarit, quàm opportunè motus omnes compresserit, quàm parum sibi pepercerit vt subditis præsidio esset, quid attinet recensere, cum in conspectu spirans adhuc armati, & laborantis imago versetur? omnium enim nostrum somnos illius vigilia defen-

dit, omnium quietem illius peregrinationes, omnium delicias illius industria. Nimirum ita secum cogitat Rex optimus, ut orbem vniuersum Dei, sic priuatum aliquod regnum, Regis vnius domum esse; dominum, & patrem familias Regem, qui non ut seruis herus, ita subditis imperet, sed tanquam filiis: suum igitur esse singulorum vtilitati consulere, neminem grauius habere, omnes in officio retinere. Regem officij esse nomen, non naturæ: non minus hominem se, quàm hominibus præesse: in suis quoque ceruicibus imminere sempiternum dominum, quem dies noctesque timeat; omnium ad se, suas ad illum rationes deferri oportere. Itaque fabrum esse se fortunæ vniuscuiusque è subditis, Deum autem suæ: se à statu in homines, illum à natura imperium in Reges possidere. Ita demum comparatus animus quem ambitionis cursum non retardet, cui non moderetur felicitati, tanto augustior, quanto modestior? Ex eo sensu, tanquam è perenni & liquido fonte, manauit illa comitas atque humanitas singularis, qua submittit ipse se, summumque illud fastigium ad omnia priuatorum colloquia inclinat: sibi supplices quoslibet prior agnoscit, hortatur accedere, salutat liberaliter, paucis beneuolentiam, nemini audientiam denegat. Veniat nunc ille Romanorum odium, labes historiæ, monstrum principatus, qui Senatoribus populi Rom. pedem sinistrum osculandum porrigebat: prodeant è Persepolitana Regia dicam, an arcula? Reges illi Regum, qui se vix vnquam dabant in publicum: quos amicorum intimæ admissionis cohors raro sine veli alicuius in-

teriectu, & quasi transfenna conspexit. Existimabant illi fortasse ignotum omne in vulgus esse pro magnifico, & viles fieri Reges qui sint valde ciuiles. Quasi regnare dicendi sint ij qui domus vnus septo, vt cicurandæ, aut saginandæ feræ clauduntur: qui solitudinem nunquam deserunt, nisi vt faciant solitudinem: qui Regum habere personam malunt, quàm faciem. Alia ad auctoritatem grassantur via Francorum Reges, cumque magnitudinis suæ securi sint, amorem ducunt ex humanitate, fiduciam ex amore. Nunquam vilescit filio patris aspectus: quoties Rex paret, aut nouus videtur, aut nouo desiderio: infirma est veneratio quæ terrore acquiritur, atque ipso demum timendi vsu parit vilitatem, syncerus amor assiduitate augetur.

Hæc sæpenumero cogitanti mihi, contigit; *Amore*
 Auditores fingere Regum maximos stateram *melius*
 manibus tenere: & in altera quidem lance Ma- *quàm ma-*
 iestatem, eique coniunctum Timorem; in alte- *iestate im-*
 ra benignitatem, eiusque foetum Amorem im- *peratur,*
 positum: Et si quidem prior illa pars trutinæ supra hominum capita per superbiam, commune illius fortunæ malum, extollatur; iacere humanitatem, perire amorem: sin autem Maiestas eadem ad subditos descendat, & quam habere non potest æqualitatem, affectet; huic quidem non plus perire dignitatis, quàm Soli radios infernè demittenti; Comitatu autem regiæ multum splendoris accedere, & amorem supra subditos eminentem alacriter æquè ac fortiter imperare. Atque vt herbæ quædam ad Solem, sic popularium animi ad Regem, à quo se amari sentiunt, ita com-

uerti solent, ut nulla unquam eos videndi satietas, aut amandi capiat fastidium. Quam raro, quam non nisi exigentibus grauissimis Regni negotiis ex vrbe Regia discedit Ludouicus? At ecce vix extra illam pedem posuit, cum hortatur, poscit, flagitat reditum: eius absentia difficilem sibi vitam, inane nomen, perniciosam amplitudinem conqueritur. Illæ autem vrbes quas ingressu fortunare non dedignatur, quanta parentem publicum magnificentia, quanta felicitatis suæ auctorem alacritate suscipiunt? Diceres ipsa se effundere oppida, & dimota suis sedibus te cæta hominum inuidere lætitiæ. Condensantur ad vnius aspectum populi, & quem oculis, non ad ciuitatis, sed ad felicitatis ipsius arcem ferre gestiunt, numerosa sui stipitatione ad portas detinent. Vicissim omnes accedere, aspicere propius, certare cum turba: qui præeunt, festinantes, respectantesque eminentias occupare: quos præterit insequi animo, oculis, pedibus: circumfusa ipsa multitudo impulsu vario fluctuare, satellitium opprimere, queri tam cito accedere palatia, irasci parietibus, quia morem suum eripiant, & portas omnes, areasque, dum redeat, dum per fenestras prospiciat, pertinaci patientia obsidere. Quid est populi patrem, quid Regem esse, si hoc non est? Deus immortalis! potest ne homini quicquam diuinius contingere? aut, si habent fastidiosi illi hominum contemptores vllum sæculum, quod vel cum vno dierum istorum possint comparare?

Ludouicus Adnotasse vos iam dudum opinor, *Auditor noster D.* res, eligere me quæ referam: propositum enim

mihi est Principem laudare, non vitam narrare: *Ludouici*
 quanquam omnia eius acta sunt eiusmodi, ut is *actionum*,
 eum optimè laudasse videatur, qui narrauerit *virtutum-*
 fidelissimè. Quem enim diem perdit? quem lo- *que imita-*
 cum non alicuius virtutis vestigiis consecrat? *tor.*

quod temporis momentum non laudabili signat
 actione? Cresceret tamen in immensum ora-
 tio, si consecrandis singulis aut materiæ beni-
 gnitatem sequerer, aut vestræ in audiendis Re-
 gis laudibus alacritati velificarer, aut officium in
 laudando meum explere cogerer. Itaque mode-
 rabor ipse mihi, & ex immenso illo campo di-
 ctionem in angustum limitem reuocabo; sic ta-
 men ut verbo vno ingentia virtutum decora, &
 quicquid in Rege laudabile potest esse, comple-
 ctar. Ludouicum hunc nostrum dico, Audito-
 res, Digni Ludouici dignum successorem esse, ve-
 rum imitorem. Hoc cum dixi, dixi omnia: ne-
 que per Reges cæteros, vbicunque terrarum,
 quocunque sæculo vixerint sparsa vlla virtus est,
 quam nudum huius imitationis nomen non com-
 prehendat. Nimirum illa cum sanguine descen-
 dit in nepotes, & in heroïcorum filiorum ani-
 mos diuina parentum integritas deriuatur. Hunc
 ergo generis sui auctorem, si virtutibus non re-
 fert Rex Christianissimus, causæ nihil esse dico
 quin tam diuino nomine sis indignus; sin autem
 eius & in vita modestiam, & in Regno vigilan-
 tiam, & in publicis priuatique negotiis sancti-
 tatem, quantum mortali fas est, exprimit; quis
 illum negare possit, iure ut qui ante eum opti-
 mo Ludouicum appellari? Omitto ea quæ casus
 ytrique fecit communia, immaturo parentis obi-

tu tenellis adhuc annis, rudes ad sceptrum manus attulisse; in materno sinu primos vitasse surgentium tempestatum impulsus: ineunte Regno bella domestica feliciter composuisse. Prætermitto etiam leuiora aliqua, quæ certo animi proposito in eius rebus gestis excerpfit, quæ illustriora faceret imitando. Ille egentes atque ægros regia mensa, regia manu pascebat: hic strumis laborantes, ipso etiam aspectu horridos sæpiissimè atque omni alacritate contingendo per sanat. Ille Religionis, atque Ecclesiæ iura fecit ampliora: quid hic ipsis militiæ rudimentis conetur nostris penè oculis intuemur. Ille studia literarum promouit, & Academiæ Parisiensis Fundatorum gloriam vnius Scholæ Sorbonicæ adiectione superauit: hic imperium penè auspicatus est à Collegij Regij fundacione: hic Academiam eandem restituto Societati nostræ gymnasio reddidit auctiorem: quo fructu? malo in cogitatione vestra relinquere, quàm in oratione mea ponere. Ille vt sordes à templis, auaritiam ab hominibus Deo dicatis, ambitionem ab omnium animis remoueret, ne præbendam quidem ædiculæ suæ Regiæ Parisiensis, nisi cognitæ integritatis viris dedit: hic semel apud animum statuit nunquam nisi probis, nisi viris donare Pontificatus, neque ad pueros, aut minus dignos admittendos ullis se precibus, ullius hæctenus gratia permisit adduci. Ille sceleratam blasphemorum audaciam, qui in humanis corporibus linguam imitantur Dæmonum, omni edictorum seueritate compescuit: hic idem edictum renouauit quo die pueritiam in publico Galliæ theatro deposuit,

deposuit, & supremæ pietatis primitias sanctissimæ Parentis illius sui memoriæ consecrauit. In quo quid alia effecerint Tribunalia equidem nescio: vobis certè gratulari possum, Flexienses, quod incensum Regis desiderium opera vestra studioque iuueritis. Contigit enim mihi ante annos aliquot urbem fortè vestram peragranti occurrere lacrymabundum squalido capillitio, sordida veste hominem, qui se recens vinculis exemptum diceret, fortunisque penè omnibus euersum quereretur, quod ore blasphemio cælum violasset. Laudare tunc enim uerò liquit & Regis pietatem, & zelum vestrum, ut qui optimis eius conatibus tam piè, tam religiosè, tam iustè obsecundaretis. O præclaram, inquebam, in Republica consensionem Regis ad imperandum pia sanctaque, Flexiensium Iudicum ad seuerè obsequendum! ô admirabilem æqui bonique societatem, cum alter quasi è specula quæ bonis moribus impendent pericula, præuidet, & admonet; alij quasi virtutis emissarij pestes illas procul à ciuibus suis exterminant. Viderunt-ne aurea sæcula (quæ quoniam esse vellemus, fuisse aliquando fingimus) maiorem Regum aut Tribunalium sanctitatem? Maçti esse his magistratum vestrorum infulis, Flexienses, vosque Regi optimo ad extirpanda subditorum flagitia datè administros, ut in partem solidæ gloriæ veniat.

Sed nimis diu Ludouicum per sancti Regis vestigia prosequor: dumque studiosius singula confector, admiror obuia, penè latent optima, effluunt vniuersa. Itaque quod mollior, & delica-

tè deambulantibus vsu venire solet, vt in pratū perennibus riuulis variè interfectum delati, quorum aquula per limpidos lapillos susurro dulcissimo defluat, hac illecti voluptatis quasi promulside non sibi prius discedendum putent, quàm amœnitatis illius fontem inuestigarint: id nobis hoc loco necessariò faciendum est, Auditores, vt salutaris libatisque aliquot animi Regij virtutibus, cum à quo deducuntur fontem venemur.

*Viriusque
Ludovici
integritas
& vite in
nocentia.*

Scitum illud est, Auditores, atque omnium sermone celebratum, quod Diuo Ludouico adhuc puero crebris adhortationibus repetebat mater sanctissima; malle se, si daretur optio, filium suum, cuius humeris maximum Orbis terrarum Regnum nitebatur quouis mortis genere extinctum videre, quàm is peccati lethalis maculam sponte susciperet. Hoc est quod in Diui Ludovici rebus gestis admiror, hoc est Francorum Rege dignum facinus, quod ad posteritatis memoriam transmittere debuit. Potentissimos alij terrarumque diffundent exercitus, Hellespontum iungent classibus, Asiam totam victoriis, & triumphis peragrabunt; terram quàm cingitur Oceano, quàm distinguitur insulis, quàm vastas aperitur in solitudines, quàm tumet in æqualia nubibus cacumina exercituum suorum multitudine commouebunt: atque hæc cum fecerint gloriæ victiorumque mancipia, cum orbes alios spe, cupiditateque hauserint, in septempedalem compacti arculam, cinis & umbra, & iam nihil apud viuos, nisi nomen fient, apud inferos igni pabulum sempiterno. At Ludouicus cum non segne

otium domitriuerit sed, totum Orientem armorum suorum gloria, terroreque compleuerit; non genium suum seuera fraudauerit abstinencia, sed regia se, suosque tractauerit magnificentia; non solitudinis latebras scrutatus sese hominibus eripuerit, sed in luce Regni florentissimi, in supremi status splendore, in oculis & veneratione hominum vixerit, tamen regno exemptus temporario, regnum aliud loco immensum; gloria cœlestē, duratione perpetuum inchoabit: quo agente? Conseruandæ integritatis vigilantia, quam non alta toto Regno pax eneruauerit, non deportata in vltimas barbaræ superstitionis oras bellā turbauerint; non quotidianæ regij apparatus delicæ suffocarint. Sed hoc rudis fortasse, inquiet aliquis, exemplum tulerit antiquitas; nostra autem decoctæ nequitiae tempora, quasi auem albam videntur hominem non pessimum videre, in omnium scelerum impunitate inaudita, in concessis fraudibus atque periuriis, in habendi cupiditate infinita. Mirum ni nostros etiā mores temporibus imputemus. Quid si rudem illam antiquitatem nostrorum vita prouocat, virtus superat? Quid si in hac sæculorum face auream illam B. Ludouici ætatem in Rege, in eius Nepote, in Ludouico nostro dixerō renouatam? Quis nescit, quis non videt eum à grauiore noxa tam vehementer abhorrere, vt in sua innocentia Regni penē ipsius fortunas omnes collocatas esse existimet? existimet autem, imo sibi persuadeat, vt qui non studiosius Regnum quā diuinam in mente conseruet gratiam: certus à sanitate capitis pendere membrorum omnium sanitatem;

Rem per se incredibilem testibus confirmare possum, quos hulla eleuet inuidia : cui enim potius de Ludouico credamus , quàm ipsi Ludouico ? Aliorum testimonia vel gratia corrumpit , velodium nemo conscientiam suam decepit. Audite, Adoléscentes ingenui, vestræ ornamentum ætatis, exemplum innocentie, normam sanctitatis; & si quidem hæc oratio vestrum aliquibus non displicuit, auribus blandita sit hæctenus; hoc quod dicturus sum altè in animum descendat; moriantur intra aulæ huius parietes quæ dixi cætera, hoc vnum si domum refertis, ne grande mihi operæ meæ precium erit. Atque dum à me commemorabitur, cogitatè de Rege id dici, cuius & ad peccatum proritari potest cupiditas illecebris innumeris, & factorum turpitudine prolixa seruorum adulatione velari: pudeat vos in mediocri fortuna eius virtutem non imitari, cuius in aliis rebus similitudinem nemo vestrum est, qui vitæ periculis benè emi non existimet.

*Continen-
tia Regia
singulare
exemplum.*

Anno abhinc tertio, feria nascenti Christo sacra, cum satis constaret quod Templum obeundis pietatis officiis Rex destinasset, Matrona oris quàm animi melioris, dici celebritate ad exquisitam munditiem abutitur. Non ducam vestros animos per cerussam & calamistros, per mittellas & patagia, per auri, gemmarumque fulgorem, & cætera mundi muliebris, hoc est, blandi domesticique Dæmonis instrumenta: breuiter dicam, Regi se adolescenti venustissima mulier exornat. Tum benè manè in Ædem sacram, ô scelus! ô portentum! progreditur, locum occupat, quèm Rex omni necessitate oculis intue-

ri, transire pedibus cogeatur. Opportuna erant
tend. culæ, si incautum deprehendissent; Adem
ingreditur Ludouicus, oculos acres & argutos
ita in illam partem coniicit: sed quasi laten-
tem in gramine serpentem manu tetigisset, subi-
to resilit. Illa interim emissis oculis Regem lu-
strare, eminere in turba, popellum submouere,
offerre se prætereunti, satis agere vt videretur.
Ibat Rex inter circumfusum satellitium ore mo-
desto, demissis oculis, aliquando etiam aliorum
spectantibus: quid multa? visa feliciter est mu-
lier, ne videretur; & deprehensa discessit, quæ
venerat deceptura. Vix Numen ex altari saluta-
uerat Ludouicus, cum ad astantes conuersus:
Has, inquit, mihi sapius tetenderunt insidias; sed
frustrà sunt; Deum testor, quiduis mihi perire
mallem, quàm animum lethali noxa constringe-
re. O vocem non vnus recti claudendam angu-
stis, sed in concionem mortalium mittendam! ô
dignam vocem cui omnes qui vbicunque sunt
Reges, hominesque subscribant! ô dictum au-
reis litteris æternitati consecrandum! Pereant, in-
quit, humana omnia dum constant cœlestia; mi-
hi vilis terra est diuinam conseruanti gratiam: se-
curum se anguis putat si caput occultauit; quod
est autem viuendi caput nisi bene viuere? mor-
tem prouocauit veterum nescio quis, dum sal-
uus esset clypeus; quis Reges protegit, nisi qui
facit Deus? illum si mihi propitium conseruo,
quis noceat? O animum verè integritatis thro-
num, Regiam innocentiz, adytum sanctitatis! ô
mentem admirabilem in adolescente, stupendam
in Rege. Hic ille fons est, Auditores, omnium

Regis optimi virtutum ; hæc illa regula qua singula vitæ momenta componit. Hic lydius lapis omnium Ludouici actionum certissimus explorator. Eius facta sciant omnes , explicent singuli : derogat virtuti malitia , gloriæ inuidia , fama veritati : ad omnes obrectatorum impetus quasi murus opponetur Conscientia ; quicquid de Ludouico narrabitur , aut bonum est ; aut non est Ludouici.

Felicem te ! non Regno , non opibus , non potestate , sed illis moribus , Rex Christianissime : Felices nostam Pio Iustoque Regi subditos ! tu viam nobis ad virtutem sternis , qui ea mentis exaggeratione ad pietatis Christianæ culmen ascendisti ; tu nostræ felicitatis Asylum es , qui summo bono penitus inhærescis. Cum maiorum tuorum facta cum tuis comparanda delibauerimus , tuque illorum plerosque iis ipsis virtutibus quibus excellebant , superaueris ; hæc tandem summa summarum erit , veram te omnium optimi sanctitatem assecutum ; illam , Ludouice , sanctitatem quæ ipsum cælo dedit , & perenni inter homines memoria consecrauit. Perge quam instituisti viam , Rex Magne , annisque crescentibus , illa religiosissima , illa ad omnem virtutem nata crescat indoles. Purpuræ splendor , opum affluentia , imperij magnitudo , bona sunt , sed fortuita : nemini bonum esse casu obtigit. Perfecta virtus in te non incidet , ne leui quidem opera , aut paruo labore comparabitur : sed est tanti laborare omnia bona semel occupaturo. Felices vos , iterum dicam ac sapius , imperio tuo ! felicem Rempublicam te saluo salui & securi sumus ,

in te nostrum omnium vota consumuntur, te sacram publicæ tranquillitatis anchoram, beatitatis portum, saluum cupimus. Viue diu tibi, nobisque, semper inuictus, semper augustus, semper, quod fecisti hastenus, LVDOVICVS.





PANEGYRICVS
REGI
CHRISTIANISSIMO
DICTVS.

Ad xv. Kal. Decemb. Anno 1621.

*Ecclesia
nutriti Reges & Re-
gina à Deo
constituti
sunt.*



I QUANDO diuinitus instin-
cti Prophetæ futuram in ter-
ris Ecclesiam vaticinatione
ornarunt, eo certè tempore
totam eius gloriam, amplitu-
dinemq; æquasse mihi viden-
tur, cum Reges Reginasque illius nutritios atq;
alumnos fore dixerunt. Nam cum in rebus hu-
manis dignitate Regia nihil excelsius perpetuus
omnium gentium consensus adhuc repererit;
cui domina nature Diuinitas terrestres istos Deos
tutores instituit, eam necesse est caduca omnia
prætergressam nullis humanitatis nostræ regio-
nibus ac terminis contineri. Et verò quid aut ad
Maiestatem præstantius, aut ad venerationem
augustius dici potest ea mentium nostrarum re-

gina, quæ ab omni concretionē mortali sciuncta
æ libera, Patrem, Deum ipsum, Sponsum, æ qua-
lem Genitori filium, Sororem in illis cæli pala-
tius gloriosè regnantem agnoscit, ipsa ad idem
cognitionis domicilium optima sui parte sem-
per aspirans? Itaque non eius modo salutem at-
que incolumitatem, verum etiam omnia Maje-
statis ornamenta piis Regibus commēdari opor-
tuit: ut scirent homines eam paululum à Deo
discessisse, quæ primorum inter mortales curæ
custodiæque commissæ sit. Quod præpotentis
Dei de sua fidelitate, Religioneque iudicium tan-
ti fecerunt, ut par erat, optimi quique Principes,
ut in ea tuenda, amplificanda, exornanda nulli
vnquam operæ, nulli sumptui pepercerint. Na-
tant adhuc, ut ita dicam, ipsa scriptorum monu-
menta eorum Regum sudore & sanguine, qui
aut infinitos in sacris expeditionibus labores ex-
hauferunt, aut suum, florentissimorumque exer-
cituum cruorem pro sola sancti & solennis offi-
cij solutione oppignerarūt. Quid enim aliud quā
factorum conscientiam secuti videntur heroës
illi, qui non sibi, ut Romani felices orbis præ-
dones; non ambitioni, ut Alexandri, ut Anniba-
les, ut Scipiones, gloriæ animalia; non lucri cu-
pидitati, ut Arcades furori populorum omnium
auctoritati; sed Fidei, sed Ecclesiæ, sed Dei volun-
tati pugnabant, vincebant, triumphabant? Quod
si post nobilissimas victorias ex Africa, aut Asia,
sanctum aliquod & illustre nomen, tanquam
spolium retulerunt, fuit illud profecto non am-
bitionis trophæum, sed victoriæ additamentum;
non pompæ ferculum, sed insigne virtutis; non

*Ecclesia
diuersis
Regibus
diuersa
indidit ag-
nomina.*

inanis meriti ostentatio, sed vehemens gloriæ stimulus posteris admouendus. Mihi quidem Regum eiusmodi diuersorum cognomina diligentius intuenti, optimæ alicuius matris familias species versatur ob oculos, quæ filiorum solitudine atque industria multas creditorum syrtes præteruecta, plurimis litium tempestatibus iudiciorumque procellis erepta, in eorum charitate, tanquam in portu suauiter conquiescit: atque ut quandam præteritorum laborum memoriam refricet, simul ut suorum beneficia non ad exigui commemorationem temporis leuiter adumbrata ostendat, singulos eo nomine, non sine blanditiis appellare solet, quod sua vni cuique pietas, & confecta feliciter negotia pepererunt. Ita communi omnium parens Ecclesia, quæ sanctissimi patrimonij iura maximarum gentium Regibus vindicanda, conseruandaque tradidit, hunc Catholicum, illum Fidei Defensorem, alium alio factis suis conuenienti nomine nuncupauit. In quo certè nomenclationis iudicio, maternæque blanditiæ priuilegio, neque postremum illum censerî decuit, quem diuinæ voluntatis prærogatiua Primogenitum constituerat: neque qui cæterorum omnium Princeps designatus esset, mereri tenuetantum aliquod, & humile cognomen. Itaque & hic, quanquam in protegenda matre nunquam aliud quam filij officium facere contendit, illud semper affectus est, iure ut primigeniorum dignus esset: & illa, quanquam eius pietati gratia in terris referri nulla poterat, præclari nominis appositione perfecit ut grata esse videretur.

Quid enim minus Francorum Reges (nam de illis agerem non erat quod admonerem) Religione, Fide, transmarinis bellis, beneficiis erga Romanam Ecclesiam meruerunt? aut quod eorum pietati testimonium illustrius impartiri potuit Ecclesia, quam ut eos Primogenitorum loco haberet, sanctissimoque agnomine tot ianiente sæculis honestaret? Nisi fortasse humani generis inuidencia, nobis pulchra videntur aliena, istud quod vim omnem reliquorum, dignitatemque & cōplectitur & excedit, minoris æstimamus. Quātam, amabo, huic nomini amplitudinē inesse putatis, quo nomine nullū habuerunt prius in Ecclesiæ Antistites magnificentius quod Imperatoris Romani maiestati consecrarent? Parthicos maximos, Dacicos maximos, Germanicos maximos, Senatus suos olim Cæsares appellauit: vno Christiana veritas contenta fuit nomine; sic quidem, ut cum Imperatorem, illum inter homines Deum, illū mortalitatis pœnē cōmunis expertē, illū perpetuū Ecclesiæ patrem & tutorem, Christianissimū nūcupauit, totā eius magnitudinem æquasse, omnes excubias, & custodias cōpensasse videatur. Neque ego certē vetera Christianorum Imperatorū elogia magnoperē requiram, ut Nobilissimi, Sanctissimi, Dei Ministri, Pontifices etiā dicantur, dum istud sanctius atque diuinius, verū reliquorum omnium compendium conseruabunt. Quanquam ea fuit Imperatorum aliquorum improbitas, & præuaricatio (dolenter hoc potius quam contumeliosè dicam, Auditores) ut partā à maioribus pietatis gloriā tueri nō potuerint; sed ab iis, eorumque posteris tam præclari

Christianissimi in agnomen Francicis Regibus peculiare.

Olim Romano Imperatori concessum.

Sed aliquorum impietate deperditum, à nostris autē Regibus studiosissimè conseruatum.

nominis significatio, atque adeo nomen ipsum defluxerit. Nam quemadmodum interiectis obicibus, & fossis excauatis, quosdam amnes in aliū cursum contortos & deflexos videmus: ita post Isauricos, Copronymos, Balbos, Anastasios, immensas impietatis atque vitiorum voragines, quis putet ullam auitæ Religionis aquulam ad posteros permeare potuisse? Itaque eorum successores inani quadam honoris atque potestatis specie decepti, nomen Imperij retinere sati duxerunt; labentem pietatis gloriam reuocare non contenderunt.

*Reges Frā-
corum Im-
peratorī
Romano
pares.*

Longè alia Regibus nostris mens fuit atque iudicium, qui paria cum Imperatoribus honorū titulorumque insignia consecuti, de pompa illa, ut appellamus, sæculari & mundana detrahi non nihil, quam quicquam de iure pietatis, & Christianissimi nomine decedere maluerunt. Nam Franciæ Regem definiunt Iurisconsulti Imperatorem appellari: maiorem in Regno suo, quam in Imperio Imperatorem ipsum habere potestatem; Regibus omnibus tanquam steles Solem excellere; atque adeo ubicunque terrarum Regis nomen præcisè usurpatur, Francum intelligi: ambulanti Imperatori non à tergo ut assecram, sed ad latus ut parem comitari. Addunt alia veteres historiæ haud parum gloriosiora, Imperatorem neminem Francici nomine, quasi à deuictis Francis iure gloriatum: Francorum Reges omnium primos auro natiuo & Gallico nummos cudere cepisse, qui in orbe Romano essent vsui, eosque sua, non ut cæteros Imperatoris imagine signasse, quod ne magnis quidem Persarum Re-

gibus narrant esse concessum. Sunt hæc quidem & eiusmodi alia ad hominum commendationem illustria: sed ea partim Regum moderatione singulari neglecta, partim diutina vsus intermissione obscurata: nomen autem Christianissimi, tanquam optimam hæreditatem, omnique patrimonio præstantiorem, auidissimè omnes omnibus sæculis arripuerunt, tenuerunt, conseruarunt. Quod non fecissent diuinæ mentis atque consilij homines, nisi vanitati veritatem, ambitioni Religionem, humanis rationibus diuinam prætulissent voluntatem. Verum Deus Opt. Max. qui nemini vnquam homini liberalitate cessit, eam huic agnomini potestatem indidit, vt & in pietatis commendatione, summus inter homines splendor; & in Regia magnificentia, eximia pietas eniteret. Qui autem abiecta Religionis medulla, extimum gloriæ corticem ambierant, ij contumeliam suam vindicante Numine, & quod spreuerant perdiderunt, & cui firmitus inhæsusos se sperauerant, non tenuerunt. Sed ne quis in istorum miseras insultare; & de eorum exuviis contra eisdem gloriari nos existimet; sentio tacita omnium vestrum cogitatione hoc à me flagitari, vt iis omiſſis, demonſtrem Francos Reges iure vt qui ante eos optimo illustre Christianissimorum agnomen possidere. Quod vt apertius fiat, necessarium esse arbitror vt euoluamus complicatam eius verbi notionem, & quæ in eo latent, tum ad pietatem sancta, tum ad famæ celebritatem magnifica eruamus.

Equidem sic existimo, sic mihi persuadeo illum vnum Christianissimum & esse & appellari

*Christia-
nissimè
agnomen*

*Catholica
fidei tum
professione,
tum defen-
sionem cō-
plectitur.*

debere qui Catholicus sit integerrimus, idem
que fidei & Ecclesiæ defensor acerrimus : quo-
rum alterum Religionis, alterum etiam bellicæ
fortitudinis est utrumque perfectæ demum con-
summataque virtutis. Enimuero si Platonicos
& Peripateticos nominamus eos, qui Platonis
atque Aristotelis sacramento addicti eorum de-
creta pro oraculis, præcepta pro moribus, facta
pro regulis habent : is pari saltem iure Christia-
nus dicitur qui Christi dogmata omnia compro-
bat, non vni faciliorem quam alteri credulitatem
indulgendo. Præterea qui sic animo sit affectus,
eum oportet si doctrinam profitetur, varias ad-
uersariorum calumnias soluere : si tractat Reip.
gubernacula, inimicorum furorem atque amen-
tiam legibus & suppliciis coercere ; si ducit exer-
citus, non hostium modo vim atque impetus re-
futare, verum etiam ultro latèssere, & ex iniquis
possessionibus exturbare. Illis ergo qui non te-
merè, neque leui coniectura, sed sine vlla dubi-
tatione constanterque crediderit, Catholicus :
hæc qui studiosè, fortiter, magnificè fecerit, Fi-
dei Defensor : qui diu laudabiliterque in vtrif-
que versatus fuerit, Christianissimus appellabi-
tur.

*Reges Frã-
corum sem-
per Catho-
lici.*

Quis autem omnibus sæculis, omnibusque po-
pulis, tam fuit vnquam veritatis inimicus, tam
à ratione atque ipsa humanitate relictus, vt
Francorum Reges sprete violatæ ue fidei Ca-
tholicæ accusarit ? Videte quam honestè, quam
non insolenter gloriari possimus, Auditores,
quantum potero voce contendam vt hoc Eccle-
sia Catholica, aut si qui restant gloriæ nostræ

et multi, obrectatoresque exaudiant. Per annos
pœnè mille & trecentos à Clodouæo, qui signum
Francis ad benè de Deo credendum sustulit, Re-
ges sexaginta è tribus stemmatis numeravit Gal-
lia, quorum nullum, non duos, non vñum ha-
buit aut testis temporum historia, aut falsitatis
artifex inuidia, quem desertæ fidei non modò
suspensione, sed ne infamia quidem posset asper-
gere. O pietatem ore pleno laudandam! ô fidem
singulari gloria & prædicatione efferendam! Tot
Regibus in priorum locum succedentibus, tam
diuersis ingeniiis, tam contrariis moribus, cum
alium alia suò traheret cupiditas, & in perpetua
voluntatum dissensione viuerent, neminem vn-
quam repertum, qui cum vel odio maiorum, vel
rerum nouarum appetitione eorum acta rescin-
deret, in illorum fide vel litterulam immutaret.
Stant quidem ipsa per se fidei mysteria, neque
alienis indigent adminiculis; ea tamen in homi-
num mentibus ipsa sæpè temporis diuturnitas
obliterat: in Francorum Regibus duodecim &
amplius sæcula perennarunt. Religionis, tan-
quam Solis lumen propagatione minuitur, op-
positu corporis interrumpitur: Francorum pie-
tas vna atque perpetua hæredum participatione
splendescit. Minimis occasionum momentis
maximæ Religionis inclinationes fiunt: præ-
miorum spe sollicitati Francorum Reges nun-
quam de obseruantia erga Ecclesiam gradu di-
moueri, nunquam de fidei statione decedere po-
tuerunt. Et certè monstrosum hominibus visum
fuiſſet, naturæque instituto contrarium, si aliud
parens Ecclesia, aliud Primogenitus eius filius,

senfisset vnquam : si leui opinionum aura concuti, Hæreseon flatibus labefactari potuisset cum liliorum capita nulla ventorum violentia deprimi, nullis turbinibus inflecti posse dicantur.

Ferdinandus Hisp. Rex Catholicæ agnomen concessu Iulij 2. primus hæreditarium fecit superiore sæculo.

Angli ad fidem venerunt anno 596. regnante in Gallia Childberto.

Anno Christi 866.

Imperante Lothario II.

Anno Christi 965.

Damihimodo regnum vllum cum huius nostri constanti fide vlla ex parte conferendum. Non prouoco illud quod ex Saracenæ superstitionis tenebris, & intolerabili seruitute tandem aliquando emerfit : & , vt solent qui resumptis viribus siue pudore, siue iracundia ferociores in pugnam redeunt, per nouas victorias & parta de Mahumete trophæa, sepultum & inter mortuum multis ante sæculis Catholici nomen excitauit. Non illud appello quod Magni olim Gregorij cura paternæque sollicitudine, quod felicissima sanctissimorum hominum legatione ritus Barbaros, & totam illam Idolorum noctem exiit, atque in Petri cymbam receptum Reges quamplurimos ad optatum sempiternæ felicitatis portum transmisit : nunc autem insanis hæreseon fluctibus, & turbulentis opinionum tempestatibus de integro redditum, maximum miserrimumque salutis æternæ naufragium, nisi quis Deus tabulam obiecerit, expectat. Non contendo cum Bulgaris quorum Ducem primum Christianum Michaëlem fuisse iamdiu stirpe Carlouingiorum Regum apud nos imperante accepimus. Non certo cū Polonis qui Miezislaum primum Christianarum partium Principem Ottonis magni temporibus, Religionis, morumque integritatē amplexatum esse concedunt. Non debet cum inferioribus hisce Regnis Francorum pietas & gloria committi:

committi : maiora postulat , Imperium ipsum cum quo de Religione , virtute , rebus maximis omnibus dimittet , desiderat. Roma illa terrestre Dei domicilium , arx fidei , caput Religionis, quàm contrarias inter se, discrepantesque Cæsarium suorum naturas experta est? Vix abiecta vanissimorum Numinum superstitione, Imperium in fide Christiana sanctè, pièque fundauerat Cōstantinus, cū antequam radices ageret Arriana impietate conuellit Constantius : reuocato Idolorum cultu penitus euertit Iulianus. Post hunc orbis Imperium partiūntur Valētinianus, & Valens: ille in Occidentē Reipublicę Christianę cicatricem aliquantulum obducit : hic per Orientem tanquam vīguis in vlcere Catholicos omniditrate atque immanitate lacerat; sic quidem vt excitatum in rem orthodoxam incendium, Imperatoris morte funestissima, & ipsius penē Imperij ruina fuerit restinguendum. Iam extrema mala cogitatione informatis, iam vos horror ab hæretica barbarie totos perfudit : necdum tamen ad Monothelitas, ad Iconoclastas, ad Trium Capitulorum impugnatores, Catholicorum scopulos, fidei charybdes, exitiosa prodigia, & humani generis pestes nostra deuenit oratio. Itaque noluerunt, vt apparet, in Imperio filij paternę pietatis hæreditatem capere; fratres à fraterna Religione desciscere ausi sunt ; coniuges ipsę declinantem de suo statu Rempublicam reuocare cogebantur : quas eiusmodi conuersiones rerum , ac perturbationes vidit vīquam Francia in Ecclesię Romanę fide iacta semel per nobilem illud Remigium anchora, fundata; & aptè constituta?

Gregorij Magni de Regum Fracorum religione & fide notabile testimonium. Accipite huius laudis, ne profanos in re sacra aduocem, fundum testem Gregorium: audite ab ipsis aris, & infulis Patrem Patrum, Pontificem Maximum, sacrorum Regem diuinissimum: Gregorius Magnus loquitur, quis non credat? insignis Ecclesiæ doctor loquitur, quis contradicat? Ecclesiæ caput, Dei in terris vicarius, Deus terrenus loquitur, quis tenuissimam admittat dubitationem? NON IMMERITO. (inquit ad Brunichildem) CONTIGIT VT CUNCTA GENTIVM REGNA PRÆCELLERET, QVIPPE EARVNDEN GENTIVM CREATOREM ET PVRE COLIT, ET VERRACITER CONFITETVR Satis magnificè: Cedo quid amplius? QVANTO COETEROS HOMINES (inquit ad eius filium Childebertum (REGIA DIGNITAS ANTECEDIT, TANTO CÆTERARVM GENTIVM REGNAREGNI VESTRI PROfecto CVLMEN EXCELLIT. Accipite autem quibus gradibus ad illud Maieſtatis fastigium alcenderit, ESSE AVTEM REGEM QVIA SVNT ET ALII, NON MIRVM EST: SED ESSE CATHOLICVM QVOD ALII NON MERENTVR, HOC SATIS EST. Quid diceret si Francos Reges Catholicorum præsidium, Pontificum Asylum, fluctuantis nauiculæ anchoram fore præuidisset? SICVT ENIM MAGNÆ LAMPADIS SPLENDOR IN TETRÆ NOCTIS OBSCVRITATE LVMINIS SVI CLARITATE FVLGESCIT, ITA FIDEI VESTRÆ CLARITAS INTER ALIARVM GENTIVM OBSCVRAM PERFIDIAM RVTILAT AC CORVSCAT. Atqui

primæ stirpis Reges infirmam, ac velut nascentem adhuc pietatis lucem, tantum quodam quasi crepusculo ostentabant, quæ per Carolinum atque Capetianum stemma in Carolis, in Pipinis, in Robertis, in Ludonicis; Sole iam alto, & radiis explicatis, cæterarum gentium Reges quasi stellulas præstrinxit. QVICQVID ENIM (pergit Pontifex) REGES SE CÆTERI GLORIANTVR HABERE, HABETIS: SED IPSI IN HAC RE VEHEMENTIVS SVPERANTVR, QVONIAM HOC PRINCIPALE BONVM NON HABENT QVOD HABETIS. Nimirum in reliquis mundi partibus virtutum flores illa errorum pruina perdiderat: Franciam pretiosissimum Ecclesiæ hortum ver diuinum rosis & liliis adornabat. Cætera corporis membra pestifero frigore obriguerant: Franciam coreiusdem nobilissimum calor salutaris animabat. Omnia sponsæ cælestis ornamenta aspersa maculis, fracta, dissipataque splendorem suum & vsum amiserant: Franciam sanctissimi capitis flammæum & coronam perennis decor illustrabat. Hæc ipsa profectò Paulus I. significare volebat cum Pipinum FVNDAMENTVM ET CAPVT CHRISTIANORVM; eadem Bonifacius nonus cum Carolum sextum. SVPREMVM REGEM TOTIVS CHRISTIANITATIS appellabat. Sed nimis iam diu causam exploratam verso, cum res ipsa præteritique temporis custos historia, conseruatæ apud Francos Reges fidei Catholicæ gravissimum dicat testimonium. Reliquum est, quod expectare vos video, Auditores, vt quos Ca-

tholicos fuisse semper vidistis, eisdem fidei defensores esse demonstrem. Quæ quidem oratio vobis eo gratior futura est, quod eam in hoc confessu non vt doceam instituo, verum vt iucunda nostrorum Principum recordatione ad eorum amorem ac venerationem magis magisque accendam.

*Reges
Fræcorum
fidei defen-
sores.*

*Agnomen
Christia-
nissimino-
stris Regi-
bus iam
inde à Clo-
doueo hæ-
reditariū.*

Ac primum satis constat Clodouæo Regum Christianorum coryphæo, Arrianorum profligatori, Romanæ sedis cultori eximio, Christianissimi agnomen tanquam hæreditatem à Remigio Patre optimo, testamento relictum. Fuit enim Francæ virtutis tanta granditas, & amplitudo, vt statim atque in Christianæ pietatis possessionem pedem posuit, secundos & tertios gradus dignata, ad primos euaserit. In eius postea Regnum, & religionem qui successerunt, non tantum priuatis Antistitum Epistolis, non Rescriptis summorum Pontificum, non voce Conciliorum atq; oraculis, sed Græcorum etiam Imperatorum confessione gloriosi illius nominis participes extiterunt. Scimus enim Childebertum II. Imperatoris Mauritij literis Christianissimum compellari. Sed quoniam Imperij huius fundatorum gloria nonnullorum è posteris ignauia deflorescere videbatur, Romani Pontifices ad Carolum Martellum, eiusque filium Pipinum, de re Christiana optimè meritos, quasi futuræ dignitatis prærogatiuam transmittendum putauerunt. Nam cum ab illo Gregorius III. auxilium aduersus Longobardos postulare, supplicibus litteris iterato Christianissimum vocauit: idque nimirum post nobiles illas, & orbe toto decanta-

tas de barbaris victorias : post trecenta septuaginta quinque; Saracenorum millia Turonicis campis vno die, vna pugna, vno impetu cæsa: cum sub eorum tyrannide gemeret Africa, pars orbis terrarum maxima: cum Hispania Romanis olim viribus inaccessa regio, apud illos in fœdissima feruitute esset, & penè dicam, ergastulo : cum Mahumetis sacrilegia Romanis altaribus inferre minarentur, atque ad Urbem ipsam sibi aditum patefacere Francorum interneccione cogitarent : tum enim uerò repertus vnus est Carolus qui torrenti se illi opponeret, & vt veteres Galli exundantes fluuios arreptis obiectisque clypeis coërcere posse sperabant , sic ipse viuum ac spirans Christianæ Reipub. scutum, tantam, tam formidolosi latrocinij molem sustinuit, fregit, comminuit. Secutus Carolum Pipinus, religionem, fortitudinem, nobile agnomen à Patre accepit, regnum in familiam intulit: moxque ineunte principatu asylum Stephano Pontifici factus est, vice Constantini Copronimi, ad propulsandas Austulphi Longobardi Regis iniurias. Hunc summum diuinæ legis Antistitem qua veneratione suscepit Pipinus, qua obseruantia coluit, quibus officiis demeruit ? cum obuij pedes exosculatus, prohiberi non potuit, quin in equo sedentem ipse pedibus ad frænum profecutus in Regiam deduceret. Quo ex tempore facta Gallia est ara Pontificum, arx bonorum, portus naufragorum, miseræ perfugium, præsidium innocentie. Quot summorum Dei vicariorum vestigiis consecrata Gallia est, cum schismaticorum atque tyrannorum iniuriæ nostra fierent emolumenta ? cum

Anno 753.

- tria suprâ viginti schismata Reipublicæ Christianæ perniciosissima Regum nostrorum auctoritate, armis, pietate componerentur? Quis Carolum Magnum alterum Constantinum, alterum Ecclesiæ Romanæ parentem aduersus Longobardos armauit? Hadrianus Pontifex. Quis Carolum Caluum aduersus Saracenos, & importunos quosdam Marchiones interpellauit? Ioannes Octauus Pontifex. Et quoniam rerum maximarum exempla à Ludouicis potissimum Regibus sumenda sunt, à quo Stephanus Quintus Ecclesiasticam pacem firmitus stabiliri cupit? à Ludouico Pio: ad quem cum repente post sumptas rei Christianæ habenas venisset, Pontificatus non diuturni optimam partem posuit in Gallia. Quis Lamberto Comiti, Adelberto Marchioni nobilibus & factiosis hominibus cessurus ad Ludouicum Balbum venit in Gallias? Ioannes Octauus Pontifex. Quo Gelasius Secundus schismaticorum Frangipanum seditionibus agitated, tanquam in portum confugit? In Gallias ad Ludouicum Crassum. Vbi Innocentius II. innocentiam suam, & legitimam electionem aduersus Antipapam Anacletum comprobauit? In Galliis Ludouico Crasso. Quo loco tranquillitatem reperit Eugenius Tertius rebellium Romanorum impotentia vrbe sacra eiectus? In Gallia apud Ludouicum Septimum. Quod præsidium tutum habuit Alexander Tertius furente & orbis Romani gladios in eum aciente Friderico Ænobarbo? Galliam, & sinum Ludouici Septimi. A quo Gregorius Nonus auxilium contra vim & furorem Friderici Secundi postulauit? à Ludouico

nono cum ei scriberet Francos Reges in fide man-
fisse, & afflictorum Pontificum perfugium sem-
per extitisse. Vos appello montes Apennini, at-
que Alpes, quæ exultantes in equis Reges sæpè
Francos vid stis inter liliata vexilla, & florentis-
simos exercitus, sedem Pontificibus, Italiæ pa-
cem, Ecclesiæ dignitatem. Diuo Petro patrimo-
nium, possessioneique restituere, augere, conser-
uare. Te nobile septimontium veteris amplitudi-
nis index & testis; teque Roma gloriæ, virtutis,
Imperij domicilium obtestor, quæ Francorum
Regum fidei, religionis, iustitiæ, probitatis, atque
integritatis trophæa tenes, non superbè erecta ad
caducam hominum commendationem, sed ad
memoriam Dei Angelorumque sempiternam.
Quid aliud clamant vestra iuga & valles, quid
domicilia, & solitudines, quid vici atque itinera,
nisi vallum illud montium ascensu transgressio-
neque Francorum sæpè superatum, ut Italia pa-
ce atque otio frueretur? Quid loquuntur clarius
quàm vnde olim tumultus, trepidationes, vr-
bium solitudines, regionum incendia oriebantur;
inde placationem tumultuum, compositionem
seditionum, pacem à Barbaris, tranquillitatem à
Tyrannis, securitatem ab omnibus prouenisse?
Quæ cum ita sint, videtur ne Ludouicus idem
Septimus perperam gloriatus, cum Henrico An-
glo Thomam Cantuariensem Archiepiscopum
repetenti (ne sola Ecclesiæ capita Regum Fran-
corum custodiæ commissa existimetis) respondit
animosè, non esse illud in sua potestate ex quo
Franciæ regnum suscepisset: induisse se cum pa-
ludamento liliato miserorum clientelam: fuisse

apud maiores suos id in vñ semper, vt confugientes ad se afflictos, maximeque pro iustitia exultantes recipere, fouere, defenderent. Quid? Regis olim Bohemi, & Vngari Legatum Carolo VII. adulatū putatis cum Christianam domum, Christianitatis columnam appellauit? Quid? Froissardo externo homini & historico valde bono non credent exteræ nationes, profitenti Franciæ Regnum fidei fontem esse & excellentiæ: Romæ, Francorum Regem Regum summum & Principem haberi per quem Ecclesia sit illustranda! Quid? Clarissimis Louaniensibus Academicis leuitatis & mendacij notam inurent gloriæ nostræ obtrectatores atque æmuli, sancte apud Pontific. Max. profitentibus Reges Franciæ, præ omnibus aliis Regibus & Principibus aliarum terrarum & Regum, meruisse appellari dextrum brachium Catholicæ, & militantis Ecclesiæ?

*Expedi-
tiones
Fræcorum
Regum
aduersus
infideles &
hereticos.*

Hoc illud est quod alio colore Honorius Tertius efferebat, Franciam Christi pharetram esse lectissimis sagittis abundantem. Procedat enim in aciem & puluerem vera Castrorum Mater Ecclesia, Roma capiti galeam imponet; latus ense succinget Imperium; lorica pectus muniet Hispania; scutum obtulisset vetus illa, pia æquæ ac fortis Anglia: Gallia autem, quanquam ad tegendum scuti loriciæque loco esse potest, ad nocendum tamen & laceßendos hostes pharetram & sagittas ministrabit. Hac armatura, hoc apparatu quò bellum feret, vnde expeditionem inchoabit? Vultis ab Oriente & Syria? Pharetram opinor consulat, & Claromonte in Gallia referat ad Concilium trecentorum & decem Patrum de bello sacro suscipiendo, asserendis in libertatem

filiorum Dei Christianis Palestinis, sacra regione ad Saracenorum manibus vi & armis recuperanda : sagittam eliget Vgonem magnum Philippi Franci Regis fratrem, fortissimosque è Francis exercitus. Aliquo post tempore auxilia mittet, Ludouicos Septimum, & Nonum, non sagittas, sed amentatas hastas : cum hic vltimus in hostium potestatem redactus, sæpeque iam ad cædem designatus, constanter tamen in vinculis equestrem ordinem Mahometano Duci conferre recusaret, palamque profiteretur Christianum militem, quid Francum? quid Regem? ad infidelem accedere non debere, nisi vt decretorio ferro eius iugulum exhauriret. Quo stridore tot tantaque tela emissa sunt? vt Regis Franci vexillum vnum (inquiebat Iberorum Legatus) & missus in Orientem dux vnus plus terroris Turcico Imperio allaturus sit, quàm centum millium armatorum exercitus. Quid vero cõsecuta sunt? Vt quò Francorum virtus & fortitudo, eodem Christiana pietas penetrauerit. Qua Pharetræ ipsius gloria? Vt etiamnum apud remotas illas & barbaras gentes Christiani omnes communi nomine Franci appellentur. Vultis in Septentrionem tendat? Saxonum indomita gens, & per uicax Christi contemptrix Ecclesiæ iugo subdenda penitus est : Francorum Rex Carolus, iam Magnus, nondam Imperator (Dèus sancte qualis sagitta!) aduersus eam è Pharetra emittitur; atque idem tres & triginta totos annos admirabili fortitudine, constantia, patientia quotannis pugnat, vincit, triumphat. Quo fine? Nullam quietis partem cepit telum, donec in intimis singulorum præcordiis Christi cultum & fidem de-

*Christus
nullum ve-
rè suum
militem,
nullum du-
cem præter
Francum
inuenit.
Paul.
Æmil.
lib. 7.*

figeret. Vultis Iudæos sollicitet? educitur è Pharetra Dagobertus, vir acer, qui Iudæos omnes ad præstitutam diem aut religionem, aut regionem cogit vertere. Vultis domesticos hostes exterminet? Ecce telum igneum Robertus, qui nefarios Manichæos Aureliis medio foro, spectante tota Gallia viuos exurit, Idemque postea Leuthericum prauè de fide sentientem, doctis rationibus Rex Antistitem confutat. Cuius in opinione cum Berengarij hæresis, tanquam in semine lateret: non immerito perfidiosi hominis, omniumque augustissimo fidei mysterio repugnantium primus oppugnator & hostis dictus est Rex Christianissimus. Quem deinde pestiferæ opinionis virus effundentem, Henricus non magis Regni, quam Religionis hæres, indicto silentio ita cōpescuit, vt mirū sit vlllo postea tempore impias illas votes ex impurissimi pectoris gurgustio prodiisse. Ecce iaculū ingens, quod ipsam Pharetram implere potuisset D. Ludouicus, qui militiæ Regiæ tyrocinio Tolosates iustis armis persecutus, Albigensum hæresim glorióssimè profligat: media ætate blasphemos Iudæorum Talmudistarum Commentarios TANQVAM CATHOLICVS REX, ET PRINCEPS CHRISTIANISSIMVS addicit incendio. Certè sagitta fuisset electa Ludouicus vndecimus Pij secundi literis & cohortationibus aduersum Turcas vehementer inflammatus, nisi vicinorum Insularium ambitio, & subditorum Principum perfidia tam gloriosa consilia interuertisset. Quibus autem rationibus Pontifex Regem sapientissimum ad id bellum excitabat?

*Sic eum
appellat
Innocen-
tius IV.*

Proposito maiorum exemplo & rebus diuinè gestis atque virtutibus. Siquidem contra infideles pugnare inquiebat & vincere, Terram Sanctam recuperare, seruare fidem, Ecclesiam Romanam colere, Regum Franciæ proprium est. Postea verò sedatis tumultibus externis prodiit ab eadē Phætra telum vehemens Carolus nonus, qui nouitiæ atq; peregrinæ infidelitatis fibras omnes vno die, vno edicto, ultore ferro, quando non poterat mitius, amputauit. Quo quidem tempore lilia Gallica, quasi fuligine absterfa, iucundius florescere sperabāt, cum eandem iterum pestem hydra periculosius renascens ore teterrimo inhalauit; tum enim uero confodiendo pestilenti portentoeducta est lectissima sagitta, iaculum nobile, telū aureum L V D O V I C V S decimustertius.

Ludouici

Video vos ad istud nomen quasi prospero quodam sidere afflatos, alacritores erectioresque. Quem enim audito nomine Ludouici cogitatione informatis? Opinor Fidei securum, Religionis tutelam, hostem perfidiæ, perduellionis vindicem, Hæreseos domitorem. Eant nunc, Dei hominumque odia, & Catholicorum fortunis atque capitibus insatiabili tyrannide immineant: Constitutum diuinitus, & beata sæculorum duodecim serie stabilitum in Francia statum euertere conentur: perpetuis seditionibus, & rebellionibus se, nosque exagitent, & quasi vniuersam subiectu haberent Galliam, efficiantur formidabiles: cum nostras vrbes rapinis, adyta sacrilegiis, templa incendiis exhauserint: cum occisione, inflammatione, euerfione, depopulatione, vastitate Galliam parentem optimā infelices vipera discerpserint:

cus XIII.
Rex verè
Christiane
issimus.

cum aduersus legitimum Regum Imperium in-
 punitatis asyla, perfidiæ præsidia, perduellionis
 propugnacula extruxerint, munierint, cælo ter-
 raque inuitis retinuerint; existet aliquando Rex
 ille qui Francos auitæ pietatis admoneat, veteres
 Religionis iniurias vindicet, extorqueat à furio-
 sorum manibus arma sacrilega, subditos ad offi-
 cium, contumaces ad obedientiam, fidem ad
 optimam Galliarum partem, pacem, otium, tran-
 quillitatem ad Regnum vniuersum reuocet, &
 reducat. Meministis anno superiore, Audit. hoc
 ipso die, hoc loco, hoc regiarum scholarum adi-
 tu multa à nobis de Regis laudibus commemo-
 rari: scio vestros qui tum aderatis animos ad eius
 admirationem, amorem, venerationem non sine
 sensu quodam voluptatis excitatos: absens autē
 aliquis orationem meam non ad natium colo-
 rem veritatis, sed oratorium assentationis fucum
 factam, & compositam putasset; nisi eodem tem-
 pore ea fecisset is qui laudabatur, quæ omnia Iso-
 cratis myrothecia & Sophistarum arculas consu-
 mere potuissent. Et vero ille ipse dies summa Dei
 prouidentia, Regis Ludouici pietate vltimus er-
 roriatque amentia, primus Ecclesiæ Benehar-
 nensi post quinquaginta tenebricosissimæ super-
 stitionis! annos felix fortunaque Iobæus illu-
 xerat. Ille dies, Auditores, fidem, & illud au-
 gustissimum fidei Mysterium ex ergastulo semi-
 ruti magalis in libertatem, & nobilius, vnde ex-
 acti fuerant cum Deo Catholici, templum asse-
 ruerat. Atque vtinam Euangelistæ Lucæ sacro
 die Cœlestium aliquis in hunc cætum, vt olim
 Romam Castores, eius triumphi Euangelia per-

*Expositio
 Benehar-
 nica anno
 1610.*

tulisset ! Quis mihi tum pulmo , quæ vox , quæ verba sufficere potuissent , vt vestrum meumque ornandi Regis optimi ardorem sequerem , augerem , inflammarem ? Quid si nos potius Deus aliquis eadem hora , ex hoc loco ad Palensem illam supplicationem rapuisset ; si nostris ipsi oculis v'surpassemus , Regem , Principes , Curiam , exercitum , admirabili magnificoque ordine tota vrbe procedentes , & pedibus sequentes summum Religionis pignus , diuinissimam Hostiam ; ea tectam vmbella quam paucis ante diebus recusauerat Ludouicus : cum palam offerentibus responderet , non posse se vt Dominum & Principem in eam urbem ingredi , in qua nullum haberet locum , vbi principatum illum omnipotentis Deo referret acceptum . Si quis etiam vestrum eorum temporū testis oculatus , nobis omnibus renunciasset , illud anni tempus , illum ipsum esse diem , quo die ante annos quinquaginta Ioannæ Reginæ edicto Episcopi omnes suis sedibus exacti , verumque & incruentum Catholicæ fidei sacrificium remotum fuerat atque ablegatum : qui tum plausus , quæ acclamationes fausta Regi , tam pio , tam Catholico , tamque Christiano precantium toto cœlo personuissent ? Si tamen vocem ire liberam pati potuisset admiratio , & præstrikti tot miraculorum euentu quodam fatali corporis stupor , & suauiter manantes gaudio lacrymæ . Facite etiam si vultis fatidicum aliquem , & vatem in ipso admirationis articulo interuenire spectantibus , & plenum Deo in hæc effata prorumpere . Quid defixi hæretis , spectatores , quid obstupescitis ? mensis vix vnus pere-

*Eximia
Regis pietas
in supplicatione
Palensi.*

An. 1576.

*Expedi-
tio
Vasconi-
ta.*

grinatio, vnius pacificatio prouinciæ, paucorum recuperatio oppidorum, restituta bona Ecclesiæ Sacerdotibus & Præsidibus summam vobis admirabilitatem faciunt. Magnatum ista rerum præludia sunt, & difficilioris omnia victoriæ: vel ita-
tur hic Ludouicus, seque ad grauiora prælia vincendo exercet. Anno sequente classicum maioribus tibiis canet, quando reatum maiestatis vrbium mœnia solo æquabit, & aratrum ibi securus agricola imprimet; vbi modo immensæ fossarum voragines, & regia aduersus Regem cœlestem terrenumque propugnacula æternam perfidiam machinantur: quando mensium vix trium curriculo, trium Prouinciarum lustratione, à perditis, & desperatis hominibus vrbes plus quinquaginta auctoritate, deditioe, vi, terrore nominis armorumque recuperabit: quando quadraginta & amplius leucas illo Regno, illo Christianissimo exercitu occupabit vno eodemque tempore, quo toto terrarum spatio vix longæui senes, quasi per nebulam meminerint fieri sacrum vllum more institutoque Romano. Vide te prima fax nefarij belli Engeriacum, seu mauis San-Ioannis Angelitani vrbs appellari, mox D. Ludouici pagus futurus: interest enim vt omnia suo te nomine agnoscant sæcula; in qua turpificata, deformata, euersa, vt in grandi codice, leget posterorum ætas, qui fidem Deo fefellerit, Regi seruare neminem: vtriusque autem iniurias vindicari quo lentius, eo grauius, quo tardius, eo diuturnius. Si hæc atque alia diuinus aliquis prædixisset, ieiunam, & puerilem orationem meam vestra certè, Auditores, ex-

poloisset admiratio, & vnum aliquem è docta illa antiquitate oratorem sibi dari argumento supparem postulasset. Quanquam vereor vt is apud mentes nostras fidem inuenisset, cum prædicta illa quæ iam facta scimus, tamen fieri vix potuisse credamus. Et vero nisi ea nobis narrent ij qui interfuerunt, nisi testes omni exceptione maiores confirmarent, nisi ad vniuscuiusque nostrum oculos fama prouocaret, nisi de Ludouico dicerentur, quis vnquam aut vno anno à multis Regibus, aut ab vno Rege multis annis fieri posse speraret? Vidit numerosissimus exercitus frequentem in aggeribus Ludouicum qua vultus alacritate, quo robore corporis, qua animi firmitate? Quanta discerni prudentia, qua celeritate confici, qua sollicitudine omnia ritè administrari curat? qua pietate pacem & veniam à Domino exercituum exorat? qua mansuetudine perditos homines ad resipiscendum inuitat? qua clementia victis, supplicibusque perduellionem condonat? Quis tot victoriis immoderatè & insolenter vidit elatum? quis infelicibus quibusdam eruptionibus, vt est Mars belli communis, fractum & abiectum deprehendit? quibus oculis aspexit animosa illa nobilitas læsos in acie, Trajani, Gratiani, maximorumque Imperatorum exemplo inuisentem, & morituris grauiter illacrymantem.

*Gregorij
Pape XV.*

Atque ne laudes istas non à veritate prolatas, sed adulatione fucatas, liberiores in iudicando posteri existiment; producendus testis est alius, affectus nostri, quo aut priuatam Regis, aut

*de Ludouico nostro
illustre testimonij.*

Gentis vniuersæ gloriam auctam cupimus, penitus non particeps. Atque ille quidem aduocetur, si placet, trans Alpes ab Italia, ab ipsa Urbium domina: loquatur is qui sacri clauum tenet Imperii, & Reipub. Christianæ tractat gubernacula: sequatur in exornanda præconiis Gallia priores Pontifices Gregorius, non sanè parcius, quam ardentius in iis promerendis maiores suos Ludouicus æmulatur. Catholicum Franciæ Regnum sub Childeberto dicit Gregorius Primus: Christianissimum sub Carolo Martello Gregorius Tertius appellauit: Erit-ne aliquid quod ad hæc elogia possit addere Gregorius Decimus quintus? Reperietur Nam vbi illi honorum tituli ad posteros quasi hæreditario iure propagati fuerint, priuatum Ludouico addetur agnomen, vt **BELLI FVL MEN**; **PACIS CLYPEVS**, **DECVS ISRAELIS**, **ORBIS GLORIA**, **MVNDI ORNAMENTVN**. à Pont. Max. à summi Dei sacerdote, ab omnium gentium oraculo nuncupetur. O verè illustrem vereque Regium splendorem! O diuinam atque immortalē laudem! O vtilem! O necessarium parenti primogenitum! Vis Ecclesia catholica schismaticorum discessionem castigare, Hæreticorum furorem frangere, Saracenorum atque Turcarum spiritus contundere? **BELLI FVL MEN** est Ludouicus. Christianos Principes pia, & æterna pace deuincere postulas, omnibusque studiis bonum publicū promouere? **PACIS CLYPEVS** est Ludouicus. Christianum populum cæteris infidelium gentibus dignitate, amplitudine, gloria, optas excellere? **DECVS ISRAELIS** est Ludouicus.

douicus. Orbem terrarum sinu complexa amplissimo extremis etiam hisce sæculis vigere desideras? ORBIS GLORIA est Ludouicus, Hanc aspectabilem rerum naturam pulchriorem ornatoremque videre appetis? MVNDI ORNAMENTVM est Ludouicus. Tolle fulmen, pater cæterorum dicam, sacra bella languebunt: abiice clypeum, nulla satis erit firma pax: exime decus hoc, iacebit Christiana maiestas; hanc gloriam oblitera, deformatus & incultus orbis erit: hoc ornamentum mundo eripe: solem & oculum erueris. Ita verò non poteras, Ludouice, maiores tuos Catholicos sanæ atque integræ fidei principes sequi, nisi delecti à Deo Israelis decus esses? Non imitacere fortissimos Reges, qui in amplificanda tuendaque fide vitam fortunæque posuerunt, nisi tu sacri belli fulmen, & sacrosancti fœderis clypeus existeres? Parum erat Christianissimi agnomen aut à maioribus accepisse, aut posteris relinquere; nisi illo dignum te reddidisses, vel si nouum à te inciperet?

At te Religionis candidissimæ Gallia quis non regnis omnibus iure optimo anteponat tam pio Rege felicem? Vna iam tu nauis es bonorum omnium, quis hoc remige scopulos, hoc gubernatore tempestates pertimescat? Luximus elapsis iam ante mensibus generosissimorum Ducum, lectissimorumque militum naufragia: tuumque im-

Henricus Dux Medanius ad Montem Albanum ictu scopi occisus.

simus globus actus in oculum, eximium nostri sæculi lumen extinxit. Ite Manes optimi, maiorumque vestrorum animos ad Catholicam fidem tuendam natos inter piorum cœtus requirite. I felix Umbra, & hoc te saltem solatio refoue, quod stans occubuisti ut Imperatorem decuit; quod ingens omnibus tui desiderium reliquisti: quod mortem tuam ira Dei iustissima, quod Regis, quod Galliæ vindicabit. Nihil agis hæretica vesania, nihil promoues: si veterem illum furorem furere, si Galliam deintegro cædibus atque incendiis implere, si terram, crudelemque tyrannidem in Catholicos renouare destinas, bonos viros his funeribus existimas posse terreri? Non est tibi commorandum in singulis, si omnes vis opprimere: tota tibi Gallorum cadaueribus implenda Gallia est, quibus extinctis saxa ipsa & pēdentes templorum ruinae rebellionem tuam accusabunt. Interim saluus Rex, salua Resp: viuit Ludouicus, viget res Catholica: pugnat Rex Christianissimus, vincit Christus, vincetque, si quid Francorum, si Pontificis, si Ecclesiæ, si fidei ipsius preces valebunt, diuturna stabiliq; victoria.

Hoc est omnium nostrum, hoc orbis vniuersi præeunte tuo Pontifice Deus Optime Maxime, non ambiciosum ut speramus, non maius Rege Christianissimo votum: primum ut domesticos, sempiternosque hostes perdomet: deinde nobile aliquod suæ victoriæ addat corollarium: Orientem adiungat Occidenti, Europæ Asiam, Galliæ Palæstinam: relegat maiorum suorum vestigia, & fatalem quasi propagandæ fidei necessitatem

hoc regni sui tempore sibi impositam arbitretur.
Etenim à Clodouæo, quem non solum Christianum Franci viderunt, sed etiam Catholicum senserunt cum Alarico suo Visigothi, vicésimus imperium Gallicum tenuit Carolus Magnus, cuius in Schismaticos, in hæreticos, in Paganos, gloriosissimos labores nulla tacere potuit posteritas. Ab hoc iterum vicésimus regnavit Diuus Ludouicus, cuius adolescentiam Tolosates hæretici, inuentutem Saraceni Palæstini, extremam ætatem Afri Mahumetani experti sunt. Hunc ipsum quoque vicésimus excipit noster Ludouicus, illi priorum, non audacius dico quàm verius, si ætatem, si tempora, si res gestas spectamus, inferior. Atque utinam quando istis Antichristi emissariis Reges omnes Christianissimi obiecti fuerint: ter ab hoc, quater-ve vicésimus, Antichristo ipsi, & perfractis orei repagulis Ludouicus aliquis Christianissimorum ultimus opponatur.



GRATIARVM

ACTIO

PRO IMPETRATA PER
LVDOVICVM XIII.

A GREGORIO XV. P. M.
BB. Ignatij & Francisci Xauerij
Consecratione.

CELEBRATA FLEXIÆ AD VIII.
Kal. Aug. Anno 1622.



LVDOVICO DECIMO-
TERTIO FRANCORVM
ET NAVARRÆ REGI
CHRISTIANISSIMO,
ECCLESIAE PRIMOGE-
NITO, PATRI PATRIÆ,
IVSTO, PIOQVE PRIN-
CIPÍ, SEMPER FELICI, SEMPER AV-
GVSTO gratias agimus, habituri si liceret im-
mortales. A quo enim potius nomine tam lato
dic orationem hanc auspicemur, Auditor. quàm

ab eo quo nullum gratius post Deum Sanctoſque veſtris auribus accidere poteſt ? Aut à cuius hominis laudatione celebritatem hanc commodius aggrediamur, quàm eius à quo poſt ſacrorum Antiftites tota profluxit ? Cum enim annis abhinc plus triginta SS. Ignatij, Franciſciſque gloria donorum cœleſtium crebritate, miraculorum amplitudine, populorum pietate in dies augetur; multi ſe Reges, Principes viri ac fœminæ, Gentes Reſque publicæ in iſtam dedicationem interpoſuerunt. Verùm ſapientiſſimè, & prouidentiſſimè conſtituit Deus, vt Diuorum cultu non ſpreto, ſed prorogato Principum incredibili contentione, & precibus non repudiatis, ſed extractis; ad tempus illud deueniretur, quo tantum, tamque ſanctum negotium, & ſuſciperet Rex Chriſtianiſſimus, & vrgeret Eccleſiæ Primogenitus, & conficeret Ludouicus. Quod ſi quis ambitioſius à me quàm verius dici exiſtimet, videat etiam atque etiam quam mihi boni viri opinionem apud ſe relinquat, quem in tam graui cauſa, tam nobili clariſſimorum virorum conſeſſu, cum de Regis Optimi Maximi gloria agitur, res aut obſcurare detorquendo, aut augere dicendo ſuſpicetur. Et quanquam nemo ab hiſtorico, nedum ab oratore iurato res vnquam exegit; tanti tamen ad hanc cauſam intereſt certo noſſe cui beneficium debeamus, & quam poſui veritatem comprobare: vt neceſſarium viſum ſit à publicis ſanctiſſimisſque Conſecrationis ipſius actis, eius ordinem, & Principum qui eam promouerunt ſtudium replicare.

Superiore ſæculo exeunte cum vniuerſæ So-

*Hanc con-
secratio-
nem multi
Principes
petierant,
impetra-
vit vnus
Ludoui-
gus.*

cietati nostræ visum esset optimi sui parentis no-
men & res sanctissimè gestas ab interitu vindica-
re, Gaspar Petrosia Societatis eiusdem per Hispanias Procurator, ab Camillo Caietano Apostolico apud Regem Catholicum Nuntio supplex petiit, vt vitæ Ignatii sanctitas, & miraculorum veritas ritè ac legitimè probaretur. Quod cum perstudiosè ab delectis Iudicibus factum esset iis in locis in quibus aut natus, educatusque fuerat, aut prima sanctioris vitæ rudimenta posuerat; eius acta quæstionis ad Clementem Octauum Pont. Max. delata sunt: qui cum ea suis examinanda ponderibus sacro Rituum Collegio commisisset, iamque maiora meditaretur animo, pulcherri-
mos eius conatus mors ipsi quidem matura, sed orbi Christiano luctuosa intercepit. Clementi Leo successit Vndecimus, horti Medicæi flos delibatus: sed qui tantum Ecclesiæ concessus videretur, vt vbi languidulam effcete suauitatis afflasset auram, acerbissimo interitu homines admoneret, quæ spectatissimè floreant, ea celerrimè marcescere. In locum demortui admotus est ad sacra gubernacula Paulus Quintus Ad eum statim à Poloniæ Rege Sigismundo, Maria Augusta, Margareta Hispaniarum Regina, aliis Principibus, Catholicis etiam Regibus Philippis Secundo & Tertio, Præsulibus innumeris literæ super eare supplices adferuntur. Addit petitioni pondus Henricus Magnus, ille Galliæ Alexander, Philippis omnibus maior, proque suo iure flagitat, vt eius Societatis quam in aula, in oculis, in sinu ferebat, parens atque auctor Regiæ beneuolentiæ fructus è cælo caperet honestissimos;

Quis, tot tantorumq; virorum precibus tam iustis, tam diuturnis amantiſſimū filiorum patrem, Eccleſiæ ſacerdotem, Diuorum Pontificem ceſſurum non arbitraretur? Quis enim obex tam glorioſi Paulo ipſi negotij curſum retardare potuit? Temporis diuturnitas erat neceſſaria beata pacis atq; otij tranquillitate roborata? Ipſos ſexdecim annos Petri nauem paucis quibuſdam turbinibus ac fluctibus, ſecundis vt plurimum ventis gubernauit. Rerum geſtarum cognitio ſciētiaque requirebatur? At cœlo terraque penè cogentibus Ignatium atq; Xauerium publica iam voce beatos & eſſe & haberi debere, pronuntiauerat. Quid, inquam, examinatis teſtibus, conſectis tabulis prohibeat quo minus qui Beati fuerant nuncupati, Sanctorum nomine augerentur? Laborioſi fortasſe ritus, quibus perficiendis ſenis imbecilli corpus exantlatum atq; exhaustum par eſſe non poterat? Sederat mente pro tot curis & laboribus adhuc vegeta, ætate pro tanta adminiſtratione non exacta, corpore pro vitæ occaſu benè conſtituto. Certè validior aliquis aries ad impellendum ſupremi Antiſtitis animum deſiderabatur. Moritur tamen re infecta Pontifex, & agente maximè Francorum Legato, in Pauli locum Gregorius Decimus quintus ſubrogatur. Ad huius cognominis memoriam ſpei aliquid veſtris animis oboriri arbitror, Audit. & beneficium toti quidem Eccleſiæ, ſed maximè nomini, Regnoque Francorum vocabulum augurari. Nam ſi à primo repetimus, Childebertum, & Brunichildem eximiis honorum titulis magnus ille & rebus geſtis, & ſanctitate Gregorius exornauit. Gregorius III.

Christianissimi agnomen secundo Regum nostrorum stemmati, etiam antequam imperarent, donauit. Quartus plusquam ciuiles inter Ludouicum Pium, eiusque filios dissensiones extincturus, in Franciam venire non dubitauit: Septimus paterna auctoritate peccantem Philippum, reduxit in viam Itaque ex quo post ereptum terris Paulum Quintum ad sacra Reipublicæ Christianæ gubernacula accessit Gregorius Decimus quintus, erexit sese, & veteres, vt loquitur, cogitationes noster Ludouicus reuocauit. Anno igitur proximè exacto, quo ætatis suæ vicennalia agebat, omnibus precibus atque humili obsecratione à Pontifice, vix dum à creationis pompa & tumultu respirante, petiit vt Beatus Ignatius solenni illo atque augusto ritu toti Ecclesiæ colendus proponeretur. Additæ Cardinalium duorum litteræ Rupifucaldij, & Retiensis, qui sæculum purpura, purpuram vita & virtutibus conuenerant, quo animi ardore, quanta voluntatis contentione, quàm incredibili desiderio felicem petitionis suæ exitum Rex piissimus optaret, declarabant. Non erat difficile volentem impellere, Sanctissimæ voluntati cumulatè satisfacit Pontifex. Diceres è specula prospexisse Ludouicum, dum Gregorius aliquis ad supremam sedem ascenderet: aut expectasse Pontifices, dum id Ludouicus aliquis Rex Francorum postularet: vtrumque demum tam illustris facti gloriam cum altero communicatam voluisse. Aliquanto post tempore Maximilianus vtriusque Bauariæ Dux religiosissimus, idemque Princeps fortissimus, & Ferdinandus Imperator designatus, idem à Gre-

gorio per litteras petierunt, quod iam antea Ludouici precibus fuerat condonatum. Itaque qui præcesserunt tempore, prima quadam, & rudi deformatione nobilem illam tabulâ inchoarunt: qui subsecuti sunt, perfecti iam operis laudatores suffragatoresque extiterunt: solus autem extrema lineamenta, & pigmentorum florem attulit Ludouicus.

Quid hic potius mirabimur, Auditores, Principis nostri auctoritatem? iustitiam? pietatem? Quid enim grauius quam vnis litteris Regem vnum adolescentem impetrasse, quod plurimi ætate prouectiores, rerum gestarum multitudine fortasse superiores obtinere non potuerunt? Quid iustius quam id agere vt non tantum inter homines suum cuique, sed etiam vt cœlestibus ipsis honores debiti tribuantur? Quid sanctius quam in suis conuiuere, alienas amare, & consecrare virtutes? Hæc enim veneratio certa pietatis propriæ nota est, & futuræ olim sanctitatis prærogatiua. Nam in rebus humanis nemo verè iustitiam probat, nisi qui sit ipse iustus; nemo temperantiam amat in alio, nisi qui temperatè viuat; nullus Imperator præclara militum facinora coronis & honoribus cōpensat, nisi qui veram fortitudinem & exercere soleat & æstimare. Certè sacrilega veterum superstitio haras, & lupanaria transtulit in cœlum, & quod perditissimo cuique placebat, diuinitatem accepit de flagitio, vt daret è cultu licentiam, laudem ex consuetudine. Christiana vero pietas habet virtutis atque honestatis incitamentum in cœlo, quodque vita & actionibus quotidianis exprimit, id in optima vniuersi parte

Hæc in re plurimum Regis virtus atque auctoritas spectata est.

collocat. Nobis enim similes colimus singuli, aut iis quos colimus, volumus esse quam simillimi. Denique Diuos facere, & diuum esse, felicitate plurimum, virtute, animoque perparum interest. Sed ne quis de curriculo propositi desisteret, orationemque ad assentandum transferre me putet, quanquam hoc loco nihil iucundius aut me dicere, aut vos audire conuenit, quam Regis optimi prædicationem: moderabor tamen meo vestroque desiderio, & totam hanc causam ab vnius hominis laudatione ad vniuersi generis rationem, quantum potero, traducam. Quæro igitur ex vobis, Auditores, quid causæ esse putetis cur hanc Ludouicus noster Sanctorum virorum consecrationem & studiosè susceperit, & ardentè promouerit, & feliciter expedierit? Non dubito quin taciti apud vos huic meæ interrogationi satis singuli faciatis, proque mentis vestræ solertia subtiliter multa, pro Regis gloria magnificè plurima, pro Sanctorum causa piè omnia cogitetis. Subsequatur orationis meæ tarditas ingenij vestri celeritatem; dumque rerum à vobis solertius inuentarum cogitatione pascemini, pauca à me eius facti rationes, obuias cuique, & fortè ab aliquam multis neglectas accipite. Sic igitur existimo Regem Christianissimum id sumpsisse negotij, primum quod eo honore Sanctos illos còli dignum iudicaret: deinceps quod eam procurationem Regum Francorum propriam esse duceret: deinde quod illud Ecclesiæ, reique Gallicanæ, & temporum difficultas exigere videretur. Hæc tria dum breuius, quam restant dici possint, expedio, quæ so quod facitis, diligenter attendite.

Ignatius atque Xauerus illustre par Heroum, vicina nostris temporibus sæcula nobilitarunt omnino tria. Quartum ab anno millesimo, felici ortu; quintum, vita singulari, ac prope diuina; sextum autem quod iam traducimus, merita cōsecratione. Annis ante aliquot in lucem eruperat Martinus Lutherus fat. le pōtentum prodigiumque Reipub. Christianæ cui procurando sapientes illos quasi aruspices submisit Deus, vt, quemadmodum est in fabulis, quicquid orbe toto luctifica Ate pestifero spiritu atque contactu fædatisset, id omne istorum hominum beneficio in integrum restitueretur. Et illum quidem anno superioris sæculi primo & vicesimo, cum profanam strenuè militiam exerceret, ænea glande fracta tibia claudicare permisit Deus, vt rectius via salutis incederet, quique tormenti impetu de suo gradu deiectus fuerat, aduersæ deinceps fortunæ procellis agitato, firmiter in vno pietatis vestigio insisteret. Sic enim retulerunt optimi virtutum æstimatores, Ignatium in suscepto semel piè sancteque viuendi proposito tam fuisse constantem, vt eum nulla auræ popularis gloriola detorquere, nulla inuidorum obtrectatio abducere, nullæ inimicorum machinæ retardare potuerint. Nam ab eo tempore Deum cogitanti, ad cælum magnis itineribus properanti, Dei gloriam omni corporis animique contentione, quasi rem suam promouenti, corporis incommoda deliciæ spiritus erant, inque rerum externarum detrimento lucrum interioris hominis computabat. Hoc virtutis iacto fundamento, quod alij tectum, & colophonem putant, quæ pericula

Hunc bonorem virtutibus, & præclare gestis Heroe. illi sunt promeruit.

Ignatij eximia, quamquam ignota vulgo sanctitas.

non adiit, quæ maria non tranauit, quas molestias non exorbuit, quos labores non exantlauit; vt sopitam in hominum mentibus fidem, iacentem spem, extinctam charitatem commoueret, erigeret, inflammaret? Quantæ charitatis esse vobis videtur, Auditores, consecratam Christi vestigiis terram, loca Dei sanguine purpurata, solum ignotum, mendicum hominem petere, vt peregrinorum cohortes solatio leuaret? Ad litterarum studia animum appellere annos triginta natum, & benè barbatum virum, intervagam, & instabilem cirratorum turmam in deuorandis ignotæ linguæ rudimentis serio & ardentè inep- tire? In his difficultatibus vitam mendicato trahere copiosum olim & nobilem virum, collectis pecuniis fraudari, ipsumque illum furem in extremo discrimine constitutum, omni ope, cura, industria, sustentare? Qua in re non miror id à te factum Ignati, sed quod improbissimus plagiaris, post tam atrocem iniuriam in extrema naturæ necessitate, tuam vnus opem implorare atque appellare ausus sit, illud profecto mihi diuinæ cuiusdam virtutis, potestatisque vestigium repræsentat. Quid dicam de turbido illo & impuro stagno, in quod summa hyeme, confectum laboribus, vigiliis, ieiuniis corpusculum collo tenuis immerfit, vt flagitiosum iuuenem ad libidinum suarum diuersorium illac euntem, oppilato ponte reflecteret? Erat hyems teterrima, concreta densissima glacie aqua, sæuus & in medullas penetrans aquilo: Viuat tamen, inquit Ignatius, in animo nostro cœlestis ignis, dum flammæ tartaræ fomitem impudicus iuuenis submini-

strat : ardeat in nobis diuinæ zelus gloriæ, quam
venereus dæmonis flatus in huius improbi mente
penitus extinxit : calorē concipiat corpus ab ani-
mo , quo alieni pectoris glacies liquefacta, & di-
lapsa diffundatur. Tépestate perfrigida nudū sta-
tuas æneas amplexantē Diogenē inanis gloriolæ
fumus concalfecit: ergo in sūmo diuinę glorię pe-
riculo delicatis artub⁹ obrigescā? D. Frācisco suā
curanti salutē immanes niuiū cumuli mitē vapo-
rariū fecerūt: ego alieni capitis discrimen luto &
frigore redimere cūctabor? Quid autem sordidū
est si peccatū excipis? quid lutulentum, si libidi-
num maculas eluis? quid vile & abiectum si cælo,
si Deo laboras? Age mergamur in aquas toto cor-
pore , vel si necesse est demergamur , dum extet
atque emineat è cœno integritas, ex aqua cādor,
è lacu puritas. Ibis interim tu adolescens impu-
dice, & libidinum tuarum ardore incensam infe-
rorum fornacem acrius excitabis : dum ego pia-
cularis hostia detonantem iræ diuinæ tempesta-
tem fastinebo. O dictum sæculorum memoria
dignum ! O factum æternitati consecrandum!
Audit. Pudet me tui temeraria factorum iudex
posteritas: tu Ennensem lacum raptus impudicif-
simi testem & theatrum tantum non consecrasti:
& stagnū istud , quo ex Plutonis faucibus anima
diuino redempta sanguine emerfit, memoriæ no-
stræ inuidisti. Tu pontem Danubio impositum
ad arcendos barbararum gentium impetus, ser-
uatis etiam reliquiis ab obliuione vindicasti: &
hunc quo perduto iuueni aditus ad dæmonem in-
terclusus est , ne vno quidem sæculo extare
voluisti. At manet , manebitque æternū

in suprema illa rectè factorum mercede atque memoria: priusque diuinam rerum omnium cognitionem obliterabit æternitas, quam Ignatij meritum atque gloriam. Omitto eius facta cætera quibus vitæ non annos, non dies, non horas, sed momenta singula vir ad omnia summa natus illustravit. Sui vero instituti Socios quibus imbuit præceptis, quibus ornauit virtutibus, quo sacramento obligauit? Impendi sibi, superimpendi cæteris: Dei gloriam, eamque maiorem continuè, ardentem, constanter quærere: nullis industriam suam locorum, temporum, personarum, vrbiũ, Regionum terminis circumscribere: in nationum diuersitate amorem eximium; in perpetua hominum consuetudine Angelicam puritatem; in doctrinæ splendore demissionem animi singularem conseruare: rebus humilibus non deici, illustribus non extolli, aduersis non obrui: scire abundare, & penuriam pati; bene agere, malè audire. Hæc sunt eius, quam secundum Deum erexit, Societatis insignia, hæc genuina militum cœlestium ornamenta, vt istos vitæ morumque characteres qui habuerit, is verus germanusque Societatis nostræ sit Religiosus: quibus ea notæ defuerint, etsi externa specie nomen, habitusque præferant, non magis tamen Ignatij sint, quam mures montium, terræ Pygmæi, monstra naturæ. Seligere me vnum ex omnibus recens transacta iubet celebritas, in quo tanquam in speculo Ignatij præcepta atque exempla possimus intueri.

*Francisci
Xauerij*

Is est magnus ille Xauerius, quem quo nomine hoc loco appellem, nescio, Dicam diuinæ fi-



dei buccinatorem, charitatis foculum, gratiæ miraculum? Nuncupabo noui orbis solem, Barbaræ feritatis domitorem, Indorum Apostolum? Appellabo Thaumaturgum, Alexicacum, Auerruncum? Quid est in eius factis non heróicum, in verbis non cœleste, in portentis non diuinum? Quæ maria zelo potius quam ratibus non transmisit? Quam barbariem non mitigauit? Quas Regiones nõ aliquo sanctitatis vestigio cõsecrauit? Testis est ignotus Mathematicorũ ingeniis orbis ille, quem non passibus sed cõcionibus, non pedibus sed Idolorũ deiectione, nõ corpore sed diuini honoris ardore peragrauit. Testes ij populi, quos barbarũ nescio quid stridentes, in vnã cõuenire Christi linguã coëgit. Testes illa maria quæ vnus hominis ad frugem conuersioni intentũ tulerũt: quæ baptismo tingẽdis Christianis vix suffecerũt: quæ naufragũ, innixum tabulæ desertũ, solum, ad portum detulerunt, rogantem vt eo periculo non liberaretur, nisi ad grauius aliquod reseruandus. Hic ego non cõmemoro cõcitas Dæmonis inuidia tẽpestates Francisci precibus placatas: duobus in nauigiis eodẽ visum tempore: vno populi vnus sermone vtentem, ad omniũ intelligentiam venisse, quod olim Apostolis concessũ: enuntiata per anticipatã cœlitus cognitionem futura: reuocatos ad vitam homines numero viginti: & eiusmodi sexcenta, quibus immortalem sibi alicuius diuinitatis gloriam apud barbaros comparauit. Non enim ista sanctum fecerunt, imo ne declararunt quidem nota vndecunque certa, & propria Xauerium. Intima res est sanctitas, quam non pulsẽ ex humanis membris vitilignes,

*ingentes in
fide propa-
ganda la-
bores.*

non exacti è possessis corporibus mali atque iniusti hospites, non calcatae illæ sis pedibus ardentes prunæ, non redire iussæ in antiquum hospitium animæ pepererunt: sibi res suas agit, se Deo probari, non hominibus, expetit: carbunculus est, plus lucet in tenebris: Gygis annulus est palma intra palmam abscondita hominem tegit: Luna est, cum minus videtur splendere, Solem propius aspicit. Eam igitur cum ab omni parte absolutam assecuti sint de quibus diximus Ignatius atque Xaverius; dubitabit ullus quin & à Deo sint in cælum admissi, & ab hominibus ut certi verique cœlites sint colendi? Quid? Hercules, Æsculapios, Triptolemos, Cereres, Bacchos veterum superstitio beneficiorum memor consecrauit: istos, Deus bone! quantum orbi fructuosos & salutare, quasi adscriptitios ciues in cælum receptos negabimus? Deos Ægyptij suos in hortis seminarunt; nos in cælum inuitos homines non venerabimur?

*Id negotiū
à Rege
Christia-
nissimo
suscipi &
perfici ma-
ximè de-
cuit.*

Verum illi licet in humanis corporibus vitam imitatio cœlestium sola Dei ope, suaque industria consecrationem istam sint promeriti: nunquam tamen essent assecuti nisi eorum virtutem sanctitatem, diuinitatem hominum aliqui gratia & favore adiuuissent. Ita & homines, si fas est dicere, patrociniū eorum suscipiunt, quos hominibus patronos Deus esse voluit: & qui nos in fidem suam capiunt, gratiam pœnè exigunt, & beneficia scenerantur. Itaque mense ea Ludouico diuinitus iniecta est, ut cum honore illo dignos esse constaret cœlestes homines: is eam potissimum susciperet procurationem, qui & iure meritissi-
mo aggre-

mo aggredereetur, & felicissimè perficeret. Cuius enim erat Christianarum virtutum culmen consecrare, nisi Regis Christianissimi? Quis potius Heroas illos Ecclesiæ dare debuit, quàm Ecclesiæ Primogenitus? Quid enim sapius, ardentiusque fecerunt Francorum Reges? Cuius alterius Principis opera, aut in cuius regno crebrius eiusmodi decretæ sunt consecrationes? S. Suuiber-
tum Carolus Magnus primis Imperij annis sanctum haberi, colique impetrauit, Alexander Tertius Ludouico Octauo scripsit, decreuisse se Diuum Bernardum canonisandum ad gloriam Dei, & exaltationem Ecclesiæ, & totius Regni eius. A Sancto Ludouico vitam & Regnum Philippus Nepos accepit; vitæ benè actæ, & Regni optimè administrati gloriam apud homines Bonifacij Octauo Pontificis consensu reddidit. Eius Sancti Regis frater Carolus Siciliæ Rex, mundo & Ecclesiæ Ludouicum Tolosatensem Episcopum dedit: cui dubium non est quin Regia familia Sanctorum honores concedi fecerit. Quid dicam de splendido illo sapientiæ sole Thoma Aquinate, quem quia eruditionis angelicæ radiis Galliam præcipuè illustrauerat, non alibi quàm Auenionè in Gallia, non ab alio quàm ab Gallo Pontifice Ioanne Vicefimo Secundo decuit consecrari. S. Iuo Trecorensis Presbyter, Aremoriciæ corona, iustitiæ Christianæ sceptrum, Suadæ medulla, Aduocatorum aquila, Astræ Antistes, alienas in terris causas dum agit, patronos in cælo reperit; & contestatam non litem, sed virtutem Philippo primùm suo Regi, Rex deinde Clementi Sexto obtulit, vt in Diuorum cultum & iura recipere-

*Hac est
 prima Ca-
 nonisatio
 solenni ri-
 tus acta.*

An. 804.

An. 1164.

An. 1297.

An. 1317.

An. 1323.

An. 1347.

An. 1482.

An. 1519.

tur. Eundem honorem S. Bonauenturæ Ludouicus Decimus impetrauit. S. Franciscum Paulensem de Ludouico Vndecimo, deque Regno vniuerso optimè meritum, Franciscus Primus, eiusque Mater, & Coniux per Leonem Decimum totæ Ecclesiæ venerandum proposuit, an-
 nis ante meliorem Ignatij vitam admodum duobus. Et id seu consuetudinis, seu pietatis ius à maioribus acceptum non conseruarit Ludouicus? & religionem in eo suam desiderari patiatur, cuius exemplum nemini non præscribet imposte-
 rum? Sciebat videlicet, vt data ad Pontificem Epistola testatur: venisse se in ius Ecclesiæ Primogeniti, in nomen Christianissimi, mererique Fidei Defensoris agnomen, iam ante à maioribus iure possessum, nisi illud impius in alio Regno Hæresiarcha funestasset.

*Societas
 Iesu in
 Gallia si-
 nunata &
 educata.*

Atque illi quidem superiores aut Galli fuerunt plerique, aut in Gallia diu vixerunt, quibus optima sanctitatis nutricula honorem in terris à Deo reddidit præstitutum. Nostri autem Indigetes naturalem in Hispania, diuinum in Gallia spiritum hauserunt, vt clementiore cælo ea ponerent virtutum fundamenta, quæ sua deinde sponte in viam, spirantemque sanctitatis basilicam crescerent. Audi inuidia, audi hæresis, pestifera fax seditionum, odium bonorum: tu Societatem nostram peregrini nominis, quasi lacerna dedecoratam, in hominum contemptum conaris adducere: Hispanias tu nobis, & nobilem Cantabriam obiiicis rana de Lemano lacu, lutra de Rupellenfi gurgite, cum Societatis nostræ in sinu Galliæ, in vrbe Regia fundamenta sint posita. Habuerit illa

licet parentes externo Principi subditos, natione tamen Gallam se profitetur. Parisiis enim concepta, nata in Monte Martyrum, inde Romam deportata adoleuit aliquandiu: tum excrefcens in dies ramis hinc inde diffusis orbem vniuerfum opacauit. Atque vt in patria quædam arbores aut nullos, aut perniciosos fructus præbent, quæ peregrino insitæ solo vberrimos atque iucundissimos pariunt: sic Ignatius quod in Hispania non potuit de spe omni, conatuque depulsus, id tandem feliciter inchoauit in Gallia. Itaque debet Galliæ Christianus orbis quicquid vtile, magnum, gloriosum ab Ignatij filiis perpetratum est. Ex Gallia, tanquam ex equo Troiano, profecti sunt qui vitia dedocerent, qui ignorantiam euicerent, qui Idololatriam euerterent, qui hærese contra impetus refutarent. Adiuncta sunt Ecclesiæ Catholicæ vastata erroribus loca ac solitudines: reducta in Perriratem regna atque Prouinciæ: reuocata ad capitis venerationem resectorum membrorum abalienatio, per eximiam cœli Gallici temperationem. Non hoc nesciebas Ludouices, optime bonorum tuorum æstimator, quum Pontifici scribebas Dei filium Ignatium Parisiis bonas artes hausisse, ibi sui instituti Socios congregasse, in Monte Martyrum prima tam felicitis partus extare cunabula. O gloriosum montem! quem ego non cum Ida confero, commentitio illo Iouis ortu percelebri. O beatam illo vnico partu Galliam! quam nulla vnquam Rhea tot Deorum mater æquarit. O nos felices qui in paterno Societatis nostræ solo educati, plerique & nati, lac Religionis nulla peregrinitate corruptum epo-

tamus. Quid vobis videtur? Auditores, satisne validas habebat causas Ludouicus, quibus impelleretur ad illud suppliciter postulandum? Ignatii merita, Regum Francorum, etiam in exterorum hominum cultum beneficentissimam propensionem, Societatis nostræ in ipso Galliæ meditullio, in prospectu Regum ipsorum, in oculis Regiæ Luparæ non ingrata incunabula?

*Ecclesiæ
temporum
difficulta-
tes Ludouicum ad
huius Consecrationis
postulationem inci-
tarunt.*

Sed altiora quædam spectat mente diuina vir: humanas istas rationes leue apud se momentum habere permittit: quare & eas affert non vt prodidisse, sed ne perdidisse videatur. Adeste animis, qui corporibus hunc confessum celebratis: accipite veram, legitimamque causam cur petitionem consecrationis istius in animum induxerit Ludouicus. PRIMOGENITI ECCLESIAE FILII TITVLVS, inquit, TAM ALTE IN ANIMO INFIXVS MEO, QVAM BONO IVRE A MAIORIBVS MEIS VSVRPATVS, QVIME DIES, NOCTESQVE STIMVLAT AD CATHOLICÆ FIDEI AMPLIFICATIONEM, ET HÆRESEOS PERPETVAM EXTIRPATIONEM, FACIT VT EO VEHEMENTIVS B IGNATII SOLENNEM CONSECRATIONEM EFFLAGITEM, QVOD EIVS MIHI PATROCINIUM PRÆSIDIO FORE SPEREM AD ILLVD EFFICIENDVM, CVIVS CAUSA IN VITAM HOMINVM MISSVS A DEO EST, QVODQVE AB EO INSTITVTVS ORDO TAM ARDENTER, TAMQVE UTILITER EXEQUI PERSEVERAT. Quid in his primum verbis retexam, quid mirer, Aud. equidem

nescio : ita singula momentis suis æstimanda rapiunt atq; absorbent admirationem meam. PRIMOGENITIE ECCLESIAE FILII TITVLVS. Regem se & Imperatorem Francorum, Regum gemmam, Regni nobilissimi animam esse non meminit, vt ab Ecclesia nomen accipiat, vt eius se profiteatur filium, à qua diuinæ vitæ originem, & Regni æterni hæreditatem accepit. STIMVLAT ME AD CATHOLICÆ FIDEI AMPLIFICATIONEM. Deus immortalis! nihilne est in Regno quod prius collocare appetat Ludouicus? In tam malè affecto corpore alia non sunt membra quæ medicam curantis manum desiderent? Apud plurimos Principes politicam gubernationem Dei cultus sequitur; apud non improbos comitatur: Regem Christianissimum, Ecclesiæ Primogenitum solus impellit, trahit, abripit: non Regni, sed fidei, non potestatis, sed pietatis amplificationem flagitat: cæteræ dotes quasi consecrariæ, & pedissequæ, proximè quauquam longo interuallo consequuntur. Sic enim existimo, sic res ipsæ, & facta declarant habere iustum Ludouicum in sitam animo libram quandam, cuius in alteram lancem Dei cultum imponat, in alteram temporalia, vt appellant, Regni negotia: propendere autem illam semper vt primum in ea figat vestigium. HÆRESEOS EXTIRPATIONEM ardentè cupit. Audite rebelles, audite perduelles: non Hæreticos, sed Hæresim; non vos, sed nefariam pertinaciam; non subditos suos, sed furorem, sed amentiam, sed sacrilegium tolli vult atque extirpari. Quis vos è Gallis barbaros, è subditis perduelles, ex hominibus belluas effecit?

Quo poculo Lemanica illa Circe vobis mentem
 atque sensum eripuit? Itaque vt pestem illam in-
 frà mortuos amandet in S. Ignatij clientelam se-
 dat. Sapienter tu quidem, Ludouice, præsidium
 è cœlo aduocas, vt in partibus tuis Deum ha-
 beas, ne tuorum certantium otiosus spectator se-
 deas. Ille igitur qua manu ensẽ tibi tradidit vt
 pugnes, eadem vires, animumq; augeat, vt trium-
 phes. Sic enim sacrorum annalium monumentis
 refertur, oppressis aliqua tyrannide Catholicis,
 auxiliãres è cœlo misisse copias Deum persæpẽ,
 & noua quasi in cœlo astra collocasse. Antioche-
 nam Ecclesiam Iuliani desertoris crudelitas affli-
 gebat: de repentẽ S. Babilæ cineres reuiuiscere, &
 sacrilegum illum perfugam oppugnare. S. Am-
 brosium Mediolani Arrianorum sæuitia oppri-
 mebat, subito Geruasius, Prothasiusq; par Mar-
 tyrum excitari, & magni Antistitis, certæque fi-
 dei causam quasi suscipere. Parisiis pestifera Da-
 norum barbarorum lues sæuiebat, sacra omniã
 profanaque depopulabatur: tum enim uerò vin-
 dex Germanus exugere, & plus esse in mortuis,
 quàm apud viuos roboris, virtutisque demon-
 strare. Vastabant Africam Gildonis importuna
 barbaries; ecce recens mortuus Ambrosius adesse,
 & Mascezili Honorij Legato incruentam fa-
 cere victoriam. Par enim est vt quæ Deum homi-
 nesque oppugnat, impietas, diuinis, humanisque
 armis debelletur. EIVS REI CAUSA, inquit
 Ludouicus, MISSYS IN MVNDVM IGNA-
 TIVS EST. O nobilem viuendi causam! O glo-
 riosum inter homines agendi finem! HOC A-
 GIT AB EO INSTITVTA SOCIETAS. O

sacrum & grande vitæ nostræ testimonium ! O *de nostra*
 singularem instituti nostri laudationem ! Quid *Societate*
 agis inuidia, quid contra moliris ? Genuinum tu *iudicium.*
 in moribus nostris frangere ? tu actiones honestis-
 simas limis intueri ? tu ipsas etiam cogitationes
 nostras ad importunæ tuæ vertiginis calculos re-
 uocare non erubescis ? vt quos Princeps sapien-
 tissimus diuinæ vocis oraculo edomandis erro-
 rum monstris, procurandis Hæreseon portentis,
 exterminandis vitiis insudare proclamat, eos tu
 perturbatæ Reip. & nequitix non tolerandæ au-
 deas accusare ? Macti este Socij, hoc Regiæ pro-
 bationis tecti clypeo pugnate : omnes maleuo-
 lorum imperus opposito tanti testimonij quasi
 muro repellite ; operam vestram, vitam vestram,
 sanguinem Regi, Regnoque Christianissimo
 probate : ei Regi quem Ecclesia Catholica verè
 Primogenitum agnoscit ; quem Gallia Patrem
 salutat quem orbis Dominum colit ; quem hære-
 sis hostem, flagellumque suum pertimescit. Eius
 vos Regis Numini, Maiestatique vouete, quo
 neque Augustus vnquam felicior, nec melior
 Traianus, nec maior Constantinus, nec religio-
 sior Theodosius extiterunt.

Hoc agimus Ludouice, agemusque, quamdiu
 Franci, quamdiu Catholici, quamdiu Religiosi,
 quamdiu Ignatij filij vixerimus. Tu Societatem
 nostram quæ in regno tuo versatur, innumeris
 hætenus ornasti beneficiis : hoc vno vniuersam
 complexus es ; vt qui vel Perüanas peruadent so-
 litudines, vel in intimam Sinam penetrabunt, aui-
 dè accipiant Ignatium communem parentem in-
 ter Sanctos relatum volente, agenteque Ludo-

uico Decimo tertio Rege Christianissimo : hoc loquentur historiæ , sciet posteritas quoties Sanctum nominabimus Ignatium , Ludouici meminimus. Id vnum est quod tanto beneficio respondere possumus, æquare gratiam neque possumus, neque tua esset, si possemus. Tuum est, Sanctissime Ignati, filiorum nomina explicare; tuum est sanctitatis tuæ assertori habere gratiam : patrociniū tuum nobilis ille cliens flagitat, in tuo fauore perfecti triumphī spem repositam arbitrat̃ur : Deo pugnat non sibi ; neque tam Regno quàm fidei vincit. Da illi vel gloriosā pacem, vel bellum prosperum: & si quando Regius cum animus, & inconsiderata gloriæ cupiditas inter acies, inter arma, inter pericula, longius prouehent, quicquid esse poterit discriminis longius propulsa : vt confecto bello diuturno, profligato hoste pertinaci, fama, terroreque sui nominis circumquaque diffusotriumphet, quietamque post hac vitam, annos plusquam Nestoreos regnet, & viuat Ludouicus.



LITERÆ
SVMMI PONTI-
FICIS AD REGEM
CHRISTIANISSIMVM.

Quibus ardentem eius pietatem & zelum
in amplificanda Religione Catho-
lica commendat.

GREGORIUS PAPA XV.
Dilecte in Christo Fili noster.

Salutem & Apostolicam Benedictionem.

EXIMIA Regia vestra vir-
tutis facinora, quæ Christianorū
in se omniū oculos conuerterunt,
magnam inter armorum vestrorum glo-
riam, & spem triumphorū paternæ nostræ
Epistolæ hæc men-
se & anno
quo data
notatur,
in lucē ex-
cusa typis

prodiit
Parisiis
gallico
sermone,
eamque
historiæ
temporū
cōpilator
in totum
7. Mercurij
Gallici
sic coniecit,
vnde in latinam
linguam
conuersam
hic damus.
Ludouicus
ætatis
Regiæ tyrocinium
in sacro
bello gloriosè
ponit.

solicitudini letitiam afferunt. Nam cum audiamus nō sine incredibili animi n. ærore hereticā prauitatē aliquibus in locis sine metu securē desiderare, in aliis iniquissima tyrannidis vim, potentiāq; exercere: nūc tandē Deo exercitiū gratias agimus, quod tam idoneo ad bellum tēpore Maiestatem Vēstram ad arma hac sacra pro Religionis Catholicæ dignitate tuēda excitari. O præclarum militia Regiæ, & Christianissimo Rege dignū tyrocinium! Quam nouum est, & laudabile artem illam, quæ à cæteris per socordiā in ludis & voluptatibus conteritur, à te totam in pace inter discordes populos concilianda, regēdis exercitiis, expugnādis hereticorū propugnaculis, nō sine Dei numine, cuius regno Reges subsūnt, nō generosius, quā felicius exigunt? Quid? credibile est ipsis adolescentiæ initiis opus à te susceptū tam magnū, atq; difficile: & cū cæterorum voluntates labores & pericula retardarint, iis te vehemētius ad eam gloriā incitatum?

*Fruere (Dilectissime Fili) ea fama, quam
 tuum tibi peperit nomen, & Deum tecū
 pugnantem sequere: ut quemadmodum* Ludoui-
nunc te omnes pro Belli fulmine, & Pacis cus Belli
clypeo habēt, sic nemo sit imposterū qui te fulmen &
decus Israēlis, & Orbis gloriam esse non pacis cly-
existimet. E summo Apostolica dignitatis peus.
culmine, quo diuina bonitas humilitatem
nostram sine vllis meritis perduxit, mente
& animo vestris exercitibus intersumas,
& diuina remedia crebris precibus præ-
paramus. Et quanquā dubiū non sit quin
ultimam ei negotio manum fortiter, &
constāter, virtutis tuæ inuitatu sis imposi-
turus; tibi tamē ut spero graue non fuerit
ad illud nostra exhortatione magis, ma-
gisq; inflāmari: ut omnib⁹ appareat quā-
ta cū cura veræ Religionis, & gloriæ tuæ
progressum suscipiamus. Hactenus certē
Deo plurimū obligatus es ob immēsa eius
in te beneficia, quæ ut sperare, & optare
fas est, augeſcent impoſterū: estque credibi-
le admodū tuam illam mentē excelsam,

Regnorū
fundamē-
tum est
orthodo-
xa fides.

*Et exaggeratam cælesti quadā disciplina
esse imbutam, nō humana sapientia præ-
ceptis, ut qui optimè semper intellexeris
Regnorū fundamenta veritate vnius or-
thodoxæ fidei niti. Neque enim nisi Do-
minus custodierit ciuitatē, Magistratus
vllus, aut Principatus potest stare securus.
Æstiment sapientes qua fide Regium tuū
solium tueri possint ū, qui Diuos ipsos suis
templis eiecerunt, qui nullū non mouerūt
lapidem ut eos è sacro albo eraderent, imò
cælo ipso, si fieri posset, exturbarent: sit. ne
ab iis vlla speranda fidelitas, qui temerè,
atque impiè maiorum instituta, Regū cō-
suetudines, decreta Pontificum, Ecclesiæ
ritus, caremoniasque conuellunt. Ii sunt
Reipub. Christianæ tumultus, Et Frāciæ
labes, ac pestis, quā Regum supremus Im-
perator adolescentiæ tuæ opprimendā re-
seruauit. Vide nunc hoc armorū tuorum
aditu suspēsos Europæ vniuersæ animos,
id vnum expectantis ut tuis quā primum
auspiciis Oceano sese cōmittat: ut qui lo-*

Ad Ru-
pellanam
obsidionē
Ludouicū
cū Ponti-
fex ad-
hortatur.

cus portū, ac perfugiū hareticā rebellionī
 præbet, in sempiternū victoriarum tuarū
 trophæum cōmutetur. Scio equidem Re-
 giam tuam indolē neque periculorū me-
 tu, neque laborū fastidio, neque vlla leui-
 tate à suscepto posse dimoueri; sed & me-
 mineris Sāctos pro quorū gloria certatur,
 adesse Principi, qui Religionis causā am-
 plectitur, & ut cōmilites in eius quasi
 exercitu merere. Habebis sine dubio fa-
 uentē in illis vndis Deū, quas aliquando
 soli instar sub pedibus indurauit: quarum
 diuulsi hinc inde fluctas, & velut in mæ-
 nium molē excitati liberum assertis in li-
 bertatē agminibus iter aperuerunt. Tum
 vero ingē, nobis oborietur fiducia, fore ut
 Regno tuo benè stabilito, & impietate de-
 bellata triumphis aliquando tuis Orientē
 addas Occidenti: maiorū tuorū gloriam
 æmulatus qui Romanorū Pontificum co-
 hortationes, non minus religiosē, quā ipsa
 Dei præcepta susceperūt. Eo te Sanctissi-
 mus ille Ludouicus inuitat, cuius tu & no-

Ludoui-
 cus noster
 S. Ludo-
 uici imi-
 tator.

mine gloriaris, & facta imitaris: primi
 mi profapia tuæ Principes excitant, qui
 Apostolica Cathedræ auctoritatem de-
 fendendo, Religionem propagando fir-
 missima Regiæ domus fundamenta iece-
 runt. Sequere dilectissime fili, Mundi
 ornamentum, cæli mandata: effunde
 iram tuam ingentes, quæ Deum non no-
 uerunt, ut thesauros diuinæ pietatis in
 cælo reconditos habet Maiestas vestra,
 cui Apostolica auctoritate cum intimo
 affectu benedictionem nostram impar-
 timur.

Datum Romę apud Sanctam Mariam
 Maiorem, sub annulo Piscatoris
 die 4. Septemb. Anno 1621.
 Pontificatus nostri
 anno primo.



LITERÆ
REGIS CHRI-
STIANISSIMI AD
SUMMVM PONTIFICEM.

PRO IMPETRANDA
Canonisatione B. Ignatij Soc.
IESV Fund.

CVM Rex Christianissimus
rogatu admodum R. Pa-
tris nostri Generalis, pro
ea beneuolentia, qua Societatem
nostram prosequitur, suscepisset
promotionem Canonisationis B. P.
Ignatij, tanta deuotione in eam
exarsit, vt ex illo tempore
B. Patrem acceperit in Patro-

num, & tutelarem. Itaque cum literas iam exarasset ea de re ad Sanctiss. Dom. N. Paulum V. eius audita morte alias destinavit, & propria manu scripsit ad eius successorem Gregorium XV. quarum exemplar sic habet, latinè ex Gallico fideliter expressum.

SANCTISSIME PATER.



V *M* nulla gubernatio felicius initiū possit ducere, quā ab alicuius negotij diuinā gloriā spectantis gestione, *V*estra Sāctitati nō erit iniucundum, si postulatio mea, qua primū cōpello recentē vestrū Pontificatū, agat de illo opere quod nō minus paternā vestram pietatē declarabit, quam Religionis igniculos diuinitus in me immisos accēdet. Ab ineunte siquidē atate per PP. Soc. Iesu in fide, bonisq; morib⁹ institutus, eos semper

cos sēper conscientiaē meae in sacris confes-
 sionibus rectores adhibui: qua in re ut mi-
 hi cumulatissimē satisfecerunt, sic bene-
 uolentiaē meae fructum uniuerso eorum
 Ordini cupio esse communem. Itaq; cūm,
 ut accepi, causa Canonisationis B. Igna-
 tiij eiusdem Societatis Fundatoris probē
 sit cognita, & publicis instrumentis con-
 testata, nihilq; ad tam sancti operis con-
 summationem desideretur, quā rata V.
 Sanctitatis voluntas, oro, quāsoq; ut eum
 in Sanctos referre, & sacro illo honore
 toti orbi colendum proponere dignetur.
 Spero equidem à V. Sanctitate beneficia
 non mediocria, sed nullum expecto maius
 hoc vno; quod praeter utilitatem quam in-
 de consequar, vestrū etiam Pontificatum
 felicitate cumulabit. Diuina certē proui-
 dentia quae animos nostros inflamat, eo-
 rumq; motus pro arbitrio regit, huc pieta-
 tis sensum ab annis iam aliquibus conce-
 ptum, ante hūc diem in publicum prodire
 non permisit: opus tam eximium V. San-

fu Ludo-
 uico Regi
 cumulatē
 satisfec-
 runt.

Ludou-
cus fidei
Catholi-
cæ propa-
gationē,
& hære-
ticos ex-
tirpatione
vehement-
er exoptat.

*Et tati, mihi verò petitionis huiusce quæ
Primogenito Ecclesiæ filio maxime conue-
nit, gloriam reservando. Atq; hic titulus
eam alte animo infixus meo, quàm bono
iure à maioribus meis usurpatus, me dies
noctesq; stimulat ad Catholica fidei am-
plificationem, & hæreseos perpetuam ex-
tirpationem, facitque ut eo vehementius
hæc consecrationem efflagitem, quod eius
mihi patrocinium afforesperem ad illud
efficiendum, cuius causa in vitam homi-
num missus est, quodq; ab eo institutus Or-
do tam ardentem, tamq; vehementer exe-
qui perseverat. Id sanè Regno meo per-
commode accidit ut Divinus ille vir Lute-
tia Parisiorum literas didicerit: eodem lo-
co socios sibi primos adiunxerit, in Monte
Martyrum prima Societatis suæ cunabula
collocarit. Quare novum Dei fauorē pa-
ratum habebo, si V. Sanctitas ad meam
postulationem concedit, breui ut inter Di-
uos Celites referatur. Atq; ut primā hanc
à me profectam videt, sic obnixè consendo*

ut principem locū teneat inter eas actiones quas bonas sanctasq; à vestro Pontificatu expectamus: quem cupio Deo esse acceptissimum ad sui nominis honorem & gloriam, Ecclesię edificationem, & Christianorum omnium utilitatem.

Parisiis 14. Febr. 1621.

His literis adiunctę erant ad eundem Sanctissimum literę Illust. Cardinalium Rupifucaldij, & Rethienfis: nec non & Excellentissimi Ducis Luyneï, quibus testificabantur quanto desiderio Rex Christianissimus Canonisationem B. Patris exoptaret. Has Regis literas, & alias cum Orator Regis Christianissimi Sux Sanct. in manus dedisset, & postulatum Regis ipsi copiosius exposuisset: Pontifex collaudata Regis pietate, & ostensa voluntate gratificandi, respondit in eum modum, quem in literis ad Re-

gem datis posuit : quarum tenor hic
est ex Italico sermone, latinè expref-
sus.



G R E G O R I V S

P A P A X V.

D I L E C T E I N C H R I S T O
fili noster.

Salutem & Apostolicam Benedictionem.



*Anta pietate, & religione
plena est V. Maiestas, tan-
toque desiderio fertur in
diuini cultus augmentum;
ut dabitari non possit, quin diuina inspi-
ratione incitata, eo animi affectu à nobis
Canonisationem B. Ignatij Societatis Ie-
su Fundatoris postularit. Sed quoniam
inter eas actiones quæ ad Summos Ponti-
fices referuntur, ea quæ solennem cæle-
stium hominum Consecrationem respi-
cit, primum semper locum obtinuit, iique*

in ea nunquam nisi ex Spiritus sancti ductu progressi sunt : rem tantam sine grauißima consideratione decernere non possumus. Quia tamen Vestra Maiestati satisfacere cupimus, cuius merita, & auctoritatem plurimi facimus: nobis erit iucundissimum posse omnibus quidem eius precibus annuere, sed isti maxime petitioni, quam primam esse voluit. Quare confisi diuinam bonitatem nobis demonstraturam quid hoc in negotio sit agendum, credimus etiam fore ut eam cordi nostro voluntatem inspiret, quæ sit ad ipsius gloriam, & vestra Maiestatis consolationem: cui abundanter de nouo paternam nostram benedictionem largimur. Romæ 22. Martij Anno Domini 1621.

ANno deinde consequenti cum & impetrata, & perfecta Romæ esset ea Canonisatio, voluit idem Rex optimus eius suæ pietatis toto suo

Regno in iis vrbibus in quibus Societas habet domicilia, extare celebre aliquod monumentum: atque datis ad Prouinciarum Præsides literis hanc ipse solennitatem indixit. Exemplum verò earum, quas ad D. Du Bellay Vice Sacra Andegauenſium Propreſectum dedit, hoc eſt è gallico latine redditum.



DOM. DV BELLAY

V. I.

PER ANDEGAUENSEM PRO-
uinciam V. S. Propreſecto.

LVDOVICVS REX.



*Um haectenus religione peculia-
ri B. Ignatium Societatis Iesu
inſtitutorem, & B. Franciſcum
Xauerium ſumus proſecuti, quos & ſpe-
cialiter patronos elegimus, & eorum
Canonifationem à Sanctiſſimo D. N.*

Gregorio XV. ipso Pontificatus exordio
 pro singulari gratia & beneficio humili-
 ter expetiimus: cumq; nostræ postulationi
 annuens Summus Pontifex maxima cere-
 monia die 12. mensis Martij Romain Ec-
 clesia Sⁱ Petri eos in Sanctorum nume-
 rum retulerit; insuperq; concesserit ut qui-
 buscunq; in vrbibus Domos & Collegia
 habet præfata Societas, semel eius Cano-
 nisationis Festum celebretur, plenariam
 in eam diem peccatorum remissionem li-
 beraliter indulgendo: Nos, qui huius Fe-
 sti, utpote per Nos obtenti, pars magna
 sumus, volumus quoq; eam solennitatem
 quanto maximo fieri poterit apparatu
 transigi. Qua de re Illustrem tuam Ma-
 gnificentiam duximus admonēdam, qua-
 tenus id fieri cures in vrbe nostra Flexia,
 quæ ad ditionem tuam noscitur pertine-
 re. Hoc igitur opus in tua fide reponen-
 tes, Deum tibi propitium precamur.

Datum Santonibus 2. Maij 1612.



I N
SOLA SCRIPTVRÆ

SACRÆ HISTORIA

Veritatem reperiri.



O R A T I O V.



VOCEM æternæ veritatis anni huiusce decursu audituri, VIRI ORNATISSIMI, quæ commodiore via in sacram intrabimus Academiam, quàm per assertam veritatem, & ab eorum qui illam in iniustitiâ detinent, iniuriis vindicatam? Nam cùm in rebus humanis nihil suavius, nihil naturæ nostræ sit convenientius, quàm simplex sine fucò, & fallaciis veritas; illorum qui ingenij monumentis ad posterorum commendationem grassari voluerunt, repertus est nemo, qui non humanitatem profiteri suam in veritatis affectatione voluerit. Sed quoniam tenuissima res est, & diuinæ quodammodo naturæ citima; hominum autem ple-

rique in solis corporibus terreno principiorum genere confectis mentem defigunt: euanesceit aliquando; & subtiles indagantium conatus eludit, Cum enim illam ad exemplar meditationis suæ in aspectabilem immersæ materiam formare contendant: mirum non est si alieno in loco vestigata non appareat, pro se autem speciem quandam affectatæ virtutis supponi promittat. Ridiculum profecto vanitatis genus, expressam in cogitationum tuarum admiratione, tanquam in speculo imaginem osculari, & cum deceperis ipse te, amantibus veriposteris inane simulachrum, quod de Helena fabulantur, relinquere. Et id quidem si soli peccarent Philosophi qui in naturæ indagatione versantur, esset ferendum, Auditores: cum in ea materia posteritas quæ incauta fuerit, errorē à maioribus accipiat non perniciosum, quæ acuta & subtilis eundē nō difficili negotio corrigat. Historicos autem qui se rerū gestarum memoriam omni ævo propagare profitentur; qui futura seculi præteritorum recordatione ad virtutem & felicitatem informare moliuntur; qui eximia maiorum facinora quasi paternā atque auitam possessionem nepotibus tradere se gloriantur; eos umbram pro corpore, laruam pro persona, mendacium pro veritate proponere; id vero tam est iniquum atque intolerabile, vt illos non iam ex albo scriptorum expungendos censeam, sed infra homines, si fieri posset, amandandos. Quippe qui nostra nec inutili, nec inerudita curiositate abusi, nos in eum sæpenumero traxerūt errorem, in quo insistere vitæ exitiosum est, à quo emergere naturæ arduum atque difficile. Stulti sanè ho-

*Historici
veritatis
negligentes
vitæ hu-
mane plu-
rimum no-
cent.*

mines si nescierunt, improbi si viderunt vitæ nostræ oculum historiam esse, h istoriæ veritatem: hanc illi qui eripiat ducem hominibus dare, non qui ad bonam, beatamque vitam deducat, sed improuidum ac deuium qui in scopulos, voragineſque præcipitet. Hanc deceptæ mortalitatis errationem tanti supremus omniû gubernator æſtimauit, vt eam ſuæ quoque prouidentia partem faceret, certamque, ac definitam viam omnibus aperiret in qua veſtigium ponere ſalutare eſſet, decurrere glorioſum. Illa eſt, Audit. immortalis ſacrarum literarum auctoritas & amplitudo, quibus omnia benè beateque viuendi ſubſidia tam diligenter explicantur, nihil vt deſiderare poſſis; tam eleganter, vt alibi commodius nihil reperiās; tam porro certo, tam ſine vlla mendaciunculi ſuſpicionē, vt cœlum, terramque commoueri facilius ſit, quam leuiſſimum diuinæ legis apicem præteriri. Hæc eſt inexpugnabilis arx veritatis, receptaculum virtutum omnium, caſtellum recti atque honeſti: hæc eſt de lapſa de cœlo ad cognitionem omnium regula, qua omnia veri, falſique iudicia diriguntur: hæc eſt arca medica, quæ publico medetur errori, & mendacij peſtem exſecat, tanquam ſtrumam ſapientia. Nolo equidem diuinorum codicum laudes oratione cōſequi, quibus huius lycei parietes quotannis perſonant: ſed quoniam ex Euangelicæ hitoria floribus annuo ſtudio ſertum conficere aggredior, non erit, arbitror, alienum hoc in conſeſſu demonſtrare penes ſolam ſacram vtriuſque inſtrumenti hitoriam reſidere veritatem: fluere autem res profanas mendaciorum ſordibus lutulētās. Ac ne quis veſtrum

materiæ benignitate perculsus tacitis cogitationibus, nihil facilius in hac erudita sapientium Theologorum coronæ effici posse existimet; rem ita tractabo quasi contra Iulianos & Porphyrios sempiternos Christi hostes ad barbaros & ignotos iudices, qui neque gratia tangantur, neque odio, controuersia recentis actio afferatur. Dico, inquam, etiam alienorum iudicio, qui modo homines fuerint, historiā quam canonicā appellamus, quam pro diuina veneramus, ab omni falsitatis suspitione penitus esse remotā: historicorum autem profanorum scripta, præter aliquos insigniores locos notis veritatis inuitos, aut voluntate fallendi, aut quadam quasi necessitate nesciendi, erroribus esse corrupta.

Quod ut melius conficiatur à nobis, reuocate cogitationem vestram ad tres illos sapientium filios, qui coram Dario, & Senatu Persico de re omnium fortissima copiosè, ut illis temporibus, prudenterque disputarunt. Nam cum eorum primus vinum, furiosissimum emotæ mentis tyrannum: Reges alter, illos mortales Deos, quorum quo capaciore est volūtas, eo infinitius imperium, plurimum posse contenderet: Zorobabel decoctæ vir sapientiæ, vino Regibusque, Mulieres primum, audacissimam, ambitiosissimam, imperiosissimam hominum nationem: deinde quasi se corrigendo reprehenderet, mulieribus ipsis prætulit victricem omnium veritatem. Figuram hæc Audit. in vestrorum animorum conspectu pono, ut cum scriptores externos vitiis & rerum imbecilliorum similitudine deteriores fieri ostendero, sempiternæ veritatis maiestatem in sacris codici-

*Historia
profana
fabulis
corrupta
sunt.*

bus, potentiamque adoretis. Quid est igitur in alienis monumentis quod cum vino conferamus? Opinor fabulæ non ad exempli fidem allatæ, sed ad aurium oblectationem comparatæ. Nam & earum primi artifices Poëtæ bicipitem suum Par-nassum Baccho æquæ ac Phœbo consecrarunt: neque aliter quam vino quasi equo vectos in eo spatari se gloriantur: & ex cum sui dulcitudinem in auidas aures semel infuderint, tot errorum vapores emittunt in ingenium, vt opposita eiusce-modi caligine ad purum, syncerumque veritatis splendorem nequeat penetrare. Fabulas autem hic appello, non Poëticas illas corporum mutationes, non Gorgones & Harpyas aniles ineptias. Sed confictas ad similitudinem veri narratiunculas, quæ grauioribus cibis quasi pulmentum adiunguntur ne nauseam pariant: quibus non reficitur quidem legentis animus, sed titillatur cognoscendi gustus, vt ad eum reliqua historiæ series cum suauitate affluat & illabatur. Habet namque talibus condimentis opus veritas vt sapiat; & quo minus suapte natura potest, subsidio sibi mendacium aduocat. Putatis-ne, Audit. cum in celebri illo totius Græciæ conuentu Herodotus subito & improuisus apparuit, minus eum placitum si puram putam veritatem splendida & suauis oratione popularibus suis enuntiaffet, quam cum aspersas dulcibus mendaciis cantilenas recitauit? Non placet illud voluptatis aucupium Ctesias, qui fabulatorem eum & mendacem appellat, ei-que repugnantia scribit in omnibus. Eximiè profecto, & ad posteritatis vtilitatem luculenter, si quæ scribit Ctesias, aut ipse vidisset, aut idoneo-

rum testium relatione didicisset. Hoc ipse quidem profitetur: sed cum Indici fontis miracula commemorat, cuius aqua in aurum mutetur, limus concreascit in ferrum: è quo confecti gladij in terram depacti grandinis & tempestatum sint auerrunci: cum in fluuio quodam mel è petra scaturire facit; cum Pygmæos describit barba ad pedes ante demissa, capillo in tergum ad genua usque pendente, quibus succinctis pro veste vtantur: cum populis incerti nominis octonos in manibus, pedibusque digitos assignat, aures autè ad cubitos usque protendit quæ totos humeros conuestiant: nos videlicet barones stupemus, & illam fabellarum dulcedinem ad infaniam usque vanæ credulitatis, ad furorem concipiendi mendacij percupidè haurimus. Puderet me hoc loco vini illius mentionem facere, & eius imbecillitatem vobis demonstrare, si eius farinæ homines pudicum esset historicorum sibi nomen, & gloriam vindicare.

Sed quoniam deposita est ea controuersia, & *Scriptores* tam perniciosæ ebrietatis profligata lis: veniamus ad id aliud quod in rebus mortalium publicis principem amplitudinis locum dicitur obtinere. Assignaturis Regi in cuius manu vita, morsque hominum est: cuius salutem, quiete, infelicitatem vota ciuium laboresque procurant, cuius palatia priuatæ domus ædificant, ministeria familiæ conficiunt, mensæ delicias subditorum sudor & parsimonia instruit: pro cuius capite omne periculum adit tota si fieri potest Respub. ad cuius nutum prouinciæ & imperia commouentur. Huic rerum humanarum Deo non exter-

*externi
spe & me-
tu, pec-
cant in
historia.*

na tantum operæ, non corporum membra, non priuatorum facultates, sed ipsi etiam animi, voluntatesque subduntur. Quod sentiunt ad iudicij ipsius libellam exigendū est: quod cupiunt ad voluntatis illius regulam dirigendum: quod metuunt in eius arbitrio est, quod sperant ab eo expectatur. Vt autem spe, metuque omnis hominū vita continetur, qui vtrumque in æterius potestate collocauit, is sui iuris esse desit & in impotentis domini transit seruitutem. Ad hoc igitur Regum caput scriptorum peccata refero quæ Regum ipsorum amore & metu, quæ innata adulandi libidine, quæ insita patriæ charitate, quæ hostium publico, aut priuato inimicorum odio committuntur. Hic iam non disputo liceat ne historico virgulam censoriam ad Principum vitam extendere, & de eorum factis iudicare, quos Deus in ceruicibus nostris imposuit vice sua adorandos. Scio equidem Regum famam non minus sacram esse quam vitam: & eos immani se obstringere sacrilegio, qui de Principum existimatione vel minimum detrahunt. Quia tamen humanum aliquid & ipsi patiuntur, magnasque virtutes magnis sæpè vitiis decorant; hoc dico, historicos qui vtrumque spectant, suppressis improbè factis, laudabilia tantum in commentarios referre; unde posteriorum ætatum scriptores tamquam ex puro fonte hauriunt; hinc fieri vt parte tantum meliori quidem, sed tamen vnica homines in cognitionem posteritatis trāsmittantur. Quis enim nostrum Herodis Ascalonitæ flagitia, domesticas turbas, furorem atque amentiam fama accepisset, si Nicolai Damasceni sola historia ad nos per-

uenisset? quam ab eo scriptam non ad posteritatis cognitionem, sed ad gratificandum Regi suo, testatur Iosephus, dum eius hominis nequitiam, & importunissimam tyrannidem leui quasi orationis declinatione euitat, parricidia, calumnia in innocentes adhibita obtegit; quædam magnificè gesta omnilaudum genere prosequitur, cōtraria verò diligenter excusat. Quanquam si rebus iniustus potest aliqua iusta esse defensio, hoc eius consilium, si humanæ vitæ, non scriptionis solius ratio spectatur, omni excusatione nō caret; cum, ut sunt, hominum ingenia, nuda veritas omnibus telis & iniuriis sit exposita. Neque enim est, ut aiebat ille, tutum in eum scribere, qui potest proscribere. Sensit id Cremutius Cordus in Senatu Romano postulatus Tiberio Principe, quod editis Annalibus, laudatoque M. Bruto, C. Cassium Romanorum vltimum appellasset. Nam inedia vitam finiit vir æternitate dignus, & capitale habuit sub improbo Imperatore boni ducis laudasse virtutem.

Quid dicam de adulatione magnæ fortunæ peste, quam necessariam fecit hinc imperantium superbia, qui stupent inter mentientes, ipsaque consuetudine pro veris blanda audiendi perducti ad ignorantiam sui, tam magnos se, quam audiunt, credunt: inde asseclarum extincta libertas, & fides in obsequium seruale submissa, dum nemo ex animi sui sententia loquitur aut scribit, sed adulandi certamen est, & vnum amicorum omnium officium, vna contentio, quis blandissimè fallat. Ita omnium ingenia assentatione aut corrumpuntur, aut corrumpunt, Proh Deus immortalis! tamne

*Adulatio
ut principi-
pum hic
historico-
rum scopu-
lus.*

est cœca, tam sui amans hominū natura vt alteri
potius quam sibi de se credere velit: & ei quidem
qui si lucellum olfecerit, nihil gloriosum non af-
fingat, si pœnam timuerit, nihil turpe nō taceat?
Egone vt existimem Berenicem, cum eius coma
vanissimis Poetarum versiculis tantum laudaba-
tur vt etiam inter sidera cōsecraretur, caluitium,
deformitatemque suam in speculo non sensisse?
Putem-ne Alexādrum sibi Deum videri potuisse,
cum is fulmine armatus vulgari pictorum assen-
tatione formaretur, cum iustissima Apellis indi-
gnatione: non enim credent posterī, aiebat, Ale-
xandrum fulmen emisisse, hastam vibrasse igno-
rabunt. Peto à vobis, Audit. si quis Deus Cyrum
illum magnum ab inferis excitaret, isque se, vi-
tamque suam in Xenophōnteis scriptis legeret;
tam-ne esset impudens, vt talem fuisse se qualis
describitur, peieraret? At, inquires, boni Principi
imaginem sœculis dare voluit Philosophus; &
qui nēminem reperire potuit, vnum illum di-
cendo fecit optimum. Esto id sanè Heroēm igitur
de Poëticiis aliquē vt Agamemnonem, vt He-
ctorem, vt Æneam eligere debuerat, in quo an-
ticipata fictionis cognitio de veritate non præiu-
dicasset, non hominem suo opte præstantem inge-
nio, cui aduentitium splendorem qui addit, is &
historiæ fidem detrahit, & veram gloriam obscurat.
Atque vt ad propagandam sui cum laude
memoriam ingeniosa est ambitio, aliquam multi
factis & virtute florentes reperti sunt, qui post
trophæa per orbem terrarum sparsim erecta,
commentarios de rebus etiam suis scripserunt,
qui vel perennarent ipsi, vel historiam scripturis
vberem

vberem rerum segetem ministrarent. Alio quodam vanitatis genere laboravit Alexander Mammææ filius, qui literatos viros sibi perpetuo adesse iubebat, vt singula publicè, priuatimque gesta ipso docente addiscerent, si fortè ipsi non adfuissent, eaque petebat vt si vera essent, in literas mitterent. Quibus gloriæ, si sic loqui fas est parasitis, quorum vt plurimum quo vita deterior eo gloriosior pagina fuit omnem habere fidem, est, vt dicam leuiter, ipsam prodere veritatem.

Ad eundem sui amorem, tanquam recti synerique sermonis scopulum, appellant quos priuata gratia, quos publicum aut domesticum odium transuersos agit. Nam vt animi sensus in verba deriuatur, & perquam libenter sese prodit concepta interius affectio; vbi amare, vbi odisse aliquem occæpimus, benè aut secus eius dicta omnia factaque æstimamus, eisque colorem damus quæcunque motus animi subministrat Herodoto quid causæ fuit cur inter innumerabiles fabulas, diceret etiam Corinthios subterfugisse nobilem illam pugnam ad insulam Salamina? odium gentis à qua spretus illususque fuisse dicitur. Quæ res Xenophonti probra & conuicia suggerit quibus Menonem continenter incessit? in offensa erat apud Platonem cui Meno amicus fuisse dicitur. Quid Philistum coegit verbis cum Dionysio iuniore digladiari? concepta cum ipso discordia. Timæus autem honestiore velos suam offensionem obtegens Agathoclis tyranni dotes ingenij, & præclare facta vel dissimulat, vel in contrarium detorquet. Quid ita? Quia eius im-

*Amor &
odium pe-
stes veri-
tatis histo-
rice.*

manitatem execratur, & bonus videri affectat, improbos omni ex parte vituperando. Imprudenter profectò; nam dum hominem putat depingere, monstrum facit, nulla, ut ille ait, virtute redemptum à vitiis; dum historiam promittit, dat calumniam. Huic suppar apud Latinos Sallustius vir omnium libidinum, illo suo truci & violento dicendi genere aliorum vitiis perpetuo irascitur, quasi inuideat: Ita ex aliorum insectatione nequitia suæ integumenta venatur. E diuerso eundem Xenophontem ad prædicanda Persarum instituta, eorundem Persarum quam expertus est, magnificentia impulit. Timæum quoque Taurominitanum ad Timoleontis encomium potius quàm historiam, perduxit eius in patrem suum Andromachum beneuolentia; ut qui regia cum dignitate, cum posset, non spoliaret. Atque illa leuitatis & mendacij parens animorum. Atio, tam est omnibus ad videndum exposita, ut Varro scriptor grauiissimus, historicos asseruerit quasi data opera, & quasi ex industria per multa dissentire. Id cum diceret vir sapientissimus; aspiciebat opinor ad Hellanici & Acusilæi discrepantes in genealogiis sententias: meminerat Hesiodum ab Acusilæo, Hellanicum ab Ephoro sæpenumero mendacij coargui: requirebat apud se quid causæ esset cur Ephorum Timæus, Timæum sequentes historici, Herodotum denique omnes reprehenderent: fortasse & Timæum accusabat quod in rebus Siculis cum Antiocho, cum Philippo, cum Callia concordare non esset dignatus: Sed idem vitij genus in iis qui Atticas Argolicasque scripserunt historias animaduvertebat. Illud

certe queri videbatur quod ut quisque illorum
aduersus virum aliquem aut populum illustrem
affectus erat, ita sibi de illo credi, eleuata auctori-
tate cæterorum, postularet, aut eorum profectò
deridebat amentiam, qui patriæ charitate occu-
pati, ambitiosa domesticatum rerum ostentatio-
ne fucum posteritati facere sperauerant. Quasi
tam hebes aliquis vllò sæculo reperitur, ut Græ-
corum laudes ab Atheniensi posse obteri existi-
met: aut à scriptore Romano Romani nominis
dedecus tradi posteris expectet. Quis enim sem-
piternam ignominia notam amicis atque paren-
tibus inuri debere arbitretur? amicis dico, & pa-
rentibus? imo certe ignotis quibusdam homini-
bus, quos natural quadam animi propensione,
nescio vnde concepta, diligimus. Nam sæpè hi-
storias voluentibus accidit ut cum duo Reges de
summa rerum decertant, repentino quodam &
improviso fauore in vnius potius quàm alterius
castra transeamus, & ei victoriam, felicitatem-
que cupiamus; cum magnanimi, liberalis, pulchri
etiam ducis, res benè gestas eleganter expositas
legimus, prosperos illi successus gratulemur, me-
liores optemus, aduersam eius fortunam inuiti
spectemus, mor em præsertim si in præclaro quo-
dam conatu extinctus est, tanquam recens funus
lacrymis & misericordia prosequamur. Nos igitur
otiosi spectatores quorum minimum interest
quis occidatur, quis triumphet, motu illo quem
vanum & inanem esse scimus, ad ignotum homi-
nem amandum, & ei bene cupiendum imbelli-
mur; & tam erunt sui præcætes historici ut in de-
scribendo vno homine tanquam in adornanda

Sparta non laborent ambiciosius? Ita certè comparatus animo fuit Titus Liuius vir alioqui grauissimus, qui post bellorum Punicorum narrationem respirare se proficitur, tanquam rerum non gestarum scriptor, sed gerendarum socius & adiutor extiterit. Idem quoque cum omnia sua deberet Augusto Cæsaris hæredi, tamen in bello ciuili exponendo id facere non potuit, quod Cato ingerendo, vt neutri addictus parti pro æquitate, reque publica certaret; sed ipse amici sui partibus Cn. Pompeium tantis laudibus tulit, vt Pompeianum eum Augustus ipse appellaret. Tantum valuit ad obliterandam recentium beneficiorum memoriam clarissimi Imperatoris virtus, dignitasque tractata.

In omnibus historicis neu aliqui & contra veritatē peccata reperiuntur. Dicat hoc loco fortasse aliquis colligere me vitiosos historicos, cum aliquos ingenio, fideque præstantes fuisse sciamus, quos neque potentiorum gratia, neque ciuium amor, neque alia res vlla ab officio reuocauit. Quis enim vnquam Polybio mendacii crimen impegit? Quis Thucydidem in ipsa diuturni exilij iniuria malè Atheniensibus, malè Cleoni, malè ipsi Brasidæ suæ calamitatis auctori præ ira, aut odio dixisse criminatur? Cur autem credamus viros optimos, atque integerrimos quos elegit antiquitas vt præcedentium ætatum formam & imaginem sibi repræsentaret, tantæ fuisse leuitatis, ne dicam impudentiæ, vt temerè, nullo proposito præmio, pro historiis fabulas, pro veritate mendacia, pro rerum gestarum exemplis Milesiarum vanitatem humano generi vellent obtrudere? Audio: virtutem sapit hæc oratio. Sed non sapiebant Græca, Romana-

que pectora quibus mentiri, & temporis voluptatisque causa fingere concessum semper fuit. Plato certè ei quem ciuitati à se excogitatae præficit, leuitatem illam imperat pro necessaria: mendaciunculis autem partem illam orationis aspergere qua factum exponitur, de quo rei in iudicio controuersantur, præcipiunt dicendi magistri non vanis circulatoribus, sed optimis viris, oratoribusque perfectis. Atque ut moremur in historicis, Iunio Tiberiano Urbis Præfecto in familiaris sermone sanctè affirmabat aliquando Flauius Vopiscus, neminem scriptorum quantum ad historiam pertinet non aliquid esse mentitum. Prodebat quinetiam in quo Liuius, in quo Salustius, in quo Cornelius Tacitus, in quo denique Trogus manifestis testibus conuincerentur. Et quoniam Thucydidis integritas opposita mihi est, ad momentum temporis Flauio Iosepho subscribere me profiteor, affirmanti eum in multis tanquam fallacem accusari, licet scrupulosissimam sui temporis historiam conscripsisse videatur. Nemo enim ab historico iurato res vnquam exegit. Cæterum cum aliud sit mentiri, hoc est scienter alios in errorem inducere, aliud mendacium dicere, hoc est quod tu verum, quamquam falso existimas, pro vero venditare, in quo nihil à boni viri officio discrepat: cum plerosque veterum in conscribenda historia mentitos esse demonstra-uerim, superest ut efficiam probabiliter, qui mendacium non dixerit esse neminem.

Qui de re omnium fortissima apud sapientes *Rerū multarum*
 Persas tertius disputauit, vinum & Reges mulierarum
 ribus posthabuit. Sed illa humanæ naturæ por- *ignoratio,*

*falsa com-
memoran-
di necessi-
tatem hi-
storicis
imponit.*

tio cum propter sexum imperfectum, & rudem, & vt cum Philosopho principe, pace eius conditoris dicam, penè monstrolum, multis abundat vitiis: tum illud præci, uè innatum habet, vt emnis expers scientiæ in perpetua rerum magnarum incuria & ignoratione delitescat. Itaque isti generi perfimiles facio scriptores eos, qui licet maximè velint incorruptam historiæ fidem ad posteros propagare, falsum tamen æquè ac verum sine discrimine ex mera ignorantia pronunciant.

Quorùm maximam partem esse persuadet tum fabularum nebulis implicata primorum sæculorum antiquitas: tum humani ingenij angustia, quæ veritatem omnem nec indagare possunt, nec continere: Denique nonnullorum credulitas aut etiam mala fides, qui pia præcedentium scriptorum dicta suis ponderibus examinare negligunt, ad obuia quælibet adhærescunt, eaque nobis pro certis, exploratisque obtudunt. Id primus ille asseruit luculentus scriptor, & elegans: Bene habet: quid deinde? In eadem est sententia fide æqualis sæculo inferior ille alius. Cedo quid postea? aliter quidem narrauit ille, hic alter: sed Neoterici penè omnes primum illum sequuntur, Præclarè, sed cur illum potius quàm hunc? quia vetustior est. Atqui in pluribus narrationibus fabulæ præiudiciū est antiquitas. Quia grauis suorum temporum testis, & integer. Quid suorum temporum scriptoribus fidei debeamus, quæretur postea: iam dico tam grauem non esse, tam integrum quisquis est, vt aliorum relatione falli, credulitate sua fallere non potuerit. Quia plures eum sequuntur. Heus tu, velut in Senatu Roma-

no capita numeras? scito in bonis rebus plures esse qui meliores, & quæ pars veritatem habebit, fore maiorem. Audio: sed ab alia parte stare veritatem, volo mihi luce meridiana clarius demonstrari, vel hunc sequor, & si errandum est, pecco cum pluribus. Tua igitur sapientia est, inter stultos insanire? tu viam amas popularem in qua directè itur ad lapsum: Ostende me labi. Ostende tu potius eum quem sequeris certum esse ducem, nunquam errasse, ne errare quidem potuisse. Fateor equidem in tanta scriptorum copia, alios aliis longè locupletiores esse, & religiosiores: sed cum vtrique sint homines, id etiam detur oportet, in omnibus vni alicui credere stultum esse, alteri in nullo, iniurium. Atque id quod de eiusmodi ignorantia disputo, nolo tantum videri pertinere ad tempora scriptoribus ipsis vetustiora; vt cum de Alexandro quærent vino-ne, an veneno perierit? cùm de Themistocle, an Tauri sanguine, an toxico sibi mortem consciuerit: quibus in historiis certum modo habemus viros illos interuisse quo casu, & ratione? id in omnium opinione relinquitur. Sed ad illos etiam historicos referri debere contendo, qui res suo tempore gestas describunt. Non dubito, quin hoc dicto vestram, Audite. tentauerim patientiam, vt vix quicquam causæ appareat cur nemo vestrum importunitatem meam explodat atque exhibilet. Si tamen hoc ab humanitate, modestiaque vestra impetrauero, vt ad punctum temporis vos à dissentiendo sustineatis, dicam audacèter quod sentio, ne æqualibus quidem suarum historiarum scriptoribus temerè esse credendum.

*Suorum
temporum
scriptores
fidei per-
parum me-
rentur.*

Quod vt conficiam non tenebo vos diutius in Regum profanorum temporibus, quibus explicata vitia in suo regno fuerunt : sed rem totam Dionis Cassi, nobilissimi atque integerrimi viri penè verbis quàm breuissimè repræsentabo. In quo homine nemo vnquam aut doctus facundiam, aut laborem accuratus, aut rerum cognitionem aulicus, aut Reip. administrationem Princeps, desiderauit. Nam in Græcia disciplinarum omnium parente natus, vixit sæculo non ineredito; duodecim annorum otium literatum & nobile in scribendo posuit : in Imperatorum consilia, & familiaritatem admissus, ipsos etiam dignitate pene attigit : patrem denique Consularem, iterato Consulatu superauit, maximasque prouincias summa cum potestate administrauit. Sic ergo disputat auctor grauissimus, licet in populari Reip. statu non pauci gratia & odio ducti, prout animus erat historiam scriberent, fuisse tum tamen in publicis commentariis, & scriptis ad Senatum, Populumque literis speciem aliquam veritatis: at mutata Rep. cepisse pleraque agi occultè : publicè autem gesta ad Imperatoris eiusque amicorum obsequium fuisse deprauata narrando : inde fieri vt multa conficta diuulgentur, multa quæ verè acta sint lateant in obscuro, denique secus omnia quàm euenerint edantur. Huc accedit ipsa Imperij amplitudo ; & negotiorum moles sanè infinita in tot prouinciarum administratione, tot gestione bellorum, tam crebra sociorum pacificatione, quæ præter eos qui conficiunt ipsi, nemo alius satis explorata habet, plerique ne auditione quidè accipiunt. Quamobrem

nēcessarium sibi esse res Romanas prosequenti ea in historia ponere quæ sunt ab aliis recensita, siue illa veritate nitantur, siue fuerint corrupta mendacio. Ita scriptor religiosissimus dum timet apud posteros offendere, culpam omnem in maiores traiecit, & impositam sibi fallendi necessitatem à prioribus historicis non sine iusta indignatione conqueritur. In eadem naui fuisse Nicolaum Damascenum Iosephus nos nuper admonuit: sed hic ipse censor aliorum, nondum eruditus omnibus persuadere potuit illam Herodiani templi structuram; quam tamen ita describit, quasi faciundo ipse operi præfuisset. Quid dicam de Ecclesiastica historia, in qua mentiri licet sacrilegio proximum sit, scriptores tamen magna ex parte hæretici, non immerito nobis suspecti esse debent de calumnia. Equidem Eusebianam de Constantini gestis historiam ita legere soleo, ut Nazarij, aut Eumenij Panegyricum; neque parciore in Iuliano laudando mihi videtur Ammianus Marcellinus, quam Mamertinus Consul, aut certè in Tiberio suo Velleius. Zozimum vero si quis roget quid in assidua Christianorum Imperatorum vituperatione secutus sit, aliam, opinor, instituti sui rationem reddet quam aut in dialogis Lucianus, aut Iulianus in Cæsaribus?

Atque utinam in solis antiquiorum monumentis expressa legeremus eius vanitatis vestigia, neque tam turpis iudiciorum corruptela nostrum etiam sæculum inuasisset! utinam in ea quam institui veritate comprobanda plus mihi laborandum esset, neque id quod habuimus ipsi in manibus, quod oculis penè vsurpauimus, vobis

*Histori-
corum no-
stra ætatis
lenior est
auctori-
tas.*

in testimonium afferre possem. Ante annos enim plus minus octo in viuis esse desit is, qui regis stipendiis alebatur ad historiam Henrici Magni conscribendam. Nihil isto loco exprobrandi causa, sed cōmonendi gratia dicam. Optimos & religiosissimos viros audiui qui dicerent, se præliis, & urbium expugnationibus interfuisse, quæ longè secus quam euenissent, ab historico narrabantur. Nominabant, quin etiam duces nonnullos quibus victoriæ laudem assignat historicus, quos omnium cōsensu illo die, neque locum illum, neque arma vidisse constaret. Dicās scriptorem illum non priuatis tantum pecuniis redemptum, sed regio etiam stipendio ad tentandam omnium patientiam fuisse conductum. Nuper autem cum furore & hæresi armatam rebellionem iustissimis armis coërceret Ludouicus noster Principum maximus, & factis ostenderet, quid summa pietas cum summa fortitudine coniuncta posset; quæro à vobis vllusne vestrum certo norit quid ad Montem Albanum, ad Pessulanum quid toto illo Vasconum & Pictonum tractu fortiter, & gloriosè, quid contra ignauiter & perfidè gestum sit? Admoueabantur ad vrbes castra regia, in ipso Galliarum sinu sublatis vexillis, ardentibus animis contra perfidiam iustitia dimicabat: stabat Rex adulescens in procinctu quotidie, quasi in aliquo virtutis & gloriæ theatro, palmas & triumphos non tantum causæ bonitati, sed etiam glorioso Regis amatissimi tyrocinio votis publicis cupiebamus; suspensi erant omnium animi expectatione victoriæ: iam litteræ, iam nuntij, iam veredi à castris, iam submissi ab urbibus exploratores, qui

quid eo loci fieret curiosè indagarent, civibus-
que suis fideliter rescriberent. Quid deinde? quid
expectatis aliud, Auditores, quam exploratissi-
mam non factorum modo, non dictorum sed ip-
sarum etiam cogitationum cognitionem? At ego
sanctè & verè affirmo toto illo tempore plus
nos desiderio credidisse, aut timori, quam rebus:
plus fidei, famæ, quam veritati dedisse. Tollite
illa spectabilia, vt expugnatione oppidorum at-
que castrorum, vt æquata solo mœnia, vt pactas
cum hoste inducias, quæ nemo homo facta igno-
rare possit: cætera quædam minus splendida, di-
gna tamen historiæ luce, quæ satis constanti ru-
more aures nostras peruagata sunt, dico vana ple-
raque, alia obscura, omnia incerta fuisse. O in-
credibilem hominum stupiditatem! ô intolera-
bilem gloriæ in tantis facinoribus iacturam! In
castris, in ipsi aggeribus nesciit miles quid in Re-
gis, quid in Comiti stabuli, quid in alterius du-
cis statione ageretur. Tendebat vnus ad meri-
dionalem vrbis portam, alter ad occidentalem, &
quasi totis disjuncti essent prouinciis, quid hic
vinceret, quid amitteret ille, nesciebant. In hac
rerum obscuritate quæ totæ sunt opinabiles, Po-
lybium mihi, aut Tacitum, aut Comminæum
constitue: quam multis illi diuinationibus, quam
crebris coniecturis non quid factum sit, sed quid
fieri debuerit, aut potuerit, more poëtico repræ-
sentare cogentur?

Scio equidem currere per vulgi manus quen- *De Mer-*
dam Mercurium, qui Europam annis singulis *curij Gal-*
peragrat, & si quid noui euenit, nostro nobis ser- *lici fide*
mone declarat. Sed & Mercurio fabulari, & via- *iudicium.*

tori licet impune mentiri. Certè rogatus à me aliquando maiorum gentium aulicus , nobis omnibus notus, cuius potissimæ in motibus ciuilibus partes erant, quantum fidei speciosæ illi saturæ deberemus : quod, inquit, ad res nostras atinet quas ipse aut gessi, aut oculis spectavi, epistolas germanas habet & veras : in multis aliis & fallit , & fallitur. En quicum in tenebris mices ! quem perplexæ atque difficilis viæ ducē eligas ! Videre mihi videor sexcentis , ab hinc aut mille annis virum aliquem peritum & eloquentem animum ad scribendam huiusce temporis historiam appellere , & excussis amicorum bibliothecis in obscuriore cuiusdam forulo , puluere sitoque obrutum nancisci librum cui titulus sit Mercurius Gallicus anni 1623. hic & tum hominem lætitiis omnibus gestientem *supra* exclamare, sustollere oculos, librum osculari. O me beatum ! ô gemmam antiquitatis ! ô theatrum historiæ ! videsis, illorum temporum scriptor est, non audita narrat, sed visa. O litteras ! ô narrationes ! nostro illum sæculo putem imposuisse securum sui ? tot reuinci potuit testibus quot tum homines vivebant in terris, & tam nauiter impudens ætate non imperita, non simplici esse potuerit , vt vel latum vnguem à veritate discederet ? ô felicem Mercurium ! magno ambitu flagiturat à doctis diurna libri vsura ; agrè conceditur in horam , gratulantur omnes de lucro. Quid plura ? nobilis historia Mercurij relationibus tanquam sacro Stilbonis igne illustratur : in orationis seriem Mercurij digressiones, præne dixi errores inseruntur , quasi gemmæ in annuli pala : nihil certum habetur nisi

quod dixit Mercurius : nemini venit in mentem contra mentem loqui potuisse Mercurium. O historiam omni exceptione maiorem ! ô homines ! ô tempora quibus eximium illud veritatis oraculum Dei prouidentia reseruauit ! Ridemus, Audit. errorem in quem posteros inducimus, & maiorum fraudes quibus nos ipsi pari modo ludificarunt, non sentimus.

Sed multa satis ut opinor superque dicta sunt de externis scriptoribus : de auctoritatis humane infirmitate nimis fortasse multa. Abripit iam & quodammodo absorbet orationem meam hitoria sacra nulli vnquam mortalium satis adorata maiestas. O viri magna veritas, & præualet. Eam igitur in scripturis diuinis integram, incorruptamque reperiri duplici ratione cōficio, & quod à Spiritu sancto veritatis omnis, scientiæque fonte purissimo syllabatim dictatæ sint, & quod à fidelissimis amanuensibus, virisque sanctissimis exceptæ, celeberrimo gentium omnium cōsensu admissæ, dignitatem suam hætenus cōseruarint. Quæ duo dum efficio breuius quam restantē dici possint, peto à vobis, Viri ornatissimi, ut conceptam ex profanorum vitiis molestiam suscepta mecum sacrarum litterarū recordatione abstergatis ? Atque imprimis horret animus, & refugit meminisse, repertos aliquando homines : (si homines dicendi sunt qui in humanis corporibus belluarum more sentiūt) qui Spiritum sanctum aut non probè scire quæ fierent, aut quæ sciret non enunciare fideliter, ore sacrilego pronunciant. Enimvero si illi diuinitatem abrogare voluerunt, & in rerum creatarum ordinē redigere,

*Sacra è
diuerso hi-
storia pu-
ram conti-
net verita-
tem quia à
Deo inspi-
rata est.*

individa Triadi fecerūt iniuriam. si cum Deum
 farerentur, aut ignorare aliquid, aut temerè &
 falso loqui posse putabant, nefariam ipsi diuini-
 tati contumeliam intorserunt. Quotus enim
 quisque cum Deum cogitat, sibi non informat
 mentem quandam æternam atque providentem,
 auctorem naturæ mortalis, ipsam tamen à con-
 cretione mortali separatam, actu sempiterno om-
 nia mouentem, omnia sentientem: sua luce instru-
 ctam, cu tenebræ nihil furentur: sua prædi-
 tam intelligentia, cui temporum vices nihil eri-
 piant: sua perpetuitate constantem, in qua neque
 desideretur futurum, nec præteritum evanescat.
 Huic naturæ qui ignotum aliquid posse esse con-
 tendat, is oportet aut à se Deum concipi non me-
 minerit, aut hominem esse se nesciat. Iam verò
 mentem illam plenè atque perf. ctè omnia in-
 telligentem, existinare suppressa re ipsa aliud ali-
 quid alterieffari, mutare quæ circumstant plera-
 que, narrare fabellas, quæ placeant: quid autem
 tamdiu circum rodo quod deuorandum est? pri-
 mam veritatem, cui tam est contrarium fallere
 posse quam falli, Deum ipsum fingere, mentiri,
 decipere, quid aliud est quam eum cum abie-
 ctissimis & leuissimis hominibus c. are? Ita-
 que cum nemo iam homo im. tum quic-
 quàm de diuinitatis amplitudine cogitare possit:
 nemo Christianus tertiam Trinitatis personam à
 diuinitate extorrem facere audeat; quis dubitet
 codices ab intellectu diuino conceptos, è cœlo
 missos, in quibus humani nihil sit præter char-
 tam, & amentum, vnicum eumque ampliissi-
 mum veritatis esse thesaurum? Hæc opinio ab

omni sæculorum memoria in Iudæorum mentibus tam altas egit radices, ut cum præter alia rituum sanctissimorum mysteria depositum istud à Deo accepissent non studiosius aras & focos, quam sacra volumina; non religiosius Templum Salomonis, quam Moysi Pentateuchum; non ardentius vitam, quam legem conseruarint. Venit postea in præclaræ illius custodiæ partem populus Christianus, hoc est omnium gentium atque nationum consentiens in Christi doctrinam fides ex iisdem hauistam codicibus, quorum sancta, & nullis humanarum cogitationum maculis corrupta auctoritas usque ad occasum, interitumque mundi, conseruante Deo in Ecclesia perennabit. Sed quid ago? animum incitatum ad supremæ veritatis commendationem non sustineo, qui concepta iam inde ab initio dicendi promissa ita præterire debui, ut tamen intuens, respectansque relinquerem. In vos ego culpam hanc confero, Audit. nam dum vos mihi Theologorum sapientiam præsentia vestra; amicorum audientiam, nutu atque oculis; Christianæ Philosophiæ apicem, nec tacita, nec occulta assensione præstatis; quasi apud Christianos dico, & Theologos, qui dicta mea, tanquam in profana curia Iulianis & Porphyriis probaturum me promisi.

Itaque ne ab instituto digrediar, nolo diuinam *Scripta est* Spiritui sancto attribui naturam: illum ego falso à prophetis nostrarum literarum auctorem appellauit: eiusce- *et viris* modi volumina hominibus restituo, à quibus illa *sanctissimi* vestro consensu abiudicati: concedo cætera de *mis.* quibus inter nos controuersamur. Sed vicissim dum hæc causæ meæ firmamētā reiicio, volo dari

mihi scriptores illius historiarum viros fuisse notæ
sanctitudinis qui Deum hominesque dum viue-
rent piè semper, augusteque coluerint. Quan-
quam ne istud quidem aduersariis debere volo,
sed causæ meæ bonitati, sed rationi, sed veritati.
Nam si quid in rebus humanis certum atque defi-
nitum dici potest, id certè est, canonicæ ut appel-
lamus, scripturæ auctores, vates & futurorum
præcios extitisse. Cum enim tot ante sæculis ab
eis prænuntiata legamus quæ suis temporibus
ad verbum in Christo perfectæ, aut in eius æccle-
siis nunc etiam impleri oculis ipsi nostris vsurpa-
mus: nemo sapiens, ut opinor, negabit eos sine
humanis disciplinis præoccupatam quandam fu-
tutorum notionem habuisse. Vanum quidem sit
& importunæ plenum arrogantia si dicam cum
Iudæo Platone, prophetarum istorum maiorem
fuisse dignitatem quam ut se miscerent humanæ
Reip. & mundi ciues essent: sed sublimiores
omnibus rebus quæ sensu percipiuntur, migrasse
in mundum qui sola mente potest intelligi, ubi
domicilium sortiti, adscripti sunt Reipublicæ spe-
cierum corporis expertum & nulla ex parte cor-
ruptioni subditarum. Sed neque patiar infra hu-
manam naturam detrusos pro Magis & dæmonū
mancipiis haberi. Nam etsi rebelles Spiritus po-
steaquam superbissima perfidia eximias diuinæ
gratiæ dotes decoxerunt, naturæ suæ amplitudi-
nem non amiserunt, atque ea haud paulo quam
humana capacior est: id tamen habet cum illa
commune quod eius scientia præteritis tantum
præsentibusque continetur. Quare neque homi-
nes quancunque sint ingeniorum celeritate
præditi

prædicti, neque dæmones cum tota illa sua incredibili sagacitate, quicquam etiam leuissimum quod in arbitrij nostri potestate sit positum, futurum postea certo præsentire possunt, hæc est Dei solius Opt. Max. cognitio, qui ut in futurorum productione causis inferioribus potentiam suam commodare debet ut existant præsentia, sic in æterna cognitione præscientiam illis suam applicare debuit, ut essent futura. Itaque cum aliquem videmus futurum enuntiare non temeraria quadam præfagitione, non furore atque amenia; non solerti prudentiæ coniectura, sed constanti atque moderata animi anticipatione, vel Deum in humana specie loqui, vel hominem diuino instinctu & afflatu concitari fateamur necesse est. Ea re potius quàm miraculis apud plerumque Christus Dominus magiæ suspicionem ab se se amouit, & fidem diuinitatis suæ fecit.

Quia vidimus, inquit Lactantius, in eo facta esse omnia que nobis vaticinio Prophetarum annunciata sunt, quod neque Apollonio, neque Apuleio, neque cuiquam magorum potuit, aut potest aliquando contingere. Propheta fuerunt ante Christi carnem, clamat Augustinus, nondum erat homo Christus quando misit Prophetas, quisquis eum dicit magum fuisse: si ergo magicis artibus fecit ut coleretur & mortuus, ninquid magus erat antequam natus? Quod cum ita sit putamusne tam beatos homines ut Dei afflatum suscipiant, tam sapientes ut susceptum aliis enuncient, tam fideles ut enunciatum usque ad eius gestionem & ultra posterorum vtilitatibus conferuent, facinorosos posse esse & improbos? Quid? Dei hospitium vitiorum maculis turpe sit

*Scriptores
sacri nihil
vnam
rationi
contrariū
scripse-
runt.*

*In iis pec-
cata profa-
norum non
reperiun-
tur.*

& impurum? in eodem hominis animo & Dei sermo commoretur, & nefaria libido velut lutulentus susvolueretur? non eligat sibi pectus instinctus Dei, sed temerè in superbos mitis, in turbulentos quietus, in inuidos benignus, in voluptarios sanctus incurrat? Et quoniam præclarè dictum est à sapientibus, vitæ vniuscuiusque nostrum speculum esse orationem, neque alia vulgo solere loqui homines quàm quæ sentiant, sentire autem ea in quæ insita propensione ferantur; studeo ex aduersariis scire quid vnquam scriptores nostri à virtute, à ratione, ab æterna lege alienum effutierint? quæ scelerum vestigia in libris impressa reliquerint? Qui paginis omnibus superbos, avaros, libidinosos execrantur: qui genuinum frangunt in crudelibus & sanguinariis: qui literis pene omnibus leuioribusque interpolationibus, tanquam obelis, sacrilegos simulachrorum cultores configunt; qui Dei vnus cultum, qui animi demissionem, aduersæ fortunæ tolerantiam, alienæ leuamentum, rerum humanarum contemptionem, omnibus versibus inculcant, nō optimi dici possunt, & existimari? Quid? ea peccata quibus historias suas infecerunt profani, quis in istis vel leuiter adumbrata esse criminabitur? Dederunt, credo, Regum suorum gratiæ, & charitati patriæ illas Saulis, Achabi, Manassæ Sedechiæ, Ieroboam non historias sed tragedias; non actiones, sed calamitates; non narrationes, sed criminationes. Aut lectorum velificati deliciis anicularum fabellas infercierunt, quasi rimas explerent, qui casus quidem nonnullos naturæ ordinem superantes narrarunt à Deo profe-

ctos, nullum qui corrumpere aut dissolveret. Non est mihi credite, fabularum præstigiis, & verborum captionibus nata illa casta & verecunda, illa plena grauitatis, & simplicitatis oratio, quæ sic omnia persequitur vt nihil redundet: ita pressa est, & temperata vt nihil omittat necessariū: tam porro sancta & prudens vt se videri malit hominum mentibus, quàm sensibus accommodatam.

Quæ quidem non ideo dicta velim vt quæ duæ *Iucundis-*
res ad historiæ iucunditatem plurimum possunt, *simæ histo-*
materiæ subiectæ benignitas, & orationis vbertas *ria sacra-*
atque suauitudo, eas in sacris codicibus desidera- *veritas.*
ri putetis. Sic enim existimo, sic mihi persuadeo,
è libris omnibus qui nostris manibus teruntur in-
numerabiles, nullum reperiri in quo eloquentia,
& illa flexanima, & omnium regina oratio sit suis
numeris absolutior. Ipsa autem narrationum se-
gete, quid est aut varietate vberius, aut maiestate
grandius, aut specie ornatius? Philosophari cu-
pis, & illa rerum naturalium principia infinitis
Philosophorum disputationibus ventilata co-
gnoscere? Ea sacrae historiæ fundamenta sunt in-
eunte Genesi perspicuè conscripta, atq; simplici-
ter enodata. Maui terrarum situs, vrbium posi-
tiones, fluminum decursus, quasi in tabula vide-
re: Sequerè peregrinantem Abrahamum, labo-
rantem Iacobum, transmittentem cum populo
suo Mosem, Iosue eidem populo possessiones vi-
ritim distribuentem, Manassen & Sedeciam igno-
miniosè deportatos, Zorobabelè postliminio pa-
triæ restitutum, Tobiam perductum reditumq;
feliciter. Armorum sonitu, & tubarum clangori-
bus excitatis? Stat in assiduo procinctu contra

importunissimos hostes armata Machabæorum gens, omnibus Fabiis & Deciis gloriosior: quæ sæpè Deum imperatorem experta est, Angelos autem sub signis habuit pro sociis atque auxiliis. Hosticum ingreditur cum instructissimis copiis Iesus Naue, & promissam à Deo terram peragrat non passibus, sed victoriis, non pugnis sed triumphis. Quid illa nobilis Iudicum dictatura difficilimis temporibus ad Hebræorum salutem administrata? quid salutare Saulis atque Davidis in vicinos circumquaq; Palestinos excursions? quid sparsa per Regum historiam prælia; in quibus debellata improbitate, pietatem sæpius triumphare gratularis? Viros loquor & exercitus. Nam admiratione obstupescit omitto dicere de Iahel fœminarum fortissima, de Iuditha viduarum fidentissima, de Hestere Reginarum felicissima, de Machabæa matrum generosissima. Hic ego totam antiquitatem prouoco, vt apponat si quid habet iucundius aut illa Isaaci iam iam mactandi cum suppositicio ariete commutatione; aut Iosephi & fratrum agnitione dulcissima, aut inseparata vtriusque Tobie felicitate. Sunt qui non minus in legenda historia, quàm spectandis histriionibus flere ament, & horrorem in rebus tragicis summa cum animi voluptate concipiant. Audiam lubens, quales ij futuri sint cum eluuiem illam legent quæ vniversalitatem generis humani absorpsit & exhausit: Cum Iobum ex Rege opulento merum humanæ societatis carcinoma in sterquilinum videbunt abiectum, vxoris iniuriis, amicorum criminationibus, dæmonum crudelitati mancipatum. Cum spectabunt Pharaon-

nem (Deus sancte ! hominis nomen hoc est, an impietatis ?) post terribilem plagarum decem admonitionem, post densissimas tenebras spectro-
rum imaginibus exaggeratas, post ignis simul at-
que grandinis portentosum imbrem, post filio-
rum natu maximorum vna nocte, vno impetu,
tota Ægypto luctuosissimam internecionem, lu-
ctari tamen adhuc, & congregari cum Deo velle in
profundos interim maris Erythræi gurgites cum
expeditissima equitum manu abripi sempiterno
corporis, animique naufragio. Cum infamem
præposteris libidinibus Pentapolim ardore sul-
phureo, igne cœlitus emissio deflagrare animad-
uertent: cum Regis Moabitici filium dignum pa-
tre meliori adolescentem, ante quatuor Regum
oculos productum cernent, ibique Mesam ex
Rege popam, ex patre victimarium, ex ciue parri-
cidam, ex homine belluam, ad omne facinus pro-
iectas manus, filij sanguine cruentare, & natum
regno, iuuenem pro tuendo regno trucidare ! O-
mitto Samsonis gloriosissimam seruitutem, Abi-
melechi parricidia, mortem Athaliæ, cæcitatem
Sedechiæ, sæuitiam Iehu, & sexcenta eiusmodi:
neque hæc enucleare necesse erat aliud agentibus.
Eo reuocor vnde digressa est oratio; vt cum
in decursu dicendi ostenderim adeptos esse scri-
ptores nostros omnes historiæ videntes: negem
tamen subiectos fuisse iis vitiis, quibus cæteri
commentarios suos obscurarunt.

Nam quod de ignorance obiici potest, quæ nemini vni grauis esse debet, cum vniuersis im-
putetur: indaget ipsa quantumlibet inuidia om-
nes suspicionum latebras, rimeturq; ecqua labis

*Rerum ve-
ritas igno-
ra sacris
historicis
non fuit.*

*Magno
consensu
idem om-
nes enun-
tiant.*

eius vestigia in iis scriptoribus deprehendi possint quique literis mandarunt, aut egerunt ipsi, aut agi viderunt? Excipio paucissimos, ut Moysen scriptorū omnium qui ad nos peruenerunt principem, qui cum ipsa mundi nascentis incunabula retractaret, omni necessitate debuit antea cetera secula prophetice replicare. Ut Lucam, & Marcum qui ab oculatis testibus acceperunt: quorum fides eo debet esse sanctior, quod ne litterula quidem Matthæo & Ioanni perpetuis Christi assertatoribus repugnant. Reclamat hoc loco Iulianus, contradicit Porphyrius, & per sanè frigida atque ieiuna calumnia, pauculos obiiiciunt locos qui aliter ab aliis Evangelicæ veritatis præconibus concepti videantur. Religiosior, si Deo placeat, Faustus Manichæorum Antesignanus offendi se queritur duorum maximè Evangelistarum dissensione, & eorum infinitam, sibi quæ interminabilem litem prætermittere profiteretur. Sed audax sim & ridiculus, si in arenam hanc aduersus hostes tam importunos descendere appeto, quam iam inde à primis temporibus Augustinus, quam Hieronymus, quam similes multarum palmarum athletæ, hac etiam victoria consecrarunt. Demonstrabant illi scilicet liuore & ignorantia cæcatam esse aduersariorum aciem, qui aut fateri nollent, aut agnoscere quæ ab vno essent omissa, ab alio referri; quæ vnus transiret leuiter, ac tantummodo perstringeret, explicari ab alio copiosius, dicere autem aliis contraria, neminem. Erubescat hinc iterum, si quid habet boni sanguinis debellata iam diu inuidia, sacro se stylo quotidie iugulari sentiat error, & imperitia triumphet.

in ætatum omnium laude & memoria sincera & incorrupta veritas, quæ in tanta historicorum facrorum copia, in tam multiplici rerum gestarum diuersitate, cum aliæ obscuræ antiquitatis obscuritate forent inuolutæ, aliæ portentosum aliquid, & iudiciorum nostrorum infirmitati non satis credibile præ se ferrent, aliæ à profanis auctoribus secus narrarentur, quamplurimæ penitus ignorarentur, neminem vnum esse permisit qui narratiuncula vna, qui sententia, qui apice ab alio discreparet. Hæc omnia si non dictasset vnus atque idem Spiritus, librarij illi sic consentirent, cum in exteris hominibus, vix duos reperire sic qui eandem historiam eadē ratione perscribant?

Quamquam quid miramur eam fuisse auctorum in historia scribenda consensionem, cum in interpretanda singularis fuerit, ac verè diuina? Proh Deus immortalis! fuit ne in illa vnquam sacræculorum memoria factum vllum, aut præstantius ad Scripturæ sacræ amplitudinem, aut sanctius ad Interpretum ipsorum venerationem, aut illustrius ad historię commendationem? Selecti ex vniuersa natione duo & septuaginta viri religione, doctrina, ætate grauiissimi, sic vtriusque linguæ periti vt per facile possent, sic in patriam religionem animati vt vellent fideliter, sic tamen animo, sensuque diuersi, vt pro sua quisque opinione sacros codices è natiua in peregrinam linguam transferre cuperent: includuntur separatis singuli domicilijs, in iisque cum musis suis omnibus habent rationem. Videte quæ custodiat re-nues aditus obseruet, ne quis externus ad eos aspirare possit? quàm serio, quàm diligenter ca-

Admirabilis in sacra scriptura interpretatione Septuaginta virorum consensus.

ueant satellites ne suas inuicem lucubrationes conferant? Erras Ptolemæe, & vehementer erras, si quid vnum à tam multis, simile à diuersis, consentaneum à discrepantibus ingeniis expectas. Cōuocentur in vnam potius omnes aulam, symbolam conferre iubeantur singuli, quàm benè hic, quanto melius ille sentiat examinetur à pluribus: etiam tum discessio erit facienda, & vix vnquam ad eam loci vnius explicationem venietur, in qua communis consensus neminem habeat repugnantem. Atque prius illud consilium, quoniam ab vſitata rerum gerendarum ratione plurimum discrepat, neque illa sapientiæ corcula vilius perperam facti vel per suspicionem insimulare possumus; disiecti absque dubio sunt ab inuicem, vt cùm singuli pensum translationis suæ confecerint, collatis simul omnibus, aut eligatur reliquarum optima, aut è singularum perfectionibus vna aliqua absolutissima componatur. Itaque, quod benè verſat, opere confecto, re bene gesta, alieni successus ignari, sui amantes, ex illis educti musæis Alexandriam reducuntur, vbi coram Rege, & selecta Ægyptiæ sapientiæ medulla messem diuturni laboris explicant.

Singuli locis separati, eandem omnes explicationē ediderunt.

• Credeſ-ne Iuliane id quod vidit Ptolemæus? tibi persuadebimus Porphyri quod Demetrius, quod Menedemus præſens est admiratus? Aduoco vos in hunc confesſum omnes quorum aures sic occupauit peruicacia, vt in equabili sacre Scripturæ harmonia diſſonantiam reperiri vobis penitus sit perſuaſum: quod dicturus ſum, non Ethnicis Chriſtiani, non hæreticis Catholici, non Eccleſiæ doctores rudibus & impolitis; ſed illorum

temporum Reges, Sacerdotes, populi, omnibus retulerunt. Tam mirabilem, videlicet, ac stupendum, planeque diuinum in eorum verbis fuisse consensum, *ut cum ad hoc opus separatim singuli sederint, in nullo verbo quod idem significaret & tantundem valeret, vel in verborum ordine aliter ab altero discreparet; sed tãquam si vnus esset interpres, ita quod omnes interpretati sunt vnum erat: quoniam reuera erat Spiritus vnus in omnibus. Et ideo tã mirabile Dei munus acceperant, ut illarum scripturarũ, nõ tanquam humanarum, sed sicut erat, tanquam diuinarum etiam isto modo commendaretur auctoritas, credituris quandoque gentibus profutura.* Habetis factum verbis Augustini relatum, reliquorum sententia; cui singularis eruditionis atque prudentiæ scriptores quamplurimos assentiri video, abiisse in aliam partem paucissimos. Id narrat Iustinus purpuratus Martyrio Philosophus Consentit Irenæus Antistes doctrinæ & sanctitatis antiquæ. Testatur idem apertè Cyrillus Hierosolymitanus vir instituendis rudibus singulari Dei beneficio concessus. Hoc profitetur Epiphanius, qualis vir & quantus? Hoc Iustinianus Imperator, id est, grauissimorum virorum Senatus compilando iuri Romano præpositus. Quid hic Clementem Alexandrinum, quid Ruffinũ, quid Philonem Iudæum commemorẽ? quid innumerabiles alios? quorum omnium consentiens in hunc consensum oratio, non scripturæ auctoritatem, sed ipsorum dicto fidem conciliat. Susceperunt igitur illam prouinciã permittente Iudæa, plaudente Ægypto, & velut vetera sibi spolia ab Israëlitis restitui gratulante: spectante au-

tem & ad operis euentum crecta tota Græcia; tot voluminum in peregrinam linguam conuersionem elucubrati sunt iuuenes fortasse aliqui, quorum sermo, vt natura, effert se se iucundius atque vberius: Senes qui politiore iudicij lima & crudeli stylo superflua omnia refecant: docti, qui cum suum singuli iudicium venditare consueverint, alieno cedere indignum putant atque inglorium: Iudæi qui dignitatem gentis vniuersæ in Regum suorum exaggerata commendatione ponere debuerunt, linguam explicare aggressi sunt sensibus quam verbis vberior, cuius vna vovula, puncti vnus inclinatione leuissima, salua interpretum fide multos, eosq; maximè diuersos sensus efficere possunt: illos autem accentus & apices, doctrinæ vniuscuiusque est diuinare, prudentiæ eligere. Et post eorum quidem inuentionem Masoretharum Rabbiorum subtilitate, tutior fuit interpretatio, & adstrictior lingua. Verum antea cum liber esset campus in quo doctorum industria decurreret, Theodotion, Aquila, Symmachus tres viri, tres è suo sensu explanationes deprompserunt: Philo maximam historiæ sacræ partem, Iosephus totam persecutus est: sed & hic adiectione, aut commutatione, & ille allegorica interpretatione veram, natiuamque sententiam corruerunt. Et septuaginta homines natura dissimiles, iudicio impares, doctrina inæquales, dissipati, solitarij, interdicta studiorum communione, interclusa locorum obscuriorum disceptatione, vnum sentiunt, vnum scribunt, vnum eloquuntur. Hoc si antea suasit Demetrius, si petiit Ptolomæus, si Eleazarus impera-

uit, si promiserunt interpretes ipsi, profecto insanierunt. Proh Deus immortalis! vtrum ego ipse desipio, & apud tam eruditas aures, fabulas canto, an historiam omni fide cōprobatam enarro? Id scriptum reliquit Clemens ille Alexandriæ natus & educatus, qui & ab eo euentu interpretationem hanc quasi Græcam prophetiam appellare non veretur. Vidit ad Pharum reliqua adhuc domiciliorum vestigia Iustinus philosophus: annuam celebritatem in huiusce rei monumentum institutam celebrauit cum Alexandrinis Philo Iudæus: hæc exemplaria diutissimè apud Serapeum recondita habuit Alexandria, non Christo gratificata, qui nondum natus erat: non Iudæis obsequens, quos omnibus domitos cladibus pro despiciatissimis habebat: non auitæ Ægyptiorum superstitioni velificata, quam Sacri libri paginis omnibus conuellunt atque confodiunt. Itaque ferrum hic recipe Iuliane vel inuitus, qui hunc ictum nulla declinatione ynquam effugies. Tam enim noua, tam inusitata, tam peruagata scriptorum cōsensio si intra humanitatem stetit, solæ nostræ litteræ talem habent prærogatiuam veritatis: si autem quid experta diuinum est, vt Menedemus confirmauit, euicimus profecto ab ipsa veritate esse deductas.

O eximium atque incredibile Christianæ religionis robur ac firmamentum! ô diuinam litterarum nostrarum sanctitatem! quæ non tantum benè viuendi præceptis nihil à ratione discrepans, nihil cum natura cōiunctum non tradunt: verum etiam ea in quibus falsitas nihil admodum incommodaret, religiosissimè proferunt. Finga-

mus enim commentitiam esse nobilem illam ca-
 stigati Pharaonis tragœdiam, Hebræorum autem
 filios sponte sua, propensissima Regis voluntate
 ab Ægypto digressos nouas in Palæstina sedes ar-
 mis & viribus quæsisse, vt olim Græci se in Gal-
 liam infuderunt, in Græciam Galli: minus ne in
 hominum natura erunt insitæ leges ex quibus il-
 lorum Respub. summa cum dignitate floruisse
 narratur? Cogitemus Danielem regium iuue-
 nem Iordanis oras nunquam prætergressum, cæ-
 tera omnia gesta cum Babylonis, Medisque Re-
 gibus ementiri; quis propterea regnorum muta-
 tiones, Christi ducis impetium, celebres illas
 Hebdomadas in dubium reuocabit? Nunquam
 Saül Dauidē iniustis armis sit persecutus, ne Da-
 uid ipse quidem in arenam cum Philistæo gladia-
 tore descenderit: ideo ne continuo quicquam in
 eius psalmis dissonum, in oraculis fabulosum, in
 regni administratione iniquum reperietur? Fa-
 teor, inquires, hæc inter se apta, & connexa non
 videri: verum si aliqua parte vel leuissima, fides
 historię sacræ nutat, totam scripturam claudica-
 re, & vacillare necesse est. Præclarè sanè, & pro
 ea quam suscepi, causa, iustè pronuncias. Nam
 qui semel mendacij conuictus fuerit, quod pro-
 fanis scriptoribus sæpenumero contigisse sole
 clarius demonstratum est, illum cæteris in rebus
 teneri quis non videt? Qui vero nulla falsitatis
 suspicione vllum scriptorum suorum apicem in-
 sperferit, eius vel inuidia teste auctoritas atque
 existimatio diuina esse debet & immortalis.
 Quid? leuitatis notam Deo librorum nostrorum
 artifici, vatibus sanctissimis eius librariis inuras?

Qui præter vnum Dei cultum nihil spectant, quem describendis piorum præmiis, improborum suppliciis persuadent : qui cum cæli quasi domicilij sui aspectu fruuntur, amore hominum & odio, terrenis vinculis teneri se non patiuntur : qui ex eodem fonte & perfectissimam præteritorum recordationem, & certissimam futurorum præ-sensionem hauriunt : quorum denique in scribendo consensus, tantam in ipsis interpretibus concordiam peperit, vt antiquitas vniuersa nihil diuinius possit producere, eos humana lingua, non ipsius diuinitatis afflatu locutos existimes? Permittite me hic, Audit. iterum, ac sæpius admirari sapientissimi numinis prouidentiam, cui visum est religionis nostræ mysteria, amantibus: tam mundo poculo propinare, vt quicquid inde haurias, purum, liquidumque te haurire cõfidas. Id sentiebat Christiani Senatus Princeps, qui cum susceptum à Seruatore nostro ad punctum temporis splendorem, maiestatemque quam ipse præ-sens oculis vsupauerat, cuius magnitudine præ-strictus, ac pene obrutus fuerat, cuius aliquos è sociis testes & participes producere poterat, enarraret : statim, quasi in priuati hominis (si tamen vir talis ac tantus, priuatus censerì potest) auctoritate parum esse ponderis significaret, adiecit, non illi potius narrationi, licet omni fide contestatæ credendum esse, quam prophetarum oraculis quæ vitæ humanæ caliginem admirabili luce peruincunt. Itaque si in pernicioso errore versari, si in pulcherrimarum rerum ignorantia iacere non vultis, necesse est Audit. à profanis illis scriptoribus quorum lutulenta semper est oratio,

ad nostros codices curam, cogitationemque traducatis. Placeāt illi fabellarum suauitudine quas veris narrationibus adtexunt, quemadmodum animam fœdissimæ pecudi dedit natura pro sale, ne putisceret: nos magna, ac seria semper agimus & docemur. Verborum pompam & totum eloquentiæ apparatus circulatorum explicent, nos in aliena veste fidem nostram non quærimus: simplex, & nuda, & vt veritatem decet, natiuo colore delectat. Palpentur alij potentibus, & turpi assentatione Principum suorum gratiam aucupentur, vitia foveant: nobis offertur religio virtutis planè habitu seuerior quam blandior, sed viris digna & sapientibus: Illæ denique literæ incautos animos in lubrico constituent, quo loco insistere sine casu difficile est: nostræ plana & stabili via, neque longa ad felicitatem deducunt.;



I N
SCHOLIS VTILIVS
QVAM DOMI IVVENTVTEM
ERVDIRI.

ORATIO VI.



NIMADVERTI, Audito-
res, magnam hoc sæculo, poli- *Ex Quinti-
tolicet, & elegante opinionem tiliani l. 1.
esse, bonis artibus deditosa- instit. c. 3.*
dolescentes non minus in earū
scientia priuata studiorum cō-
tentione, quam publica scho-

larum disciplina progredi. Id cū ante & fama per-
uagatum, & in vsu quotidiano positū esse audie-
bā: tum mihi quoque ipsi accidit nō infrequenter,
vt in eos qui sibi suisque genus illud studij gratu-
larentur, incurrerē. Quibus si rationes eas defuif-
se dixerō quæ vulgi animos probabilitate percu-
terent, faciam veritati iniuriam, Auditores, cum
mihi ab illa vmbratili, &, vt appellare solebam,
tenebricosa doctrina satis alieno, tamen extorfe-
rint vt assensum à concepta semel sententia co-
hiberem, & ad partem alteram æstimandam,

momentoque suo ponderandam, animum appellerem. Equidem omni hoc vobis asseueratione confirmare possum, Adölescentes, hoc animo me ad cognoscendam causam venisse, vt meminisseni & me qui iudicarem hominem esse, & eos qui retulissent: vt si probabilia dicerentur, nihil vltra requirerem; sin vera, studium ipse meum conuerterem & in ea sententia cæteris persuadenda collocarem. Atque hæc res me magis commouebat; quod quanquam plerosq; eorum nossem bene de rebus domesticis cõstitutos, qui ne minimam quidem scientiæ fraudem turpi illo compendio commutarent; plures tamen hac via rei familiari cuius minimè negligentes sunt, consulturi oppido viderentur. Itaque sic aientem controuersiæ partem sumpsi in manus, vt eam cuperem esse aptam parentum commodis, filiorum progressioni, Reip. literariæ dignitati. Verum vbi rem totam explicare atque excutere cœpi diligentius, tum denique non opinione solum vt antea, sed ad veritatem planè mihi persuasi tenebris hisce studiorum nihil nisi desidiam, libertatem, inutilem temporis collocationem contineri: si quis doctum se & esse, & haberi velit, ei necessitatem esse in literatorum consortio, in scholarum luce, in gymnasiorum splendore viuendi. Id ego non aliis probare contendo præterquam vobis, Adölescentes ingenui, quorum in hac disputatione res aliqua vertitur. Nam si ad istorum quos videtis, sapientissimorum hominum arbitrium causa deferatur, prohdiu vos, opinor, exclaimabitis: quibus quanquam considerati & graues, ij tamen iudices dentur, qui & exemplo suo præiudicium

iudicium in hac ipsa causa sæpè fecerint, & magnam sua auctoritate animorum inclinationem sint facturi. Nam quæ potest esse, Patres Reuerendi, iustior, quæ minus obscura & incerta sententiæ illius damnatio, quàm tot academias, tot collegia, tot exhedras quotidie vestras, vestrique similibus, omni doctrina eruditissimorum hominum vocibus & eloquentia circumsonare? Sed de hoc, alio loco dicam; vos mea nunc omnis spectat oratio, qui tanquam equulei ferocitate exultantes ad freni tactum horrescitis, atque vni euagandi quo feret imperus, licentiæ adhinnitis: vobis meæ opinionis firmamenta cum exposuero, si falsa videbuntur esse, causæ nihil dico quin cedam cupiditatibus vestris: sin plura detrimenta eruditioni vestræ, dignitati, existimationi quàm adiumenta, per studium illud priuatum importari cognoscetis; nolite illic potius consistere vbi seclusa aquula teneamini, quàm vnde vniuersum scientiæ flumen erumpat. Atque vos eo libentius huic quæstioni iudices præesse volui, quos acres & cupidos aduersarios reformidare poteram, quòd & de ea syncerum sanctumque iudicium rei magnitudo vtilitasque flagitat, & plerique ea virtute estis, vt iam effrenatas primæ ætatis perturbationes in rationis gyrum duxeritis, nihilque vobis quàm æquum & bonum persuaderi malitis.

Tria hominum genera Scholæ publicæ à pueris frequentari nolunt.

Atque vt inde initium dicendi sumam, vnde hæc omnis exorta est disputatio, tria hominum genere reperio, à quibus Academiæ clarissima Lux, & studiorum publica celebritas oppugnatur. Vnum est eorum qui pueritiæ teneritatem in laboribus minimè necessariis confici no-

lunt, vt cum domi primam ætatem liberi posuerint, priuatæ disciplinæ nutrimentis educati, tum demum animi corporisque firmitatem ac robur, ad publicas Scholarum exercitationes adferant. Alterum est eorum qui posito in Gymnasiis tyrocinio morum corruptelam in posterum verentur; & in eo ætatis flexu prouident diligenter ne vel minimum à paterna domo & familiæ consuetudine discedant. Alia denique tenebricosorum natio ab vtrisque tela mutuatur, quibus illustri collegiorum lumina præstringant: & cum neque pusiones academicis laboribus, neque iam grandes pueri licentiæ morum exponi tuto possint, conficiant Scholis frequentandis nullam satis aptam esse ætatem, præsertim cum æquali mentis contentione, maiori assiduitate, progressu non minore, domi studeatur. His ego aduersariis ita me opponam, vt olim Horatius ille Romanæ libertatis vindex fortissimus, quem narrant interfecit in singulari certamine fratribus, nihilo timidius pugnam sustinuisse, & dispersos dissipatosque hostes tres omnes superasse, contra singulos ferocem, qui esset impar vniuersis. Sic ego nostros hosce obrectatores cum suis ratiunculis separatim aggrediar, ne me collecti, aut telorum crebritate terreant, aut sua multitudo obruant.

*In Scholis
publicis
sociorum
conuictus
& exem-
plum plu-
rimū pro-
dest.*

Atque in primis eorum hominum qui liberos suos penitus à gymnasiis abstrahunt vt improbitati aut stupiditati respondeam, quis si modo rationi dare locum velit, negare potest accuratiores in illis quàm domi esse artes, exercitationesque studiorum? Non dicam hîc quàm diligenter memoria rerum perceptarum custos, scientiæ totius

noſtræ theſaurus, in iſtis exerceatũr, quã frequenti cultura & quaſi habitu acriorem, firmioremque fieri experimur. Non commemorabo quã fit aſſiduus ſtyli, optimi illius dicendi artificis, & penẽ in hoſas ſingulas imperatus uſus. Omittam recensere perplexos, atque implicatos auctorum locos magiſtrorum induſtria euolutos: facilẽ patior hæc doctri-næ adiumenta utrique hominum generi dici communia: cũ neutri deſit & ſtudioſum exactor in ceruicibus im-poſitus, & docentis uiua vox. Ea tantum perquam breuiter perſtringam, quæ omnes, & maxima ad doctri-nam præſidia, & huius quod hoc loco commendamus ſtudio propria, eſſe fateantur. Itaque ſinite me, Auditor. in eo verſari commodò, in ea utilitate habitare, quæ ab ſodalium multitudinẽ, ab eiſdem rei æmulatione, ab virium proſectusque communione promanat. Etenim ut corpora ipſa corporum aliorum vicinitate atque attritu concaleſcunt, quæ ſeorſim ab aliis videmus obri-gere: ſic animi ſcientiæ appetentes æqualium numero, æmulorum ardore, plurium exemplo mirum in modum excitantur, impelluntur, inflantur. Non enim homines ut cæteras animantes edidit natura, ut inculta, & deſerta ab omnibus loca perſequantur, ubi ſyluæ, & ær, & ſolitu-do mera: ſed comuni rationis ſocietate deuinxit, ut ipſi inter ſe alij aliis prodeſſe poſſint. Hanc animorum coniunctionem lucifugi illi ſic perſtringunt, ut neque aliis ſua quicquam opera conferre, neque ab iis dignentur recipere: quorum alterum inuidiæ eſt, alterum arrogantiæ, utrumque perfectæ demum cumulatiæque dementiæ.

At ex aduerso publicæ disciplinæ alumnus, præter communem naturæ sensum quem ex assiduo cæterorum conuictu haurire potest, id etiam compendij facit, quod tum quæ sibi tum quæ aliis in Schola præcipiuntur, ediscit. Inuenit ille sanè subtiliter, disposuit alius sapienter, hic autem distinctè, abundanter, illuminatè pro ingenij modo de re proposita differuit, plautum à sociis, laudem à magistro retulerunt. Magna res, ingens illis ad perfringendos difficultatum obices calcar admotum est: Certè: sed hebes & pene inutile si vnum stimulat, penetrabit ad alios videlicet, & si quem tardum repererit, verecundiam iniiciet, vt cum non consequi pudeat, quem audiuisse delectat: sin currenti iam incitatoque inhæserit, docebit saltem non solum cur alter laudatus sit, sed etiam quomodo enitatur vt possit ipse iure laudari. Et quemadmodum rerum omnium copiam vni alicui regioni tribuere natura noluit, vt mutua mercium traditione societatem alij cum aliis iniremus, quo nundinationis quasi fœdere tandem effecerunt homines vt quæ priuata singulis erant, communia fierent vniuersis: ita in isto mercatu studiorum ipsos inuicem adolescentes sibi quæ desunt sumere oportet, & tradere, vt è plurium collatione in singulorum animis vtrique quædam scientiæ perfectio componatur. Angustis certè terminis vniuscuiusque nostrum ingenia circumscribuntur, & vix vllum quolibet sæculo reperiatur qui ex se solo sua habeat omnia Laboris igitur alieni compendio necesse est ad partem aliquam doctrinæ veniamus, & doctorum virorum sudore tanquam riuulis hortos nostros irri-

gemos. Id nos prouectiores librorum usu consequimur, quos clarissima veterum lumina nobis quasi Ariadnæum filum tradiderunt, ut difficile & perplexum disciplinarum iter facile teneremus. Pueris autem qui nuces eiusmodi frangere non possunt ut nucleum edant, quibus lac & pulgium propinandum est, ut conuenientem ætati succum exprimant, æquales sunt pro exemplis, magistri pro libris, exercitatio pro commentatione.

Quid dicam de Philosophia, quid de Theologia, cæterisque artibus quæ totæ in mentis agitatione & magna ac diligenti contemplatione versantur? quàm lentè & frigide res, ita non raro tenues ut aciem effugiant, ita intricatæ ut enodari vix possint, ingeniis sæpè non acutissimis citra disputationem nuda & continenti oratione traduntur? Vbi verò minutas illas districtiores, id est, ut ego interpretor, subtiles rimas, & arguta effugia reperiet? Disputabit ipse secum, inquit, & animo contraria suggerenti, rationum momentis satisfaciet. Audio. ipse sibi magister, ipse discipulus fiet: interrogabit se, respondebit sibi, idem vterque athleta, idem victus & victor: fortasse etiam aliquem animo finget aduersarium, & cum larvis luctabitur: prorsus ut si quis ex occulto testis eam concertationem aucupetur, ei homo furere & insanire in solitudine videatur. Verum quanto commodius in Schola, quanto acutius & audacius disputetur, sciunt vicina nobis illorum mysteriorum adyta, quorum ipsi etiam profectò lapides sapere quodammodo, & rerum difficilium explicationem personare vi-

Disciplina in animi commentatione posita sine crebra & vehementi disputatione acquiri non possunt.

dentur. Nam si, vt est in fabulis, Apollinis Lyra-
cam Insulam cui adhæsit, sonantiorē reddidit
vniuersam: aut vt rerum periti affirmant luscinio
læ Thraciæ quæ ad Orphei sepulchrum canunt,
innata quadam vel solo ipsi dulcitudine suauius
modulantur: quis non videat in Philosophicis il-
lis parietibus latere nescio quem disputationis
genium qui subito feruore, an furore? accedentes
impleat; ideo vt isti ipsi adolescentes qui mode-
stum illud *αὐτὸς ἔφα*, seu quid à præceptoribus au-
diendo, seu ab auctoribus legendo didicerunt,
candidi, creduli, simplices vsurpare studiis in rhe-
toricis solent, simul ac Philosophia ista aura sunt
afflati, cum vix pedem in Logices limine posue-
runt, perpetui disputatores euadant. Et quidem
domestico doctore diuidente illa, atque distin-
guente quemadmodum dicantur, ille claudus
(quomodo aiunt) pilam retinet, quod accepit
garrit: at ab istis subtiliter in disputatione lima-
tur veritas, quæ rationum quasi balistis impulsâ,
non minore propugnantium studio reddita, suis
in sedibus retinetur. Atq; dum illos irriti conatus
pudet, & in petus: hi stationem in qua ab Impera-
tore collocati sunt, deserere vt aras & focos pa-
trios verentur: interim excitata hoc ardore, & in-
dustria natura, quam vtrisque subtilitatem, quæ
acumina subministrat? Plura de exercitatione di-
cerem, nisi vos mirabiles eius vtilitates quotidia-
no tangeretis experimento: de quæ ea primis hisce
in studiis dicere possemus, quod olim Demosthe-
nes de actione, primum esse in dicendo exercita-
tionem, secundum idem, & tertium idem videri,

nihil ad mentis contentionem interesse solus aliquis aut vno teste, aut in celebri hominum frequentia det ingenij sui specimen & periculum faciat solertix: Nondum dico quid alacritatis ad agendum circumfusa concio & innata laudis cupiditas adferat: purum illud & nudum videre & videri considero in iis præsertim adolescentibus, quibus, quia copiosorum parentum imperio ad liberales artes perdiscendas se applicant, erit aliquando in media Reip. luce viuendum. Quàm multa quotidie faciunt, quæ si probentur, spiritus augeant: sin minus, dedecus quidem sed & honoris recuperandi desiderium importent. Quanti æstimant sociorum multitudinem auribus ducere, dicente se imperari silentium, in se omnium ora atque oculos esse conuersos, è sublimiori exhedra quæ didicerint, clara ac beata voce pronunciare, despicere subiecta subsellia, ad nullius auctoritatem conuiuere, nullius accessum aut discessum repentinum formidare: æmulum interim fastidia contemnere, dicta eludere, obstare conatibus, impetum refutare. Et miramur sic eos cum per ætatem licet, videmus in foro regnare, in curia sententiam de rebus maximis copiose prudenterque dicere, legatos de publicis negotiis ad Reges externos mitti, solos illos Principibus æquè ac multitudinì probari? dimoueri de suis sedibus ciuitates, & ipsos prope dixerim populos, eas inundare basilicas in quibus homines illi de Deo, de sanctissimæ fidei mysteriis, de morum integritate concionantur? Quibus verò gradibus ad illud honoris fastigium ascenderunt? us ne latebrosis quos foliugi illi sibi mente fa-

*multitudo
subrusti-
cam vere-
cundiam
pueris ex-
cutit.*

bricant, an præclara iam inde à puero publicè dicendi consuetudine? quam multos nominare possumus qui cum essent cæteris à natura & doctrina dotibus præditi, eos tamen à dicendo pudor, & subrustica quædam timiditas retardauit? qui si à primæ ætatis verecundia impetrare potuissent, vt frequenti concione linguam soluerent, faciliores sibi aditus ad hominum existimationem & gloriam comparassent.

*Declara-
tur exem-
plis quanti
referat à
reneris pu-
blia pro-
nunciatio-
ni consuef-
cere.*

Declarauit certè Romanis olim Porcij Latronis casus quanti referret cum hominem qui ad eloquentiam & aduocationem exerceretur, sæpè in aciem pulueremq; prodire. Is enim cum in Schola septus parietibus, tectus lacunari, inter paucos Scholasticos ludicras declamationes præstantissimè si quis alius obiret, facile persuaderi potuit sibi satis esse virium & animi vt veram causam in foro apud Iudices peroraret. Eò cum venisset declamatorum antesignanus nouitate confessus, insolentia loci, coronæ frequentia tam subito perterritus, & pene exanimatus est, vt actionem à solæco inchoarit: neq; prius sui compos fieri potuerit, quàm ex aperto loco in alium parietibus & tecto clausum migraretur. Patrum verò nostrorum memoria scimus persanè ridiculum aliquid hoc in genere viro non inerudito accidisse. Nam eloquentiæ suæ omnem supellectilem in celebri Senatorum confessu explicaturus, elaboratam industria orationem in horto suo declamabat quotidie; ibi copiosa caulium multitudo repræsentabat auditores, & vt quisque aut trunco humilior, aut patulis diffusior foliis erat, diuersos dignitatum ordines distinguebat. Dicebat ad viridei

istos Præfides magna cum cura, submisso vultu, adducta toga, in omne argumentum modestiæ fideus. Si ventum foret ad illud solenne, Auditores Ornatissimi, aut illud grandius, Patres Conscripti, hic caput aperire, pedem utrumque per vices adducere iactare ceruiculam, concionem modestis oculis & grauibus salutare. Adreperet terrigena, herbigrada, domiporta? nouum fingeat auditorem: obstreperet auicularum cantus? quasi aduersus importunos tumultuantium strepitus animum obfirmabat: impulsæ leui flatu stirpes agitarentur? hæc vero sententiose, & grauius dicta laudantium admurmuratio putabatur. Iam satis firma erat memoria, congruens actio, illuxerat dies ille quo die ex hortuli vnus umbraculis in solem & à pertum educenda erat eloquentia. Instruitur locus ad agendum amplissimus, omni apparatu ornatuque visendo, conferta hominum turba mature fores obsidet, excluduntur plebeix animæ, pauci barba, talarique pallio doctrinam, aut pretioso vestitu nobilitatem professi, magna demum ambitione admittuntur. Prodit tandem nouus Hortensius, tabificarum, vt olim pari in causa Augustinus, cogitationum febribus æstuans: in, num ora, in vnum oculi, in vnum animi defiguntur: altum silentium, ingens expectatio. Quid deinde, quid censeatis? Audit. Orationem, vt apud Homerum, concitatam, & sine intermissione in morē niuis superuenientem? Eam ne potius quæ verecundo similis principio se circumspicit, & æstimat, & præbet æstimandam? Videte vt pallet, vt tremit! Salua res: magnos olim ora-

tores scimus in principio dicendi exalbescere solitos. Sed diutius obmutescit. quid etiam circumspētat? Dic, orator, aut nunquam dicas. Surgit, caput aperit, voce tremula postulat sibi ignosci, euolasse cum auditorum domesticorum viriditate filicatum orationem: parere certe præsentes superstitēs caules non esse, qui sponte mouerentur. Quid plura? demittere cogitur aurículas ut iniquæ mentis asellus, & elinguis, rubore suffusus proripere sese infantissimus arator, dignus profecto qui pueriliter ad Rhetorum statuas vapularet, aut aliquandiu in Tulliano habitaret. O priuatorum studium ingens operæ pretium! ô lucīscorum nostrorum doctrinam reconditam! quæ prodire foras atque ad auditores emanare non potest: ô firmis excultum disciplinæ animum! qui quem in opaco situm duxit, ad solis radios & clarissimorum virorum splendorem nequit excutere.

Vita communis rudimenta percipiunt in scholis pueri, quæ reliquam, ætatem non parum inuuant.

Quæ, malum! isthæc disciplina est? sic liberos tuos instituis ut tenebris assueti caligent ad lumen. Si tu mansuerarius fores, bestias, opinor, spectandis hominibus velles consuescere, ut iis feritatem excuterēs; & natum ad ciuilem societatem animal secretis parietibus, quasi lustris & cauernis continēs remotum ab oculis populi, inculta & deserta ab omnibus vita, hoc est, si quid vides, si quid sentis, hominem tollis ex homine. Da in hac solitudine vnde communem naturæ sensum hauriat, qua via magistræ vitæ experientiam & rerum quotidianarum vsum aucupetur? Nomina quibus cum contrahere possit amicitia, quam viri graves atque constantes à pueritia iis-

dem studiorum quasi sacris initiata firmam & perpetuam arcessunt. Demonstra quomodo bonos & fortes complecti, odisse improbos, fugere, insectari condiscat. Sed hæc officia vitæ sunt vniuersæ vsque ad extremum diem colenda; ad quæ tamen sic adolescentes præparare debemus, vt meminerimus eos Collegij vnus septis non semper continendos: ea porro fide & diligentia vt laborem nostrum præclare positum putemus si felicem hanc teneriorum mentium terram ad virtutis satus accipiendos præceptis disciplina- que ita subiecerimus, vt cum ab agricolis disces- serint, plus afferant quam acceperunt. Mihi credite, Adolescentes, leuiora illa quæ in scho- lis geruntur (si tamen quicquam leue est quod indolem vestram aut ostendit, aut erigit) eius- modi sunt vt olim vobis ipsi in hominum luce viuentibus neglecta, dolorem & dedecus, vsur- pata, non mediocrem cum laude voluntatem sint allatura. Sic enim existimare vos volo, hæc quæ modo agitis, esse vitæ incæptionem & non ob- seura lineamenta futurorum. Nam vt solo tem- porum lapsu ætas accrescet, animo vires, robur corpori sine naturæ vestræ immutatione accedet: ita studiis puerilibus vera succedēt negotia, quæ pari alacritate, prudentia maiore viri cum viris, vt modo inter pueros pueri, tractabitis. Hæc, inquam, ad totam vitam pertinent: redeo ad eius tyrociniū quod in acquisitione scientiæ po- nimus. Dicant isti solitarij studij probatores quā puero iniiciant emulationem, quem imitandi ardorem, quam spem superandi? se ipse comparat secum, feruentiorem nullum videt, doctiorem putat neminem.

*Emula-
tione &
gloria in
scholarum
luce ado-
lescentes
mirum in
modum
excitan-
tur.*

Sed fingamus hæc quæ modo commemoravi aut minimum ad discendum momentum habere, aut etiam in domesticis studiis non desiderari: habent-ne illi in domorum suarum recessibus difficultatum quæ in perdiscendis artibus frequenter exsorbentur dulce condimentum, ad aspera quæque experiunda calcar singulare, contemingeniorum, flabellum industræ, ambitione & gloriam? At ea puerilis animus minium mouetur, inquirunt, qui labores suos voluptate metitur: virorum est honesta sectari: iocis, ludis, delectationibus iuuentus occupatur. O peritos venatores indagatoresque naturæ, quæ se tenera ætate sine fūco exerit! Te hic appello Alexander qui Philippi patris felicitatem & victorias tota Græcia propagari puer ingemiscebas. Vos Spartani pueri omnes qui cruenta illa ad aram verbera insita nobilitate concoquebatis, qui ab impetu verberantium inter matrum vbera cadebatis, & semimortuis vocibus obtestabamini præter crepitum plagarum, nullam aliam vocem auditam. Vobis hos animos diræ illius ac funestæ lusionis voluptas, an incensa gloriæ cupiditas faciebat? Quid si in illo ipso ludo in quo ad profusorem delectationem cōpia licentiæ crescit, ut ignis oleo, non solam quærunt voluptatem? quid si laudem etiam avidissimè consecretantur? Alexander ut ab eo magnarum rerum sumamus exempla, in Olympiis currere dedignatur. Cur ita? quia collusores filios Regum habiturus non est, quos solos vincere gloriosum putat. Pythagoras ille veterū Philosophorū princeps in prætexta, viros pugilatu, Damiscus quidam anno æta-

tis duodecimo grandiores cursu superauit : quo
 duce? gloria, quæ magnos in exiguis corporibus
 animos sui fiducia & rerum gerendarum cupidine
 implet. Receptum erat more institutoque
 Græcorum, ut in Olympiis pueri inter se, in Py-
 thiis autem etiam cum viris committerentur:
 quo adiutore? gloria, quæ sexcentas puerorum
 statuas pugilum, luctatorum, cursorum immor-
 litati consecrauit. Redeamus ad ludum littera-
 rium : quoties cum summa animi voluptate vi-
 distis, Auditores, composita in scholis puerorum
 paria de literularum apicibus, de numeris sylla-
 barum, de voculæ vnius latinitate, aut peregrini-
 tate tanquam de regno aliquo decertare? flen-
 tem hunc, illum exultantem; illos sub iugum mis-
 sos, hos opimis spoliis, & aduersariorum manu-
 biis oneratos? Quid ardentius menstrua Senatus
 lectione, & noua in Calendas singulas classis
 descriptione? Quid magis expectatum annua
 præmiorum augustissimo illo & celeberrimo
 confessu diribitione? quæ scribendi auiditas,
 quam suspensa bene aut perperam facti con-
 scientia, qui victorum plausus, quæ gloria trium-
 phantium?

*Honestæ
ambitioni
inuenturæ
laudabili:*

Vos hic Socrates & Catones delapsos de
 cœlo audire putate. Male, inquit, huic cres-
 centis spiritus licentiæ innutritur pueri, quibus
 omne ludicrū in pretio est : At erit cū circa veros
 honores insanient periculosius inepti. Interim
 magistratus gerunt inter se, & prætextam, fas-
 cesque ac tribunal imitantur quæ olim omnia
 in foro & Curia virili ambitu molientur. Satis
 grauiter. Cedo quid postea. Appetitionem

*ter innutri-
ri docet sa-
pietum au-
toritas, &
ipsa scho-
larum pu-
blicarum
etio.*

gloriæ in vitis numerari nemo nescit : quis autem ab vitiosa radice sani & vegeti succi fructum speret ? Ambitiosorum personata felicitas est, oculis suis imponunt : & cum auro sinum implevere, cum induerunt purpuram, quid aliud quam mendacio gaudent, non ignari sub ista dignitatis membrana quantum mali delitescat. O inauditam seculis omnibus sapientiam ! ô nouam & elegantem Philosophiam ! ô magistram morum & disciplinæ orationem ! Doleo non esse vobis integrum, Patres Reuerendi, hoc vti consilio ; plerique enim aliàs docendo puerilis ambitionis ardorem, virtutum, vitiorumque imperiti homines, aluistis, imo succendistis. Verri Flacce, pudet me tui : quid est quod luculentis librorum donis diligentiorum adolescentum industriam munerari primus instituisti ? M. Fabi puerum opta : illum quem laus excitet, quem gloria iuuet, qui victus fleat, qui alatur ambitu, honore excitetur. Annæ Seneca puerum sic doces instituere vt cum æqualibus vinci illum nō permittamus, assuescat in certamine non nocere velle, sed vincere, quoties superauerit, & dignum aliquid laude fecerit, attolli patiamur. M. Tulli pueros naturæ specula miratus es, quanta in iis studia decertantium sint, quanta ipsa certamina ? vt illi efferantur læticia cum vicerunt, vt pudeat victos, quam cupiant laudari, quos labores non perferant vt æqualium principes sint ? Atque ea in optima quaque indole maxime apparere disputabas senex, qui iam ante consularis in Senatu grauitè pronunciabas, vt leuitatis est inanem aucupari rumorem, & om-

nes umbras etiã falsę glorię cõsectari; sic leuis esse
 animi lucẽ splendoremq; fugientis, iustã gloriã,
 qui est fructus verę virtutis honestissimus, repu-
 diare. Vos miror ad veterem illam Philosophiam
 adhæsisse, hanc istorum orationem neglexisse,
 ne in errorem induceremini. O stultos Platones,
 Aristoteles, Theophrastos, Isocrates, Valerios,
 Catones, Antonios Gniphones qui iis quos edo-
 cebant adolescentibus persuaferunt nihil humi-
 le, nihil demissum, nihil sordidum, sed omnia
 summa, ampla, gloriosa in media hominum lu-
 ce appetere. O socordem Salomonem, qui in
 vna Sionis arce septem maximo sumptu ædifi-
 cavit Gymnasia, ad quæ certatim tota ex Iudæa
 conueniebant pueri, vt è fonte tam puro gentis
 mores, sacrorum ritus, datas diuinitus leges hau-
 rirẽt. Stultum Abrahamum, qui Astrologię scho-
 lam ad famosam illam sylvam Mambre aperuit.
 Stolidos, & cum periculo fatuos Athenienses,
 Massilienses, Druidas, Romanos ipsos, cæteros-
 que orbe toto Reges & Principes qui hæc Col-
 legia quæ videmus, tanquam emporia bonarum
 artium infinitis sumptibus instituẽre, vt tenera
 indoles ad verum decus, publicę priuatęque rei *Carolus*
 splendorem quadrigis, quod aiunt, albis, curre- *Magnus*
 ret, glorię stimulis incitata. Quid hic nostros *in Acade-*
 Franciscos, Carolos, Henricos, Ludouicos ar- *miã Pari-*
 guam Regni florētissimi moderatores, videli- *siensi pue-*
 cet imperitos, qui publica musarum domicilia *rorum stu-*
 prope dixerim cum pulcherrimarum vrbium *diã amu-*
 fundamentis posuerunt! Tibi autem Carole *latione in-*
 Magne quid venerit in mentem nescio, cum *flamma-*
 Imperij tui caput, oculum Europæ, orbis gem- *uit.*

mam, urbem humani generis caputem Alcuino
 tradebas ut eius tertiam partem musis & scien-
 tiæ consecraret. Hic tu sæpè vius es quasi à gra-
 uissimis Reip. muneribus requiescens; dilcep-
 tantes devoculis pusiones inter Grammaticos &
 literatores magistros avidissimè audire, victores
 in Nobilium & Baronum iura transcribere, vi-
 ctos contra, desidesque ordine & gradu motos
 in ceritum nonnunquam tabulas redigere. Huic
 Imperatori si quisquam istorum comes & asse-
 cla extitisset, hac opinor eum oratione à propo-
 sito deduxisset. Quid agis Carole? quid cogitas?
 ubi maiestatem illam regiam ubi altæ & exagge-
 ratæ mentis singularem prudentiam amisisti? tu
 has scholas tantus hospes implere digneris? tu
 vocem illam qua hostibus armatis terrorem,
 supplicibus clementiam, militibus tuis confiden-
 tiam afferebas puerilibus cōcertatiunculis accō-
 modare? tu caput tot laureis graue, tu pectus
 tot negotiis tot regnis non impar ad curas hæc
 literarias possis demittere? manus illæ fugandis
 exercitibus, munerandis Principibus, tollendis,
 dandisque Imperiis exercitatæ, pueris scholasti-
 ca munera partiantur? Non sentis quanta eorum
 ambitioni fomenta suggeras ut intolentiores po-
 stea spiritus induant? Non vides quam cupidè
 leue istud gloriolæ choragium de te accipiant
 honorum futurorum pignus: quo tanquam gla-
 dio parui adhuc & infirmi nocere nemini pos-
 sunt, grandiores autem beneficio tuo armati
 Remp. contrucidabunt? Nescis quam multorum
 malorum artifex sit ambitio, quam crescat im-
 modicè, ut munia omnia occupet, & velut Ari-
 stophaneus

strophaneus ille Cleon pedem vnum in foro, alterum in pylo figat? Quid autem necesse est igniculos illos gloriæ simplici ætati vel adhibere, si extranei sunt; vel excitare, si naturales? quasi non eos & honestius ipsa scientiæ pulchritudo, & efficacius parentum cohortationes, exempla, studia pertrahant? Hac ille oratione permotus non dubito quin Alcuinum subito in Britanniam suam relegaret, suas sibi res habere iussu: scholasticos domum amandaret, Collegia noua venter construi, excitata Regio Diplomate disturberet. O amentes & tenebricosi homines! ô honestatis omnis obliui, naturæ vix memores! Gallorum gallinaceorum spectaculo cum magnis inuicem viribus certarent, suos sic animare potuit Themistocles, vt non ad pugnam, sed victoriam; non ad certamen sed triumphum duci viderentur: nos soli stipites sine sensu pueritiam, aut vllam aliam ætatem ab tam ardenti, tam altè insito atque inusto in natura laudis desiderio totam penitusque remouebimus? Quid? reperiatur ne in naturæ nostræ genere vel vnus homo qui consentientem bonorum laudem, incorruptam benè de virtute iudicantium vocem veræ virtutis comitem & præmium, quæ perfecta, quæ grauis, quæ solida gloria est, repudiet?

Etenim nos ita sapientissimus omnium moli- *In hominē*
tor effectorque Deus comparatos esse voluit, vt *natura in-*
quod iustum, quodque commodum est (boni ho- *sita est glo-*
nesti atque vtilis nomenclatione Philosophia mo- *ria cupidi-*
ralis complectitur) bifariam nobis obiiceretur vt *tas, eaq; ad*
appetitionem commoueret; qui ad istud adhæ- *virtutem*
rescerent, i) dominationis, potentiæ, honoris ef- *nos incitat.*

sent percupidi: si quos autem illius maiestatis ad se traheret, ij rectè factorum amplitudinem, publicæ libertatis splendorem, suam æque ac bonorum virorum gloriam affectarent. His animi generosi stimulis aliam affixit præterea bene viuendi necessitatem, vt cum ad proximorum commoda curas cogitationesque suas appellerent, omnibus occurrerent, neminem laterent, Solis instar summa atque infima collustrarent. Qua rerum conditione & statu effectum est vt nec virtus pateretur tenebras, nec vitium inueniret. Itaque cum cælestibus oraculis iubemur coram Deo & hominibus bona prouiderè, Deo conscientiam, hominibus vitam, cælo puræ mentis arcana, mundo consideratæ actionis exempla debere profiteri. Huic virtutis claritati tanquam Reginæ, comitès adiunguntur bonorum amor, fides multitudinis, omnium admiratio, laus, plausus, fauor, gloria. Hæc si qui forte contemnunt, viles animi nihil altum sapiunt, nihil grande spirant, nemo scit natos, nemo vixisse conqueritur. Qui è diuerso modicè appetunt, & famam vt vestem amant non magnam sed bonam, eos à rerum gerendarum amplitudine, patriæ salute, omnium commodis non corpus ad delicias, non labor ad quietem, non avaritiâ ad rei domesticæ curam, non inuidia ad otium ignobile reuocant. Id olim Senatus Romanus sapientiæ medulla, generis humani flos delibatus satis superque declarabat, cum Tiberium monuit contemptu famæ contemni virtutes, cuius ad posteritatem transmittendæ vel vna spes quæ facinora à præstantibus ingeniis non impetrauit, expresse, extorsit?

Eam naturæ ipsiusque virtutis vocem esse docuerunt veteres ipsi sapientes, qui cum de contemptione gloriæ scriptis libris differerent, illis tamen operibus nomen inscribebant, ut quo sensu contemni vellent, ostenderent, qui tum etiam de ea sibi nihil deperire volebant. Iam verò quantas in hominum animis radices egerit, vel ipsi sciunt artifices & operarii, qui habent in manibus scientiam quæ suam: illi enim nisi ut pecuniæ, sic laudis, illiberali quamvis opere lucrum facerent, artes persæpè suas defererent: lautis & elegantibus ingeniis quid animi esse debeat, quis non videt?

Itaque ut ab laudabili scholasticorum ambitione, cuius causa hæc à me disputata sunt, ad ipsorum etiam magistrorum studia veniamus: ponite vobis ob oculos domesticum alterum, alterum publicis scholis præfectum, & statuите utriusque animi sit ad munus suum sedulo & accurate fungendum. Nam ille privatis inclusus parietibus, se vno teste contentus neminem timeret, puero vni servit cui docendo ridiculum sit multa conquirere. Temerè nonnunquam effutiâr, quis reprehendat? veteramentarium auctorem quisquiliis collectitiis abundantem describat, quis furti arguet? ex arcanis scientiæ quam profitebitur libris quid reconditum proferat, quis laudabit? diuturna commentatione subtilius aliquid extundat, quis æstimabit? Imperito adolescenti quicquid novum obicitur æque in pretio est: habet omnia pro magnisquæ meliorum comparisonem metiri non potest. Interim magister ipse deambulandi desiderio tenebitur, iustitiam li-

*Ea præceptoribus
ipsis magno est ad
studia incitamento,
qua tamen
carent qui
privatim
docent.*

bris indicet : id verò discipulus magno emat , & ad parentes decipiendos operam cum doctore conferat. Fessus de cursu & ludo in desidiā soluetur : illa quoque puerilium votorum summa est. Dies serena inuitabit ad equitandum , adolescentis auiā in villa est , queritur rarius ad se nepotem deduci : rapiet ergo puerum & seruum , Id est , scholam vniuersam præceptor , & optimam hebdomadæ partem rusticabitur. Sic vtriusque animus tenebris abusus ad otium situ & ignauia deprimitur. Hic autem alter eruditionem suam in Academiæ theatro probaturus vigiliis conficitur , lucubrationibus impallescit , libros omnes peruolutat , excernit illustria quæque & recondita : verba ipsa in iudiciū vocat , ne asperiore concursu aures lædant eruditæ , ne quid desit , ne quid effluat. Meminit sibi nuper oscitantius dicenti non nihil excidisse quod existimationi nouit , refarciendum est : antea autem cum venisset instructior , plausum retulisse , reparandus est : certis auctoribus accepit dictata sua per manus eruditorum currere , prouidendum ne quid Aristarchi iure displiceat. Venit in Athenæum tanquam ad messē gloriæ , discipulis ita loquitur quasi æmuli audiant : suos ita docet vt externos conuenire desideret : paucis dictat , quæ domi tota cum animi contentione commentatus est quasi omnes lecturi sint. Tum verò existit iucundum inter vtrosque certamen quo neutris licet esse negligentibus : suorum enim industriam magister docendo stimulat , isti discendo magistri studium excitant : illi turpe est nihil nisi vulgare , nisi auditum antea depromere , his perpetua illa noui-

tas delicatum fastidium iniicit: hunc gloria, illos profectus in officio continet, & dum alteri alteris deesse timent, utrique inuicem satisfaciunt. Hoc est, Auditores, magnis itineribus ad scientiam ducere & progredi; hoc gloriæ condimento ingenium acuitur, excitatur solertia, animus commentatione, labore corpus induratur. Quis enim opus difficile, min meque necessarium susciperet, quis assiduitate studiorum se conficeret, quis non ad vacuitatem laboris & molestiæ tanquam ad portum confugeret, si quasi in Zenonis Republica, honesta laudis titillatione non tangeretur?

Veniant igitur studij solitarij defensores, & vestro in conspectu id obiiciant quod ab eis vulgo dictitari audio, multitudinem singulis obesse, laborem in plures sine imminutione propagari non posse, in vno melius operam & otium collocari. Hæc cum dicunt graues homines, literatorum coryphæi, obscurum nobis esse existimant quanta lateat in opertis illis desidia, quàm sæpè in adolescentium ludis conniueant, quàm diligenter id agant ut obscurata puerorum ignorantia parentum expectationi blandiantur. Dissimulant quantum sibi ipsis ardoris & animi pereat coram vno dicentibus, quàm mollis & enervata sit actio quam gloria non exsuscitat, laus non alit, honor non corroborat. De ratione docendi tanquam de congiario differunt, quod eo minus esse oportet, quo maior est numerus recipientium. Non est ita (viri clarissimi) scientiæ diribitio multitudine non minuitur; Iugerum quidem amplitudo seminati tritici aceruum extenuat; pe-

*Nulla
scientia
pars singu-
lis perit,
cum ea
pluribus
participa-
tur.*

cuniarum donatione thesaurus exhauritur; multiplici derivatione fluuios quantumlibet ingentes legimus exsiccatos. At intelligentiarum semen non manibus sed voce spargitur; magnifica doctrinarum supellex, non arca sed auribus suscipitur; disciplinarum irrigationes non terris sed animis fecunditatem afferunt. Pene interiit cognitio quæ uni commissa est: præbet se omnibus ex æquo scientia, & ita singulos amplectitur ut neminem fastidiat, sic omnes occupat ut in singulis tota consistat. Et quemadmodum infusa nostris corporibus anima nullam minus partem vegetat, quia motum & sensum omnibus impertit; imo verò ab multitudine & granditate membrorum nescio quid amplitudinis perfectionisque mutuari videtur: ita doctrina, quæ est eximium ipsius animæ decus & ornamentum, paucorum angustis coerceri non amat, sed magnitudinem inductione acquirit; eo melior quo pluribus prodest. Equidem si quid esset in sole sensus & intelligentiæ, beatiorum illum fore crederem, si omnibus orbis vniuersi partibus semel, eodemque momento vim suam & lumen præbere posset; quàm cum circuitione & anfractu diurno diuersis pedetentim regionibus illucescit. Quamquam ne hæc ipsa quidem eius illustratio tam benefica, tam communis omnibus, tam ubique solida atque integra semel percepta à quamplurimis scientiæ imaginem incommodè repræsentat. Nam quoties in illum oculos coniicio, & simul cogitationem meam ad Theophrastum, inter duo discipulorum millia de rebus grauissimis differentem, conuerto, hoc iste apud nos in animis

hominum facere videtur, quod ille de cælo corporibus elargitur. Tum enim uerò ridere mihi libet Isocratem tribus contentum adolescentibus, & Epicurum Menedemo suo scribentem vnum vnifatis magnum theatrum esse: ipsum quinetiam Philosophorum Deum Socratem in officina Simonis cuiusdam coriarij arcana illa sapientiæ mysteria enunciantem. Istud enim nihil minus ridiculum puto, quàm si pauci homines reliqua terrarum quererentur à sole collucere, cuiusque lumen & efficientiam omnem soli occupare conarentur.

Sed quoniam non de ipsa, vt arbitror, scientia, sed de eius traditione disputant aduersarij, voluntque hominem vnum in vno puero plus temporis & operæ positurum, quorum vtrumque multitudine deteri necesse est: videte quæso, Auditores, hominum insulsitatem, & iusta iudiciorum lance quæ ab iis afferuntur, ponderate. Quis enim hominis non ineruditi neque indiligentis industriam vnius pueri finibus circumscribat? quis non plures etiam per ludum ab eo institui posse fateatur? Rem difficilem, Deus bone! & permolestam, ab adolescentibus quinquaginta pen- tum diurnum exigere, eorum scriptiones recognoscere, memoriam exercere, formare ingenium, efficere vt quod vni præcipitur, suum omnes ducant; quod paucorum causa explicatur, reliqui intelligant; qui locus fraudi aliquibus fuisse demonstratur, cum omnes cauere condiscant. Quid autem vetet vt rerum sic personarum vicissitudines obseruare? vni non semper insistere, quod est perquam importunum, ad alios pro-

Neque præceptor vnus vni plus vacat, quàm multitudini scholasticorum.

gredi dum isti animos resumant ; modo antesignanis calcar admouere , vt cæteri incitentur , modo pigrales stimulis pungere vt contrariorum appositione meliores inflammentur : aliquos præterire , neminem negligere , securos deprehendere vt semper timendum sciant quod semel euenire potest ; sollicitis imminere vt prouidenter cauissese gaudeant. Quæ quidem varietas , & fortasse etiam aliquando perturbatio , tam est puerorum animis necessaria , vt eos nihil magis erectos semper & alacres efficiat : cum è diuerso qui vnus perpetuo metu contremiscat , qui solus exactoris seueritati obiiciatur , qui suo semper damno , nunquam alienis periculis instruat , necesse sit paucis mensibus eius ingenium totum penitusque obtundi. Iam si præceptor aliqua officij religione tangitur , si discipulorum amore ducitur (quem vero primæ illius ætatis gemmæ atque oculi non delectent ?) quàm multos ille selectæ indolis pueros pro vnis habiturus est ? quàm libenter illud operæ quod à scholis vacabit eorum progressibus impendet ? quàm ardentem nocturna etiam quietis tempora in eorum commoda insumer ? neque si minus exercitationes vsitatæ illorum , vel etiam ipsius desiderio satisfaciant , in nouis atque extraordinariis aut inueniendis solertiam , aut admouendis operam , aut exigendis laborem denegabit. Nam si putant obrectatores totam in emendatione scriptorum positam esse magistri operam , aut tantummodo discipulis laborari , cum ij reapse instituuntur in schola : vereor vt angusto nimis sint pectore qui laboris in crudienda iuuentute

collocandi magnitudinem, & ipsam magisterij amplitudinem non capiant. Itaque cum gloriosa inflammatio animorum discipulis quæ ac præceptoribus cõmunis, nullam operæ temporisque partem cessare permittat: cum exempla lociorum, & ipse multorum aspectus maximo sint ad scientiã pueris adiumento, cum id in ætatis exitu agere doceant publica gymnasia quæ tota vita sunt facturi; quæ omnia in umbraculis & studiorum tenebris ne per umbram quidem reperiuntur: quis erit tam amens & vecors, tam vilitatis suæ suorumque negligens, tam hostis rei publicæ ut perfectam puerorum educationem, qua vna salus regnorum amplitudoque continetur, obscurare, & in latibula quædam ferarum instar de-
trudere audeat?

Sed hæc, inquiunt delicati, Collegiorum emolumenta carò pusiones emunt, cum tenera cor-
puscula procul à complexu parentum, à matris blanditiis, ab amicorum charitate in gymnasia, inter iniuriosos æquales sub immanis præceptoribus deportantur. Hic misellis noua omnia, ignotus orbis, insolentes hominum facies, ipsi domorum lapides inusitati: tum autem labores permolesti, ludus demensus, cibus vulgaris, perpetua cupediarum abstinencia, metus assidui, minæ crebriores, quotidiana sociorum supplicia: quæ omnia grandiores vix constanter aspiciant, animi molles in membris infirmioribus quomodo sustinebunt? alterum igitur è duobus euenire necesse est, ut aut graui laborum onere opprimantur si generosæ sunt indolis, aut ad illa studiorum initia exhorrescant: quod Quintilia-

*Aduersus
eos qui non
pueros, sed
corroboratis
viribus
adolescen-
tes ad col-
legia mis-
tendos pu-
tant.*

nus cauendum in primis admonuit, ne qui puer studia nondum amare potest, oderit; & amaritudinem semel præceptam etiam ultra rudes annos reformidet. Quid hic agā, Auditores, cum è mea pharetra tela depromuntur quibus ipse cōficiar? Credideram enim hæcenus Fabij Quintiliani opinionem tueri, cuius aduersum me hoc loco profertur test monium. At in quo id puero caueri præcipit Quintilianus? in eo, vt arbitror, qui sit minor septem annis, qui literas doceatur ex quo loqui poterit. Eum vero infantem qui ad Scholas publicas mitti volet, dignus profecto est qui ad nutricem ipse remittatur. Quam autem bellè pusionis eiusmodi primum in gymnasia ingressum describit aduersarius! Equidem existimaui cum de Oasi aliqua, aut Scythica barbarie dicere: ita nobis non homines sed feras, non ædificia sed cauernas, non vitam sed mortis imaginem oratione repræsentat. Tetrum enim vero exilium in quo pueri à pagis in urbem, à rusticorum consuetudine in adolescentium liberaliter educatorum societatem ab impolitis moribus ad comitatem & elegantiam transferuntur! Misera peregrinatio, quæ sopitos animos rerū nouarum aspectu excitat, quæ rudibus ingeniis primæ urbanitatis figuras imprimit, quæ vt mentibus, sic membris robur & firmitatem conciliat. Nam vt ei qui ex morbo conualescit foras progredi, & liberum haurire aërem magna confirmatæ valetudinis pars est: sic imbecillibus ingeniis dici non potest quātum accedat virium cum paternos focos deserere audent, & aliquam vitæ, sociorum, actionum nouitatem pati condiscunt. Quis enim

non experitur rerum varietate stuporem illum rusticum : spectata autem in aliis earum tolerantia difficultatis horrorem imminui ; qui denique usu proprio pepitus absumitur ? Tum vero seipso maior animus usitata contemnit, noua prouocat, nullam sortem, nullum casum reformidat. Inter hæc grandescunt corpora, & laboribus pedetentim cum vita crescentibus ad adolescentiam rebus magnis iam non imparem peruenitur.

Sed, amabo, qui sunt ij labores quibus anxiarum matrum deliciolæ succumbant ? legere, scribere, dulciculis potionibus non vesci, abstinere tragematis, in rosa & viola non dormire. Quamquam nec ista quoque ad rem pertinent. Hunc tu laborem appellas ? His tu pueros assuescere prohibes ? Sic eorum posteros instituis apud quos recens nati olim infantes in profluentem immergebantur ? quorum matres in fodiendis agris occupatæ ubi maturi partus tormina sentiebant, paulū ab aliis seiunctæ vicinis in sepibus foetum edebant, mox quasi noui nihil accidisset, ad opus redituræ ? Quam vero nobis Rempub. facis qui pueros in mellina & in vidulo educas ? quos reperere iusseris in purpura, quos ciborum deliciis alueris, quos mater dissuauiendo placauerit, cui postea militiæ destinabis ? Castrensi opinor ? vt is tubarum clangores audiat, quem galli cantus dormientem læsit : vt suum atque aliorum sanguinem videat, cuius lacrymas amita deterfit : vt frigus, vt æstus, vt in ediam perferat, qui melle creuit & bellariis. Forensi igitur ? Certè, nam ex myrothecio non Isocratis sed nutricis, hominem educes ad clamores rabularum, catenarum stri,

*Laboribus
saltem literariis
con-
suescere debet
pueritia.*

dores, licetorum vociferationes, reorum complorationes, coniugum eiulatus: Tolerabit ille constanter importunas clientum preces, litigantium disceptationes, eorum qui causa ceciderint contumelias: totum diem sedebit in foro de iniuriis, de bubus, de agelli finibus cogniturus: nocte leget ad lucernam molesta caularum ænigmata, ignota verborum compendia, rusticani notarij characteres, aut fugientes in vetustissima membrana literas diuinabit. Quid ergo? Templis consecrabis, & Præbenda pretio redimes; ut qui apud te domi inclusus animo per delicias eneruato, fluente corpore, ingenio hebeti & retuso nullū vitæ politioris munus explere potest, iam non ut eximius Sacerdos panis Christi in ara, sed pecuniis & cibariis ut in hara porcus fagine-tur. O labem sæculi! ô morum corruptelam! ô certam rerum sacrarum profanarumque perniciem! eum in finem nasci tibi pueros optat Resp. ut inutilem turbam domi foueas? ius liberorum impetrabis à Principe, cuius utilitatibus seruire non potes? hanc secuti sunt instituendæ pueritiæ viam maiores nostri, seu qui has regiones Romanis summa cum gloria eripuerunt: seu qui regnū istud ex paruo fecerunt amplissimum? Eam credis fuisse apud Persas, Athenienses, Lacedæmonios, Carthaginenses, Romanos formandæ primæ ætatis rationem? & illi terrarum imperium sine militibus acquisiuisent, aut ex illa sagena milites accepissent? A qui non militiæ solum & bellicis facinoribus imposita est laborandi necessitudo: non veniunt ad otiosos mercatores diuitiæ, non crescunt negligētibus agricolis segetes,

non accedit ad ludentes pueros scientia : nihil gratuito cœlum donat; omnia sudoribus venalia sunt : sed est tanti animo & corpore contendere bona ingentia aliquando occupaturum.

Non est, inquiunt, ea quam dicis instituti nostri ratio; Scholæ bono publico patens; ad eas ibitur, sed à valentibus, qui & labores literarios sustinere, & vitæ communis officia discernere, & amicitias parare atque colere per ætatem possint : in sinu parentum doctrinæ fundamenta ponentur; postquam eo deuenerint vt in secundo vel tertio ordine censeriqueant, tum demum faustis auib; è nido longo tantum post interuallo redituri euolabunt : ante id temporis & necessaria est puero domus, & inutile gymnasium. Meministis, Audit. repertum aliquando peritum, vt opinor, tibicinem, qui quos in disciplinam suam recipiebat duplicem mercedem iubebat pendere, si quid alibi didicissent : cum diceret vir festiuissimus duplum sibi laborem imponi, vt & ea dedoceret quæ attulerant, & noua traderet quæ venerant accepturi. Nos isti homines in eandem adducunt necessitatem, neque præparato & perpurgato solo vti volunt; sed agrum lolio & lappa oppletum offerunt, qui tum demum bonæ frugis capax esse potest, si fallaces herbæ ab agresti domi magistro seminatæ stirpitibus euellantur. Quam est autem imperiti agricolæ primam perboni lætique noualis fertilitatem inutilibus stirpibus occupare, & ad fructuosos satus accipiendos semiexhaustum cogere? Aut quis sanus in area complanata domum amplam & ornatam ædificare decernat quidem, sed eam velit prius casis, & male mate-

Primos annos domi ponere est perdere, & reliqua studia enervare.

riatis tuguriis impleri, quæ & ipsa necessario destruenda sint, & magno labore sumptuque superfluo rudera longius exportanda? Sic enim usu quotidiano comprobatum est nobiles pueros diu in pagis institutos, & expeditè non tantum Grammaticæ Syntaxeos regulas, sed etiâ Virgilio atque Ouidio plures versus pronũciantes, planè barones esse, & toto illo tempore nihil sapere didicisse. Itaque ad prima elementa reduci eos oportet, & doceri duo verba latina jungere, qui se in oppidulo doctrinæ principes videri volebant. Interea viui spiritus defuerunt, acres impetus resederunt, feruor euanuit, memoria diminuta est; & tum aliquid incipiunt discere, cum ad percipiendum minimè sunt idonei. Noua omnia appetant oportet, & integram, ut olim iocabatur alia in re Tullius, ad ouium famem afferant. Fastidiente stomacho nihil est languidius; utiq; si & cõditiores priorib⁹ cibos apponi vider. Piget eos omnia quæ sciebant ignorasse: pudet infra prouectiorem popellum sedere grandes iam prætextatos: Scholas numerant & annos, & longum doctrinæ iter animo metientes, timent ad paternam domum redire pogonati. Illis sic affectis, quid virium, quid animi esse possit, equidem non video: experimur certè paucos eiusmodi stadium ingressos ad metas peruenire, multos in carceribus subsistere, non paucos è collegiis tanquam è carceribus euolare. Sed esto, recta fuerit & proba primi illius magistri institutio (non enim ita sum omnibus inimicus ut neminem quicquam promouere confirmem) hoc tamen reprehensores velinuiti dabunt, eadem illa

in Scholis facilius & citius à pueris percipi, & quod hic non solido anno ediscitur, vix illic toto triennio comprehendì. Non iam quæro quæ sit eius retardationis causa, aut quorum ea culpa accidat; tantum dico sic fieri. Cur ergo tam bonos annos malè perdunt? quidni potius tempori parant quam pecuniis? imo & cum liberorum studiis pecuniæ iacturam faciunt, rerum vtilissimarum dilapidatores stolidissimi.

Quid enim, dicet illorum aliquis tantopere studia puerorum urgere necessarium est, qui sepe prius & philosophorum lycea, & Iurisconsultorum basilicas percurrerint, quam ad publica magistratuû munia possint admitti. Redibunt, igitur ad parentes, quid acturi? otia buntur in patria cum sociis præcocium literarum, ludo, compositionibus, desidia si quid in collegiis hauserant, obliterabunt: ad annos denique capeffendis Reip. muneribus præstitutos indocti peruenient. Quanto melius est statim à Scholis eos ad forum propellere; & post curam magistrorum, bene viuendi & ea quæ perdidicerint exercendi necessitati alligare; vt iuuenilem licentiam, & otiosorum adolescentum flagitia non prius cognoscant, quam ipsis erunt in aliis vindicanda. Hanc orationem, Viri Clarissimi, totam autem, totam gemmeam vehementer cupio à vobis probari, & in memoriæ thesaurum recondi, vt illam reliquorum qui soli supersunt inimicorum importunitati, cum eo ventum fuerit, opponamus. Sed ne illa isti tantisper abutantur, aio hac in parte Alexandro Macedoni persimiles mihi videri, quem sine risu nunquam legere soleo, deliberaf-

Neque viderendum ne pueri nimis cito studia ab soluerint quasi postea nihil illis discendum super sit.

se serio quid tandem rerum acturus esset postquam vniuersum orbem ditioni suæ subiecisset. Is enim non maximam terrarum partem aut à patre acceperat, aut virtute parauerat; Regem vnum atque alterum armis vicerat. paucas vrbes iusta obsidione, reliquas deditione acceperat, & quasi mundo iam subactò ad otium inclinabat. Supererat Africa Carthaginensibus, Europa Gallis, Germanis, Græcis, Hispanis, Romanis eripienda; peruadendum quicquid in America, in India vltra Gangem sub Zona, vt appellant, torrida, in Septentrione pene suppositum mundi vertici audax posterorum industria deprehendit: decurrendus Oceanus, quem ne viderat quidem, Orcades, Albion, Iaponia & reliquæ Insulæ inuadendæ: & quasi hæc omnia in manibus haberet, ad quæ occupanda multorum Imperatorum ætates non sufficiunt, quid deinde negotij gereret, inquirebat. Non alio planè modo posteaquam pueri iudicio imbecilli, laboris impatiētes, ludi & otij appetentes, paucis annis, assidua magistrorum opera, vigilancia, conuiciis eruditionem summis labris degustarint, quasi iam percepta omni scientia, requirunt nostri homines quid domi paternæ sint acturi. Facient videlicet quod Seneca qui senex philosophum audiebat: quod Solon qui quotidie discendo senescebat: quod Theophrastus qui vitā sibi propagari optabat vt pulcherimarum rerum cognitionem perfectam consequeretur: quod Cicero qui si vitæ spatium duplicaretur, negabat sibi fore temporis satis ad lyricos Poëtas Græcos legendos: & hæc quota pars scientiæ est, quam parum vtilis, quam remota ab

ta ab hominum consuetudine? Quid? in Scholis
 adolescentes tanto studio, tot vigiliis id solum
 perdiscunt quomodo studendum sit, & illud ubi
 magna animorum contentione acquisierint, quæ-
 rent parentes quid agendum supersit? O miseram
 literarum conditionem, quæ tam negligenter ha-
 bentur. Si quis puer in ferrariam aut sutoriam of-
 ficinam semel traditus est, artis facilioris quàm
 vilioris instru-menta tota vitâ non deponit: & lite-
 rarum scientiam rem laboris intolerabilis, cogni-
 tionis infinitæ, ingenij plusquam humani qui sa-
 lutarunt à limine, tanquam qui in abditos myste-
 riorum recessus sunt admissi, quietem & igna-
 uiam prospectant: vagari & in temporis ingenii-
 que certissima pernicië otiosi sinuntur à parenti-
 bus, vt Remp. inepti & imperiti capeffant. Et hæc
 cum geri vident studiorum accusant properatio-
 nem; quasi nimium cito id incœperint quod nun-
 quam satis agi potest: confecta studia criminan-
 tur, quasi possit illud absolui quod omni vitâ fa-
 ciendum est: queruntur nihil superesse quod a-
 gant, vbi domestica disciplina dirigi, doctorum
 consuetudine institui, fori assidua frequentatio-
 ne erudiri debent: cum libros euoluere tenentur
 quibus ius Romanum, Prouinciarum consuetu-
 dines, res decretis Senatus antea iudicatæ tradun-
 tur: cum explorare se fictis causis possunt, com-
 parare ad veras, tentare ipsi priuata opera alienas,
 & quid in vtramq; partem pro æquitate afferen-
 dū sit, præuidere. Profectò non perueniet ad sum-
 ma qui multa sibi semper superesse non putabit.

Videre mihi videor aduersarios assumpta gra- *Contra eos*
 uitate censoria temporum infelicitatem notare, *qui adoles-*

*centes maturè è col-
legiis edu-
ci volunt.*

conqueri inter sæculi corruptelas eam numerari vel maximam, quod adolescentes neque à parentibus, neque à ratione frenum accipiant. Omnia quidem post Academiarum confecta spatia iis superesse facienda, quæ norunt aliquando facienda: hoc se cum id ætatis essent expertos, hoc egisse diligenter & accuratè patris imperio atque institutione. Nunc autem seu parentum stoliditate, & amore in liberos præpostero, seu filiorum corruptis moribus, iuventutem arcepta libertate, profligata verecundia in lustris & ganeis desidere, puellarum pudorem expugnare, mercatorum officinas exhaurire in sumptus nepotinos: id dolere cognatis atque amicis. Offensioni & ludibrio esse ciuibus: ab ea licentia legitimis matrimonij vinculis vix retrahi; magistratus deniq; officium emi, quo tandem vel inuiti in gyrum rationis ducantur. Tum verò egregios controuersiarum arbitros, iudiciorum præfides, vitæ necisque pene dominos inter ciues quorum nuper fuerunt fabula lites dirimere; morum turpitudinem qua anno ante infectissimi erant, in sociis libidinum castigare; coërcere blasphemias impiorum, cum ipsi nihilo modestioribus nondum satis abstineant. Quanto commodius foret eos si fieri posset, perpetuo seruare in collegiis, vbi vel magistrorum auctoritate in officio contineantur; vel si libertatem amant, ea moderatius vtantur; aut certè flagitia sua ab oculis parentum, à conspectu ciuitatis remoueant. Nam quia maior est ex longinquo reuerentia, & populo facile ab ignotis imponitur; conceptam de probitate doctrinaque sua opinionem facile tuebuntur, si non prius pedem

in patria,quàm in magistratu pōnant. Explicare vobis non possum, Audit: quantam animo meo voluptatem hæc istorum oratio conciliet; ita mihi ad id quod modo acturus sum videtur accommodata. Sic enim illi causam suam agunt vt amentatum mihi telum subministrent quo tertium aduersariorum genus conficiam: qui volunt pueros maturè positos in gymnasiis, inde maturius educendos, ne improborum consuetudine deprauati ad libidinis scopulos adhærescant. Equidem meas in disputando contra istorum errorem partes illis volens libensque concedam, si in concepta semel indignatione progredi velint. Nam & ipsos præsidio suo exturbatos ad mea castra veritatis viribus traxisse integra victoria est; & vereor vt graues isti & sancti homines qui iuuentutis corruptionem tanto perè horrent, vt etiam eius metu collegia vitanda existiment, si veram eius stationem in paternis domibus requisiero, mihi succenseant. Nolo existimare iuuentutem eo impudentiæ & nequitia venisse, quantum isti clamitant: fatendum tamen & ingemiscendum, plus indulgere libertati, quàm virtutis atque honestatis ratio patiatur. Sed quicquid tandem est licentiæ dicunt ipsi in oculis parentum vsurpari, parentum indulgentia tolerari: in collegiis vel occasionem deesse, vel facultatem. Hoc à me non affertur: illorum vox est, quos hæcenus habui subinfectos. Quid vos hic sanctitatis vindices? qua declinatione criminationem illam effugitis? Nam præter experientiam qua instructi pugnant, veterum etiam testimonia producunt, qui suis idem temporibus euenisse confirmant.

Legerunt enim M Fabij Institutiones, cuius suffragum aduersus me nuper citauerunt. Atque ille locus hunc non vehementius, quàm confidentius tractat his verbis.

Veterum auctoritate probatur parentum vitia liberorum moribus plurimum nocere. *Finem liberorum nostrorum mores non ipsi perderemus. Infantiam statim deliciis soluimus. Mollis illa educatio, quam indulgentiam vocamus, nervos omnes & mentis & corporis frangit. Quid non adultus concupiscet, qui in purpuris reperi? Ante palatum eorum, quam mores instituimus. Gaudemus si quid licentius dixerint. Verba ne Alexandrinis quidem permittenda deliciis, risu & osculo excipimus. Nec mirum: nos docuimus, ex nobis audierunt, nostras amicas vident: Omne conuiuium obscænis canicis strepit: pudenda dictu spectantur. Fit ex his consuetudo, deinde natura. Discunt hæc miseri, antequam sciant vitia esse. Inde soluti ac fluentes, non accipiunt è Scholis mala ista, sed in Scholas afferunt. Quæ quidem obiurgatio ipsos maximè vulneraret qui pueritiam domi fouendam asserebant; nisi iam ad nostras partes transissent: quibuscum sic disputant. Si prudentissimus Rhetor parentum delicias nocere stomachatur teneris adhuc pueris, imò infantibus, quibus omnia sunt indifferentia, qui quidlibet faciunt quia putant faciendum: quanto senem eum par est in eisdem iracundius commoueri qui grandiores exemplo docent nequitiam? grandiores inquam liberos quorum & animus ad omne delectationis genus procliuus est & corpora intemperantiæ non resistunt; & ingenia diiudicandis voluptatibus apta sunt; & ætas iam tantum moneri potest, cogi amplius non potest: gaudent ea sibi domi offerri, quæ aliunde*

comparassent : impunè in iis se amoribus voluntant, quos maiorum improbitas fecit esse domesticos. Nimirum amant filij quæ à parentibus diliguntur, quis non laudet? faciunt iuvenes quæ à senibus fiunt, quis reprehendat? Sed quoniam ea Quintiliani castigatio vitiosissimos tantû cruentat, quorum fortasse pars minor est: aliam certè à Seneca mutuatur haud paulo remissiore: qui puerum narrat apud Platonem educatum, cum ad parentes relatus vociferantem videret patrem, dixisse; *Nunquam hoc apud Platonem vidi. Non dubito*, addit Philosophus, *Quin citius patrem imitatus sit quàm Platonem.* Nam cum omnis vitiorum imitatio facilior est, quàm virtutum expressio: tum in eos maximè tanquam in præparatam materiam funesta illa fax improbitatis adhærescit, qui & sanguinis coniunctione, & vitæ societate, & morum similitudine inuicem propius accedunt. Itaque si Platonis gibbum, & Aristotelis balbutiem, corporum vitia, in se transfulerunt discipulorum aliqui, quia rerum omnium inanes animi, & flexibilia membra id arripiunt ad effingendum quod primum occurrit; idque longo deinde videndi & simulandi vsu cum natura coagmētatur: quanto illud in iis periculosius est, quorum & idem sanguis est, & animorum similis propensio? Adde paria corporum lineamenta, amorem mutuum magnum in filio, vt ait ille, patrisfandi desiderium, patris è diuerso conscientiam qui sua in illo vitia castigare non audet. Atque eiusmodi maculis licet præceptores ipsi aliquando deformati sint: difficile tamen contingit vt adolescentes externis hominibus à quibus

commodato pendent, quos sæpè ut molestos voluptatum interpellatores oderunt, firma vlla & constante in reliquam vitam morum similitudine coniungantur.

*Fatendum
quidem vi-
riosos pue-
ros aliquā-
do in Colle-
gijs reperi-
ri, qui sint
æqualibus
offensioni.*

Nec verò inde filiis suis timent aduersarij, quæ de parentum vitiis dicta sunt, ad se minime pertinere gloriantur: sed in æqualium multitudine quæ in collegiis alitur, certam morum perniciem aiunt esse constitutam. Nam in turba promiscuè collecta, in tanta ingeniorum varietate, imbecillitate iudiciorum; cum alij sint à natura facti ad alliciendum, alij simpliciores quocunque facile ducantur; isti ad audendum proiecti, illi aliorum societati præfidentes fiant; hos ad excogitandum solertia, quosdam ad conficiendum pecunia non deficiat: quis non videt alios aliis ad malum & exemplo esse, & incitamento? Et quemadmodum hominem pestifero aëre afflatum suæ primùm domui, tum ciuitati, prouinciæque vniuersæ, exitium procreare sentimus: ita vitiiorum contagio à perduto vno Puerò profecta, in omnes manat cum horribili strage virtutum. Fecisset vtinam Deus immortalis, ut quod obicitur, simplici & præcisa negatione diluere possemus! vtinam omnis ea pueritia quæ se autoramento nostro addicit, & in his ludis exercet, bonum virum promitteret, quod honestum sacramentum Seneca nuncupauit! Non addam alia vri virgis, ferroque necari, quod imperatum Gladiatoribus; sed honesta & rationis plena lege proficere: nullius esset tam peruersum ingenium, tam præfracta natura, tam altis defixa radicibus consuetudo, quæ vestræ, Patres Reuerendi, pietati, con-

filiis, hortatibusque non cederet. Verum quid
 facias? huc se ipsos deferunt, admittuntur ignoti,
 naturam mutare non possunt, occulti serpunt,
 diu latent, teguntur simulatione, numero defen-
 duntur: & tandem longo post tempore suspicio-
 nibus primum, deinde certis indiciis deprehen-
 duntur. Tum verò penè curatum est malum.
 Nam id non liberius quàm verius ubique profite-
 bor, esse vobis ad imminuendam eam pestem tam
 occultam, quàm emergentem parata remedia.
 Sed omnino tollatur Id fieri non potest Sic enim
 sunt res humanæ, vt bonorum malorumque per-
 mixtione temperentur. Quinetiam ipsa virtus,
 quæ nullam admittit cum vitio communionem,
 eodem tamen loco consistat, eodem tecto clau-
 datur, eidem mensæ accumbat necesse est. Nam
 vt nullus vnquam Philippus potuit Poneropolim
 ex omnium scelerum colluione componere; sic
 nemini vnquam Plotino concedetur Platonis
 Remp è sapientibus & iustis hominibus constan-
 tem vnius oppidi muris includere. Itaque ad eo-
 rum quibus hominum congregatio, & vitæ com-
 munitas regenda commissæ est, officium perti-
 net, malâ quæ prouidentia anticipari possunt, im-
 pedire: quæ iam facta comprehenduntur, punire,
 ne vltius procedant: stirpitus autem eradicare
 atque euellere, ne puris quidem illis mentibus,
 promptissimis voluntatum suarum ministris
 Deus permittit.

Hæc cum vera sint, atq; inter homines humanæ *Sed longè*
 agier conueniat: quia tamen cuiuslibet rei po- *certius ab*
 tius, quàm virtutis & modestiæ toleranda iactura *ipsa fami-*
 est, cedam aduersariorum oppositioni, si vllum *lia domi*

*periculum
est.*

vsquam in terris locum nominant ab improborum consortio, & vitiorum contagione remotum, in quo non dico pueri studere securius quàm in collegiis possint, sed ne vllus quidem honestè viuere. Nam quod eos domi sanctius educari volunt, cogitent amabo vtrorum illis societas magis appetenda sit, puerorum an iuuenum, ingenuorum an seruorum, æqualium an pedissequorum? Quàm blandè se in orientis illius solis beneuolentiam insinuant domestici? vt animum implent promissis, euincunt blanditiis, assentatione corrumpunt? quàm sèpè clam parentibus duces se & m̃agistros præbent ad flagitia, quibus cum incautum implicuerint, totum sibi penitusque addixerunt. Quid commemorem prætextata verba quibus identidem recreantur? quid blasphemias, quæ vt sermonis ornamenta inferciuntur? quid incredibilem quiduis dicendi faciendique licentiam illi hominum generi pene concessam? Ab ea verò societate quis adolescentem abducet patre negotiis intento, matre lanam in cubiculo facientè, patruis atq; auunculis alibi habitantibus? Domesticum certè præceptorem ea cura spectat, cuius fidei creditus est adolescens: sed neque ipse Plagosus Orbilius est: neque frenum accipere vult etas iam grandior. Parentes igitur moneat: sed neq; ab illis gratiam inibit, quia filiorum peccata quæ sibi iubent narrari, nunquam libenter audiunt; & domesticis cæteris erit offensionis: ipsum autè puerum fortunæ suæ fabrum grauius exulcerabit. Nam vt in ipsis crèpundiis & prætexta non nihil in eum licuerit: nunc tamen cum se æstimat, cum sua circumspicit, cum spes suas nouit, & prope est vt ce-

neat, odio implacabili aduersum se concitare, hominis est insani, & suo se gladio iugulantis. Ita boni, cauti, optimi parentes venduntur, filij deprauantur. Fateor equidem hæc rationum momenta tantum apud me ponderis habere, vt si de duobus tēporibus quibus oppositi homines negant habendos in collegiis pueros, alterum eligere necesse sit : longè malim teneram pueritiam domi consistere, quam grādiore ante studiorum finem domum reuocari. Nam ætas pusionum vix ipsa per se se prauitatis est capax, & si quid improbum domi hausit incautius, excuti sibi facile patitur in collegio: maiores autem postquam bonos collegij mores in ea quam dixi domesticorū consuetudine decoxerunt, postquam verecundie naufragium in ea vitiorum charybdi fecerunt, quam deinde tabulam arripere, quem vllius virtutis portum vel expulsi & eiekti tenere possunt?

Verum cum nec isti abduci à collegiis sine virtutis, nec illi domi desidere sine studiorum detrimento possint, & omni vtilitatis varietate completa & perfectā sit Scholarum disciplina; quid habent iniqui collegiorum obtrectatores, verique studij hostes, cur tā opere domesticas literas amplexētur? Animorum aut corporum salutem? at altera in collegiis non deteritur, altera etiam acquiritur. Parsimoniam temporis? at compendiarium ad scientiam iter alibi quam in collegiis non reperient. Sumptuum moderationem? at neque illud obtendere ausi sunt, nec verè potuerūt: nam quo citius studiorum spatia decurret adolescens, eo minus pecuniarum exhauriet. Quidni ergo Scholas publicas vera scientiæ emporia fa-

tentur esse, & in iis omnem filiorum suorum etatem erudiant? Vos autem, Adolescentes, ad quorum arbitrium totam hanc controuersiam retuli, quanquam iudicis non est actori quicquam obii-cere, sed quæ afferuntur æqua lance ponderare: tamen si quid habetis præterea, per me licet, opponite. Vnã excipio domi libertatem, maioremque licentiam, quæ neque vestris parentibus voluptati, neque vobis honori vnquam futura est, Silentium, vt video, nutusque vester sententiæ meæ suffragatur, neque iam exigi vt pedibus in meas partes catis, qui animo & benevolentia testificatione mecum sentire monstratis. Atqui ista prima non est vestri hac in causa iudicij declaratio: cum enim pedem è domo paterna extulistis, cum in istud Athenæum conuenistis, cum in disciplinam nostram traditi estis, si non expressa, certè tacita fuit parentum vestrorum oratio, sola collegiorum institutione doctrinam cito & cumulatè percipi. Cum illos ergo tam multos paucis domesticorum studiorum patronis, tam sapientes inconsultis, tam nobiles obscuris opposuero, si auctoritate res agitur, quam ratione niti comprobatum est, verendum non erit ne causam non obtineam. Sed vltimum, potentissimumque argumentum in vobis repositum est; à vobis, Adolescentes, causæ istius bonitas & successus dependet. Nam si illis quæ commemoraui ad discendum instructi præsidis, magistrorum vigilantia, sociorum exemplo, Scholarum splendore, amplitudine Collegij. eos in scientia progressus facitis, quos vestra indoles, & præsidum cura suo iure flagitat; si in exercendis Reip. muneribus

tantum omnibus excellitis, quantum docti imperitis; si morum sanctitatem à disciplina Scholarum traditam in omnem vitæ partem propagatis, nemo dubitabit in posterum, quin Collegia priuatis domibus, publica studia domesticis, eximij doctores domi magistris antecellant. Eo vos exemplo suo inuitant qui priores hæc gymnasia celebrauerunt: quorum pietas in templis atque aris, æquitas in iudiciis, doctrina in foro, vbique virtus elucescit. Præ se ferunt & palam profitentur, animum suum natura vberem, magistrorum diligentia, collegiorum cultura, publicâ institutione meliorem extitisse. Hoc est dicere, si quid sentitis, si quis post contrita gymnasia minus à scientia paratus exierit, ei aut ingenium defuisse, aut laborem: alterum natura vobis liberaliter concessit: ad alterum vestra vos vtilitas, spes parentum, vota ciuium, rei magnitudo, Reip. dignitas, adhortantur.



V T R V M

RES LITERARIA

PLVS SCRIPTIS LIBRIS,

AN VIVA VOCE

PROMOVEATUR.

O R A T I O VII.



ALso queritur de natura Theophrastus, quod animantibus non paucis diuturnam lucis vsuram concefferit : hominum autem vitam quorum id maximè interesset, vt artes omnes perficerentur, terminis descripserit, finibusq; perquam exiguus. Nihil enim esse video, aut in ætatis tempore, aut in natura disciplinarum, aut in doctorum institutis, quod hanc vocem vsurpare cõegerit hominem eum, qui se sapientem & esse, & haberi vellet. Nam vita longa satis est, & in maximarum rerum consummationem largè data, si tota benè collocetur : & in artibus nihil est tam reconditum, quod hominum ingeniis penitus perspectum, planeque cognitum nõ sit ; ipsorum

denique hominum diuina inuenta illustres atque directas omnium artium vias posteris tradiderunt. Quamobrem sic existimo parenti potius optimæ gratulandum, quod multorum ingenia in pulcherrimarum rerum inuestigatione posuerit: vt quoniam non videntur omnia quæ peritum efficiunt ab vno homine reperiri potuisse, ex complurium labore atque studio rem numeris suis redderet absolutam. Et vero licet vnum aliquem tanto mentis acumine, & vitæ diuturnitate donasset, vt artem vnā institueret, perficeretque: cum ego si modo homo esset, in aliquam multis errare, labi, decipi potuisse contendo. Vnde profecto non sine graui scientiæ, humanæque vitæ damno eueniret, vt omnis posteritas quæ illius inuentis excultisque vteretur, ad eius quoque vitia adhæresceret. Nam quemadmodum apes idoneos ad mel faciendum flores securæ possunt carpere, melle ipso allini absque periculo non possunt: ita clarorum hominum virtutes delibare licet, in iis autem habitare iucundius, etiam quæ putantur insignia, periculosum est. Habemus igitur diuina prouidentia singulis in artibus eximiam perfectorum copiam, vt dum omnes ab aliis exprimunt, quæ in aliis vel obscuriora, vel penitus nulla sunt, nemo vitiosa sectari imitando cogatur.

Et quoniam non doctrinæ beneficio, sed naturæ impetu; non alieno persuasu, atq; inductu, sed insita cupiditate, non deliberato proposito, sed velut anticipata propensione ad cognitionem inclinamus, quod desiderium rerum obiectarum infinitate nec obrui potest, nec extinguere fuerunt

Artes & disciplinas a pluribus, quam ab vno homine perficere optabilius est.

ij qui signum hominibus ad scientiam sustulerunt ab omni sæculorum memoria bipartio distributi.

*Duplex
est via ad
disciplinas
capeffen-
das, viua
magistro-
rum vox,
& scripti
libri.*

Alij enim viua voce præsentium animis doctrinam instillarunt, alij futuram posteritatis propagationem librorum scriptione iuuerunt. Earum autem, quæ sic traderentur, rerum nuntios, atque interpretes dedit natura sensus duos, aures atque oculos, nihil vt intelligentia dignum mentes nostras, cogitationesque præteriret.

Itaque sic humanæ curiositati consultum est, vt cui alter sensuum obtusus fuerit, is ab altero subsidium petat: cui foris à doctore scientiam arcessere non vacabit, habeat domi litteras; quarum cōmentatione doctior euadat, meliorque. Equidem duo hæc, vt aliqui appellant, adiumenta; vt malunt alij, fundamenta scientiæ, tam esse homini necessaria iudico, vt hoc actionis ingressu, palam, aperteq; profitear, qui in altero planè claudicet, doctum peritumque posse esse neminem. Habere te magistros prædicas quorum vocibus aures tuæ assidue circumsonent? id vt primis annis optabile est, & perhonorificum, sic in ætatis flexu putidiusculum, in senectute intolerabile est. Librorum copiosam suppellectilem ostentas? nisi prima litterarum lineamenta magistri voce quasi penicillo in animo tuo effinxisti, quid sunt aliud ea volumina, quam stultitiæ tuæ abaci, gloriæ scopuli, ludibria hospitem, oblectamenta puerorum? Nimirum in scientiæ regnum per viua magistrorum vocem aditus est, in quo si aliquem dignitatis gradum & gratiæ tenere vis, relicto doctorum officio, per uolutandis

scriptorum monumētis te totum penitusque dedas oportet. Est ergo tam æqualis in vtroque necessitudinis ratio, vt alterum sine alterius accessione mancum, imperfectumque videatur. Sed existit non indigna hoc loco, vestris auribus, vt spero, non ingrata, de principatu inter vtrumque cōtentio. Nec iam de pura puta necessitate cōtrouersantur, cum alteri inchoatam, alteri perfectam deberi scientiam nemo videat: sed decantata illa magistrorum viua vox, plus in se momenti ad scientiam, quam in omnibus omnium gentium bibliothecis esse contendit. Stat ex aduerso pro doctis hominibus qui illustria ingenij monimenta reliquerunt, diligens & accurata scriptio, sibi que quicquid est in scientiæ acquisitione iucunditatis, in possessione honestatis, in vsu atque experientia vtilitatis totum assumit atque vendicat. Magna causa (Auditores) & implicata sanè controuersia, nobilem hunc & eruditum confessum postulabat, extra quem aut acutiores ad peruidendum, aut æquiores ad æstimandum arbitros frustra requirat. Ego partis vtriusque momenta sic ponam in medio, vt nihil mei iudicij esse velim, sed in vestra auctoritate & arbitrio conquiescam.

Altera

Atque vt à magistris ducatur oratio, iure hoc *pars controuersia* meo dicturus videor, nec hominum iudicia reformidabo, absque magistris esset, scientiam quā *pro viua* nunc vix tenemus, iamdiu nullam futuram. Non *magistrorum voce,* hic repeto primos esse veluti pictores, qui in can didis adolescentiū animis ea lineamēta designāt, *aduersus* ex quibus admirabiles virtutū formæ, pigment- *scriptos li-* torum deinde florem & colorem accipiunt. Non *bros.*

dico iter ad doctrinam obseptum laboribus, difficultatibus arduum, desperatione præceps, flexuosum varietate, fastidiis præpeditum sola Doctorum opera complanari. Non commemoro radices scientiæ amaras, suauitate vocis, actionis venustate; dignitate corporis mitigari: In viua voce, virtutis & efficacitatis inesse nescio quid, quod sentiri possit, explicari non possit. Patior hanc etiam mihi disputationem eripi, ante libros scriptos auditam in studiosorum circulis magistrorum vocem, paulatim autem dictata scriptaque quæ subtili obseruatione collecta essent, non vt præceptorum studium contineretur, sed vt diutius prodesset industria: non vt neglecto docentium officio ad mutas literas, quasi ad expositum aliquem artis foetum concurreretur, sed vt viux illius spirantisque vocis imago saltem aliqua circumferretur. Proh Deus immortalis! tam ne est ingrata, tam immemor beneficiorum humanitas? quæ cum sacrosanctam scientiæ possessionem à magistris acceperit, eamque illi certam ac stabilem scriptis voluminibus effecerint, in eū tamen errorem labitur, nisi quis Deus succurrit, vt vmbra corpori, imaginem archetypo, scripta auctoribus anteponat? Non vtor, inquam, hac actione; hæc causæ meæ robora abduco, quæ si tamen altè in animum vestrum descenderent, profligata iam & pene sublata esset controuersia.

*Principia
scientiæ
omni ne-
cessitate à
magistris
petuntur.*

Vnum accipio ab aduersariorum confessione, id est, à veritatis ipsius manu, quod nulla negare possit impudentia, nulla eleuare calumnia, nulla obscurare facundia: in magistris esse disciplina-

rum

rum omnium fontes, riuulos in libris: ab illis tanquam ab oraculo Themidis, omni necessitate scientiæ capienda esse primordia: sola magistrorum gratia & labore, omnia sapientiæ adyta referari. Hic ego vos appello indagatores veritatis, venatoresque Philosophi, quicquamne frequentius vestris in scholis auditum est? aut si vultis quicquam verius in sapientum libris legitur, quàm, quibus modis, mediis, instrumentis, adiumentis, & si quod aliud verbum est, quo effatum illud declaretur, res aliqua in mundo existere incipit, per eadem in illa quam acceperat essentia conseruari? Quid? nobilem scientiæ partem, cuius se tantummodo obstetricem faciebat Socrates, quem excipere studiosè, peramanter fouere possunt parentes optimi, tanquam fœdam abortionem eiiciant, aut quasi furtiuam & vulgo suspectam sobolem, extrariis nutricibus alendum, educandumque exponant? Quid? cum omnis Doctorum labor, doctrina, studium lactescat, ut alumnos dulci nutrimento corroborent, contemnent illi has delicias, ut à mutis atque inanibus truncis succos fortasse nocituros exprimant? Cum seduli Præceptores nutricum more, teneris illis mentibus omnia mansa in os inserant, grauem aliunde cibum petent, quo non augeantur nascentes adhuc vires sed opprimantur?

Atque hic vescendi modus quam & suauis sit, & facilis ad concoquendum quotidiana do-
cet experientia, cum in librorum obscuritatem, locorumque asperitatem delati, inter instructissimos ferculorum apparatus fame & siti, ut est in fabulis, enecaremur, nisi doctorem aliquem,

Ad librorum ipsorum intelligentiam necessaria est magistri opera.

aut etiam æqualem adhiberemus, cuius bene cō-
 cta & condita explicatione intelligentiæ pluscu-
 lum obsonaremus. Quæ res quanquam satis se
 ipsa comprobât, exemplum tamen vobis propo-
 no, vnum è sexcentis veritate certum peripicu-
 itate clarum, religione sanctum, augustumque.
 Æthiopem, vt arbitror, eunuchum meministis,
 eum qui Hierosolymis cum discederet, à Philip-
 po religionis iam tum nascentis mysteriis initia-
 tus, & lauari potuit, & nigrorem deponere. Le-
 gebat ille solus in rheda Maia vaticinium, quo
 Assertoris nostri luctuosa mors non obscurè con-
 tinebatur. Applicat se Philippus ad currum, &
 persanè liberali interrogatione hominem salutat,
 intelligeret ne quæ oculis percurreret, quæ ma-
 gno studio legeret. quæ contenta voce recitaret?
 Ego ne vt ea intelligam quæ mihi nemo homo
 vnquam explicuit? Atqui, dicere poterat Philip-
 pus, nihil est in hac doctrina reconditum, celebre
 oraculum est, quo prænunciantur ea quæ ante
 mensem gesta sunt, quæque in oculis hominum
 pene adhuc geruntur: quorum diritatem execra-
 ta ipsa sydera, præter naturæ ordinem, suorum-
 que orbium conuersiones, luminis defectu Hiero-
 solymam primùm, tum orbem vniuersum
 damnauerunt. In hac te corporea caligine solum
 animo cæcutisse? vnum è tot profelytorum milli-
 bus tam potentem, tam carum principibus ne au-
 ditionem quidem de re adeo conclamata accepisse?
 videor, ait ille, suspitione nescio quid attinge-
 re de Nazareno quodam nuper in crucem acto,
 qui se pro Messia venditaret, sed hæc quæ lego,
quomodo possum intelligere, si non aliquis ostenderit

mibi ? Atqui ea ipsa quæ legis de Nazareno illo dicuntur, & facili temporum applicatione in eum mirificè conueniunt, vt tutè videre incipis. Quomodo possum sine duce, sine explicatore, sine magistro? Quid? sine magistro tam illustria nouarum rerum prodigia neglexisses? tam perspicuas futuri vaticinationes, quarum euentum pene oculis vsurpasti, præterisses? primum summumque Iudaicæ legis caput, cuius tu te candidatum profiteris, acta scilicet Messia mortemque ignorasses? Certè, si nemo docuisset. Non docebat liber? non prædicebat vates? non monstrabant digito tam eximia, tam inusitata naturæ patientis portenta? vanum erat & inane quicquid extra magistri vocem poterat adhiberi? At enim quid est mirum ab externo homine non peritissimo Prophetæ dicta intelligi non potuisse, quæ natura sua tam sunt obscura, vt in hac Euangelicæ cognitionis luce, in tanta librorum, commentatorumq; copia, vix ab ingeniosissimis possint percipi? Multi mihi credite (Auditores) quasi diuino quodam afflati spiritû furere volunt, & Prophetica lingua loquuntur: vt tùm demùm doctos se, peritosque haberi autument, cùm ea scripserint quæ nemo sanus intelligat. Non hîc commemorato Heraclitos, Aristoteles, Lycophrones meras tenebras, cùm Antonius Ciceronianus Poëtas Græcos omnino quasi alia quadam lingua locutos non conetur attingere, cum Cicero ipse neget habiturum se tempus quo Lyricos legat & Dialecticos, si vel ætas duplicetur. Itaque quàm multi in obliuione sempiterna iacerent auctores, quàm multi altera manu nos ad se inuitarent, altera re-

iicerent scriptores, Id est, vtilitatem earum, quas inuenerunt rerum obsecarent, nisi animata præceptorum explicatio lumen afferret?

*Magistri
librorum
commenta-
toribus
longè plus
profunt.*

Vereor vt aliquorum opinionem fefellerim, qui quod esse in Grammaticorum Rhetorum enarratorum officio videbatur, id magistris assignarim, Ita dico (Auditores) tam est verum scriptorum comprehensionem à viua magistrorum voce pendere, vt ipsi commentatores quia non spirant, lentius, imperfectiusque auctorum sensa depromant. Equidem de me nihil dico, qui scio quàm in omni re nihil sim; sed audiui plerosque doctos, qui dicerent, isto hominum genere nihil esse gloriosius imperitum: Quippe qui scriptorum elucidationem magno ambitu promittant, & sæpè loquantur ænigmata: cumque præcipuorum locorum obscuracioni, tanquam capiti mederi deberent, leuicula quædam & protrita quasi reduuiam, curare satagant: in iis denique reperi quod sciamus, deesse quod requiramus. Alia longè docentium est ratio, alia conditione ad Lycophronis, Persij, Aristotelis, diuini Thomæ, & si quid est istis vel difficultate rerum, vel profunditate sensuum, vel conformatione verborum tenebricosius, enarrationem aggrediuntur magistri. Habent solertes, acutos, discendi cupidos auditores; illi videlicet honestum verborum tetorum difficultati inducent isti crebro interrogationum impulsu deiicient: præteruehentur illi locum vnum tanquam infestam Charybdim, quàm poterunt concitatissimo cursu? isti intueri & respectare cogent: circumrodent illi tempus eximendo, diem ducendo? hi deuorare contig

pellent : nihil demum effugiet in cuius certa & contestata explicatione non omnium ingenia conquiescant. Quamobrem nemo est qui non affirmet longè difficilius esse scholam auditoribus explicare quam libris, contra quos nemo tum dicat fucum facere; Atque ut progrediar ulterius, alterum altero esse ingeniosius : cum sapientes ab omni ævo id professos esse videam, ut quæ scirent ipsi liberaliter cum æqualibus communicarent : suam autem doctrinam scriptis mandasse perpaucos Nisi forte Epicurum qui plura quàm quisquam Philosophorum scripsit, sapientiorem Socrate fuisse velimus, qui de rebus Philosophicis neque ipse scripsit quicquam, neque omnia de se à Platone scripta comprobavit. Versibus autem Æsopiam fabulam in compositè composuit, puto ut sic quoque scriptores, homo festiivissimus irrideret.

Quid dicam de mediis quibusdam artibus, quæ non solum animos cognitione pascunt, sed cum ita fuerint inchoatæ, in actiones prodeunt? quas nollem profectò cum explicantis voce, tam arcto necessitudinis vinculo colligatas : habere-mus enim ingeniosissimas operosæ artis machinationes, alibi quàm in libris Archimedis : excitare-mus magnificas basilicarum substructiones, aliter quàm Vitruvius in tabula : morbis mederemur grauib; & mortiferis felicius quàm Hippocratis aphorismi. Atque libri illi per mihi similes videntur hominum simulachris, quæ alicuius Polycleti manus ad vnguem fecerit atque poliuerit, sic quidem ut ea putes vivere : ita vultus in spectatores intentus, venusti atque integri

Artes quæ non minus usui discuntur quàm studio, praceptoribus carere non possunt.

oculi, labia semiaperta, digiti vocem gubernatur
ri exprimuntur. Quod si ea compellere incipis,
vt Bucephalus suæ effigiei adhinniebat, si quod
ab eis responsum exprimere conaris, saltem vt à
Memnonis statua; tum enim uero prodent ip-
sa se, & vt inanima turpiter obmutescunt. Non
alio sanè modo spirare putamus in libris aucto-
rum ingenia, cum ad ea accessimus: sed si quid à
nobis rogantur, si consuluntur, aut conticescunt
penitus, aut malignè respondent. Et quemad-
modum in Republica leges à sapientibus consti-
tutæ sunt, quæ iubeant facienda, prohibeantque
contraria: vt est tamen hominum vita innumeris
casibus obnoxia, existunt sæpè controuersie gra-
ues & obscuræ, quæ sapienti principis interpre-
tatione, id est, viuæ vocis oraculo indigeant, quæ
si deesset, iudicium tribunalia, licet omnibus Pla-
tonis legibus circumsepta, iniquitate & iniuria
redundarent. Sic in regno literarum, etsi nulla
doctrinæ pars à libris peti non possit, nisi tamen
animatæ bibliothecæ usus accesserit, in multarum
rerum ignoratione homines quantum libet scien-
di auidos versari necesse est. Tuum hîc ingenium
Plato, tuam in iudicando diuinam mentem ap-
pello; tu dicebas literas ipsas atque characteres,
quæ scriptores isti veluti memoriæ alleuamen-
tum, doctrinæ vasarium, rerum memorabilium
apothecas osculantur, nihil aliud Regi sapientis-
simo videri potuisse, quàm pestem memoriæ, ne-
gligentia matrem, laruam sapientiæ. Vos anti-
quorum doctissimi Pythagoræi, vestram Dru-
idæ, maiorum nostrorum decus immortale, viam,
& rationem docendi obtestor, qui sanctissimo

decreto cauebatis, ne doctrina vestra scholasticorum tantum aures præterueheretur & libris impressa sorderet. Quàm iucundum erat videre senem Druidem in doctis illis cauernis nobilissimo Adolescentum comitatu circumseptum, sine ullis librorum impedimentis aliquot versuum millia de rebus obscuris, & sub imibus enarrantem, cuius verba tanquam ex tripode oracula auidissimis mentibus hauriebantur. Redeat utinam ætas illa aurea, qua præclara Magistrorum cogitata non calamis excipiantur, sed animis, neque discipulorum chartas impleant sed ingenia!

Hæc melioris partis firmamenta cum expono cupidius, ignoscitis opinor (Auditores) meam, meorumque sodalium causam agenti, qui quoniam ætatis florem magno labore & contentione in Scholis infringimus, sæpenumero dolemus operam nostram fieri non quanti debuerat. Nam, per Deum immortalem, longè difficilius est quàm vulgus hominum existimat, ad officium erudiendæ iuuentutis tanquam in pistrinum aliquod compingi atque detrudi, ut cum caput, oculos, stomachum morbis grauibus & diuturnis oppresserimus; cum noctes studendo, dies vociferando traduxerimus, cum corporibus exantlatis atque animis Scholasticos admodum paucos in peritorum numero & Reipublicæ luce constituerimus, desidiosam artem, agriculturæ, mercaturæ, militiæ contrariam, urbibus, rebusque publicis nulla ex parte utilem tractare dicamur. Quæ si vera sunt, si inutilia ciuitatibus, nocitura quæstuosis artibus studia exercemus, opulentur sanè Gymnasia, diffringantur exhedræ;

exterminantur cum graui illa studiosorum multitudi-
 ne Præceptores : fiant Collegia publicano-
 rum tabularia ; Scholæ Argentariorum tabernæ ;
 subsellia , fœneratorum locumenta ; musarum
 domicilia , fraudum receptacula ; parietes sacri
 periuriorum officinæ : solæ aperiantur bibliothecæ ,
 in quas se abdant si qui sibi ab hominibus
 exilium , & immaturam in omni vita sepulturam
 indixerunt. Hanc ineptorum hominum Philoso-
 phiam non gustaras Henrice magne , cum fle-
 xientem Regiam , quæ tibi viuendi principium
 fuit , iistam liberaliter condonasti , qui scilicet
 Scholasticis intenti negotiolis , nihil adolescenti-
 bus vtilitatis , nihil vrbi quæstus atque lucri , nihil
 patriæ splendoris & gloriæ essent allaturi : quanto
 fatius fuisset aularum istarum spatia bibliothecis ,
 Scholas scrutariorum tabellis , areas gallinarum
 cortibus , hortos & nemora fungis & caulibus
 assignare ? Neque iam tibi integrum est illo
 vti consilio Ludouice , & tu supra ætatem magne ,
 qui Palense collegium huic paterno suppar ,
 apud Bencharnenses illos tuos nuper instituisti ,
 Errabas videlicet , si credidisti ingenia illa quæ
 ignorantia , quæ furor , quæ rebellio , quæ sce-
 lerum omnium procreatrix hæresis effecerat , posse
 condoceri & mitigari voce docentium. Com-
 paranda potius erat bibliotheca , eaque libris om-
 nibus luculenter instituendâ , qui tanquam fero-
 cientes equos in gyrum rationis & doctrinæ du-
 cerent. Nimirum ingens illa prouincia ad quam
 Catholico nemini patebat aditus , ad librorum
 aspectum , quasi obiecta Gorgone , superstitionis
 suæ oblita insaniam ex animo , arma de manibus

*Ludouicus
 13. collegij
 Regij Pa-
 lensis in
 Benchar-
 nia funda-
 tor.*

abieciſſet, & auitam ſanctorum Religionem amplexata eſſet citius, quam aſparagi coquantur. Non eſt quod ludamus in ſeriis (Audit.) hoc iniquè comparatum eſſe video, vt magiſtris maiori labore exercitis, atque adeo magis vtili & neceſſario, minus detur gloriæ: ſcriptores autem ſi quid paulo elegantius in membranas retulerunt, ſtudioſè colligatur, vniceque laudetur. Cuius quidem conſuetudinis tum ab omni humanitate atque ratione dereliſtæ, ſi quid ego ſentio, hæc cauſa eſt, quod generis humani vitio noſtra bona carendo potius ſentimus, quam fruendo; & ſeculo noſtro inimici præterita miramur ingenia, præſentia ſaſtidimus. Quasi vero vel tot exactis ætatibus efficta ſit natura, vel cum Platones, Ariſtoteles, Homeros, Cicerones creauit, vim ſuam in eis omnem profuderit. Id quam iure ac merito æſtiment homines dicere prætermitto, quia partem alteram cauſæ deſiderari iam video, ad quam fauore veſtro fretus aggrediar (Audit.) non vt ea quæ ſunt à me ſtabilita conuellam, niſi iuſſeritis: neque vt in aliam ſententiam pedibus eam, niſi vos præceſſeritis: ſed ne aut ego controuerſiæ præuaricari puter, vna tantum parte propoſita: aut vos indiſta cauſa temerarium iudicium ferre videamini.

*Altera
pars con-
trouerſiæ
pro libroꝝ
ſcriptione
aduerſus
vitiū ma-
giſtrorum
vocem.*

Dico igitur in primis ſi qui generoſius inuidiam æqualium eluctati, ad poſteriorum manus peruenire potuerunt, apud illos verius iudicium reperiſſe, obtreſtatione & maleuolentia liberatum. Quo bono cuiusmodicumque illud ſit, iſe priuarunt qui præſente & temporali Auditorum plauſu & acclamatione contenti, ſui nominis

prædicationem vitæ finibus terminarunt. Quot enim post inuentas, excultasque litteras extitisse putamus viros sūma sapientia, omnibusque ingenij dotibus ornatos, qui quoniam scriptis libris temporum iniquitati superstites esse non potuerunt, iacent hæctenus sen piterna quadam obliuione contriti? Neque de iis tantum loquor, qui scribendi ambitione caruerunt, cum viuam vocē vtilitati publicæ impenderent: verum etiam de iis qui cum doctrinam suam litterarum monumentis tradiderint, ne tenue quidem eius vestigium ad nos vsque propagarunt. Vellem enim vt tam facile nobis persuaderet aduersarius, quam simpliciter, confidenterque ponebat, ex ingeniosis & sapientibus hominibus neminem non docuisse quæ inuenisset; scripsisse autem paucissimos Huius dicti auctorem & testem producere debuit vel vnum locupletem, qui, vel librorum inopiam in veteribus bibliothecis accusaret, vel qui Moses, Dauides, Salomones, Trismegistos, qui Platones, Aristoteles, Chryssippos, Carneades, Didimos, Varrones, Cicerones, Senecas, qui Augustinos, Hieronymos Origenes, Basilios, Toftatos, Aquinates, Suares, & ne ambitiosus videar in nominibus, qui illa Bibliothecarum lumina, illos ingenij soles, illos doctrinæ fontes non fuisse suæ tempestatis ingeniosissimos & sapientissimos pronuntiaret. Siquis eiusmodi testis vestrum in conspectum se daret, verberaretis opinor conuiciis & sibilis os hominis illius durissimum: Ego vero qui causam hanc non ardentissimè suscipio, argumentis, vt arbitror, satis probabilibus ab hoc cum errore deducerem. Sic

Qui omnibus seculis docti extiterunt, & aliquid videntur scripsisse.

enim existimo doctis omnibus innatum esse aliquem glorię stimulũ, aut (si sanctiores esse volumus) vtilitatis publicę desiderium, quo impellantur acrius ad ea quę magnā animi cōtentione cōmentĩ sunt, aut labore diuturno ē veterum libris hauserunt, euulganda, Hęc est quotidiana glorię titillatio, quę certē veteres incitare debuit vehementius, tantā sapientiũ penuriā, tam incredibili scribendi licentia, tam ardente immortalitatis cupiditate. Hinc illę immanes bibliothecę, vt Pergamenę quas Antonius Cleopatraz dedit ducentorum millium voluminum; vt Alexandrinę septingentorum & amplius millium; vt sacra Ægyptiorum quę in Osymandiaz sepulchro iam à primis illis sæculis recondita, nullum fuisse tempus ostendit vacuum, libris inops, à litteris.

Monet istat me vetustissima, quam animę medicamentum sapientes illi nuncupabant, vt alteri prauę hominis istius opinioni medicinam faciam. Magistros aiebat prius docere instituisse, quam libri extarent vlli: hoc si præcisè nego, quo me auctore, qua ratione conuincit? Quid si non à Magistris libri, sed librorum ope Magistri docti & clari extiterunt? Quid si omnis scientiæ initium non à Doctoribus, sed à libris repetendũ est? nūquid enim libros appellare possumus genuinas illas columnas, alteram lateritiā, lapideā alteram, ab Adami posteris ad conseruandam siderum scientiam erectas, quę aquarum eluuiionibus, & orbis vniuersi deflagrationi superesse debeant? libri non erant nobilibus inscripti characteribus, Mercurij in Ægypto columnę ex quibus Pythagoras & Plato Philosophiam didice-

*Librorum
scriptio
prius in
usu fuit
quam ma-
gistri do-
cere insti-
tuerent.*

runt? Quid? ille ipse antiquissimus Trismegistus, qui omnia Ægyptiorum mysteria plus triginta sex voluminum millibus tradidit à quo primum fonte tam multa, tam recondita habuisse censetur? Quid? Hispanienses Turdetani qui grammaticam & poemata à sex annorum millibus sibi tradita gloriabantur. Quid? Druidæ nostri qui magnum versuum numerum discipulos ediscere cogebant, an aliunde quam à libris tam veterem doctrinam repetebant? Itaque sic statuendum est diuinitus acceptam rerum obscurissimarum scientiam, primos homines mandasse litteris, quæ per temporum vices in recentiorum sapientium, ut Pythagoræ, ut Democriti, ut Platonis manus venerint; posteaque consequentes paucorum adiectione suos hortulos augustis illis fontibus irrigasse. Quæ mihi omnia persuadent paucissimos vnquam fuisse sapientes & doctos, qui scribendi impetum homini naturalem abiecerint: quin potius quo præstantiore veterum aliquis fuit ingenio, eum plura doctrinæ solertiæque suæ monumenta reliquisse.

Longè accuratior est auctorum scriptio quam Magistorum prælelio.

Atque illa sapientiæ oracula cum animum ad scribendum appellant toto pectore, ut dicitur, cogitant se posteritati scribere, quæ neque errati veniā dare soleat, neque commodare gratiā non merenti. Lege seueriori quā vocales illos Magistros doctrinæ capum & laudis ingredi: illorū vitia tegi formę dignitate, & actionis venustate: iucundā atque adeo probabilē fieri orationē voce canora atque flexibili, ipsa etiam appellandarum litterarū suauitudine: in illis copiā videri maiorem, quod dicunt omnia, quod magno impetu verba conuoluunt,

quod torrētis more fluūt turbidi quidē , sed tamē
admirabiles audietibus: sic dicendo fieri nimis se-
pē, vt apud eos etiā qui sapere se putāt, min⁹ eru-
diti pro ingeniosioribus habeantur, & illis verbo-
rū pręstigiis lapides pro gēmis, & pro auro, fumū
pro odoribus venditēt. Scripta ē cōtrario placere
per se se, non actione blāda conciliatricula, aut vo-
cis lenocinio cōmendari, hoc agere lectores dili-
genter & otiosē, vt dicta, vt sentētias, vt verba ip-
sa suis ponderibus examinent; quapropter certa
scribi debere, quæ Carneades non labefactet; bo-
na, quæ Aristarchus stellula insigniat: vtilia, quæ
Cornutus non improbet: selecta, quæ Persius nō
fastidiat: noua quæ Seneca malit: subtilia, quæ Stoi-
ci amēt: sublimia, quæ pythagorēi speculētur: sua-
uiter, vt legant Epicurei: clare, vt Lælius Decimus
intelligat accuratē, vt à posteritate voluātur. Nā
cito nata, cito intereūt, & vt pręcoces horti Ado-
nidis caducas florum amœnitates nō immaturius
ostentant, quam citius flacceſcunt: scribendi cura
æternitatem fecit aut meretur. Has atq; id genus
cogitationes cū animo penitus imbibit scriptor il-
le ingenio & doctrina præstans, sibi que persuasit
immortalitatē nominis labore quolibet bene cō-
stare: dat se deinde totum quantumcumque est in
scriptionem: Deus sancte! quæ monumenta inge-
ni, quas scriptorū gemmas, quam sapientiæ me-
dullam, cura illa profundet! Equidē eius libri sen-
tentiolam vnā, vnum versiculum memoria cō-
plecti malim, quam totū diem Aios istos loquē-
tes audire, quorum leues flosculi cū aurora nati,
meridie senescūt, cum solis lumine extinguuntur;
Age, sume aureum istud volumē in manus, aperi,

lege, vide quā infit multarum rerū cognitio, quā vibrantes claræq; sententię, quam decorē non infistat interius, nō excurrat lōgius oratio! lege iterū & sapius: yt omnia inuicem ex se apta & cōnexa sunt! quam placet iudicium electioq; verborū: quam pressē enūcleatēq; disputat sine molestia! qua amplē ornateq; disserit sine ostētatione! Petite, repete eundem librū, eundem locū, plus sapiet quo crebrius regustabis. Atque vt sacra Eleusinia, sic initiatos admittunt, vt tamē in recessu seruent quod reuisentes proleſcet: ita magnorum ingeniorū occulta & retrusa doctrina, sēper habet quod studiosorū famē exacuat. & cognitionē vnus rei per se magnā, vult tātū esse promulgidē secuturę.

*Omnes homines do-
cet scri-
ptor, magister pau-
cissimos.*

Has sapiētix delicias propināt scriptores nostri: quibus? an duobus discipulorū millib⁹ quod pro magna re cōmemorāt accidisse Thephrastō? num potius omnib⁹ hominib⁹ quicūque ea tēpestare viuūt, quiq; omni posterorū eternitate cōsequētur? Mihi quidē Galatō olim huiusmodi quiddam videtur hominib⁹ probare voluisse. cū Homerum pinxit euomētē, reliquos autē circūfufos Poētas, qui magna auiditate expectorata illa sapiētix frustra colligerēt. Fingite quā vultis immēsam eorum multitudinē qui se omnib⁹ sæculis sciēdi cupidos professi sūt, post euulgata Plat. & Aristot. placita, eosq; in capacissimū quēdā locū cogitatione cōuocate. Hi omnes tā diffusi regionib⁹, tā seiuncti ætatib⁹, tā repugnātes morib⁹, tam dissimiles studiis, si quid sunt, si quid habēt, vnde hauserunt? à Platone, ab Aristotele. Quomodo acceperūt? Nō certē viua voce vt Rabbinicā cabalam, sed per uoluntatis eorum scriptis, quibus illi doctrinæ suæ

fuccū & incorruptum sanguinē tradiderunt: illos ego si rogē vtrius plus philosophia debeat, Platoni & Xenophonti, an Socrati? dubitabunt opinor præceptorī discipulos, docētī loquētīq; scriptores anteferre? Scæuolas, Aquilios, Seruios ciuitatū oracula suspexit antiquitas: ij. ne plus iurisprudentiā ornarunt quam Vlpiani, Pauli, Papiniani? Protagoras Abderites annos quadraginta oratoriā artē professus est, Quintilianus tantū viginti, Aristoteles vix vnquam: scire aueo quem istorū minimē nostra intererat inter homines viuere? Rēnius Palæmō Rex Grāmaticorū secū, natus secū morituras litteras iactabat: & effecit porro vt suæ morerētur, qui nihil de arte sua litteris mādauit: eum ne Grāmatici olim extitisse iam malint, quā Donatū, quā Diomedē, quā Priscianū? Facite vt in illa antiquitate omnes Socrates, Scæuolæ, Protagoræ, Palæmones fuerint, nihil quisquā scripserit, omnes scholā exercuerint, quod tū ad opinionem scientiæ inter auditores colligendam cōmodius videbatur; quid esset modo in vlla disciplina perfectum? Aut potius quā scientiā teneremus cū inuenta quēdam ingeniosissimorū hominū ne vestigio quidē persequamur? quia præceptis contineri, scriptis propagari non potuerunt?

Magnū esset dicere quātopere veneranda scriptorum ingenia posteritatem iuuent, cum præceptores suo tantum sæculo, & æqualibus seruiant. Sæculo autē & æqualibus? pauculi Adolefcētes, & ij quoque maximam partem, vel nō facti à natura ad scientiam, vel praua libertatis cupiditate laboris inimici, æqualium pars quota sunt? ad Isocratem audiendum tres conuenerant, duos

*Omnibus
sæculis pro-
sunt libri,
paucis an-
tis præce-
ptoris vi-
ua vox.*

*Hypoty-
posis ma-
gistri au-
ditorum
expectatio-
nem fru-
strantis.*

admisit, tertium exclusit; Epicurus Metrodo-
ro suo dicebat, *hæc ego non multis, sed tibi: satis
enim magnum alter alteri theatrum sumus*; laudatur
& ille qui cum artem paucissimis traderet, *satis
sunt, inquit, mihi pauci, satis est unus, satis est
nullus*. Horas autem tu aliquot, & eas necessariis
negotii occupatas, febricula interceptas, catar-
rho obscuratas sæculum appellas? Cogitate ama-
bo concursum fieri ad audiendum peritum ali-
quem virum, perccepit æs campanum, condu-
cta sunt subsellia: dum expectat conuentus, pro
se quisque de laudibus docentis inuicem mur-
muran: neminem vidisti qui obscura clarius, qui
implicata facilius expediat: dicit semper ex tem-
pore, sed quasi diu scripserit. Quid autem homi-
nis est? nam docentis multum interest, non tan-
tum quis sit, sed qualis appareat: Et si nugæ age-
ret, ipsa medius fidiis pronuntiatio, vultus, ha-
bitus, gestus, admirabilitatem meretur. Quanti
autem docet? Et si ab Isocrate didicit, artem ta-
men diuidit: cæterum talento vilis est. Huic ho-
mini quando corpus duplicare non potest natu-
ra, quid vos illum vni loco quasi rotæ Ixionem
alligatis! Quid? tantum hominem velut cymba-
lum iuuentutis tota Gallia circumferri velles?
hæc illi vrbs theatrum est refertissimum celebri-
tate magnitudine amplissimū, iudicio eruditissi-
mum: natura autē ita resonans, vt in omnes regio-
nes voces referantur. Nihil ne in vulgus emisit?
Optabamus id quidem amici, sed hoc ambitionis
genere minimè omnium tenetur. Itaque suo sæ-
culo se penitus dedit, totus noster est. Vester pro-
fecto apud quos sapientia viuo gurgite exundat,
sed

sed nos leucis hinc plus sexaginta dissi, qui plu-
 uias aquas vix colligimus, apud quos ipsi in gym-
 nasiis fontes sitiunt, hoc sæculi bono careamus
 necesse est. Atqui Gaditanus quidam ab Hercu-
 lis columnis Romam venit, Romam non visurus,
 sed historicum. Esto sanè vester Tito Liuius elo-
 quentior, dulcior, ue: mihi neque per rem fami-
 liarem, neque per negotia licet tam feliciter ine-
 ptire: sed quando bona huc me fortuna, Deo
 utar hodie, cras, cogito: dicam in patria quod il-
 le, Romam vidi, Theodosium vidi. Dum hæc fa-
 miliariter, ut fit, sermocinantur, adest pro docto-
 re nuntius: sit silentium: hodie non docebit Pom-
 ponius, irrausit. Qui d ait? non veniet, abeundum.
 Hic circumspectare se homines, ille contracto
 supercilio renidere, hic frontem ferire, alius ca-
 put scabere, omnes se sua delusos expectatione
 ridere, &, si quid, prodesset, irasci. Hem sæculi
 bonum! Hem præstitum æqualibus docendi ob-
 sequium! Hem viux vocis pretiosa possessio!
 quanto fideliores in libris certioresque magistros
 habemus? Primum enim non patiuntur officium
 suum conciunculæ vnus finibus contineri, sed
 tanquam publici orbis doctores, quo vox non
 potest pertinere, mittunt litteras. Eodem ergo &
 temporis & difficultatis articulo docent eum qui
 Parisiis, & qui Romæ studeat; sine villo raucita-
 tis periculo Conimbricæ simul audiuntur & fle-
 xiz. Deinde nemo queritur aditus ad illos esse
 difficiles: nobiles & purpuratos tantum admitti,
 sperni tenuiores: nemo vbi diu stetit ad ianuam,
 lassus ianitoris fastidio remittitur, sed expectant
 ipsi te fixo pede immobiles; si lubet, vtere; si

*Libri
 commo-
 dius docent
 quam ma-
 gistri.*

commodum non est, alio die. Urget lucubratio? tecum si voles pernoctabunt. Antelucana vigilia opus est? Nullus Galli cantus somniculosos reperiet. Hic subobscurus est? nocet meridiatio-
ni? alium habes solutiorem & amœniotem Styli guttam à te exprimere non potes, ita durus & sic-
cus es? Lude cum poëtis, fabulare cum Historicis, delictiare cum Philologis; Nam si Præceptorum
das operam, quomocunque aut animo aut corpore sis affectus, id accipias oportet quod ille
tradit; libri autem liberrimum tibi permittunt
studiorum arbitrium.

*Tenuia
tantum
scientia
principia
paucis an-
nis tradunt
magistri,
reliquæ vi-
ta & do-
ctrina par-
tes libri oc-
cupant.*

Sed ne aduersarium videar fingere & ex eius
horaria raucedine triumphum canere: Da mihi,
semel dicam, vitiis omnibus detractis, omnibus
numeris absolutum præceptorem: Is doceat eru-
ditè, peramanter, sollicitè: perdius & pernox
scholas atterat, sit consulentibus discipulis om-
nium horarum homo. Quæro ex te quos insti-
tuit? respondebis opinor iuventutem, nisi forte
senes elementarios vidisti, aut malis bene barba-
tos viros, coniugandis, declinandisque vocibus,
heteroclitis ex regula perdiscendis, concordan-
tiis exercendis audire nugantès. Illos ipsos iu-
venes quos à teneris vnguiculis informandos ha-
bet, quo tandem scientiæ perducet? vsque eo sci-
licet dum ipsi sua sponte progredi possunt. Vt
qui viam ignaro monstrat, necesse non est vt to-
tius itineris ducem se profiteatur: Sed compen-
dio rescissis anfractibus, euitatis voraginibus, su-
peratis sylvarum ambagibus hominem ponit in
patentem planitiem, vnde eat porro comite ge-
nio, vna lata, perpetuaque in urbem via est: sic

nos in scholis peritos non facimus : sed principia
damus quibus cum ætas à Magisterio excesserit,
periti per se se efficiantur. At pace tua dixerim
durum est iuuenem hominem qui sub Magistro-
rum cura creuit subito sibi permittere. Commit-
to vero illum musis & libris, hi sunt reliquæ æta-
tis Magistri, ultra quid doceam non habeo ego.
Quantum temporis est, ex quo tu illum erudien-
dum suscepisti ? quinque admodum anni, nam
præstat ingenio & fertile solum est, plus reddidit,
quàm acceperat. Quinque tu igitur annos disci-
plinæ tuæ toti hominis illius vitæ, id est, triginta
aut quinquaginta annis antepones ? Ego homi-
nem immortaliter obligavi, iecî in eius animo
fundamentum scientiæ, feci ut posset, ut auderet,
ut vellet addere Colophonem. Tuum est fateor
immortale beneficium, cui parem gratiam, ne vi-
ta quidem Nestoris referre possit : sed priuato
studio, sed libris, ut non æquè debeat non effi-
cies. Apud Callistratum didicerat Demosthenes,
qui nisi octies sua ipse manu Thucydidem scri-
pisset, orator nunquam fuisset. Annos, ut aiunt,
viginti Platonem audiuerat Aristoteles, qui nisi
magnum librorum numerum compilasset, disci-
pulos non reperisset. Moloni & Apollonio stu-
duerat Tullius: sed eum Græcorum lectio, Cras-
si, & Antonij exempla, indefessum studium sum-
mis causis parem effecerunt. Marcum Varronem
Romanorum doctissimum libros hellando fecis-
se scimus, per quos Magistros profecerit nesci-
mus. Non ibo per artes singulas : Vos hîc allo-
quor, Auditores omnibus artibus & disciplinis
ornatissimi ; & sic quidem appello, ut si vos aliud

quàm quod rogo sentitis, potestatem esse cupiam contradicendi. Conferre vestra in scholis studia, cum hodierna doctrina; id quod viua Magistri voce percepistis, cum eo quod ex libris hausistis: secernite diligenter præceptorum beneficium, à beneficio librorum. inuicemque comparate. Iam exurgat vnus aliquis ex eruditissimo hoc confessu qui aut nihil, aut certè minus acceptum libris referat; Existat ille quisquis est, nouerimus libenter virum inter Magistri manus tanquam in nutricis sinu adultum; aspiciemus hominem sine vllis chartarum tricis, eorum quæ puer in scholis licit ruminatione perfectum: Videbimus eum quem iam diu quæro, quem ne cogitatione quidem satis adhuc informauì, quem silentio vestro fatemini vobis hætenus ignotum, cogitis dicere, doctorem sine libris: Quod si hominem eiusmodi neque præterita, neque nostra viderunt tempora, viuam profectò Magistrorum vocem à magnifico & latè patenti sæculi nomine, in quinque plus minus annorum angustias compulimus.

In ipsis etiam Scholis librorum opera est necessaria.

Quid si ne illud quidem lustrum librorum opera & necessitate vacat? Quid si efficio adolescentes in Scholis ipsis plus à libris accipere, quàm à Magistris? Difficile non est id demonstrare, si credimus quod res ipsa loquitur Scholis præfici homines qui periti sunt. Peritum enim quem vocamus, aut hoc nomen in quo homine ponimus? Certè in eo qui multos auctores euoluerit, multos collegerit, multos memoria comprehenderit. Nam vt se hæc habent tempora, quid à quoque dicatur tenere, qui locus ab vllò diligenter tracte-

tur meminisse, quis huius atque illius auctoris usus sit dicere posse, scientia est. Video equidem non esse occupata omnia, inuenta sapientiæ adire possumus tanquam multorum hæreditatem, & more patris familias ampliora facere quæ accepi-
mus? Sed fatendum est ingenuè seu difficultates, quæ videntur inenodabiles, impediunt; seu commentationis labor reuocat, seu temporis angustia obstant veterum cogitatis aliquid adicere: propria nostrum omnium doctrina est aliorum scire doctrinam. Quicunque enim docemus, quid aliud sumus quam scriptorum interpretes, viua volumina, voces mortuorum? nos instar apium rosis vndique, floribusque libatis, mel non facimus, sed colligimus, apteque in fauos digerimus. Ego certè posteaquam in Schola adole-
scentes ad eloquentiam informauit, aut facem ad obscuriores auctorum locos prætulit, vbi semel cubiculi mei limen attingi, vbi sacer ille angustusque librorum chorus in conspectum venit, depono Magistri personam (Auditores) & me rudem atque integrum discipulum trado illis sapientiæ principibus. Hic enim uerò mea se mihi ignorantia, vt in speculo repræsentat: Hic lego Socraticum illud nihil scire me, cum à libris discessi; quotidianie miror tam noua à veteribus Magistris doceri, tam recondita à vulgaribus, tam multa ab vno, tam rara à compluribus. Itaque cum sedentes in Scholarum tribunalibus præceptores auditis, Adole-
scentes, duos Aristoteles, duos Cicerones, Homeros, Virgilios audire vos putatote; spirantem alterum cuius animata vox ad vestras aures perueniat, mortuum alterum, qui tamen vitam

ipsi ministret & spiritum. Nam vt in foro Romano cum Nomenclator obuialicuius nomen ad aurem domini insusurrauerat, duo erant, & vnus salutabat: sic in Scholis quotidie euenit; vt duo doceant, & vnus loquatur. At verendum sæpenumero ne blandientem domum resalutemus, nomenclatorem tanquam ignotum prætereamus.

*Verum
non vide-
tur quod
prior sen-
tentia po-
nebat scri-
ptorum ob-
scuritati
elucidatio-
nem magi-
strorum
semper me-
deri.*

Illud saltem inquis à doctoribus in nos com-
modum deriuatur vt eorum labore & perspicua-
ciores in obscuro, & firmiores simus in lubrico.
Audio: redis ad tenebras, Æthiopis cuiusdam stu-
piditate vehementer exaggeratas, in quo tuam
leuissimè dico, requirò prudentiam, qui vni ex-
terno & barbaro homini ad percipiendum Pro-
phetæ sensum, necessariam fuisse viuæ vocis effi-
cacitatem disputabas. Cum meminisse deberes
tot Philippos, tot Deo plenos Apostolos, & Apo-
stolorum comites, voce illa cœlitus excitata atq;
inflammata, tot hominum millibus nunquam
persuadere potuisse verum Dei cultum, qui Pro-
phetarum, qui Sybillarum oculis, qui ratione
ipsa, qui est diuina manu scriptus liber, & omni-
bus ad legendum expositus, continetur. Diffici-
liores sunt authorum loci. Caue ne tuum hoc vi-
zium sit, & non obscuri illi, sed tu minus acutus &
solers videre: neque enim obscuratur meridie
cœlum, etsi quis lippitudine impeditus solem
non videat. Ter quater ue retractata, expensaque
verba vix tandem percipis? Næ tu delicatus es
qui ad linnen scientiæ consistere non vis, sed intrare
subito; imò ne intrare quidem sed irrumperè,
neque fores aperire, sed effringere. Est interim

cur habeas scriptori gratiam, qui stare iussus obtemperat, reuocatus apparet, & quod lentè matureque scripsit, vult à te cum mora & prudentia æstimari. Tua autem viua illa vox mori in te multarum rerum intelligentiam cogit, si quid incidit in animum aliud cogitantem: nam aures tantum ferit extrinsecus, neq; se tractandam præbet; aufertur, teque irreuocabili necessitate secum abripit. Quod nisi sapius quàm necesse fuerat eueniret, non video Theologi atque Philosophi, vos enim hæc præcipuè spectat oratio, cur dictatis vestris tam nihil vestro labori, Scholarum temporibus, Scholasticorum operæ & stomacho parceretis.

Sed, heus tu, ex animi tui sententia, nunquam ne incidisti in magistrum qui à te de re quapiam rogatus, luci ipsi tenebras obduceret, & rem ex impedita faceret impeditissimam? semper-ne ab oraculo quod consulebas certum & apertum abstulisti responsum? Erubescis. Quid est? num conturbo te qui postulo vt aliquid pro veritate dicere audeas? Cuperes fortasse fieri exemplo confidentior. Hieronymum produco & Gregorium Nazianzenum. An potui aut acutiorem discipulum, aut sapientiore in omni antiquitate magistrum appellare? Petebat à Nazianzeno Hieronymus, quid esset apud Lucam sabbatum secundo-primum? sed vt nemo est ita ratione ad scientiam subducta vt omnes explicare possit difficultates, hærere primùm Gregorius: tum vbi se collegit, festiuè vt plurima, homo es intempestiuus, quid ni in templo in frequenti populi conuersione nodum hunc mihi soluendum proponebas? ibi enim quicquid responderem, tu cum turba

*Id Grego-
rij Na-
zianzeni
exemplo
confirma-
tur.*

plausu & acclamatione prosequi cogereris. Præclara sanè vox, & virtutis æquè ac eruditionis principe digna, quæ ostendit & multa peti à Magistris, quæ quia libris comprehensa non sint ignorent ipsi, & præstringi sæpè auditorum ingenia, qui quod minimè sciunt, audacter fingunt intelligere se: he aut stuporem suum prodere, aut doctorum auctoritatem minuere videantur.

Sape à magistris perperam explicatur auctorum sententia.

Atque difficiles illi loci cum occurrunt legentibus, aut Delionatatore opus est, aut ipso scriptore, quem si ab inferis excitare possemus, suam ipse nobis sententiam verbis haud paulo clarioribus aperiret. Nunc autem quis ferat in versum aliquot, puta Aristotelis, aut alterius obscuritate quasi Andabatas digladiari inter se Doctores Peripateticos, & cum alius alio inuitum etiam nolentemque rapuerit, iudicij nostri infirmitate abuti, vt cornicum, quod dicitur, oculos configant, & opinionem suam purissimam Aristotelis sententiam esse perluadere conentur? Tolerabile id quidem esset, si in vnam omnes conuenirent sentiendi rationem, si pugnantia non loquerentur: Sed vnum ab aiente, alterum à negante parte stare, & vtrique causæ Aristotelem accommodare, non est viua voce difficultates explicare, sed contentiones nostras Philosophi principis auctoritate quasi flabello ventilare. Quæ aliquando cogitanti mihi venit in mentem Teletix Græci hominis calamitosa felicitas & honor perquam miserabilis. Is enim cum in summo totius Græciæ conuentu olympionices renuntiatus esset, patriamque suam coronare deberet; concurrunt de repente in stadium diuersis

ē partibus audaces & robusti iuuenes, & hic Mel-
 senium, ille Crotoniatam, alius Rhodium, alius
 Chium aut Salaminium esse clamitantes, hinc at-
 que inde propellunt, vexant, lacerant; vestes
 primum, deinde etiam miserrimi victoris mem-
 bra, donec inter laudantium contentiosè, intem-
 peranter amantium, tumultuosè prensantium
 manus discerptus interit; qui si ab Antipalovi-
 ctus esset, viuere debuerat. Ad eū sanè modū isti
 Aristotelem suū esse viua voce clamant, suæ sen-
 tentiæ vindicant, lacerant, diripiunt; Et vbi-
 que opinionis apparet diecula, idem ait, idem
 negat, & vtramque scriptorum paginam facit
 Aristoteles: vt iam non veritatem in Aristotele
 quærere, sed Aristotelis particulam ad eam quam
 sibi fingunt veritatem, studeant applicare, An
 præfagebat id olim Philosophus, qui de ābulādo
 docebat, vt modo ad has, modo ad illas partes
 accederet, & omnibus vmbra sui corporis ir-
 pertiret, seipsum traderet nemini? Eum certè
 nolim reuiuiscere ne se inter viuas istorum voces
 mortuum, inter fautorem studia distractū, inter
 discipulorum ardores discerptum esse queratur.
 Hæc qui attentè cōsiderauerit, nō mirabitur Ze-
 nonem virum grauiissimum, dum is compendia-
 rium iter ad sapientiam quæreret, ab oraculo
 missum esse nō ad Academias & Lyceas, in quibus
 Philosophorum disputationes resonarent: sed ad
 libros, in quibus eorum placita pacificè specta-
 rentur; vt eadem opera se & mortuis concolorem
 faceret, & viuentibus pulchriorem.

Quid est, Audit. dum istam controversiæ par- *Causali-*
 tem peroramus, quid vobis animi est, quidue *brorū scri-*

ptoribus
adiudica-
tur.

consilij? Iam enim vestris mentibus obuersantur selectissima omnium sæculorum ingenia, quæ scientiæ suæ florem delibatum in libros retulerunt, iisque non paucos tantum pueros, sed omnem posteritatem, ipsos etiam Magistros docuerunt. Alia ex parte se cōgitationi vestræ offert, & rudimentorum in vnaquaque scientia necessitas, quæ à præceptoribus tota petitur; & auctorum obscuritas quæ viua voce dissipatur; & collegiorum dignitas atque frequentia, in quibus adolēcentes cum omnibus musis rationem habere doctissimorum hominum ductu, & inflatu coguntur. Magnum onus (Auditores) pulcher & necessarius! quod epim munus afferre reipublicæ maius, meliusue possumus, quam si docemus atque erudimus iuventutem? Hinc præclaræ illæ Persarum, Atheniensium, Lacedæmoniorū, Romanorum, Gallorum leges de puerorum institutione; Hinc illæ Gymnasiorum ædes, quas seculis omnibus Principes, vt quisque erat aduersus Reip. commodum, vtilitatēque animatus, extruxere amplissimas. Nam vt in seminibus causa est arborum ac stirpium, sic in collegiis spes omnis boni publici adolescit. Hic erudiuntur ingeniorum miracula: Hic fouentur parentum delicta, ciuitatum propugnaçula, Ecclesiæ antistites, belli arbitri, pacis tranquillitatisque publicæ fundatores. Pretiosum, inquam, depositum, Patres Reuerendi, quod nisi magno scēnore auctum Reipublicæ reddimus, verluram faciamus oportet. Ridiculè opinor, hoc loco faciet, qui pro vtraque parte pronuntiabit & eos qui docent litteras, scribuntque, iis qui alterum tantum faciant, an-

ceponet. Hic est enim fabulæ exitus, cuius ut clausula inueniatur, ij quorum causa turbæ fuerunt excitatæ, in manum conueniunt, & se confanguineos profitentur. Alius magis nugatoriè rem in medio relinquet: cum vos quasi in Solonis rep. nemini licere velitis nullius partis esse. Hanc ergo mihi prouinciam imponitis, ut pronuntiem non meo, sed vestro nomine, eam quam in omnium vestrum oculis & vultu lego sententiam; quæ mihi veritatis vim & efficientiam, si res ynquam vlla hodierno die ostendit, cum vos qui optimam ætatis partem in iuuentutis institutione ponitis, me qui aliquot iam annos eandem habeo exercitationem ingenij, curriculum industriæ, qui non nisi inuitus, & suspenso gradu, ad scriptorum causam accessi, pronuntiare tamen publicè velitis, videri Rem litterariam librorum descriptione amplius promoueri.



V E T V S

PRONVNTIATVM,
ORATOREM ESSE VIRVM
BONVM SOLIS ORATORIBVS
CHRISTIANIS CONVENIRE.
O R A T I O V I I I .



AN TA vis est virtutis atque probitatis in omnem vite partem, Auditores, vt cum diuersi, prout quemque fert libido, alia vsurpent officia, omnes tamen præstabilis alicuius virtutis studio glorientur. Cum enim non doctrinæ beneficio, sed naturæ ipsius impetu ad virtutem rapiamur, quis dubitabit ei qui homo velit esse affectandum eius studium & ibi quærendam probitatem, vbi vitæ totius transigendæ opportunitatem figit & collocat? Sed cum hæc ipsa Ratio sit quasi quædam lux, lumenque vitæ, semiobrutus ille diuinus ignis ingenij & mentis veritatem quidem hanc videre nos permittit: vbi autem sita sit virtus, & vnde eius potissimum conquisitio pendeat, non edocet. Quo fit vt do-

lendum sit plerisque, ingeniosos alioquin & non imperitos, umbram conſectari, qui ſi potius in ſolida & expreſſa effigie operam collocarent, ſuam mirabilem cumulatae integritatis ſpeciem, quam vix in libris, & ſeuerioribus veterum chartis retinemus, vita iamdiu & moribus informarent. Atque vt de conſectandae virtutis labore non minimum, curam autem quanta eſſe deberet omnem detrahant: dicunt homines delicati in iis quas proſitentur artibus innatam probitatem ineſſe: hanc earum quaſi animam & vitam, virtutem ab illis qui vel cogitatione ſeparet, cum non res nudas proponere, ſed ſceda honeſtiſſimarum artium cadauera obiicere. Hac eorum diſputatione ſcholae circumſonant, haec in circulis, in exhedris accuratè diſſerunt, hoc doctis ingerunt, ſuadent imperitis. Illud autem per mihi ridiculum videri ſolet, ſingulos in iſtud virtutis regnum ſcientiam ſuam ſic intrudere, vt alienam inde deiiciant. Quaſi aut virtutis baſilica tam ſit anguſta vt orbem illum doctrinae continere non poſſit: aut tam ſit vna alteri contraria vt ſimul conſiſtere nequeant: aut denique quod vni conceditur, id alteri neceſſario pereat. Philoſophiam laudat Eratoſthenes, Poëticen vt anilium fabellarum artificem deridet; Strabo contradicit, & poëte propoſitum eſſe oſtendit aſperſam ſuauius mendaciunculis virtutem teneris mentibus inſtillare, quod aſſequi nemo poſſit, niſi ſit ipſe optimus. Cato virum bonum oratorem appellat, architectum Vitruuius talem debere eſſe demonſtrat: litem intendit Seneca, & philoſophiam ſolam eſſe vitae legem diſputat. Principum actio-

*Omnes qui
artem ali-
quam pro-
ſitentur,
virtutem
in ea con-
ſtituunt.*

nes, rerumque ciuiliū administrationem Geographiæ assignat laudatus Strabo: instat Tullius, & pro gubernatrice ciuitatum eloquentia ornate sanè, & copiose differit: & euinceret aliquid nisi cum utroque lege agerent Iuriscōsulti, vindicarentque sapientes homines, quos cum in omni iudicio aduersarios habere nolis, tum in hoc præsentes, superstites, quando ex iure manu confertum vocabunt, reformides. Non est quod de omnibus commemorando recordemur, cum in ea, quæ huius loci atque temporis propria est, eloquentia, sapiens effatum M. Catonis sit illustre. Is enim cum multa & exaggerata mente dignam eloquentiæ speciem concepisset, atque ad eam proximā, & quasi compendiaria via filium institueret, semel omnia dicturus, oratorem virum bonum dicendi peritum definiuit. Quam eius sententiam non vt hominis vocem; sed vt cælitus delapsum oraculum acceperunt posterii; & vt quisque magis in ea facultate videri volebat excellere, ita illustriore verborum pompa, grauior sententiarum pondere, validioribus rationum momentis & dicti fidem & Catonis auctoritatem stabiliiuit. Aduersus hanc tam plausibilem tamque inueteratam opinionem dicendum mihi est hodierna die, Audit. non vt arti pulcherriam dotes suas detraham; sed vt optimam possessionem ab externorum iniuria extractam legitimis hæredibus restituam. Nam veteres quidem illi eloquentiam tanquam filiulam amplexati suam, proximè virtutem collocarunt: vt quoniam probè nouerant nihil admodum placere hominibus, quod non probitatis tanquam sapore aliquo

conditum esset, si quando elucerent in causis atque in foro, viri boni & sapientes haberentur. Hac via obrepebant ad honores errore vulgi, commendatione superbiloquentiæ: tum forensi illo regno abutebantur ad amicorum commoda, inimicorum exitium, reorum salutem, perniciem innocentum. Itaque de manibus Ethnicorum extorquenda est larua illa probitatis, ut sua Christianis temporibus constet integritas: spolianda illis ornamentis Ægyptus quæ sibi contrarius, fasque arrogavit, ut iisdem veros, germanosque novæ legis Israëlitas instruamus. Nego igitur veteris illius superstitionis oratores viros bonos esse debuisse, nego fuisse, nego esse potuisse. Quæ tria dum breuiter necessariis conficio rationibus, quæ so quod facitis, attendite. Et quoniā *Quintil. l. 12. Instit. c. 1.* M. Fabius Quintilian⁹ rem istā vrget vehemētius, cum delegi potissimū cum quo reliqua oratione contenderem. Neque vero illius aut in disputando vehementiam, aut in differendo facultatem aut in omni hoc genere oratorio potentiā vobis iudicibus pertimesco. Est enim ea causæ bonitas ut quāquā vix tolerabilē oratorē nacta sit, cogere tamen ipsa per se potius velit, quam persuadere.

Ac primum ut Geometræ solent postulare sibi *Virtus nō est coniun-cta necessa-rio cū elo-quentia.* ut quædā concedantur, quo facilius quæ volūt explicent: sic à te postulo M. Fabi distinguas virum ab oratore, tum orationis & vitæ perfectionem. Quem enim sapientem, quem bonum virum dicimus? opinor eum qui nullis aspersus est vitiorum maculis, nullis virtutum infulis destitutus. Quem oratorem bonū, quem perfectū? Qui oratoriæ facultatis ecluis vitiiis omnibus, do-

tes omnes sit assecutus. Age vero, potest ne vir bonus reperiri, qui orator non sit? vel mille inquires. Potest ne orator esse qui vir bonus non sit? id tu negas: quam rectè, mox viderimus. Hoc interim à te impetraui alia esse omnia benè viuere, & disertè dicere. Quod etiam atque etiam à vobis peto vt memoria retineatis, Audit. Hoc enim agit Quintilianus, tota sua disputatione subtili sanè & prolixa, eo semper reuoluitur vt vitæ innocentiam, cum oratoria facultate commisceat, & quod ab altera traditur, id alterius munus esse supponat. Quo quidem præsidio si semel iuerit iudicio vestro deiectus, atque exturbatus, profligata iā hæc, & pene ad exitū perducta quæstio est.

*Eloquē-
tia inter
facultates
indifferen-
tes censen-
da est.*

Te igitur hīc appello Eloquētia, seu virtus quædam es, seu artis contenta nomine: siue te Mercurius ille cælo deuocauit, vt nos à fera, agrestique vita ad hunc humanum cūctū ciuileque deduceret: seu te homines ex cognitionibus, comprehensionibusque rerum effecerunt: vnde, & quo quo modo facis hominem facundum, disertum, eloquentem. Sed non eam te aduoco quæ ciuilibus curis innutrita, virtutibus septa, Academiis & porticibus Atticis partam sapientiam ostentas: te simplicem, & nudam, & solitariam, compello, qualem habent quite solam habent: ea postulo quæ tecum in hominem infers, quæ ex te ipsa tradere didicisti. Hæc Eloquētia cuius modo aliquā speciem animo videtis, Audit. quam corpore non potestis, quæ & qualis est? Certè ars, vel ipsius Fabij sentētia; non enim ero ita ei inimicus, vt nihil ab ipso accipiam. Do etiam esse virtutem atq; in præstantissima humanæ rationis sede, iudicio
videlicet

videlicet & intellectu, velut Reginam in arce & folio collocatam, quotus autem quisque est eorum, qui moralem Philosophiam vel à limine salutarunt, qui nesciat artes omnes & disciplinas indifferentes esse & in neutram partem per se valere? iis uti & probos ad conseruandam Reip. statum, & improbos ad labefactandum? Eum qui cum Palæmone iactare verè possit secum natus, secum morituras literas, doctum censerì posse, non probum, peritum non sapientem appellari. Nam quæ istarum artium virtutem non dico afferre, sed monstrare potest? Quid enim ut sapiens ter docet Seneca, prodest argutè computare, & incundis patrimoniij rationibus tabularios omnes lassare, si quod alienum est reddere non possum, quod superfluum refecare? Dicis quomodo inter se acutæ & graues voces consonent, quomodo neruorum diuersum reddentium sonum fiat concordia, fac potius ut animi mei desideria cum ratione consonent, ut neque frons à mente, neque à vultu sermo, neque à sermone vita discrepet. Doces me animorum motus aut iudiciis, aut populo miscere dicendò, atque agitare: at ego discere volo quomodo perturbationes illæ contrahendæ, sedandæque sint. Voluntatis moderatione, non intelligentiæ acumine, actione non contemplatione, moribus non doctrina, vita bona metiendæ est; ab illa emanat, in illa consistit: cætera intellectus suppellex extra illam est, tam certè, quàm opes, honores, amici & vniuersus felicioris fortune comitatus, quem optima Philosophorum pars à sapientia, hoc est plena consummataque probitate neque excludit si adest, neque si abest

*Artes liberales
quid ad
virtutem
conferant.*

magnoperè desiderat. Quid ergo? nihil Rhetorica, nihil Dialectica, nihil denique liberalia nobis conferunt studia? Ad alia multum, ad virtutem minimum. Cur ergo illis adolescentes erudimus? Non quia virtutem dare possunt, sed quia animum ad eam accipiendam comparant. Continentem me facit voluptatum contemptor animus, & appetere quantum homini satis sit, perpetua temperantiæ geometria. Fortis sum, si terribilia, & aliorum libertatem sub iugum ducentia despicio, prouoco, frango. Hæ sunt liberales verè artes, & hominem libero dignæ quia libertatem faciunt: vulgares alias discere non debemus, sed didicisse. Vobis autem Iuvenes optimi, hæc tenus viles sunt, si præparant ingenium non detinent. Tamdiu enim istis immorandum est, quamdiu nihil animus agere potest: rudimenta sunt vestra, non opera. Deinde habent similitudinem istæ disciplinæ, comparisonemque quandam cum virtute. Amas puram, & latinam orationem? caue ne vitiorum solæcis aspersa vita sit. Astrorum perpetuos cursus, conuersionesque contemplaris? Cogita illic tibi datum animum, illic sedem & domicilium collocandum. Rhetor es, & epideictico genere delectaris. Disce non solum quemadmodum laudes alterum, sed etiam quemadmodum enitare ut possis ipse iure laudari. Hoc ni facis, in virtutis nomen extraneus inuadis, & superficialia, ut ita dicam, bonitate contentus in alieno ædificas.

*Oratores
antiqui re-
ipsa boni
viri non
fuerunt.*

At enim tantus esse M. Cicero potuisset, tantus Demosthenes, si quam vulgo probarunt eloquentiam in comitatu reliquissent, & non potius virtutis eam dote locupletassent? Pulcherri-

ma quidem Demosthenis in Remp. consilia & finis vitæ clarus: M. autem Tullij actus nobilissimè consulatus, integerrimè administrata Prouincia, repudiatus Vigintiuiratus, laudescæteræ, quibus enarrandis Cicerone laudatore opus fuerit, satis ostendunt in eloquentiæ fastigio stare, nisi qui sit vir bonus, posse neminem. M. Ciceronem, vt de hoc primùm respondeam, fateor, Aud. Romanæ Reip. non inutilem fuisse: laudo eius ingenium quod solum populus Romanus par imperio suo habuit: scis quàm multas aduersus improbos exercuerit simultatès, & eum ipsæ exercuerint, adeo vt nullam rem rarius quàm diem illum quo nullius interesset ipsum mori, viderit. Vtinam moderatius res secundas, & fortius aduersas ferre potuisset! Vellem & generosius perditis ciuibus obstitisset: maiore enim inimicitias appetebat animo, quàm gerebat. Atque ne miserandi quidem exitus eum fuisse Asinius Pollio iudicaret, nisi ipse tam miseram mortem putasset. Sed licet eius res gestæ satis amplæ, magnificæq; fuerint, in maius tamen ab eodem elatas confiteri cogimur, quàm aut viri boni modestia, aut ciuis egregij & ad vtilitatem Reip. referentis omnia, dignitas postulare. Quoties enim nobis ingerit consulatum suum, non sine causa, sed sine fine laudatum? Quam sæpè Catilinæ, Clodioque fractis, eiectis, trucidatis insultat? vt se totius Italiæ humeris ab exilio reportatum gloriatur? quem non occidit rerum suarum stolidissima prædicatione? Ardens ista gloriæ cupiditas, non ipsa quidem per se honesta, & laudabilis censeri debet: sed quoniam maioribus vitiis frænum iniicit, qui

ea ducuntur ad ingentia quædam facinora & animosè suscipienda, & conficienda gloriosè, ij non quidem bonis sunt moribus, sed minus quàm cæteri turpes & ignominiosi. Demosthenes autem quamcunque in vitæ partem oculos conuertit, ne pallio quidem viri boni nequitiam suam occultat. Eum enim legimus vestitu, cæteroque cultu corporis ita nitido & curato fuisse vt ab æmulis vulgò parum vir diceretur. Extorqueat licet ab illo dissimulationem honestas, scimus tamen quamobrem Corinthum adierit, quam pœnitendi mercedem dare Laïdi recusarit. Atque vt auaritiæ mater est luxuries, nos eius etiam silentium audiuius argentea quadam angina laborantis: meminimus quibus in causis præuaricatus aduersariis suis clam orationes vendiderit: cur denique ipsi aqua & igni sit interdictum.

*Veterum
aliquot o-
ratorum
mirifica
improbi-
tas.*

Et quoniam eum mihi campum apertum video, in quo excurrere oratio, & cognosci Rhetorum improbitas possit, admittite cogitationem vestram in patentissimam totius vetustatis planitiem & eos enumerando recordamini qui pulcherrimam artem spurcissimis moribus fœdauerunt. Non commemoro antiquissimos illos Siculos, artis Rhetoricæ inuentores Coracem & Tisiam, quorum nequitia prouerbio consecrata in posterorum animis memoria vigeat sempiterna. Præmitto oratores eos omnes, qui post æuum Quintiliani extiterunt: quorum aliqui fortasse opum bonorumq; victores, scorto & libidini improbißimis dominis seruierunt. Eos tantum perstringo quos sibi vel fama, vel scriptis cognitos esse fateatur. Hortensium Regem forinon in face-

tè P. Torquatus, seu ob effœminatam mundi-
 tiem, seu ob argutas & gestuosas manus Diony-
 fiam (Saltatriculæ nomen erat illa tempestate fa-
 mosissimæ) in celeberrimo Iudicum confessu ap-
 pellauit C. Salustius Romanæ pater historiæ, cu-
 ius quot verba, tot sunt censuræ, in adulterio ab
 Annio Milone deprehensus, & loris liberaliter ac-
 ceptus, reliquas plagas pecunia redemit. C. Cæ-
 saris in eloquentia penè Dei flagitia militares ioci
 in triumpho cantarunt, ne obscura essent. M. Cæ-
 lij quæ vita fuerit, ex ea oratione qua ipsius caput
 fortunæsq; M. Cicero defendit, colligere non est
 difficile. Iam verò Græcos dicendi artifices quid
 commemorem, quorum & vitæ sordes, & mentis
 leuitas, & oratio deniq; ipsa eloquentiæ multum,
 sapientiæ parum complexa, nullam esse rem o-
 stendunt in qua minus operæ posuerint quàm in
 probitate consequenda. Antiphontis supplicio af-
 fecti cadauer abiectum est & eius nomini, poste-
 ritatiq; perpetua infamiæ nota iniusta. Andocides
 mala fide in publica rerum administratione versa-
 tus, exilio sese voluntario conscientia iudice con-
 demnauit. Æschines de histrione orator, suis se pi-
 ctum coloribus in Ctesiphontæa Demosthenis
 recognouit. Phrynem diloricata palla defendisset
 Hyperides, si aut alias suæ, aut ibi iudicum pud-
 citiæ pepercisset? Miseret me tui Isocrates, quem
 puditum non est summum eloquentiæ splendo-
 rem, quo & æquali tuo Platoni, & laudatori Tul-
 lio mirabiliter places sordidissimo quæstu, & vitæ
 turpitudine maculare. Vultis in hac improbitatis
 pompa impurissimos Græculorum Sophista-
 rum greges traducam, scholarum vomicas, libidi-

num scopulos, nequitiae architectos? quibus mens, fastu arrogantię turgida, lingua quęstuum aucupandis nundinis impedita, manus in flagitiis exercitata, gymnasia in quę diuites & venusti adolescentes ventitabant, non Rhetoricę sacrarium, sed diuerforia scelerum faciebant. O sæculi infamiam! ô portenta Rerum pub! ô pestes iuuentutis! Vos præstantissimum Dei donum sacrilegis yfibus profanastis: vos clarissimum Sophistarum nomen flagitiorsę vitę tenebris obscurastis: vos eloquentię maiestatem turpissima nundinatione profligastis: vos in Athenarum quasi in auream messem delati pro ingenti mercede nihil sapere docebatis. Nullus diuicis puer erat quem non venaremini, nullus nummustam abstrusus quem non olfaceretis; hoc phalerati illi sermones quibus artem vestram venditabatis, hoc melliti verborum globuli, & omnia dicta, factaq; quasi papauere & sesamo sparsa conabantur. Proh Deus immortalis! hæc fuit illorum disciplina? ob hanc causam parentes suos illis pueros commendabant, vt in moribus atque in voluptatibus adolescentiam suam profligarent? deinde verò animi illi teneri, castitate niuei, purpurati verecundia, cuiuslibet virtutis capaces, vbi non in scholam, sed in haram erant perdukti, tanquam circæo poculo in venereos columbulos, in lutulentos sues, in bipedum omnium nequissimos conuersi, quas in Rep. tragœdias, quos luctus excitabant? Dies me deficeret eos cõmemorantem, qui quas ciuitates maiorũ institutis florētissimas acceperunt, cū essent omnibus vel nature, vel doctrine, præfidiis ad dicendũ parati, dissipauerũt. Sed nimis diu hæc in re

immoror, de qua inter nos non controuersamur: *Ethnici oratores ne potuerunt quidem uiri boni esse.*
 Nam licet patientiam nostram tentauerit Fabius, ut historiam nunciam uetustatis ignorare nos crederet, impetrari tamen à se facile permittit oratoribus suis summam defuisse virtutem; nullū proinde extitisse antea numeris omnibus absolutum.

Sed quoniam eò perducta disputatio ut inopiam ipse suam ultro, volensq; agnoscat; vereor ne id quidem præstet, esse potuisse. Quis enim nostrum, si veterum temporum memoriam replicarit ultimam, non videat illo rerum ante Christum natum statu, illis ignorantiae tenebris, in incredibili veræ solidæq; virtutis penuria bonum virum esse potuisse neminem? Vos (Patres Reuerendi) qui Theologiæ mysteria traditis ut perfectissimi Teletæ, percipitis cogitatione orationem meam: neq; dubito quin aliquis ita secum reputet pietatem, iustitiam, temperantiam, aduersorum tolerantiam, virtutem deniq; esse non posse, ubi vanissimorum numinum cultus, vni, veroq; rerum omnium effectori debitam religionem euertit. Quid? animus corpori, ratio cupiditatibus quomodo laudabiliter imperabit, si animus & ratio ipsa deo seruire nesciunt? Adde, sine amore illo in quo hominis voluntas erga Deum, Dei erga hominem voluntati, etsi non par atq; mutua pro rata tamen respondet, virtutem omnem afflictam, perditam, emortuam esse Iam illa, sibi natam esse virtutem, sibi pretium, seipsa ad benè, beateque viuendum contentam, arrogantium Stoicorum somnia, illi probari non possunt, qui bona illa, eo vnde promanant referenda cogitarit. Hæc atque id genus alia ex diuinæ sapientiæ arcanis erui possunt subsi-

dia, quibus adiuuetur disputatio mea, si velim summo iure cum Fabio agere, & omnibus machinis, atque balistis eius opinionem conuellere. Sed facile hanc illi orationem omnem concedo ne se circumuentum queratur: patiar hoc mihi causæ robur & firmamentum eripi, vt suo potius eum gladio iugulem, quomodo vinci longè miserimum est. Dico te M. Fabi oratorem quem proviro bono perquam ambiciosè ostentas, quem tua doctrina non à teneris quod aiunt vnguiculis, sed pene ab ipsa conceptione, antequam etiam homo videri possit informas: Dico; inquam, te sapientibus illis præceptionibus malum facere, dum ea permittis quæ virtuti populari, quæ mediocri prudentiæ, quæ triuiali probitati aduersantur.

*Veterum
præcepta
Rhetorum
malas causas
ab oratore susci-
pi permittebant.*

Malas, inquis, causas & iniustas suscipiet orator, si vtilis Reip. fuerint. Hic te appello Socrates, qui execrari eos solitus es qui vtilitatem cum honestate natura coherentem opinione distraxerunt: vos Stoici omnes sapientiæ antistites, quibus quicquid honestum est idem vtile videtur, nec vtile quicquam quod non honestum: hæc dicentem Quintilianum, si in porticu vestra esset, ferre possetis? Enimuero ita omnes à natura comparati sumus, vt cum aliqua vtilitatis species obiecta est, commoueamur: sed si cum rem diligentius inspeximus, turpitudinem adiunctam videamus, tunc ea in re non vtilitatem requirimus, sed intelligimus vbi turpitudine sit, ibi veram vtilitatē esse non posse. Quid enim est tam contra naturam quam turpitudine, quæ recta, quæ laudabilia, quæ conuenientia, congruentiaq; naturæ peruertit? Quid tam secundum naturam quàm honestas ad quam facti

& instituti sumus? Quid tam secundum naturam quàm vera vtilitas, ad quàm docente nemine studià nostra omnia, cogitationesque collimant? Aude hìc priuatarum causarum honestatem, ab vtilitate publica secernere: finge nobis ciuitates ad arbitrium tuum in quibus priuato cuique liceat iniustitia, scelere, perfidia Remp. stabilire. Quid enim est populus aliud quam cœtus multitudinis, iuris consensu, & vtilitatis communione sociatus? Iura hæc si oratoris vnius facundia reuelantur, si leges sanctissimæ pacis vincula, dignitatis fundamenta refiguntur, beatam, videlicet, ciuium vitam efficies, Id est, virtute honestam, amplam gloria, opibus firmā, copiis locupletem.

Ponite vobis ante oculos hominem aliquem summis olim populi beneficiis vsum, cuius virtuti adiuncta felicitas, æmulos, vt fit, potentes, nobiles seditiosos compararit. Conspirant illi in eius caput & fortunas, pertrahunt in ius contra leges, contra maiorum instituta homines sceleratissimi ciuem optimum & innocentem: volitant toto foro, Iudicum subsellia grege prædonum impurissimo complent. Hic incolumitatem suam patriæ salutem ratus, præter innocentiam quæ arx est inexpugnabilis, amicorum gratia, clientum armis, vim vi illatam defendere constituit. Quid deinde, quid expectatis, Audit? num bonorum omnium iugulis intentatos gladios, cædes, tumultus, quotidianas vrbe tota lapidationes? Deligitur ex Quintiliani ludo atque disciplina orator vir bonus vt reum peragat, quem omnium iudiciis, voce, suffragiis esse sciat innocentem. Quid hic agat ille? quo se vertet? miserum enim

*Id quam
iniquum
sit ostendi-
tur exem-
plo.*

est à ciue circumueniri, miserius à viro bono & amante patriæ; funestum est exturbari fortunis omnibus, funestius voce & opera sapientis: horribile est in causa capitis condemnari, horribilius innocentem. Itaque causam reiciat tanquam malam, & iniustam. At quamdiu reus in ciuitate manebit, inflammabuntur studia partium, trucidabuntur medio foro ciues fortissimi, in horas, in momenta turbulentissimæ seditionum tempestates excitabuntur. Veniat igitur contra innocentiam pro iniuria, contra virtutem pro audacia, contra rationem pro furore & amentia: quæ licet falso tueatur, maiore tamen cum fide quam ullus aduersariorum audietur. Hæcbit enim & voluntatem nocendi in officio suscepto, & vim in oratione, & pondus in auctoritate. Illo denique accusatore iudicum sententiis obrutus solum vertet vir optimus, in ea patria mortem non impetrabit, pro qua mori semper duxit gloriosum: afflictus, spoliatus, bonis expulsus, ex amplissima fortuna in vltimam rerum omnium inopiam coniectus, in ignotas terras deportabitur: sequetur vxor matrona lectissima, ab amicorum consuetudine, à complexu parentum, ab aris patriisque focis auulsa, solis infantibus liberis onerata, qui quanquam nondum sentiunt quantum sibi paternæ probitas nocuerit, gemitus tamen lamentabiles, qui aërem feriunt, testes sceleris, vindices perfidiæ erupturum in oratoris caput diuinæ iustitiæ turbinem impetrabunt. O calamitosam virtutem! ô spectaculum non hominibus modo, sed feris ipsis luctuosum! hæc agentem virum bonum appellas, quæ si ab aliquo Reip. busto

facta siccis oculis intueretur, cum ego non iam cum vltimæ barbariæ tyrannis compararem, sed belluis sæuiorem, scopulis & fluctibus duriorum execrerer. Quid enim est virtutem pessundare? quid est iura omnia diuina, humanaque violare? quid est patriæ ciuem, homini innocentiam, iudici veritatem auferre, si hoc non est?

At istud, inquit, ratio nonnunquam afferre *Mendacium quod-
que oratorum
a Quinti-
liano per-
missum.*
potest. Per vim & scelus, per calumniam & mendacium, fortunis suis innocentem exturbare ratio vlla potest permittere? quis vnquam mentitus est si hic verum dixit? At facturum aliquando virum bonum vt mendacium dicat, & quidem leuioribus causis, Stoicorum quoque asperrimi confitentur. Proh Deus immortalis! ego ne me audiuisse aliquid, & didicisse non gaudeam? mentiri, fallere, decipere, in errorem perniciosum inducere viro sapienti Remp. administranti suadetur? leuius quicquam aut turpius fingi potest quam frontem, oculos, orationem ad dolos, & fallacias componere? dissentiat ab animo lingua sapientis? quod vilissimus quilibet, & de lapide emptus sine spe grandioris alicuius lucri nolit admittere, hoc vir bonus, hoc sapiens, leui causa, nulla honestate proposita, sine publico priuatoque bono facere non vereatur? Quid cum ad obscurandam mendacio veritatem, ad euertendam innocentiam, specie vtilitatis publicæ, priuati detrimenti metu, spe ingentis alicuius præmij inducetur? En quicum in tenebris mices, cuius auribus arcana committas, cui sic confidas vt inter bonos bene agier arbitreris. Hanc si oratori, & bono viro permittimus licentiam, vbi postea si-

dem inueniemus? quo in homine fiduciam collocabimus? tolletur à vita vitæ societas, incerta pæcta, vanæ stipulationes, suspecta cuiuslibet oratio reddetur, vigeat in omni ordine simulatio, dissimulatioque, perfidi, improbi, malitiosi regnabunt. Nondū dico quam facinorosos homines, æquissimis legum vinculis adstrictos solvere debeat, quas iustitiæ tenebras obducere, quos inuehere metus, quas inflammare cupiditates: quæ cum fecerit benè, sapienterque, & vt virum bonum decet fecisse iudicabitur. Verum cum nihil tam incorruptum esse debeat in Rep. quam suffragium, quam sententia: Non intelligo cur qui ea pecunia corruerit, pœna dignus sit: qui eloquentia, laudem etiam ferat. Mihi quidem hoc plus mali facere videtur qui oratione, quam qui pretio iudicem corrumpit, quod pecunia corrumpere prudentem nemo potest, dicendo potest. Hæc igitur vt videtis M. Fabij præcepta apertam habent doli mali turpitudinisque professionem. Hæc est arguta malitia ad quam se in oratoria diu versatum iuuenes erudisse dolet Lactantius. Hæc ars cui Basilus pro subiecta materia, mendacium, pro exercitatione controuersias sententiolis vibrantibus pietas assignat, quibus prudentis alioquin, docti optimi iudicis animus irretitur.

*Edinerso
Christia-
nis oratori-
bus neces-
saria est
vita san-
ctitas.*

Traducite nunc animos vestros, Audit. ab hac Ethnicorum nequitia in aliam partem Christianorum oratorum, in quibus pietas, fides, sanctitas sedem ac domicilium collocauit. Videte vt nostrorum pudor illorum libidinem, arrogantiam demissio animi, auaritiam abstinentia profliga-

uit. Statuite apud vos aptum esse Christianis temporibus Catonianum pronunciatum: ex quo nobis diuinæ fidei dies illuxit, nullum aut fuisse aut esse potuisse oratorem qui vir bonus esse non debuerit. Nolo mihi à quoquam istorum obiici tam esse nobis quam sibi, artem oratoriam indifferenter; in ea æquale vtrisque esse præsidium ad vitam benè instituendam; non potius nostra, quam sua ætate ipsi intimis defixam radicibus inesse virtutē. Neque enim Christianos oratores hic appello forenses causidicos; qui & hoc sæculo non minus quam æuo Quintiliani maiestatem, vbertatemque eloquentiæ perdiderunt; & tractant negotia quæ ab ethnicorum libris nō abhorrent. De iis loquor qui sacris concionibus circumfusam multitudinem ad virtutis studium, & dignam Christiana professione integritatem perducunt. In iis enim solis Christianæ maiestatem eloquentiæ, & perutiles animorum motus arbitrator residere: atque iidem illi sunt, quos si virtus absit & probitas, oratores esse & appellari posse pernego. Si quis tamen veterum patronus præfractè defendat in ipsis etiam templorum nostrorum rostris, exerceri à nonnullis eloquentiam, quæ licet homines ad virtutis decus honestatemque incitet, natura tamen sua in ipso dicente sanctitatem & absolutam morum probitatem non requirat. Equidem non sine eximio animi mei dolore fatebor, repertos aliquando scelere & insania tam perditos homines ut cum ad sacra pulpita præter natiuam quandam dicendi concinnitatem & appellandarum vocum suauitadinem admodum nihil afferrent, blanda illa animorum

conciliatricula, & quasi lena ad quæstus illiberales, aut vitæ voluptariæ delicias abuterentur. Verum illos ego in sacrosoratoribus non tantum non habeo, sed ne mediocri quidem tinctos prudentia homines existimo, qui certam ad cælum viam præclare auditoribus aperiant, ipsi autem in æternæ calamitatis voragines sponte præciperent. Quanquam quid veræ, solidæque utilitatis ab eiusmodi hominibus in alios deriuari potest qui sibi ipsis boni utilesque esse dedignantur? quid honesti cæteris persuadebunt dicendo, qui aliam viuendo viam palam & aperte sequuntur? Nam si veri oratoris est nervos omnes in ea re contendere, ut sententiam suam auditoribus probandam atque amplectendam efficiat; id certe eo loco nemo consequetur; qui non exemplo prius, quam dictione, vita, quam sermone homines incitarit. Ego enim sic existimo in omnibus quidem rebus illum aliis persuadere facillimè, qui prius sibi persuaserit: in virtutis autem negotio fieri non posse, ut qui in ea studium non posuerit, is ritè atque ea qua par est dignitate & emolumento versetur.

*De virtute
te potest
aliquis si-
ne virtute
disputare.*

Quæ res ut paulo subtilius explicetur, cogitate, amabo; nostrum animum in duas partes esse distributum, quorum altera in appetitu posita est, altera in ratione, quæ docet & explanat quid faciendum, fugiendumque sit. Hinc efficitur ad duas res, intelligendum & amandum, esse natum hominem: In res autem pulcherrimas atque optimas, mentem intentam, infixamque nostram intelligentiam esse oportere, eaque ex cogitatione fructus illos excerpandos, qui foelices ac beatos

efficiant. Iam si de mente atque ratione agimus, fateor reperiri d. fertum hominem posse, qui propriam cuiusque virtutis vim definitione declararet, qui in membra partiatur, qui boni viri & cuius officium suis finibus circumscribat. Huic etiam liberaliter permitto, ut naturæ, disciplinæque præfidiis instructus ad eam peruenerit faciendam qua distinctè, qua abundanter, qua illuminatè de virtute ita differat, ut admirabilem eius speciem apud auditores in bono lumine collocet: cum tamen ab eius corpore flagitiū, scelus à manibus, dedecus ab animo raro abfuerit. Id Philosophi illi virtutis buccinatores luculenter probant, quorum ea fuit calamitas ut insigni aliquo vitio sapientiæ suæ quasi formam deturparent: quibus commune fuit & quotidianum dicere melius quam facere. Dicebant enim omnes non quemadmodum ipsi viuerent, sed quemadmodum viuendum esset. Socratem Alcibiadis nimia consuetudo non immerito infamauit. Platonem, quod supra modū gulæ esset deditus, Dionysius vendidit. Aristoteles terminum prouidentiae diuinæ summa impietate constituit. Speusippus de Platonis Academia in adulterio periit. Phaurinus ex Aristotelis lyceō de adulterio causam dixit. Cato ex Zenonis porticu deprehensus sæpè est cum in multam noctem comotationes traxisset, lectum in quo pridie accubuerat, frustis esculentis repleuisse, cum etiam ore foetido teterimam salutantibus popinam inhalaret. Itaque cum quis variè, copioseque de virtute, aduersorū tolerantia, liberali facultatum erogatione dixerit, non continuo vir optimus censendus magis est,

quam ubi parietum, luminum, stillicidiorum iura defenderit, faber cæmentarius esse debet.

*Ad eam
autem im-
pellere di-
cendo nisi
vir bonus
nemo po-
test.*

Ego vero in hac intelligentiæ illustrandæ parte Christianam eloquentiam non consistere, sed ulterius ad voluntatis permotionem progredi debere contendo. Ut enim Iurisperiti partes sunt quid rectè fiat ostendere: patroni autem eum hominem qui secus fecerit iudicum severitati obicere, vel eripere; sic in officiis Philosophi pono sapienter & copiosè de probitate Christiana disputare: ad eam autem impellere, & vitiorum odium auditorum animis ingenerare, oratoris esse statuo. In quo sanè laborandum ipsi est, ut quam commodè dicit, tam aptè, conuenienterq; viuat. Nam ad ea quæ sunt agenda melius imitatione dicuntur homines, quam adhortatione: & in virtutis doctrina caput artis est, virtutem exercere. Primum, ut ait Romanus Stoicus, quia homines amplius oculis quam auribus credunt. Deinde quia longum iter est per præcepta, breue & efficax per exempla. Quod ut melius perspicui possit à vobis, collocate in exhedra formosum iuuenem venustis oculis, colore suavi, calamistrata coma, cæterum omnibus oratorum simulachris, omnibus Rhetorum regulis emendatiorem. Continentiæ laudes summa dicendi grauitate, & copia aggrediatur: qua fronte, nolite à me quærete: consumat in dicendo totum Isocratis myrotheciū & omnes eius discipulorum arculas: Inuentione Antiphōtes, subtilitate Lysias, suauitate Phalaræos, doctrina Pericles, actione Hortensios, lepore Crassos, toto dicendi genere Demosthenes & Cicerones superet; sit magis Atticus,

*Morum
integritas
exemplo
melius quàm
oratione
docetur.*

cus, ipsis, si fieri potest, Athenis. Quid aliud sermone probo, vita non inculcata quàm vanissimos plausus, & inanissimas acclamationes popularis auræ vile mancipium assequetur? Trahet idem propositum orator alius, & in concionis aspectum corpusculum afferat aridum ieiuniis, paludatum cilicio, vigiliis confectum: nondum auditur, & persuadet. Incipit vocē rustica & agresti. Quid ait? abstinētiā laudat. O virum bonum! Calcare fastum, repudiare voluptates, terrenas hæc quisquiliās non ut vincula virorum, sed ut oblectamenta puerorum præterire imperat. O probum consilium! Posset utinam corporeis oculis spectari continentia: quàm mirabiles in hominum animis ardores excitaret! quàm honestis illecebris ad verum decus pertraheret! Ne vobis illam facite tot obseptam difficultatibus, tot interclusam dumetis, tot spinis horrentem, volenti aridet, conantem adiuuat, blanditur possidenti. Expertus loquitur. Spectate contra flagitiosorum hominum in omni vita turpitudinem, effusas in intemperantia libidines: considerate angores quibus conficiuntur, solitudines, nocturnos diurnosque metus, conscientiae carnificinam, tristem atq; acerbam præteriti sceleris memoriam, effrenatam præsentis cupiditatem, fluctuantem inter illa libidinosum, interim exosum Deo, execrandum hominibus, sibi grauem. Hoc loco in oratore exhorrescere incipiunt homines, ex eius ore attoniti pendent, eum stupefacti dicentem inuentur. Quid cum fulgurabit, tonabit, permiscebit concionem? cum libratum iustitiæ diuinæ gladium, & vtrices in perpetuis inferorum erga-

stulis flammæ denunciabit? Erras impietatis sentina, nequitie colluies, vorago libidinum, non te Deus vitæ, sed pœnitentiæ, non deliciis, sed pœnæ in omnem posteritatis tertorem transmittendæ reseruauit. I porro quò te insani flagitiorum æstus abriplunt, vocantem, cogentem, præstolantem Deum contemne: veniet dies ille quo die auersum lugeas, iratum horreas, sentias vindicantem. Tu sempiternos ignium illorum vortices? Habitantem in arrosis medullarum fibris conscientie vermem? tu quicquid tetrum, funestum, horribile fingi & excogitari potest, audeas prouocare? Quis ad hæc fulmina non palleat? quis eius sibi flagitij conscius tam atrocem exitum non perhorrescat? quis denique facta sua non torqueat, & de verbis cogitationibusq; in iudicium veniat vt saluari pœnitentiæ mysterio expietur?

*Præus sibi
quàm au-
ditoribus
virtutem
orator per-
suadeat o-
portet.*

Iam verò quæ & qualis est oratio quæ non præteruehi curiosas aures, sed in seriis & grauib; animis debet penitus insidere? quàm incitata & vibrans? quàm acris & vehemens? quàm ardens & inflammata? hîc autem cogitate quantum volueritis, Audit. quotquot adestis omnes, & pueritiæ ipsius vestræ memoriâ recordamini vltimam, si quem nominare potestis qui contra quàm senserit locutus in re difficili quicquam persuaferit. Non mille peto non centum: vnum aliquem postulo tanto temporis spatio qui vbi differuerit non ex animi sui sententia, homines ad aliquid agendum induxerit? langueat & molliatur oratio necesse est, Audit. cui color est non à visceribus sanguine diffusus, sed à lingua fucus illitus: neque fieri potest vt incitetur auditor vt doleat, vt ode-

rit; ut timeat, ut cohorreat, nisi omnes in motus in ipso oratore impressi esse atque iniusti videbuntur. Quid enim aliud est disertus hominis oratio quam terebra, cuius nisi cuspis incaluerit, lente perforat? quid nisi muralis machina quæ ardet ut feriat: ferit ut euertat, comminuat, dissipet? Equidem hoc loco Senecæ viri grauiſſimi sapientiam desiderarem; nisi is se Stoicum profiteretur, qui ut sapienti suo iram omnem detrahat, oratoribus, ipsisque histrionibus eius tantum simulationem concedit: neque dubitat affirmare id quod veri affectus non effecissent, sæpè affectuum imitatione perfectum. Alia longè est M. Ciceronis, id est, eloquentiæ ipsius aut opinio, aut experientia, qui M. Callidij actionem de parato veneno, ex accusatoris ipsius remisso vultu, voce languida, oratione soluta refutauit, cum exclamaret, nisi fictum crimen tam frigide non potuisse narrari. Æsopi verò Tragedi, cui se instituendum Cicero tradidit, qui sensus in agendo fuerit, quæ animi commotio, quæ, ubi res postulauit, perturbatio, vel vnum illud declarat, quod Atrei furorem ipso etiam corpore conceperit aliquando, & obuium fortè seruum histrionico sceptro percussum interfecerit. Omnis enim ridicula & frigida est imitatio quæ rerum naturam quantum fieri potest viuam, spirantemque non exprimit.

Sed hæc quæ hætenus dixi habent aliquid humanitatis concretionem minus syncerum, à quo si sacram hanc eloquentiam expurgauero, & in Deo solo mentem, cogitationemque meam dedidero, quàm simplex & absoluta sit in oratore probitatis necessitudo, etiam tacente me videbitis.

Ecclesia-

stes in ho-

minum sa-

lute curan-

da Dei mi-

nister est

Graditor.

Nam vt omittam sanctissima scripturæ diuinitus inspiratæ mysteria, ad quæ nisi puro, castoque non patet aditus: vt de sapientia nihil dicam quæ in malcuolam animam nunquam introibit: vt non vrgeam nullum in eodem pectore esse honestorum turpiumque consortium: fontem ipsum eius quod in nobis potest esse boni consecrtemur. Quis est qui Ecclesiastæ segetem ac materiam dicendi subministrat? qui temporibus, personisque congruentem suggerit dictionem? quis auditorum mentes ad illa semina sic accipienda præparat, vt fructuarios agros imitentur qui multo plus afferunt quàm acceperunt? Hi sunt tui Deus Opt. Max. pene dicam labores, vt hominem à te conditum, à te assertum, te fruendo, æternaque felicitate dignum efficias. Tu omnia salutis nostræ momenta obseruans, concionantis animum, vocemque inuadis, currentem impellis, adiuuas laborantem. Et quemadmodum in vaticinationibus quæ instinctu diuino, afflatuque funduntur, Sacerdotes oraculo præpositi tum demum abdita atque certa fari putantur, cum hominem exuerunt, seque totos Dei numini, spirituique permisserunt: sic concionatoris oratio vim & efficacitatem non habet, nisi eam diuinus ille spiritus totam penitusque occuparit. Itaque sic affecti sunt plerique, vt quamquam accuratas, & meditatas commentationes domo afferant; in ipso tamen actionis æstu & feruore quædam sibi patiantur excidere, non cogitata illa quidem, sed quibus tanquam telis ferente ferienteque Deo peccatorum conscientie vulnerentur. Vos appello Christi præcones, fidei sanctissimæ propagatores Apostoli,

qui orbem vniuersum Christiani nominis fama impleuistis : cùm Ioues, Mercurios, Veneres, & scdam illam vitiorum potius quàm deorum coluuiem ex animis hominum eiiciebatis, vestrum erat opus illud, ac non potius Domini cooperantis, sermonemque suum prodigiorum admirabilitate confirmantis? Vos Augustini, vos Leones, Ambrosij, Cypriani, Saluiani cùm enascentium hæresum capita atterebatis, emortuarum fibras stirpitus extrahebatis, improborum pectora scelerum impuritate expurgabatis, hoc vestra faciebat industria, & humani vis ingenij, non Deus omnis auctor, procreatorque sanctitatis? Basilios, Nazianzenos, Chrysostomos tria orientalis Ecclesiæ lumina, fidei propugnacula, eloquentiæ Christianæ archetypa, quis non audiuit, non admiratus est? quas illi diuinæ Charitatis faces in hominum animis accenderunt? quos peccatores ex ore Dæmonum atque inferni faucibus ereptos seruauerunt? quos libidinosi voluptatibus captos, vt hamo pisces, præsentis periculo, æternis doloribus extricarunt? Quæ omnia si humanis viribus peracta sunt, quidni cum Libanio Sophistarum principe magistro suo rerum tam præclare gestarum gloriam communicauerunt? Cur idem ipse Libanius doctrinæ suæ æmulos virtutis non fecit studiosos? minus erat quàm illi eloquens? at eius fontibus hortos suos irrigauerant. Latebat obscurus domi? at Præfectus esse Prætorio, ne Atheniensis Sophistæ nomen perderet, recusauit. Nullum illi fors campum dedit in quo eius ingenium spatium posset? At eodem quo illi loco, Constantinopoli versatus est, vnde propter

corruptam propudiosis flagitiis iuventutem, per summum dedecus & infamiam expulsus, exterminatus, eiectus, plures reliquit nequitiae suae testes, quàm eloquentiae laudatores. Taceo reliquos doctrinae sacrae antistites, sunt enim hoc in negotio pares omnes inter se : qui cùm in salute hominibus procuranda Dei quasi comites, & administrari esse vellent, hoc egerunt potissimum ut pietate, atque integritate vitae ad eam rem viam sibi sternerent. Nam licet Deus aquam à pumice haurire possit, & minimè aptis ad tantum opus uti instrumentis : ea tamen est ipsius consilij atque providentiae ratio vs praeclara & idonea si desunt; efficiat, si adsunt, admoveat.

Vellem mihi tantum esset otij ut probare possem iam inde à primis illis temporibus cum Christianum inuenire improbum neminem potuisses, ad hanc usque aetatem omnes, qui sacro oratorum nomine digni visi sunt, virtutem & sanctitatem coluisse. Sed ut manum aliquando tollam de tabula, malo hæc in cogitatione vestra relinquere, quàm in oratione mea ponere. Vos extremum hic alloquor, iuvenes lectissimi, quibus ad eloquentiam, cæterasque honestissimas artes currentibus iniiciendum frænum potius est, quàm adhibenda cohortatio : vidistis in qua versentur inanitate qui sibi blandiuntur, quàm parum probitatis ex oratoria facultate aut habeant, aut si suis stare præceptionibus volunt, habere possint. Quàm ex aduerso insita sit in eloquentiae Christianae medullis benè viuendi ratio. Æquum est hic, adolescentes, meminisse vos & Christianos esse & ad immortalem cœli gloriam educari. Hoc

ubi altè in cogitationem vestram demiseritis, iam per me licet, ista quam volu eritis seiungite. At videte, per Deum immort. vtrius sit maior necessitas, virtutis an faciundix, probitatis an scientix? Quid agimus, Auditores, quo curæ nostræ, vigiliæ, solitudines spectant? quid cogitamus cum in comparanda scientia tot molestias exorberemus, tot deuoramus difficultates, animo semiliberi, & ad summa properantem genium, mediocrium inuestigatione fraudantes? Doctos nos esse & haberi volumus: probitatem quasi peregrinum aliquid, & aduentitium ad secundas curas amandamus. O cæcas mortalium cogitationes! quæ veri optimique ignorance, in mediis occupantur. O præposteram hominum prouidentiam! quæ magna ingenia à se abducta, in leuium rerum scientiam quasi in aliquod pistrinum detrudit, & compingit; vt cum tota corporis, animique contentione libros exhauferint, omnia sciant, præter id vnum quod tota vita discendum est, bene viuere. Quid enim tibi prodesse potuit tanta doctrinæ suppellex, magne Aristoteles, omnis indagator, venatorque naturæ? Quid tibi M. Tulli aureum orationis flumen contulit, quod doctos omnes in eam admirationem rapit, vt per secum beatè agi putent, si tui particulæ, vel exiguæ videantur? Quid aliis præclaræ ingenij dotes emolumentum attulerunt, quos viuos ad opes, honores, magistratus euexit scientia, mortuos ad perpetuam posteritatis memoriam transmisit? Existat nunc veterum oratorum aliquis, & renuntiet vtrum se doctum fuisse, an bonum; eloquentiæ, an virtuti studuisse malit? Effluxit quod ambierunt,

sempiternum est quod neglexerunt: versantur in manibus nostris eorum scripta, Deus sancte! quàm docta, quàm luculenta, quàm acuminis, ingenij, lepôris, maiestatis plena! ipsi interim æternis: non audeo totum dicere; quoties enim hac de re cogito, totis artibus contremisco. Vos ergo quibus adhuc integra res est, per virtutis pulchritudinem, per Christianum nomen, per eam qua nihil cuiquam carius esse debet, salutem, simul cum scientia, in virtutem & pietatem, quod hætenus fecistis, incumbite. Illa est. Adolescentes ingenui, sanctorum scientia, illa Christianorum eruditio. Purum esse, castum, integrum Philosophia est: moribus, modestia, verecundia elucere, eloquentia est: Hanc si tenetis illa non deerit: quæ si deesset, ad obtinendam inter homines dignitatem, aliquantum ad veram, perfectamque felicitatem, non admodum requirenda foret.



ACTIO
IN HISTRIONES.
PANVRGVS
ORAT PRO HISTRIONIBVS,
VT IN VRBEM ADMISSI
FABVLAS DOCERE
PERMITTANTVR.

ORATIO IX.



SPECTVS vester, Iudices,
non satis quietus, & frequen-
tia populi, tantusque Con-
fessus quantum vix omnibus
spectaculis animaduerti, du-
bitare cogunt, vobis-ne, an
mihi causæ huius nouitas, &
iudicij conditio insolentior videatur. Nam ad
illud tribunal in quo de pacis otiiq; tum publi-
ci, tum priuati perturbatoribus quæritur, eos
homines stare qui in amœnissima voluptate ciui-
bus suis concilianda operam artemque suant col-

locant, æquò animo ferre non potestis : & me, qui aliena persona compositis versibus quasdam animi perturbationes ementiri soleo, mutata de repente forma dicendi, de fama atque existimatione mea verè ac serio periclitari, vehementer indignor. Quid enim dici potest iniquius quam nos à patriæ sinu, à complexu parentum, ab amicorum consuetudine per calumniam extrahi? Crèdo vt cùm Telephum & Peleum agemus in scena, ex animo dolere censeamur. Nam quod crimen huic iudicio prætexitur? quid habent accusatores tam graue & atrox in vita nostra, rebusque gestis, cur nobis ea vrbe interdictum velint, in quam Turcas, & ab ipsa barbaria Canadenses admissos esse cognouimus? Ars, inquiunt, vestra ludicra est. Respirauì à magno metu, Iudices: putabam enim ab aliquibus meorum comitum effossa sepulchra, templa violata, exhaustum ærarium, facta latrocinia, trucidatos homines, seditiones excitatas. Verum quod bene feliciterque eueniat, non mores nostri, sed fabulæ; non vitia, sed ludi; non cœnarum deliciæ, sed scenæ oblectamenta contra maiorum institutum, præter omnium consuetudinem suspensis omnibus, & rei nouitate per terrefactis, in iudicium pertrahuntur. O temporum sanctitatem quæ de iocatione questionem constituunt! ô morum grauitatem quibus lusio capitalis est! ô Censores Crassis, & Catonibus seueriores, qui ridere plusculum, aut ludere, non mitius notandum putant quam parricidij crimen & peculatus! Ars igitur vobis nostra non placet: quis eius turpitudinem vobis renunciauit? quis theatra oratione depinxit? quis tra-

gædias recitauit ? nam ad eas non conuenitis, homines Musis omnibus & Gratiis inimicissimi. Quæ est autem indignitas cæcos de coloribus iudicare velle, & quod publico loco, patente theatro, in solis huius luce & conspectu, frequenti honestissimorum hominum corona factum oculis vsurpare nunquam dignamini; flagitiosum & impium proclamare ? atque illam ipsam iniuriam & dolum iniquissimum quo nos circumuenitis, qua oratione prosequar, dum me à scena, in qua possum fortasse aliquid, in forum extrahitis, vbi regnare solet eloquentia illa quam in concionibus aduersum nos exercetis: vt vmbraculis assuetum hominem ad puluerem vestrum solemque fatigetis. Æquum-ne est, & bonum prouocari ab iis qui ætatem in studiis literarum contriuerunt, hominem de imperitorum plebe ? ab disertissimis viris, qui declamandi in cæteros studium nullo vnquam tempore intermittunt, eum qui ex commentario tantum sapit : cui, postquam præscriptam carminum seriem memoriter pronunciauerit, silentium imperatur ? Scio equidem apud Cannas id ab Annibalis calliditate profectum, vt Romanorum ora ad solem conuerteret: non dubito quin loci captandi consilium in Imperatore primum esse debeat, & armorum commoditas sit prærogatiua victoriæ. Itaque mihi erit iniquissima conditione aduersus exercitatos istos gladiatores & robustos veteranos pugnandum nisi vestra me, Iudices, æquitas & prudentia subleuarit. Nolo nos in theatrum regredi, & causam ibi nostram agere: stabimus in gradu & campo ab aduersariis constituto. Sed ne omnia

præoccupasse videantur, peto arma cōmutari, & ea abiici quibus illi ad tegendum nocendumque abutuntur, Nam si res agitur doctrina, facundia, & seверо illo supercilio, quibus apud timidas mulierculas auctoritatem sibi confecerunt: quid est quod ego, homo infantissimus hac in causa sperare possim, cui si qua historiarū veteris cognitio est, totū debeo tragœdiis, quas ago, si qua vis exercitatioque publicè dicendi, à commentitiis illis animorum in scena perturbationibus emanat. Aliquas esse Rhetorum præceptiones audiui tantum, quibus isti nihil non persuadeant: dialecticas captiones, & subtilem disputandi loquendique rationem, qua isti quemlibet irretiūt, vidi qui reformidarent: externam seueritatem & vultus tristitiam popularem esse semper existi-
maui. Supereſt igitur vt poliro illo, & aduentitio fūco penitus reiecto, innuda & simplici causæ natura consistamus, ea describatur à nobis sine copia & amplificatione orationis, vt de re ipsa, non de dicentium facultate iudicetur.

Triatantum in histrionibus reprehendi possunt, Personæ fabulæ, ars ipsa.

Itaque ab importuna aduersariorum exaggeratione ad rem ipsam, oculosque vestros, Iudices, totam controuersiam traduco: vos enim sæpè summa cum voluptate fabulas nostras spectastis; vt si cætera me deficerent, sola vestra auctoritas hominum illorum calumniam refutare posset. Verum hoc iam non ago, id volo clarè vobis ab aduersariis enūciari quid in ludis tragœdiisq; nostris reprehendendū existiment. Certè triatantum cogitari posse intelligo, quæ vituperij aliquid valeant admittere: Nos qui agimus, fabulas quæ aguntur: Ipsam denique artē & disci-

plinam agendi. Atqui personas ipsas si sunt ab omni culpa & vituperatione remotæ, in odio esse apud aduersarios, quanquam sunt humanitatis inimici, nunquam mihi persuasi. Eam igitur maculam qua offenduntur, aut à tragædiis, aut ab earum docendarum arte oportet esse contractam. Dicant ergo vobis audientibus quid in illis reprehensione dignum existiment: date veniam interloquendi, gestio meorum Aristarchorum vocem audire, vt subito nobilem Poëtarum cohortem eorum iudiciis obelisque obiciam, vt vna litura clarissimorum ingeniorum monumenta ex hominum memoria deleant; vt Sophocles Æschylos, Euripides, vt Senecas, Pomponios Secundos, vt sexcentos tragædiarum scriptores in capitis discrimen adducant, quod Poëticæ facultatis nobilissimam partem exercuerint, coluerint, ornarint. Quid? Dramaticam, siue actuosam poësim accusare audeas, cuius artifices Euripidem Archelaus, Philippidem Lyfimachus, Terentium Lælius & Scipio, Melissum Mecænas, Senecam Nero, Plautum vniuersus Populus Romanus summo in honore, & pretio habuerunt? Quid? Fabularum scriptionem reprehendas, quæ Dionysiis Regibus Patri, & Filio, Syllæ dictatori, Q. Ciceroni Consulis Fratri, Octauio Augusto, Imperij principibus: quæ Empedocli Agrigentino, Ioni Chio, Diogeni Sinopenfi, Crateti, Thebano, Timoni Nicæo, Varroni Romano, sapientiæ antistitibus ita placuit, vt in ea perlibenter acrem ingenij vim, solertiamque collocarent? Tragædias tu politioris literaturæ hostis insectaris? At non sanctitatis, doctrinæ, eloquentiæ do-

*Personæ sē
culpaca-
rent, vitu-
perari non
debent.*

*Tragædiæ
natura sua
vitiosa non
sunt.*

tibus admirandus Gregorius Nazianzenus : non eius æqualis Apollinarius Syrus, tragicis comicisque rebus nullo Græcorum inferior : non Academia hac ætate florentissima, ne vetera tantum commemorem, quarum parietes dramatis illis quotidie circumsonant, quarum typographi pulcherrimos hoc in genere partus ingenij, & inter ora literatorum victuros, æternitati transmittunt. Nam quid, per Deum immortalem peccat amplius, qui agente poësi, quam qui pedestri oratione Christi patientis acerbitates, Absalonis perduellionem, Iosephi pericula, Pompeij calamitatem, infelicitatem Bruti, Martyrum supplicia prosequitur? Cur facinorosius est mortem Cæsaris, calum Seiani, parricidium Orestis, & illas inuidiæ fortunæque virtutem superantis vicissitudines oculis exhibere agendo, quam subiicere mentibus recensendo? Quis Plutarchos, Thucydides, Liuios, Herodotos laude & prædicatione dignos existimabit, tragicos autem poëtas non aliunde, quam ab illorum fontibus scriptionis suæ materiam haurientes, in exilium extra literarum, & sapientiæ orbem amandabit? Ad ciuilem prudentiam historia inuitat? at poësis magnis ad sapientiam itineribus perducit, dum ea commemorat non quæ verè gesta sunt, ab eo qui humanum aliquid sit passus, sed quæ à forti & sapiente viro geri debuerunt. Admirabiles animorum motus cum summo voluptatis sensu excitat rerum veterum replicata memoria; at quanto magis earundem rerum non emortua lectio, sed viuac spirans gestio, animos hominum commouet, incitat, inflammat? cum hæc ita euenisse non

*Tragica
poëseos cū
historia
collatio.*

auribus creditur, sed oculis; nec vt præterita exempla, sed vt pericula præsentia formidantur. Historia vitæ magistra non vana prædicatione appellatur? at quâto firmiora ad bene viuendum præsidia à nostris spectaculis hauriuntur? In iis edomitam superbiam, castigatas intemperantiæ libidines, damnatas auaritiæ sordes, iram atque inuidiam in seram pœnitentiam & luctus inutiles conuersas licet intueri. Quod si animorum perturbationibus scenam totam permiscet tragœdia, hoc ipsum agit, si Aristoteli creditis, ne iisdem procellis & fluctibus in posterum spectatores agitentur.

Itaque theatra aperimus vt virtutis sacraria, vt publicas probitatis scholas, vt officinam modestiæ, vt in tragœdiarum argumentis, tanquam in speculo quilibet se intueatur, & quod spinosioribus conclusiunculis philosophi, quod inanibus verborum phaleris oratores, quod frigida narratione historici vix ab hominibus extorqueant, hoc videndo persuadentur à nobis, vt boni esse velint, vt peccare reformident. Quis enim post spectatam Belisarij exoculationem fortunæ suæ nimium tribuat? quis Maxentio Tiberinis hausto vorticibus non discat in Constantino religionem triumphare? quis ex horribili aut Nabuchodonosoris Assyrij, aut Armenij Tigranis transformatione modestior domum non reuertatur? audisti sapientum voces ad virtutem ducentium? eas spreuerat Cræsus quē in pyra spectasti. Grauis est tibi diuturnior parentum vita; Chosroes parentem suum excarnificari fecerat, quem filij sagittis confossum vidisti. Nepotinis sumptibus

*Tragœdiæ
exhibita
multum
afferunt ad
virtutem
adiuuenti.*

rem familiarem exhaurire non times? At Imperator erat Caligula, & immensarum opum dominus, qui tamen post dilapidatum vicies ac septies millies HS. à Chæreâ ob libidinem iugulatus interiit. Hæc est, ludices, spectaculorum nostrorum consuetudo, hac doctrina theatra nostra quotidie circumsonant, sic iuvenes instituimus, hoc frænum adolescentiæ iniicimus. Ibî explicantur consilia, quæ senes approbent: hic opum formidanda possessio demonstratur, ne diuites superbiant: hic in sapientibus sanctisque viris paupertas amatur, ne inopes desperent: hic vngulæ, equulei, rotæ, ignes martyribus adinuentur, vt minore incommodo cælum emere condiscamus. O tragædiam conscientiæ medicinam! ô theatrum culturam animi, ducem omnis officij, vitæ regulam, fontem sanctitatis! ô pretiosam artem & cuius præferendam quæ quod est in Rep. maximè expetendum, ciuitates ipsas, imo prouincias & regna in officio continet, & ad virtutem suauissimè conducit! Quid habent Catones ipsi suis in exhedris melius, quid sanctius, quid humanæ vitæ conuenientius? Ad virtutem hortantur; nos ducimus: bonorum præmia, impiorum supplicia in hac, in æterna post hanc vita cogitanda proponunt; nos spectanda exhibemus: sanctos laudant in cælum receptos; nos gradus quibus ipsi ascenderunt, monstramus: imminentem mortis necessitatem denunciant; nos facimus. Hoc tantum differimus quod illi in templis, nos in theatris; illi inter sacra, nos per animorum remissionem; illi serio, nos ludendo homines ad bonam frugem reducimus. Vidistis nonnunquam

*Maiore
cum effice-
tia quam
sacra con-
ciones vi-
ta honesta-
tem per-
suadent.*

quam Iudices, illorum aliquos frigere in suis illis rostris inter raros anicularum greges, somniculorum cateruas, mendicorum manipulos; quibus, quia domi prandere non licet, in templis residere non displicet: aut si paulo iustiore corona nobilitati sunt, si quid vehementius dicere moliantur, iactare ceruices, ferire pulpita, exclamare, lamentari, toto corpore sudare, omni denique dicendi ratione paratragœdiari inter otiosos auditores inanissimè. Quis ab illa concione melior excessit? quis abstinuit à somno? quis horam solidam sine tædio exegit? quis, si tympanum increpuerit statim à templo nostra subsellia numerata pecunia non redemit? Deus Immortalis! quàm hic diuersa confessus facies, quæ spectantium nobilitas, grauitas, frequentia? quæ audiendi cupiditas, videndi assiduitas? quàm gratum voluitur per ora murmur si quid dedecore gestum, politè dictum, inexpectatò productum? Clamores postulat rei præteritæ concinnitas, futuræ expectatio cohibet: approbare non vacat, quia audire delectat: plausum impedit ipsa plausus materia, & exultantes animi, artus subsilientes, orahiantia soli linguæ silentium imperant. Quis hic clepsydram numerat? quis exitum fabulæ ad quem autè properabat, non vidit inuitus? Discedunt corpora, figitur animus in theatro, & quod vnum superest, iucunda spectaculi recordatione voluptas antea acti regustatur. Hoc est, Iudices, homines tractare, hoc est docere virtutem, non illam seuero & horrido pallio metuendam, sed sua dulcitudine expetendam. Hoc moliantur hoc tæcum honestum bonumque delectando propi-

nant : hoc agunt scenici artifices cum integritatem morum , vitiorum turpitudinem , fraudum , & flagitiorum euenta tanquam ex tabula repræsentant. Hæc exempla ficas extorquent à furiosorum manibus : hæc rerum humanarum vicissitudo inopes à potentiorum iniuriis defendit : hæc diuinæ Nemesis duritas latumias exhaurit & carceres. Vultis Iudices, quis enim de vestra humanitate dubitat ? legis verba nunquam effari ? homines ad theatra mittite Vultis flagitiosos homines scelerum suorum stimulis perfodere & cruentare ? cogite spectare tragædias. Vultis improborum conscientiam tanquam equulco admovere ? in nostris subselliis collocate. Videbunt paricidas terreri furiarum tædis ardentibus ; mirabuntur vigilem illum diuinitatis oculum nihil latere ; produci in apertum scelera omnia , & suppliciis ex improviso subigentibus, Deo teste, reuinci. Contremiscent totis artubus ad aspectum Tartarei Phlegetontis , & ferreum Rhadamanti tribunal accusante conscientia formidabunt. Tum enim uerò si quid humani sensus habent & ingenij, per me licet, amentiam suam augeant, & eorum flagitia æmulentur, quorum supplicia intuebuntur.

Si qui forte tragædiis ad ob-scenitatē abutuntur, non ideo penitus tollendæ sunt.

Quid est Cato ? renides ? num conturbo te qui tuis omnibus inflammatis concionibus vnum alterum ue, nimis dixi, præfero spectaculum, & in eo vim maiorem ad virtutem hominibus persuadendam constituo ? Subrides ? numquid mentior ? num circumuenio Iudices ? num decipio confesum hunc vniuersum, quem testem hac in causa, suffragatoremque habere non renuo ?

Effare quid cogites, licet interloqui, conuince falsitatis si potes, si audes hisce præsentibus. Equidem quæ sint animi tui sensa non perspicio: nisi forte cum ea quæ dixi hætenus negare summæ sit impudentiæ; quæ pulchra, quæ honesta, quæ sancta nostris in theatris exercentur malitiosè prætermittis, ut ad sordes nescio quas tanquam importuna vespa adhareas. Id nimium obiicis quod ad trauim usquè declamitare solles, obscenitate fabularum theatra nostra contaminari. Hoc verò si, non dico à me, meisque gregalibus, sed omnino ab honestis vllis scenicis fieri, si accidere sæpius, si castas & non superstitionas aures verbo violari confeceris, vicisti, pono arma, herbam porrigo. Sin autem mendiculi aliqui & triobolares ioculatores circum foras, & compita scurrilem in modum deformati, seruitiis & operis temerè coactis sumptas de trivio cantilenas occinunt, ob eam tu indignitatem graues & sapientes comædos accusas? in artem præstantissimam refundas si quid fortè nonnullorum culpa peccatur? rem penitus ex hominum consuetudine exterminandam contendas qua pauci aliqui, & vulgo ignoti histriones abutuntur? Pecuniam igitur ab hominum manibus excute, quæ auaritiæ scelerumque omnium seges est: arma omnia regio tolle interdicto quæ sunt furoris & inuidiæ comites & administræ: iudicia pelle de Rep. quibus innocentes aliqui per fraudem opprimuntur. Quid? vites euelli debere censeas si duo tibi in agris occurrerint rustici ex vino vacillantes? Solem è mundo velis eripere si necessarium sibi cæcus esse negauerit, nocere etiam lus-

citiosus iurauerit? Te conuenio, tecum disputatione integerrime vindex sanctitatis: respondebis opinor ex animi tui sententia magne religionis propugnator: habesne aliquid in sacris tuis, in Ecclesiasticis caerimoniis, in cœlestibus Sacramentis à fraude, à superstitione, ab abusu, à sacrilegiis tutum penitus atque alienum? Nulli tremenda cœlo Angelisque mysteria polluant Sacerdotes? nulli altarium ministri sacras possessiones à pijs hominibus traditas, in profanos vsus, à me enim alia non audies, conuertunt? nulli quæstuosam habent rerum sanctissimarum distributionem? Quid dicam de nundinationibus Præbendorum, de supposititiorum redemptionibus, de sacerdotiorum sectionibus, quorum sacrilegiorum tam est corroborata institutio, tam altè in iniquitate temporum infixæ consuetudo, ut facilius sit templa atque aras, quàm eiusmodi dedecus atque obscœnitatem conuellere. Accusa igitur quæ sunt apud nos augustissima, destrue fana omnia, & sacrificia, sacrorum antistites veta redditus annuos possidere. Absit hoc, inquis, sed abusus tollatur. Iniquissime mortalium, mysteria illa aduersum quæ sine sacrelegio peccari non potest, abusu tantum sublato purgari posse pronuncias, & leue aliquod negotium ad exhilarandos homines comparatum, si gestu, si syllaba à paucis intellecta peccatum est, iubes ex toto funditusque deleri? Calumniatum architecte. fingere audes in maiorem priuati cuiusque, & ipsius Reip. perniciem redundaturum si quis paulum insolentius lusit, quàm si sacra omnia sunt violata?

Corrigen-

Non sic, inquis, sed nullibi abusus toleretur.

Præclare, nostris ergo singuli finibus circumscri- *da sunt er-*
 bamur : tu tuis sacris , ego lusionibus meis mo- *go quæ ho-*
 dum imponam : quid in officium meum violen- *nestas &*
 tus quadruplator inuolas ? malè feriate heauton- *non super-*
 timorum enos. *stitiosas*

Tantum ne est ab re tua otij tibi

aures pos-

Aliena ut cures , eaque nihil quæ ad te attinent?

sunt offen-

Domi cæcitas tibi est , in vicino totus oculus, to- *dere.*
 tus auris, nosti etiam si quid in aurem Iupiter Iu-
 noni dixerit. Quid ? ita sumus exscelerum collu-
 uione concreti ut nulla apud nos habitet pestis
 perniciosior ? Ita sunt tragœdiæ nostræ in omni
 flagitiorum obscenitate effusæ, ut in Repub. ni-
 hil sit quod prius medicam Censoris manum po-
 stulet ? Si tu in ceruicibus nostris impositus es
 morum magister , ut videas ne quid Respub. de-
 trimenti capiat, ante omnia palliatis tuis sacrifi-
 culis iniicienda est fibula , extinguendæ benefi-
 ciorum nundinæ, vindicanda sacrilegiorum atro-
 citas, mercatorum fraudes & periuria, vsuræ, lo-
 cupletum publicanorum latrocinia, militum stu-
 pra & rapinæ, vitilitigatorum calumniæ, iudicio-
 rum iniquitas comprimenda. In his campis glo-
 riosè triumphabit eloquentia tua , hîc opima de
 magnis aduersariis spolia reportabit oratio: tum
 denique ad ludos etiam nostros virgam extendet
 censoriam & paulo liberiores cachinnum faciet
 capitalem. Quin potius ego iam nunc illa te cura
 & solitudine libero , si quid rogare permittis.
 Nam mihi tecum prius conueniat oportet quàm
 tragœdias meas verbis optimis exoculem. Quid
 appellas tragœdiæ obscenitatem ? aut hoc ver-
 bum in quo argumento ponis ? opinor in ludis

Floralibus quos Pop. Roman. extrema à parte in Catonis præsentia delumbauit. Postulas igitur ut illam nudatarum meretricum proteruiam à theatris ablegemus; facile negotium quæ nunquam spectata est eam non admittere Num quid amplius? num amant, um munuscula, riuum litigia, ephœborum delicia, coniugum oscula, Zelotype rum æstus nimis herculè delicatus es, si te offendunt, nimis infirmus, si anres vulnerant, nimis superstitiosus, si mentem consau ciant. Quamquam si hac tantum ratione aditum tibi ad theatra nostra quereris interclusum, per me licet bona verba pereant, dum tu confessum nostrum cohonestate digneris: ea lege ut nos seria altè cothurnati, & Romanè cincti agamus negotia: tu contractio supercilio, corrugatis naribus, ore colloque rigido risu temperare promittas.

Tragædiarum altiores poetis scriptoribus sunt suppare.

Sentio me, Iudices, terminos prætergressum quos mihi ipse posueram, & poëticarum tragædiarum utilitates consecrantem, ad artem nostram quæ eas in theatris exhibet, sensum esse deductum. Sed neque Rhetorum istæ partitiones quomodo tractentur scire vehementer laboro, neque illud poëticę scriptiõis genus ab actione nostra puto seiunctum esse oportere. Siquidem audio lucubrationes illas à sapientissimis viris fuisse tantum olim productas, ut Dionysiacis artificibus traderentur: atq; istos sic in iis exhibendis omnes artis ingeniiq; neruos contendisse ut optimis per se operibus admirabilem gratiam & venustatem, adiicerent, & quod aiunt, tabulas benè pictas in bono lumine collocarent. Nimirum illa, honestissimarum artium parens & alitrix Græcia

præmiis propositis tragædiarum scriptores & actores ad pulcherrimum ingeniorum certamen inuitabat : quorum alios iam temporum fastidia in tenebris tacere patiuntur ; alios Catonum superciliosa ex verbis, atq; omnino si possint, è viuis exturbare moliuntur. Quàm iucundum erat ex omnibus Græciæ populis conuocari spectatores : accurrere ad Panegyrim frequentissimam Reges maximos, Duces triumphales, Magistratus sanctissimos, & ipsa Philosophorum Lycea atq; porticus, choragium ministrantibus ciuitatibus ipsis atque prouinciis, sedentibus iudicibus quos florem orbis delibatum merito diceres, poëtas eo in confessu, ingeniorum suorum merces proxenetis histrionibus explicare ; auditis spectatisq; omnibus voce præconis proclamari victorem eum poëtam qui absolutissimè scripsisset, histriones qui venustissimè egissent. Quis vnquam Olympionica gloriosior extitit, licet eius nomine anni notarentur, & in urbem patriam per disiectos muros eam coronaturus intraret? hoc faciebat florens illa viris & ingeniis Græcia: sic ludebat sapientissima pars terrarum fortissimaq; cum Darios debellaret, Xerxes profligaret Siciliam, & Italiæ partem teneret, imperaret Persidi, maria occuparet. Hæc theatra frequentarunt Cimones, Agefilai, Timoleontes, Miltiades, Epaminondæ, Alexandri, Alcibiades: Ex his spectaculis magnos aduersus hostes animos hausit Themistocles: longè perfectò maiores, quàm è gallorum gallinaceorum aspectu summa cum obstinatione pugnantium. Quid de Aristotele dicam, qui illi sapientiæ certamini, quod Philosophum decebat, leges præscri-

*Apud
Græcos
magno in
honore &
pretio fuerunt.*

psit? Quid de Socrate Philosophorum Deo qui as-
siduus in theatris fuit in quibus Euripidis tragæ-
diæ docebantur. Quid de Lælio Romanorum sa-
pientissimo, qui Terentianas comœdias non va-
nis coniecturis creditur conscripsisse? Vnum no-
minaui Romanum, cum totam in theatro Curio-
nis & Scauri Romam spectare liceat, cum scena
argentea L. Murenæ summo populi consensu

*A Roma-
nis locuple-
tati sunt.*

Consulatum pepererit. Quid? publicum non est
Pop. Rom. hoc est grauitatis ipsius, de arte ludi-
cra testimonium, quod Roscium tanto in pretio
habuerit, vt quoties luderet, mille ei denarios di-
urnos assignaret? quod Ætopus eius æqualis post
illam centenariam patinam lexcentis sestertiis æ-
stimatam, moriens filio ducentis HS reliquit vt
is securius margaritas voraret? Atq; id ea in vrbe
factum est in qua Regulus agro sub villicum sine
Senatu prouidere non poruit: n qua Cato censor
seruo vno, equo vno, eoque non toto vsus est. Re-
pertæ sunt & Pantomimæ scœminæ quæ decies se-
stertio nupserunt in eo imperio in quo defuncti
Tuberonis vxor fundum quem vnum habebat,
vendidit vt dotem reciperet: Cn. Scipionis filia
dos à Senatu numerata est: in quo homines post
dictaturam & Consulatum, nisi bubulci fierent,
angustia rei familiaris premerentur. Deus san-
ctè! vbi viuimus? apud quos versamur? in quæ
tempora deuenimus? Romana Resp. virtutis &
sapientiæ sedes admiraculum vsq; histriones locu-
pletaur; & nobis ex ære à volētibus collato terni,
quaterni-ue asses inuidentur: illa virtutis antiquæ
medulla Socrates, ille mortalium sapientissimus
oraculi voce appellatus, ille dux & princeps, &

moderator philosophorum omnium sua grauitate & constantia indignum esse non putauit, quod superstitiosi nescio qui, vt Catonianam simulent seueritatem, semel in vita facere hodie dedignantur. Sed hunc hominum stuporem, in quem iterum inuitus relabor, in præsentia omitto, vt cum omnibus constet artem nostram societate, & quasi agnatione quadam cum poësi coniunctam esse, atque adeo in partem eius gloriæ & vtilitatis venire; priuata ipsius bona, eaque rebus publicis bene constitutis pernecessaria ex me, iudices, hoc loco accipiatis. Sic enim in ea non modo nihil vituperatione dignum, nihil bonis artibus legibusque contrarium esse, quod tertium proposueram, verum etiam commodi vtilitatisque plurimum reperiri cognoscetis.

Dico igitur, & certa ratione conficio ciuitatum, prouinciarumque rectoribus artem histrionicam, si adest, studiosè conseruandam esse; sin abest, cupidè aduocandam. Enimuero cum sic à natura simus instituti, vt ad assiduam mentis agitationem, & negotiorum, vt loquuntur, ferietatem, acies omnis humana retundatur, & corpora ipsa continuo labore exhausta, atque exantlata fatiscant; illud sapientissimè est à legislatoribus excogitatum vt statis quibusdam temporibus ferias imperarent. Tunc enim animo soluto ac libero, corporibus cessatione reparatis noua quadam alacritas dies profectos excipit, & nescio quauiditate inflammatos homines ad laboris vicissitudinem reducit. Eo autem tempore si quis existimat ita esse feriandum, vt ab omni penitus opere, ab ipsa corporis animique delectatione ces-

*Ars histri-
onica
Rebus pub.
necessaria
est ad otium
populi sal-
lendum.*

setur : is profecto mihi quæ sit hominum consuetudo, quæ rerum humanarum natura, quæ tyrannis otij atque inertiae nondum affecutus esse videtur. Desidebunt ergo in tenebris lustrorum ac stuprorum, alea rem familiarem euerrent, computationibus exhaurient, blasphemias atque periuriis cælum, terramque funestabunt. Inde amicorum iurgia, coniugum dissidia, furor ex vinolentia, ex furore cædes, ex cædibus familiarum immortales inimicitiae; tum publicæ dissensiones, crebrae seditiones, assiduae omnium, ut in bello civili, anxietates, sacrorum direptiones, ciuitatum euerfiones. Atque ut hæc non semper eueniant quæ semper timere necesse est, quam multi malè agere gestiunt, ne nihil agant? quam multi per otium publicum consilia furtim ineunt otium publicum euerfura? Sunt igitur animi negotio aliquo non iniucundo, non laborioso occupandi, & eruptura in perniciem cogitata, ut aquæ eoclusæ, atque corruptæ, aliò deriuada. Quo quidem inuento narrant historiæ Arcadas veteres quod essent natura ferociore, uti instituisse: iisque ludis illam ciuium ferocitatem ita fuisse temperatam, ut aliquandiu Græco cælo, & reliquorum humanitate Græcorum non indigni visi sint. Sed ut est ingeniorum intempestiua diuersitas, & funditus excindi non potest naturæ vitiositas, aiunt ab eorum posteris neglectui habitam eiusmodi mentis, corporumque exercitationem, eosque sic animis obduruisse ut tota Græcia execrabiles haberentur. Hic autem reuocate in memoriam, Iudices, honestas animi remissiones, & vel vnam hac nostra conuenientiore utilioreque com-

memorate. Ludos permittetis sellularios vt aleam? at illi sunt virtutis scopuli, bonorum Charibdes, voragines patrimoniorum. Imperabitis actiuos vt pilam vt cursum, vt palastram? at agitatio diuturna labor est, non relaxatio; defatigatio, non oblectamentum. Conueniant igitur in theatrum otiosi, & paucas horas in honestissima voluptate cum animi simul & corporis quiete collocent. Hic se totos impendent spectaculis: ibi quaternis assibus ex triabilem canis iactum rediment: hic quid agendum sit bonis, quid vitandum felicibus ediscant. Nullus ibi popinarum coquinarumque nidor, nullus comessantiũ discursus, tumultus ebriosorum. Silent in theatris infeliciũ aleatorum blasphemix, inuidorum iurgia, maledicta pedissequorum. In illa denique, ne iam dicta replicem, si Socrates rediuius intraret, Platonis sui Academiam nũquam modestiorem fuisse iuraret. Sunt hæc profecto magna, Iudices, & longè magis necessaria, quã aut capere vulgus possit, aut ego dicendo exprimere. Vos qui ad gubernacula Reip. sedetis qui capitalia exercetis iudicia, qui paci tràquillitatique publicæ præsidetis, quo illa spectet quãtũ habeat momenti ad cõtinedos in officio homines peruidetis.

Aliud adiungo in eorum adolescentium gratiam qui per collegia, id est, seminaria Reip. liberalibus disciplinis, præcipueque rhetoricis artibus instituuntur: quas sine histrionica perficere non posse constans est Rhetorum omnium sententia, & eloquentissimorum virorum vsus atque experientia. Quid ais Cato? Perij, Iudices, nisi subuenitis, ita me graui & hostili obtutu po-

Ars histrionica ad oratorũ actionem perpolientem mag-nopere con-ducit.

stulabat ad deuorandum. Dicam tamen quod omnes sentiunt, neque oculos illos tuos, licet rem nouam & in scena mea nondum spectatam, reformidabo. Scitum est quas in dicendo partes aptæ decoræque actioni, cui penè totū se debere profitebatur, dederit Demosthenes ille Græcorum Oratorum vertex: neque leuius de ea iudicium est aut eius aduersarij Æschinis, qui ex histrione factus orator, & per id in Rep. spectatissimus, in æmulo suo male formatos gestus arguebat, quo culmen eloquentiæ nondum attigisse monstraret: aut Romanorum, vt M. Ciceronis, qui actionem esse quasi corporis quandam eloquentiam affirmat, vt Hortensij, qui in gestu elaborando plus operæ, atque studij, quam in perficienda posuit eloquentia. Sentiebant, videlicet, homines acutissimi, ipsam per se facundiam animos hominum inuadere non posse nisi eorum aures voci & pronuntiationi, oculos gestui, & actioni traderet permulcendos. His instructi præfidiis torpentes excitarunt, remissos inflammaverunt, oppresserunt improbos, iudices excæcarunt. Sine actione iacuit doctissimorum hominum oratio, quæ eadem in aliis adhibita quas seditiones non extinxit, quæ furiosorum tela de corpore Reip. non reuellit, quas vrbes non optimus fundauit institutis? Iam tu mihi negare aude eximiam illam rhetoricæ partem, illam eloquentiæ vim, & animam, arti nostræ acceptam referri debere. Reclamabit statim tuus ille Cicero qui in oratore *vocem tragicædorum gestum penè summorum actorum requirit.* Docebit te litteras Quintil. qui puero, quem ad eloquentiam qua-

si solum præparat, *dandum aliquid Comædo quo-*
que præcipit. Eatenus qua pronuntiandi scienciam
futurus orator desiderat. Audis Aristarche? Fa-
 bius loquitur, & dubitas? Quintilianus præci-
 pit, & abnuis? Rhetorum magister imperat,
 & contradicis? Is qui studia per viginti annos
 erudiendis iuuenibus impendit: qui annos præ-
 terea duos legendis auctoribus, qui sunt innu-
 merabiles, dedit: qui delectus est ex omni po-
 pulo Romano, ex orbis vniuersi prouinciis cui
 Domitiani Cæsaris nepotes instituendi commit-
 terentur: talis ille vir ac tantus cum rhetorem
 futurum instruit, iubet à puero scenicis artifici-
 bus operam dare: sine illa institutione, & qua-
 si fundamento negat firmum & stabile futurum
 quicquid superstruetur: Et hic nescio quis de
 gregem nouitiorum artem totam delere, exterminare
 artifices, euertere theatra, histriones ab
 hominum societate voce deturbare publica, ma-
 gistratum edicto conatur, quo, si apud barbaros
 exularent, essent reuocandi. Quid enim,
 per Deum immortem potest esse pulchrius
 quàm si quis à Theodoro didicerit omnium quas
 exhibebit personarum voces sic imitari, vt non
 effictæ, sed nativæ singularum videantur?
 quid est admirabilius quam edoceri in omnes se-
 se mutare species, & ab homine vno tam multa,
 tam diuersa fieri actionum genera, vt multo
 esse possis credere, quod barbarus ille apud
 Lucianum iurabat? Atque hoc profecto sciuit
 Quintilianus quantum ars oratoria Demostheni,
 & Ciceroni, quantum isti artificio nostro
 deberent. Quotus enim quisque vestrum non

*Id Cicero
 nis, De-
 mosthenis;
 Quintilia-
 ni auctori-
 tate proba-
 tur.*

meminit perditio ac penitus suis rebus desperanti Demostheni occurrisse Satyrum M. mum & paucos Euripidis aut Sophoclis verius eo corporis motu & vocis tenore pronunciaſſe, qui eſſet conuenientiſſimus: tum vero didiciſſe Demosthenem in apta pronuntiatione, rerum quæ dicerentur pretium eſſe conſtitutum. Itaque vt illam aſſequeretur eadẽ qua cætera diligentia conſtanter & aſſiduè Andronici Hypocritæ præce, ta audiuit, & in eius diſciplina ſummus Athenienſium orator euafit. M. autem Cicero Æſopo Tragædo, Roſcio Comædo vſus præceptoribus quam non iam eloquentiæ ſolum, verum etiam Reip. Rom. partem non excoluit, conſeruauit, amplificauit? Alterum igitur Demosthenem pater genuit, alterum Andronicus: neque minus Roſcio debet Cicero, quam Roma Ciceroni. Per Ciceronem Æſopus P. Clodium fregit, Catilinam eiecit, Lentulum ſuffocauit, Antonium compulſit. Loquentem in Cicerone Roſcium timuerunt proſcriptorum liberi rerum nouarum ſtudioſi, tumultuantes in quatuordecim plebeijs, Tribuni plebis auctore Cæſare crucem Senatori Romano minitantes. Perorante Cicerone ceſſit Roſcio Catonis grauitas in cauſa Murenæ, Sex Clodij furor in domus reſtitutione, iracundia Cæſaris in Ligarij conſeruatione. Quam quidem artis vtiliſſimæ oſtentionem nõ ab iſtis Rhetorũ arculis, ſed ex ipſo veritatis ſinu depromptam vobis Roſcius ipſe perſuaderet, Iudices, ſi nobile ingenij monumentum non fuit tantum ſæculi hominibus, ſed etiam noſtræ ætatis cenſoribus exhibere potuiſſet. Illum enim ſci-

mus scriptis libris elegantibus sanè & eruditis, artem histrionicam cum eloquentiæ facultate comparasse. Quo in opere quid aliud, per Deum immort. efficere potuit, quam quod nunc agimus, actione quæ tota histrionum est, omnem persuadendi vim contineri, sine ea tabulas fringere, iacere dictionem, mutatam esse ipsam, penè dixerim eloquentiam. Quæ res autem eam illi mentem iniecit? quam habuit causam operis tam præclari animo concipiendi? studium Ciceronis. Cicero, inquam, ipse oratorum Deus, eam homini confidentiam dedit, ut histrioniam, quam vos tantopere contemnitis, reginæ omnium, & flexanimæ orationi parem faceret. Nam dum assiduam Roscio dabat operam Tullius, non semel in contentionem vterquæ venit, vtrum ille vario gestu, eoque commodo eandem sententiam, an hic diuerso sermone per eam qua pollebat eloquentiæ vbertatem & gloriam repræsentaret. Eximium profecto certamen, Iudices, & oculis Pop. Rom. dignum! quo præstantissima duo ingenia, non solum inuicem agendo, sed ipsam quoque rerum naturam, cuius in varietate laus est præcipua, prouocabant. Quis nostrum votis omnibus in illud eloquentiæ theatrum admitti non cupiisset, in quo dicebat Tullius, agebat Roscius; & alter in alterum veluti transfusus accipiebat à socio maximum artis suæ lumen & gloriæ incitamentum? Longè videlicet vtilius quam apud Græcos Glycera, cum pictore Pausia certabat, dispares ne illa flores felicius misceret in coronis, quam hic in tabula peritius deformaret. Et tamē (ô pessimos rerum æstimatores oculos!)

Responde- peruenit ad posteritatem pictura quæ flosculos
tur sancto- referebat: sui vero sæculi metas transgredi non
rum Patrū potuit liber ad saluberrimas humani generis de-
testimoniis licias comparatus.
que aduer- Habet igitur multa histrionum exercitatio ad-
sus specta- iumenta ad oratorum institutionem & ad Reip.
cula sceni- salutem multa; quibus si quid in ea mancum &
ca produci imperfectum est, quod rebus humanis euenire
solent. solet; tegere oportuerat; non res leuissimas in
 crimen vocare, & diem ciuitatidicere quod fra-
 ctum curis animum honestissima nonnunquam
 voluptate remittat. Nam si latet subformæ ve-
 nustate næuus atticuli; & pictores quædam in ta-
 bulis de industria negligunt, quo magis id quod
 præcipuè spectari volunt emineat: quid est causæ
 cur omnia in theatris ad viuum refecentur, & hi-
 strionum caput ob malè curatam reduuiam in
 discrimen vocetur? Atque quid sit illud quod
 tantopere aduersariis nostris displicet iamdu
 apud me disquiro solus: quod certè ita terue est,
 ut aciem meam fugiat; si quid aliud esse dicitur
 quam hominum præiudicium. Satis enim com-
 pertum habeo quantum in recitandis aduersum
 nos Sanctorum Patrum testimoniis irraucescere
 soleant declamatores nostri: quibus, nisi me fal-
 lunt libri illi quos apud Pragmaticum depositos
 video, instructissimi venerunt. Sed ut sanctissi-
 mos illos fidei nostræ coryphæos, Religionis buc-
 cinatores, virtutis antesignanos summo sēper in
 honore apud me esse volui (quicquid isti de no-
 stra impierate calumnientur:) sic eorum contra
 nos voces, quanquam multas & graues, nunquam
 mihi pertimescendas esse putavi. Etenim cum

illis adhuc sæculis vanissimus idolorum cultus optimam orbis partem occuparet, essentq; theatra Veneri, tragœdiæ ipsæ Diis aliis consecratæ in quorum honorem exhibebantur, antistites sapientissimi Christianos vt ab iis celebrandis abducerent, grauitè & verè pronuntiabant, ad theatra non posse tum adiri, nisi per externam saltem superstitionis professionem, per cultum mali demonis, per fidem Christi eiuratam. Hinc illa dæmonis mulierem in spectaculo arripientis apud Tullianum excusatio *iustissimè feci, in meo eam inueni*. Hinc eiusdem Africani scriptoris argumentum ita colligentis. *Si ex idololatria vniuersam spectaculorum paraturam constare constituerit, indubitè præiudicatum erit etiam ad spectacula pertinere renunciationis nostræ testimonium in lauacro, quæ diabolo, & pompe, & Angelis eius sunt mancipata, scilicet, per idololatriam*. Atque illud maximè vos animaduertere cupio, Iudices, priuatam eius interdicti causam in scenicis spectaculis nullam assignari, sed generaliter spectacula omnia vt circum, vt venationem, vt gladiatorium munus prohiberi. Hoc enim grauitè, adiuncta etiam Stoicorum porticu profitetur auctor, cum negat Christianis quicquam esse dictu, visu, auditu, cum insania circi, cum impudicitia theatri, cum atrocitate arene, cum Xysti vanitate. Ex quo certè fonte prodiit illa Saluiani Massiliensis exaggeratio. *In spectaculis quedam apostasia fidei est, & à symbolis ipsius, & cœlestibus sacramentis lethalis prauaricatio*. Quæ dicta vt ab illis auctoribus prodita sunt vobis omni fide quantum memoria suggerit, expono; ne quid decorum sensu, aut dissimulare ta-

cendo, aut obscurare mutando censear. Sed hæc quantum à sæculi nostri moribus abhorreant quis non videt, cum religio Christiana totò orbe propagata vanitatem ementitæ diuinitatis exclusit? nullæ iam Diis aræ extruuntur nulla idolis sacra fiunt, ludi celebrantur animi causa non superstitionis. Cessat illa Cypriani querela. *Quod spectaculum sine idolo, quis ludus sine sacrificio, quod certamen non consecratum mortuo?* Itaque cum id aut solum, aut potissimum in theatris accusarint Ecclesiæ optimates, luce meridiana clarius apparet ipsos ita suorum temporum censuram exercuisse, ut nostra penitus non attigerint. Iaciant igitur, & immittant in nos telum illud quantumlibet aduersarij, non peruenient ad famam & existimationem nostram nisi forte ut suo illos fero vulnere-mus. Nam illud ipsum, Græcos mortalium sapientissimos, Romanos omnium grauissimos in humanis ritibus nihil inuenisse post sacrificia & hecatombas augustius sanctiusque quo Deos, ut aiebant, immortales colerent, & placarent, quàm scenica spectacula: nonne apertè declarat quàm exaggeratam de illis opinionem imbibissent? non enim hic quæritur quàm veros Deos colerent, sed quàm sanctè & sincèrè quos pro veris habebant, adorarent. Nullum ergo fuisse publicum & solemne sine ludis sacrificium in funeribus clarorum virorum in supplicationibus, in triumphis, in lectisterniis adhibita theatrorum spectacula, in urbibus, in oppidis, inter publica & necessaria ædificia non magis aras quàm scenas, non prius templa quàm theatra fuisse numerata: & hæc à Græcis inuenta & exulta, à Romanis auidè arre-

Græci & Romani post sacrificia nihil habuerunt spectaculis scenicis augustius.

pra, & studiosè conseruata quis sine admiratione
spectaculorum audiuit? quis legit sine approba-
tione theatrorum? Nemo iam mihi Athenienses
recenseat, apud quos histrioniam fecisse fuit glo-
riosum: nemo Ciceronem Roscio patrocinatum,
theatrum à Pompeio, & Augusto extructum,
spectacula regionatim à Cæsare exhibita per om-
nium linguarum histriones, Publium & Labe-
rium nimos spectante populo vniuerso ab eo-
dem Cæsare equestri donatos annulo, & in qua-
tuordecim sedere iussos: & id genus sexcenta
commemoret: sunt enim illa priuatorum iudicia,
quorum leuior est auctoritas, quando communi
gentium omnium consensione, sine lege, sine im-
perio, sine edicto, id est, naturæ ipsius voce spe-
tacula scenica recepta, stabilita, confirmata fuis-
se monstrantur.

Et vos in eandem venire sententiam dubitabi-
tis? Iudices, plus apud vos ponderis habiturum *Nature*
est Agelasti vnius interdictum, quàm tot Regum *ipsius voce*
& Imperatorum, tot Senatorum & Philosopho- *spectacula*
rum, tot populorum atque nationum conspirans *probata*
voluntas & consuetudo? An dum theatrorum sa-
xa loquantur, expectatis? hominum consentiente
auctoritate contenti non estis? at clamant illa se
omnibus sæculis quasi ludum virtutis & scholam
modestiae patuisse: apud se ciuiles ferias in inte-
gra, innocente, religiosa hilaritate positas, magi-
strorum suorum artem Reip. conuenientem, iu-
uentuti necessariam esse: versari in aulis Regum,
in oculis Magistratuum: non n. ius animo conce-
pturum scelus antiquitate teste, qui theatra euer-
terit, quàm Xerxem, qui templa, qui aras, qui de-

lubra Græciæ disturbavit. Habeant sibi & musis suis Catones melancholiam suam, cur ciuitati vniuersæ voluptatem inuident? cur bonum quo ipsi frui nolunt, omnibus subtrahere moliuntur? Et hoc vestra voce, Iudices, fieri posse sperant bipedum stolidissimi, si nesciunt; impudentes, si cogitant tribunal hoc vestrum aram esse iustitiæ, lacrarium legum, propugnaculum innocentiae. Vestram æquitatem reis solis scopulum esse; bonis autem ciuibus portum, anchoram calumniarum turbinibus & tempestate iactatis. Non petimus ali in Prytaneo, quod non melius de humano genere meritis Socrates, flagitabat: non ambimus magistratus & legationes, quibus infulis histrionum claros Græci rerum omnium æstimatores scientissimi decorarunt. Liceat tantum per vos in aris & focis nostris habitare, in sinu parentum, in complexu amicorum, in consuetudine ciuium viuere: interim castissimæ voluptatis officinam aperire, & agendo tragædias efficere ne otiosi ciues nihil agere, vt negotiosi aliquando nihil agere videantur. Hoc ordines vniuersi expectant, hoc à vobis cum ciuibus postulat peregrina iuuentus, cui hac vestra sententia & ludum dabitis ætati necessarium, & disciplinam olim Reipublicæ profuturam.



MODESTINVS
 PROLĀTARVM
 CONFVTATIONE
 RATIONVM,

Histriones cum Fabulis suis procul
 amandandos esse demonstrat.

ORATIO X.



ÆPENVMERO cogitan-
 ti mihi de histrionum licētia,
 venit in mentem optare vt a-
 liquando daretur ille confes-
 sus, apud quem virtutis &
 modestiæ causam agere, & de
 tota spectaculorum proter-
 uitate ex animi mei sententia differere liceret. Sic
 enim existimabam, sic mihi persuadebam alios
 temporis fallendi gratiā tanquam delectabile ne-
 gotium alios exemplo tanquam rem indifferen-
 tem theatra frequentare, & id ab vtrisque ex ve-
 teri consuetudine potius, & more pristino fieri,
 quā prudenter atque cogitatō celebrari. Quæ
 quidem inconsiderantia si alicuius hominis ora-

tione graui & libera edoceretur, si hoc à se impetrarent homines, vt per otium animo quieto, solutoque rationum momenta ponderarent; sperabam equidem & errore suo, & magistris ad peccandum damnatis, tanquam ad aspiciendam veritatis lucem posse reuocari. Horum alterum singulari Dei beneficio mihi hodierna die obtigisse video vt vobis sedentibus, Iudices, vt audiente infinita hac corona, quæ ad istud iudicium accurrit, quæ sunt olim à me contra scenicorum artem cogitata proponam. Alterum erit æquitatis vestræ, prudentia quæ conficere vt orationem meam, & eorum qui post me dicturi sunt, cum omni diligentia & accurratione perpendatis. Atq; id quod alia in causa vehementer reformidarem, mihi hoc loco accidisse gaudeo, vt erectos ac suspensos animos vestros docta sanè ac diserta Panurgi huiusce reddiderit oratio, qui licet infantiam imperitiamque suam non semel excusasse visus sit, in iis tamen quæ ad causam facerent inueniendis, solertiam; in enunciandis facundiam; in agendo artem ipse suam omnibus patefecit. Arguant fortasse iuvenes isti Rhetorum filij quod in aliqua orationis parte non satis ex decore impudentius egerit; neque quid grauitas vestra, quid dignitas huius confessus, quid causæ magnitudo postulet, animaduernerit. Non est enim ita vt arbitraris Panurge, aliud est in scena Aiacem, aliud in iudicio reum agere, aliud collectam otiosorum turbam fabulis, aliud grauissimos iudices rationibus molire: hoc ferre homines in regno tuo coguntur; in foro, in subsellis, apud tribunal non solent. Neque minus contra maiorum instituta fecisti cum

occupato priore ad dicendum loco, in hoc iudicium non ut reus, sed velut accusator irrupisti. Sed nimis, licet consilium tuum dissimules, video quo tendas: qui prior diceret, eum existimabas non parum sibi præiudicii ad hoc iudicium comparaturum. Itaque eorum more qui cum valentiore aduersario congregiuntur, cum impetum meum sustinere non posse prospiceres, mihi cauendi necessitatem imposuisti: ut qui paratus ad accusandum veneram, mutata de repente iudicii forma in responsione de gradu deturbarer. Quæ conditio, quanquam est insolens & iniqua, sic admittetur à me, Iudices, ut in hoc certamine arma illa quibus ad tegendum instructus apparebo, etiam ad nocendum sumere permittatis. Neque enim æquum, bonumque fuerit occupari me totum in euellendis gladiatoris istius telis, nisi referre aliquando liceat: & cum præparatam domi accusationem abiudicem, atque repudiem, necessarium est ut saltem ab hoste arma accipiam, si pugnare volo lacesitus. Quod non potius causæ fiducia mihi persuadet, quam vestra, Iudices, humanitas & prudentia, qui dicentem illum auerso sæpè vultu exhorruistis: ut facile appareret, vos eius phaleras ad populum remittere, & apud aures tam eruditas malè mendacia venditari. Et certè si tantum à doctis & sapientibus viris eius audita vox esset, deplorata iam foret theatrorum causa, & iste aut ut fraudulentus calumniator, aut ut iniquus præuaricator literam suam in fronte gestaret. Sed abusus est vestris auribus dum seruit plebeiis; & qui in hoc confesso fraudes suas ab aliis detegi per ignorantiam non posse

existimat, ab aliis propter humanitatem non debere confidit, veritatem prodit apud sapientes, vt eam penitus à populi mente deiciat. Quam audaciam cum sit è vestra dignitate, reque publica, teste populo ipso reuinci, idque à me non tacita neque obscura voluntatum testificatione requiraris: non permittam fidem hanc in parte meam desiderari, quin, vt occurreret occasio, tabulis etiam in medium prolatis eius mendacia diuulgentur.

Atq; vt incipiam pedem conferre, quærit Panurgus quid difficiles morum magistri in tragædiis suis, quid in arte histrionica, quid in se sodalibusque reprehendant? Suorum quidem innocentiam in tuto esse non dubitat: Histrioniam verò quasi ex altera parte respondere poëticae facultati, & duo esse peregrina humanæ vitæ ornamenta proclamat: fabulas deniq; meram esse Philosophiæ medullam, earum autem exhibitionem sacris concionibus longè præferendam contestatur. Quæ quàm vera existimet non habeo dicere: certè vobis persuasisse sibi persuadet, & etiamnum in sinu gaudet, quia inter orandum oculis sæpè emissit in ima corona reperit qui sibi arderent. Ego verò, quanquam interpellare lætitiâ inurbanum est, ne me tamen inter suffragatores suos enumeret, præcisè respondeo me in arte nequitiam, in fabulis obscenitatem, in personis infamiam, ubiq; turpitudinem, nullibi pilam probitatis inuenire. Quæ omnia iam vobis cognita atque perspecta, Iudices, pro vestra in omnes benignitate, & in Remp. charitate, oro atque obsecro patiamini multitudinem edoceri: vt cum grauem in histriones sententiam pronunciabitis, de rei æquitate nemo du-

bitet; nequē ullus in posterum ē ciuibus veritatis
ignoratione ad amorem spectaculorū abutatur.

Et vt ab arte initium dicendi faciā, à qua velut
ab impurissimo fonte in personas & fabulas, omne
dedecus flagitiumque promanat; eius originem,
si placet, & incunabula considerate: tum vt spe-
ro statuetis ita esse ipsi à natura insitam fœdita-
tem vt nulla hominum adulatione celari, nulla
histrionum industria deleri posse videatur. Sic
enim accepimus rusticos veteres, non eos quos
ab aratris & ligonibus ad prætextas & fasces
Romani euocabant, sed facetos, & dicaces Atti-
cos per vindemias feruente musto, spumante
cuppa, labris vuarum succo, genis fæce apprimē
purpuratis, conuicia inuicem iactitasse; tum post
multiplices choreas, per pagos & *ῥήματα* (vnde
& Comediæ nomen) discurrentes, obuios quos-
que lepidis illis & bonis dictis impetiisse: At non
diu in agris & rusticorum magalibus morata est
illa licentia, sed quod in torcularibus casus inue-
nerat, id in vrbibus ipuentum excoluit industria.
Nam vt pessima facile proserpunt, inuasit urba-
nos adolescentes ea maledictionis dulcedo, &
arte quadam rudi iocos illos scriptitarunt: dein-
de velut confirmatis viribus, maiore hominum
frequentia, promptiore audacia proruperunt in
satyras: nec vllum licet prudentissimum, licet
ciuitatis principem intactum reliquerunt: Itaque
cōcurrebant ad histrionum theatra quasi ad con-
uiciorum officinam qui suam profuderant famā,
alienæ imminebant venalem histrionum vocem,
& stylum contumeliosum sibi adiungebant: im-
probissimi quique vt in aliorum existimatio-

*Ars sceni-
ca apud
Atticos ab
ebriosis in-
uenta, &
ex maledi-
ctis confla-
ta.*

nem nullo suo periculo eo confidentius sæu-
rent, quo tutius atque occultius. Deus sancte!
quam indignum erat applaudente populi sæce
turpissimorum ganeonum vocibus, grauissi-
mos & sanctissimos principes Pericles, Alcibia-
des, Pisistratos, Socrates, Thrasybulos lædi
atque infamari, proponi spectanda omnibus fi-
cta vitia, quæ si vera essent, tamen priuatis pa-
rietibus cæleri debuerant. Hæc tempora nascenti-
s Comœdiæ tanquam scopulum cautè vitauit
aduersarius, ne cogeretur agnoscere eam;
quam velut filiolum suam osculatur, apud impu-
dentes rusticos, inter dolia progeneratam, ex ebie-
rate atque maledictis concretam incredibili au-
dacia & importunitate in vrbes irrupisse: desi-
gnasse ad infamiam præstantissimos ciuium, & ea
recitando edocuisse flagitia quæ se tantorum vi-
rorum auctoritate non difficile tuerentur Memi-
ni tamē audire me alios spectaculorum patronos
qui originis suæ turpitudinem inuerecundè, vt
omnia publicarent: eius inuentionis venustatem,
apertæ reprehensionis vtilitatem commemora-
rent: indignarentur homines ea facere ausos quæ
audire non sustinerent. O censores graues! o
sanctos morum publicorum castigatores! adeo-
ne cor eum fronte perdidisse scurras petulantissi-
mos, Balliones flagitiosissimos, vt sæcibus ori in-
ductis migrarent subito in nouos Solones, & viros
integerrimos notarent, omnium conuiciis expo-
nerent, infami digito monstrarent? Itaque cum
alia multa, tum illud iustissimè instituerunt Gre-
ci, in Satyricos illos histriones, qui, vt ait ille, nu-
ditate nominum abusi plurimum vitia carpebant,

plus homines, vt impudentissimo latratu abstinerent, & vel inductis, vel mutatis nominibus, vitæ communis vitia non tam verbis reprehenderent, quam actione.

Sequitur ergo quasi altera ætas comœdiæ, quæ *Reprehen-*
 à sui exordio non leuiter alienis aspersa est macu- *sinis spe-*
 lis, sed in omnium scelerum luto totius corporis *ie vitia*
 vestigiis volutata: simillima torrentibus, qui om- *docentur in*
 nia cuiusque modi rapiunt, & cum cloacas atque *Comœdiis.*
 compita perpurgauerint, eorum sordibus inquina-
 tissimi feruntur. Atque vtinam fecisset Deus
 Immortalis vt aculeum illum aut nunquam sen-
 sissent. Græci, aut primo quod inflixit vulnere ex-
 traxissent! Vtinam non Eupolim tantum, sed &
 vniuersam cum illo Comœdiam à qua sæpè in in-
 famiæ voraginem demersus erat Alcibiades, vno
 impetu oceani vorticibus obruisset! non tot inde
 sceléra hominum vitam, non tot calamitates Re-
 rum publicarum status, non tot vindictæ diuinæ
 fulmina orbem vniuersum pessundedissent. Hac
 enim licentia ad omnes libidinum impuritates
 abusi Dionysiaci artifices, quas continentia strage-
 ges, quas castitatis cædes non ediderunt? vbi sæ-
 pius exposita scorta, vbi licentius redemptæ me-
 retrices, vbi inuerecundius audita verborum pro-
 pudia, quam in theatro? Ignoscite, Iudices: plura
 quæ sentio liberè proferre nō possum: licet enim
 rei indignitas à me si exponeretur, iracundiam
 vestram excitatura esset; mihi tamen verba sub-
 trahit verecundia, & tribunalis huius sanctitas
 sola rerum flagitiosissimarum commemoratione
 non contaminanda. Equidem Græcorum hoc
loco magnoperè requiro prudentiam, qui se bo-

norum virorum officio latissecisse putarūt si no-
 mine ciuium scenicis interdicerent, vitiorum re-
 præsentationem concederent. Nam vt est ocu-
 lorum quam aurium sensus acrior, atque acutior,
 & mentem ab oculis euocare difficillimum est,
 & flagitia cum naturæ vitio facilius in animum
 irrepunt quam virtutes, tum per oculos quasi fe-
 nestras expeditissimas blandissimè sese insinuāt.
 Itaque licet disciplinæ artesque omnes auditu
 commodè percipiantur; in vitiorum tamen, vt
 sic dicam, doctrina principem ad intelligendū
 locum iure suo visus obtinet. Hinc illa pessimi
 vis exempli, & perquam efficax prauī documen-
 tum mala actio multis videntibus perpetrata. In
 quo illud etiam lugendum animaduerto; scitè
 pictam in tabula deformitatem mirari nos; & ri-
 dere monstruosum hominem ore distorto, pen-
 dente lingua, fluentibus buccis; qui tamen eius
 similitudinē speciemque gerere velit, reperiri
 neminem: cum è diuerso morum turpitudinem,
 quod portenti genus longè perniciosius est, spe-
 ctatam in alio sic amari videamus, vt eius imagi-
 nem plurimi homines in vita sua deformare non
 dubitent. Quid quod in his ipsis theatris aurium
 sensus, quāquam hebetior, asperum nihil & in-
 iucundum pati potest: oculi nihil alienum res-
 puunt ab honestate? Nam histrio si vna peccauit
 syllaba exhibetur, atque exploditur: si subsiliit
 indecorè, si digitis turpiter micauit, si ad aspe-
 ctum meretricis expalluit, acclamationibus ce-
 lebratur. Id vero nō semel expertus est Euripides
 tragicorum poëtarum grauissimus; qui cum ex
 personæ, quā inducebat, decoro Iouem senèque

scire quis esset, neque an esset ullus laborare, scripsisset, tumultum populi, cum talia recitarentur, exortum non prius sedauit, quam blasphemus illos versus oblitterasset. Alia quoque in Tragedia cum Bellerophontes immensa quædam de pecuniæ diuitiarumque laudibus prædicaret, confessus vniuersus contra carmen & recitatorem exsurrexit: neque erumpens seditio ante cõposita est, quam profiliret poëta ipse in publicum, & illum auri admiratorem auaritiæ suæ pœnas daturum extrema fabula promitteret. Hæc ergo Græcorum nonnulli æquis auribus accipere non potuerunt, & apud alios, fortasse & eosdem, apud Romanos quoque haud paulo grauiores comædorum partibus, histrionum subagitationibus, nudis floralium meretricibus nemo reclamauit. Nisi forte id in laude ponimus quod semel præsentè Catone Pop. Rom. ab illo propudioso aspectu sibi abstinentiam imperauit. Atqui si benè & honestè scorta nuda in scenam, in oculos omnium producuntur, quidni coram Catone? sin autem id sit virtute profligata, prostrata pudicitia, honestate prostituta, cur etiam illo absente? Catonem timuerunt, & cœlum consciũ, & vindicem Deum non timuerunt. Atque hæc contra oculorum sensum pro auribus non disputo, quod existimem nullum castitati vulnus à verbis versibusque apud Comædos esse metuendum. Scio enim quam altè voces prætextatæ in animum descendāt, quam firmiter ad memoriam adolescentium libidinis ista fax adherescat, quam multis exitio fuerit et audire in theatris, quæ postea domi regustarent, quæ in familiarium con-

suetudine referrent, quæ in lupanaribus exercerent. Sed Histrionum quam ipsi industriam, sapientes impudentiam appellant, à Poëtarum scriptione discretam esse monstrare volui, vt cum incunabula comœdiæ in rusticorum comessationibus deprehenderitis, robustiorem ætatem in edocendis flagitiis positam fuisse intellexeritis, verum iudicium de artis ipsius sanctitate, & præclara vtilitate feratis. Verum cum ad gestus accesserunt verba, cum vtroque sensu præsentium verecundia tentatur, cum collatis viribus hinc Poëtæ, inde Histriones hominum castitatem oppugnant, quæ lorica constantiæ tam est fideis vt illo cupidinis telo non perfodiatur? quæ virtutis arx tam est altè ædificata, ad quam ignea veneris sagitta non perueniat? quæ sanctitatis munitio tam est inexpugnabilis, quam duplex ille aries non labefactet, perfringat, euertat?

*Histrioni
carecita-
tio à facul-
tate poëti-
capenitus
seiuuncta
est.*

Laudas hic mihi tu, nouè Rosci, Poëticam facultatem. Quid ad te? quid est affinitatis arti pulcherrimæ cum lutulenta tua actione? videlicet cum in arte tua laudabile nihil occurrat, mutuum sumis è vicina. Geographorum hoc est, quos patriæ paruitatis suppuget, quando sola in tabula describenda est: confines circunquaque adiiciunt populos oppido liberaliter, vt in eadem membrana Rhenus fluat & Tamesis, & vnus oculorum coniectus Parisiensem Luparam, & Romanum Capitolium annotet. Ita se magnos autumant magnitudine vicinorum. Quanquam quæ illa vicinia est? quam parum attinet ad poëticam recitatio? quam est extraria? Dramata, collocutiones, diuerbia quota pars poëseos sunt? Et istis quoq;

necessariam esse pronunciationem Histronis Aristoteles negat, quia sine illa vult placere legentibus: & totum scenæ apparatus, machinas, modos musicos & id genus alia extrinsecus ascita minime artificiosa videri pronunciat. Importuna quin etiam actorum contentione coactos affirmat Poëtas nativam tragædiæ venustatem detrahere, & ultra præscriptos à ratione terminos ad maiorem iusta producere granditatem. O germanos Poëtarum Histrones, qui fratres coegerunt crescere ut claudos exhiberent! ô vicinam Poëtice Histroniam, quæ afflatu suo tanquã pestilenti siedere totam eius formã obscuravit! Quod si operam tuam Tragici, Comicique ut perfecti sint, reformidant, vide quo te iure in nobiles Epicorum, Lyricorum, Elegiacorum cohortes inferas atque intrudas. Omni prædicatione dignam poësim profiteris. Assentior: & quando te minus peritum esse putas, si vis alio die de eius laudibus ex me audies, etiam resectis iis quæ in alteram partem probabiliter dici solent. Sed Poëtas afferri audies sanctos, graues, innocentes: illos quodã afflatu quasi diuini furoris inflammatos, non fractos & molles, non impudicos & effœminatos & planè tuos, qui Minervã suam constuparunt, Musas prostituerunt, Parnassum vestigiis libidinum foedauerunt Fabulas probari audies, non Plauti Bæchides, Eunuchum Terentij, sed Sophoclis tragædias & Euripidis, quarum argumenta sint humanæ vitæ documenta, singuli versus singulæ sententiæ: quas qui spectarit, ut Socrates, incitetur ad philosophadum, qui legerit, ut Alexander ab Homero totum Regis officium, ut L. Lucullus ab historicis munus impe-

ratorium, sic iste ex iis libris artem bene viuendi condiscat. Sed vereor vt palato tuo insulsa videatur illa laudatio qui iocis parasiticis, salibus meretriciis, amatoriis pulmentis scenam tuam soles conspergere.

*A Comæ-
diis nun-
quam ab-
est obscæ-
nitas &
turpitude.*

Hoc sibi in more institutoque positum significauit, si attendistis, Iudices, cum simplicitatem nostram irrisit, qui venereos illos scrupulos non admittimus, & omnia quibus castitas deflorescit, vt canem & anguem cuitamus. Hoc palam profitentur emissarij theatrorum amatores, qui tantoperè ad istorum fabulas adhinniunt, eas non amari, in quibus non amatur, non placere spectatoribus, in quibus nulla puellæ forma placet actoribus: & si quando sui propositi oblitus poeta histrionicus serij & grauis argumenti tragædiam vendidit, eamque isti egerunt, friget scena; quoniam in ea caro putida defuerit, nisi elegantem mimum adiiciant pro tragematis & bellariis vt illecebram turpitudinis, otij inutiliter positi corollarium, libidinis appendicem. Hanc in rem mulierculas circumferunt, quarum non minus domi pudicitia, quam in theatro forma publicatur: quæ intra priuatos parietes suos exercent amores vt in scena penitus ad viuum alienos repræsentent. Hæ sunt virtutis scholæ quas tu, Rosci, tantoperè prædicabas: hæ prælectiones tanto interuallo sacris concionibus ante ponendæ: hi ludi casti atque innocentes rebusp. necessarij; hi denique magistri sanctitatis. O cœnum! ô sordes! ô ciuitatum propudium! labes iuuentutis! non satis efferuescebat illa, antequam hæ nouæ faces subderentur? non poterat præceps in flagitium

tium ruere nisi illud tam facili methodo perciperet? Proh Deus Immortalis, potest ne plausibilior doctrina maiore cum efficientia demonstrari! ô gymnasia! ô perditos Gymnosophistas! libido claro meridie, patente domo, titillante sensu, approbantibus omnibus per oculos & aures in animum introducitur, incidit flamma in idoneum fomitem, alitur voluptate, tegitur recordatione, augetur consuetudine; quod incendium, Iudices, quam morum perniciem, quam famæ, opum, corporis ipsius ruinam peruidetis? Sperate vtilis in bello milites, in Curia Senatores, integros in tribunalibus iudices, sanctos sacrorum præfides, fidos principibus, commodos Reip. ciues, si in tali eos schola educatis. Hoc enim profiteri omnes cogimur vsu rerum & experientia edocti, animo per libidines corrupto nihil altum inesse.

Vidit hunc scopulum aduersarius, & euitatum credidit illa veteri & decantata responsione, obscœnitatem paucorum culpa in theatrum irrep-
Obscœnas fabulas, nō edere sapē sed frustra promittunt histriones.
 fuisse, tolli posse facili negotio; debere certè, quando id vnum graues & honestos oculos offendit. Hæc cum fingeres, Panurge, non animaduvertebas tentari à te patientiam iudicum qui vultu auerso, fronte contracta, indignantium gestu si quid sapis tibi dicebant. Quæ, malum! ista est inueteratæ turpitudinis exculatio? quandiu rancidam cantilenam plani isti nobis occinent? quod semper pollicentur, quod millies iam factum putauimus, ne semel quidem fieri potest? Sexto quoque mense nos inuiunt, primo aditu in urbem proposita tabula publicè, priuatim per domos nobis recipiunt facturos se ut ciuium verecundiæ consu-

latur : non esse de illorum grege qui pudicitiam
quæstui habeant : in basilica Búrgunda Regi &
aulicis iucundo fuisse spectaculo : quid plura? bi-
nas aut ternas principio exhibent magnificas & ab
omni voluptatis lenocinio satis expurgatas, qui-
bus cum irretita fuerit hominum etiam optimo-
rum curiositas, redeunt denique ad ingenium, & sub
extremum eo nequiores fiunt quo diutius perdi-
tæ consuetudinis torrentem continuerunt. Ita
non incautos illudunt, & probitati nostræ insult-
ant eam expugnando. Quod si paucorum id vi-
tium est, cur omnes sic viuitis, sic agitis, sic fallitis?
Si corrigi debet, certè potest. Itaque corrigatur:
quoties promissum est, quoties iussimus? corri-
gatur tum demum liberos ipsi, nostros manu in
theatrum deducemus. Id si fieri non potest, im-
pudenter spondetis: si potest flagitiosè recusatis:
vtrumque vobis vrbe nostra penitus interdicat,
Mihi quidem vestra hæc querela, Iudices, qua
parte vos sæpius falli doletis iustissima semper
visa est. Si tamen ipsi nequitia honesta potest
præendi defensio, nego solos in culpa esse hi-
striones, qui id non faciant quod facere nolunt:
sed vos etiam aliquantum illa aspergi macula qui
tamdiu speraueritis id eos facere velle quod om-
nino non possunt. Nam ut illæ quondam simiæ in
puerorum morem comptæ & ornatæ naturam
suam tamdiu dissimulare potuerunt, dum nuces
in theatrum coniectæ sint: sic isti honestæ formæ
artifices, vbi plusculum lucri olfecerint, sponte,
atq; ipso quasi naturæ impetu, in turpissimas be-
stias degenerant. Non licere autem ipsis non esse
nequissimis, sed ea flagitia eorum arti esse innata

& in ea penitus insita, vna mihi ratio persuadet, quam tibi, Panurge, probandam spero, quoniam & ad eam digitum intendisti, sed planè latenter: & vides me non esse ita tibi inimicum vt malitiam tuam alio non deriuem. Scio equidem liberum tibi olim fuisse artis huius potius quàm probe atq; ingenuæ delectum; in quo quantum peccaueris, hac præsertim ingenij bonitate, quantam oratione tua perspeximus, ad causam non attinet: Sed vbi semel ad illam rationes omnes tuas applicuisti; tum fateor impositam tibi omnis turpitudinis necessitatē, & scelera tua non à te in theatrum illata, sed à theatro potius in te tuosq; socios deriuata.

Quoad enim possum replicare antea cta sæcula, *Turpitudō in comœdia natura penitus insita est.* & artis histrionicæ prima exordia recordari, semper eam flagitiis contaminatam fuisse comperio. Id autem non ab actoribus primum profluxisse demonstrat Atellanorum honestas: non præcisè ab ipsa tragædiarum exhibitione profectum esse probat etiamnum oppidorum & Academiarum consuetudo, in quibus ciues honestissimi, nobiles atque liberaliter educati adolescentes animi causa personas sustinent, & laudabilia è sacris profanisque literis argumenta, summa cum dignitate repræsentant. Itaque ad ipsam artem scenicorum pertinet ea M. Tullij reprehensio æquissima, qua negat vnquam Græcorum comœdias, nisi consuetudo vitæ pateretur, theatris sua flagitia probaturas. Eodem refertur quod apud Romanos, quorum historia quàm Græcorum nobis notior est, monete ipsorum doctissimo obscœnum à scena dictum est: quare turpe inquit, id obscœnū est, quod nisi in scena palam dici non debet. His;

*Theatrum
& prosti-
bulum
idem est.*

palensis autem Isidorus diligens latinitatis indagator idem Theatrum & Prostibulum esse ait, eo quod post ludos exactos ibi meretrices prosterne-
rentur. Quod certè nemini mirum videbitur qui cogitauerit Pompeij theatrum aliud nihil fuisse quàm gradus Veneris templo suppositos: imo vniuersè theatra omnia non alteri Deo, quam Veneri fuisse dedicata. Nam si nihil turpitudinis in scenicis potius, quàm aliis ludis publicis esse putauerunt Romani, cum Mercurium palestræ, Circo Neptunum, arenæ Martem præposuerint, cum theatro non Apollinem Poëtarum Deum, non Mineruam disciplinarum præsidem, non Bacchum ipsum vt Græci, sed Venerem præfecerunt? Certè indignatur Arnobius in Floralibus ludis flagitiosas res agi, & migratum ab lupanaribus in theatra. Plautus è contra post spectaculum meretricem promittit, quæ sine auspiciibus ultro nuptum eat. Sunt ergo theatra septa vndique & munita luxuriæ quasi excubiis: quocunque te vertas, vt Sirenes, sic impuræ occurrunt in spectaculis libidines: transitur à lupanaribus in theatra, à theatris in lupanaria reditur, in ipso theatro lupanari constituitur locus ad quem spectatores inuidentur. Viri illi prudentia & grauitate præstantes, coram filiis impuberibus aut iurare, aut turpe verbum proferre nefas ducebant, quæ palam adolescentibus præsentibus & dicere & audire religiosum putabatur? vxorum vinolentiam (& quantum illa ab adulterio distat?) probatam osculo, morte plectebant: & ipsam libidinem in theatris, ipsam Venerem per oculos immissam sine crimine habebant? Nimirum exterminata è priuatis do-

mibus scelera atque flagitia debuerunt in vrbelo-
cum reperire, quo velut in sentinam, & sordium
omnium receptaculum confluerent: quibus qui
se vellent oblinere, conferrent eo se se alacres vo-
lentes bonis auib: qui castis & sanctis moribus
studerent, ij talis loci contactum effugerent.

Hac igitur dictorum licentia, hac impunitate fla-
gitiorum, locorum opportunitate, adulteriorum
commoditate histriones & ipsos frui, & alios vti
docere, tam fuit illis temporibus necessarium,
quam doctori medico artem curandorum corpo-
rum, Philosopho scientiam indagandæ naturæ,
Rhetori copiosè dicēdi disciplinam tradere. Nam
si verè Tertulian. Theatrum *proprie Veneris sacra-*
rium, & priuatum consistorium impudicitie nuncu-
pauit; quos Antistites eiusmodi templum, quos
præfides consistorium, quos genios locus habere
potuit præter histriones? si tragœdiæ, quod idem
scriptis affirmare non veretur, sunt (*Scelerum au-*
trices, & libidinum, cruenta & lasciuæ, impia & pro-
diga), eas ne sic agere posse videntur histriones, sic
gestu exprimere, domi meditari, memorię infige-
re, quæ est pertinacissima prauī custos, vt non illa
vitia ad eorum vitam & mores adhærescant? Id vero
in hac hominū consuetudine fieri non posse decla-
rant non tantū Demosthenis in Æschinē actiones,
non Ciceronis pro Roscio patrociniū, quo multū
sudat magnus orator vt Comœdū vnum virū esse
bonū iudicibus persuadeat: & verò id nunquā ef-
ficeret, nisi simpliciter & serio affirmaret, tam bo-
num virū esse, vt eam ob rem vnus esset indignus
qui in scenā prodiret: sed maximè grauissima San-
ctorum Patrum auctoritas per omnes ætates ab il-

*Turpes &
flagitiosos
histriones
esse oportet.*

lis Rom. Imperij temporibus perpetua serie penè ad nos vsq; deducta, qui nihil magis in spectaculis quàm luxurià impunitam, nihil minus in histrionibus quàm vitæ probitatē deprehenderant. Quenā ego locū non attingo, ne quid de sapientissimi viri qui peroraturus est, oratione & officio videar delibare. Et licet Christiana forte modestia effrenatam illā gentilium licentiam aliqua ex parte compresserit; quā ample tamen eius reliquię, quā fœda vestigia in fabulis remanserint, quotidie ad videndū inuitamur; De histrionibus aueo scire quę sit hominū opinio. Est ne vllus, non dico vestrum, Iudices, nō est enim ordo sanctissimus interrogatione contumeliosa dignus, sed illorum quos procul stare videtis, eorum opificum qui arte sordida quotidie quæstū faciunt; est ne inquam qui filiū suum patiat inter Comædos profiteri? qui opificium quantumlibet humile & abiectū cum arte scenica velit cōmutari? qui suū quæstieulū illorū lucris, laborē deliciis, tenuem supellectilē splendido choragio putet oportere postponi! Quis autē est omniū sensus, quę vox cū prætereuntes digito monstrantur tanquā noui è Peruuio, aut Iaponia homines? quis paulum honestior à Comædo salutaris non erubescit? quis eius notitiā sibi honoris ducit, pedem in domū inferre permittit mēsa, hospitioq; dignatur? Vagātur per oppida sine tecto, sine lare, ignotis parentibus quasi vulgo quæsitī, amicis & sodalibus è iuuentutis fœce collectis, incertis facultatibus quę in scenā corrogatę, in cœnis dissipantur: operam locant in leuissimā voluptate hominibus concilianda, id perficiunt quinq; aut sex vt summū tragœdiis vetustate rancidis, at-

rificio impolitis, argumēto lasciuīs, dictione vernacula suauibus, quibus recitādis, ac titādis, declamandis omnia vicinarū urbium sphæristeria cōtriuērunt. Quæ ubi sunt exhaustæ omnes, nemo quærat nūquid amplius? aulæa tollūtur, vasa colligūtur, ludiones euanescent, idē alibi, idem centies reddituri. Sic in patria exules, semper abiecti, nunquam exclusi, ubiq; viuunt, nullibi habitant, amati & contempti, priuatas domos exhauriunt, tabernas meritorias locupletant; adueniunt mendici, exeunt inopes, & quod est nouum Philosophiæ genus, seipsis suaque saturitate contenti.

Iam verò illos homines hac vitæ integritate, his morum insulis ornatos, vobis, Iudices, Panurgus hic offert, qui posteaquam vos in spectaculis exhilarauerint, liberos vestros iam grādiōres, & rhetoricis imbutos disciplinis, artem aptè pronunciandi edoceant, quæ cum illis nata, cum illis moriatur necesse est Nam quo vos obstringetis scelerē si aut eloquentiam à Rep. aut actionem ab eloquentia, aut artem scenicam ab actione tollitis? Quod si aliud quidpiam quam quod ex tragicis comiisq; rebus edisci potest scire debuisset, si à theatro reflectere oculos, & cælum suspicere potuisset, si in Astronomum Manilium incidisset, iam locupletes & honestæ domus, omnes histrionibus refertæ essent: neque iam quaternos à vobis asses emendicaret sancti & graues homines, sed honestissimi quique, & publicæ rei priuatæq; studiosissimi magna ambitione certarent, quis primus Pantomimum in familiam familiaritatemque adscisceret. Aiunt enim Astrologi Pædagogorum & histrionum eandem esse genituram, sub

Falso assumit aduersarius actionem oratoriam ab histrionibus perpoliri.

Aquario adiuncto ad Cepheum. Itaq; si cœlo ipso teste, si astris consentientibus, si fatali quadam, ut cum antiquis loquar, naturę necessitate, & quasi cognatione coniuncti sunt cum Pædagogis histriones, quidni liberis vestris Pædagogos ex theatro & histrionia prouideatis? Quid hic agam, nisi me docetis, Iudices, quo me vertam equidem nescio: ita mihi omnes ad effugium exitus seu veritas, seu aduersarij oratio interclusit. Negem eloquentissimos omnibus sæculis viros omne momentum in actione posuisse? negem omnibus numeris absolutam esse histrionum actionem, plusq; illos gestu probari sæpè quàm voce? utroque autem aptè concinneq; utentes ea quæ dicunt si per se laudabilia sunt, efferre in maius; si iacent, erigere, & ut vendibilia proponere? negem histrionibus vsum esse Demosthenem, aut Ciceronem? utendum præcepisse Quintilianum? hæc cum pro certis compertisque habeantur, quis ferat si dixerò quod mihi mens suggerit, quod ratio vehementer suadet, quod causa penè extorquet, alienam esse omnino ab oratoris facultate actionem histrionicam; ab hac non modo in illam nihil profectum,

*Plus ven-
statis in a-
gendo ab
oratoribus
histriones
quàm ab
histrioni-
bus orato-
res accepe-
runt.*

sed si rerum repetundarum iudicium exercetur, hanc illi plurimum debere: deniq; non oratorem à Roscio, sed ab oratore Roscium didicisse? Et tamen ita res habet, iudices, id loquuntur historæ, id auctorum monumenta declarant Nam actione qui præter ceteros valuit Q Hortensius Æsopum, & Roscium frequētes habuit, auditores dicam an spectatores? accurrebāt cupidissimè ad eum causas agentem artis ludicrę Coryphæi, defixos in oratoris vultū oculos, manus, corpus tenebant hi-

striones præstantissimi: quid diceretur Iudices, ipsi autem quomodo, diceretur omni animorum contentione spectabant, ut gestus in foro discerent, quibus in theatro vterentur. Itaque per melicet, Ciceronem totum refinxerint? solum enim quod ab Hortensio mutuum acceperant, id Ciceroni reddiderunt. Esto illorum opera M. Tullius oratorum princeps & penè regula ad eloquentiæ fastigium conscenderit; illa scientiæ perfectio à rege fori Hortensio dimanauit. Denique quod Tullius Roscio, id Roscius debet Hortensio. Dicit aliquis, unde igitur Hortensius tantam rei difficillimæ absolutionem est consecutus? Quærisne quæ fiat ut in omni disciplinarum genere aliqui sine magno magistrorum præsidio summa cum laude versentur? unde accidat ut in ludis literariis pueros non paucos videamus annuas in theatris exhibere tragoedias, æquali, si non maiori cum venustate quam ludiones isti dupondij, qui tam sunt misera ad artem suam natura, ut ab ea concinnum versus vnus gestum toto anno vix possint extundere? Neque enim omnes Roscios esse putandum est, aut Ambuios: Turpiones certè videmus plurimos ore sordido, manibus hirsutis & pinguibus, voce agresti, planipedes, crassipedes, qui cum stolidos agunt in scena, eos ipsos esse nemo peierauerit. Nescis quanta vis sit cogitationis, & impressæ in animo notionis: quam sint aliqui à natura facti ad res quaslibet effingendas: quid possit improbus ille labor & industria, cui si non Hortensius, certè Demosthenes acceptam semper retulit actionem. Est enim persanè ridiculum duobus vulsis & recaluastris *ludificationis, & impressæ in animo notionis: quam sint aliqui à natura facti ad res quaslibet effingendas: quid possit improbus ille labor & industria, cui si non Hortensius, certè Demosthenes acceptam semper retulit actionem. Est enim persanè*

Demosthenem labor & industria, non histriones oratorem fecerunt.

dionibus totam Demosthenis gloriam attribue-
 re : illud ingenium quod victor apud Chæro-
 neam Philippus exhorruit, à mimis nescio quibus
 arcessere : illam eloquentiam , quam aduersus
 Tutores feliciter expertus , contra Midiam, Æ-
 schinem , Philippum ipsum gloriosè exercuit ,
 in duos terræ filios refundere. Nimirum balbu-
 tientem eius linguam ita soluit Satyrus vt pri-
 mam artis suæ literam expeditè pronunciaret.
 Vocis acerbicatem mitigauit , lateri firmitatem
 addidit Andronicus : cum illis fori fluctuum
 fragores declamando superaret ; cum ore calculis
 referto , continenti spiritu multos versus recita-
 ret ; cum gestus & ipsi sum totius corporis habitum
 in ingenti speculo quæreret ; cum angustissimo
 in loco pendentem è lacunari hastam penè in hu-
 meros dmitteret , vt vitiosum motum euitaret,
 nihil promouebat Demosthenes, sed quasi Sisy-
 phi saxum versaret, in studiorum initiis semper
 insistebat, donec histriones duo eloquentiæ genij
 cum manu prehensum in illud consummatæ vir-
 tutis culmen educerent. Quod si ab arte scenica
 tam multa , tamque magna accepit beneficia,
 profecto crudeliter ingratus fuit, qui Æschinem
 tam malè tractauit : Æschines autem fustuarium
 meruit, qui Satyri tyronem ipse primarum par-
 tium histrio non potuit sustinere,

Age vero quid à clarissimis illis Athenarum lu-
 minibus didicit, si quid tandem discere potuit-
 Demosthenes ? Actionem inquis, quam ? orato-
 riam. Audio. qualis autem illa est ? Quærendum
 ex oratoribus. Præclarè ? Vis ergo consuli Cice-
 ronem , illum quem Æsopo & Roscio addictum

*Actio hi-
 strionica
 in oratori-
 bus à Cice-
 rone non
 probatur.*

gloriaris? Præ illo neminem alium. Audias igitur oportet quæ sit eius in oratoriis institutionibus sententia. Sanè libenter. Atqui ille Atticum oratorem cum informat, actionem in eo requirit *non tragicam, nec scenam, sed modicam inæctatione corporis*. Vides nihil hic tuum, si nomen excipis, postulari. Quanquam cur ipso nomine actio tua potius futura est, quam oratorum? nisi quia fortasse virtutum tuarum caput est, oratoriarum accessio. Alio præterea libro, de toto agendi genere in Crassi oratoris persona disputans gestum motui subiicit *non scenicum qui verba exprimat: laterum inflexionem addit fortem ac virilem non ab scena & histrionibus, sed ab armis, aut etiam à palæstra*. Iam-ne sentis Rosci quam parum adiumenti actio tua oratoribus importet? videtur-ne tibi gestus histrionicus Demosthenem perfecisse, qui Æschinem suum defecit in concionibus? Audes prædicare Roscium M. Ciceroni quicquam contulisse, cum hic illum audierit tantum ut expenderet? expenderet autem? imo ut contemneret, ut discuteret, ut expelleret. Nam si quæras à Cicerone; dic M. Tulli placet ne tibi actio in oratore? vel maximè: inquiet, Ecce illam apporto, vtere. Quistu, & vnde? à Scena histrio. Apage cum scenica tua mollitie. At Roscium & Æliopum amasti. Etiam obloqueristu? in theatrum ludio. Aliunde hoc quam à nobis speres? habeo vnde quæram honestius, ab armis, à palæstra: hinc semper ad cauendū petendumque promptus efficiar. Ita quidem ad agnatos Cicero te remittet. Sed Quintilianus luculentus scriptor ac celebris, armis & palæstra non contentus, ipsam

*Quintilianus
non consentiens eadē
in re iudiciū.*

etiam saltationem destinato ad eloquentiam puero commodiorem arte tua tota iudicabit. Erubescis Panurge: mira res: unde hic tibi color? quid times? quæ vox à te grauius accepta est? an indignaris saltationem leuissimam artem, & censoria Catonis nota iamdudum condemnatam histrionica præferri? an potius ad Quintilianum nomen exhorruisti? at illum honoris causa appellasti, eius auctoritatem magnoperè extulisti, ad eius testimonium quasi ad Archimedis inuentum exclamasti. Verum scito illi ut respondeam laudatum à me Quintilianum: neque enim possum committere ut error hic in plebeiorum mentibus diutius resideat. Decepisti, Panurge, imperitos, si ex ignorantia quam sæpè professus es, veniam mereris: sin ex animi proposito, cum scires alia omnia sentire Fabium, eius verba decurtata protulisti, ut veritatem iudicibus surriperes; quid expectas nisi ut te ipsi Rhetorum discipulis tradant conuiciis & sibilis verberandum? Putasti, opinor, vir in omni literatura hebes ac rudis ignotum nobis auctorem quasi ex Euandri sepulchro educere, quem possumus ex memoria promptius expromere quam tu omnium sphaeriorum Rolandum aut Syluiam.

Expenditur Quintilianum prolatum ab aduersario testimonium. lib. I. Inst. orat. c. I.

Quare ante omnia scire te volo, quod inuitissimus iterum audies, à Quintiliano pluris fieri saltationem arte omni ludicra. Deinde ut fraudes tuæ & citati loci calumniæ luce & palam reuincantur: dic si potes quem in usum adhibere velis Comædum Fabius Quintilianus? Pædagogum puero præfici? Credo, qui cum Chrysippo non trires sapientes, certè quantum res patietur, optimas;

qui æquales inter quos educabitur puer eloquē-
 tiæ destinatus, illis nutricibus simillimos cupe-
 ret, minorem in Pædagogo probitatem requireret. *l. i. c. 20.*
 Domum ergo aduocetur extemporalis doctor,
 institutorque pueritiæ: Quam tu Comædi par-
 tem M. Fabio placere affirmas? Ipsum spectacu-
 lum? at illud cum otiosis sermonibus, conuiujs, *l. i. c. 17.*
 tesseris, somno inter *ineruditæ voluptates* enume-
 rat. Corporis decentem & aptum motum qui
 dicitur *εὐρυθμία*? at cum aliunde quam à musica
 peti posse negat. Chironomiam, seu gestus le-
 gem? at eam à palæstricis haberi monet. E diuer-
 so autem *manum tremulam, complodere manus, &* *l. i. c. 19.*
pectus cadere, quia scenica sunt, respuit. Vocis
 moderationem ad vsum orationis definitam? at *l. i. c. 4.*
 Comædos pessimè facere arguit qui *senes tremu-* *l. i. c. 19.*
la, mulieres effeminata voce effingant. Quid igitur,
 verbo vno gestum ac motum? at *ne omnem quidem*
à Comædis peti vult, sed oratoris plurimum abesse
 iubet à scenico, nec vultu, nec manu, nec excursioni-
 bus nimium. Atenim primum in paruis ingenij sig-
 num esse notat. memoriam, alterū imitationem.
 Certè, sed *ebrietatis, vitia, amoris, auaritiæ, metus*
affectum imitari non permittit: quid ita? quia ne-
 que oratori sunt necessaria, & mentem precipuè in
etate prima teneram adhuc & rudem inficiunt. Quod
 igitur erit eius doctoris officium? qui vsus? quæ e-
 xercitatio? In primis *vitia oris emendabit, vt ex-*
pressa sint verba: Rem magnam, Panurge, & diffi-
 cilem! quam nutrices blandius possint exequi.
 Obseruabit deinde *vt recta sit facies dicentis, ne la-*
bra distorqueantur. Hoc materteræ apud nos &
 amittæ faciunt, amantes aniculæ. Quid ergo post-

ca? Debet etiam docere Comædus quomodo narrandum, qua sit auctoritate suadendum. Eam vero provinciam cui imponat Comædo, aut exigi à prætextato puero velit Fåbius, equidem non satis perspicio: sapit enim ea pronuntiatio annos prouectiores, & ætatem bonorum suorum non ignaram. *Caterum cum legere orationes oportebit, prima illa pronúciationis rudimenta præteruectum, cum virtutes earum iam sentiet, firmioris paulo ut ætatis, sic iudicij, tum mihi assistat non histrio emptus de theatro & prostibulo, non otiosus ioculator, non planipes indoctus & inscitus, sed diligens aliquis ac peritus, qui non solum lectione formet, quod erat Comædo munus iniunctum, verum etiam ediscere electa ex his cogat, ut non tantum externum corporis ornatum & habitum verum etiam memoriam, interiorum animi facultatem, quod nunquam Comædo traditum est, exerceat. Hoc est plenum de arte tua. Quintiliani testimonium: hoc profitetur is quo suffragatore vel causam capitis obtinere sperabas. Hæc est tua Panurge, fides, qui decerptis pauculis, grauioribus & euidetioribus prætermisissis, triumphas in corona quasi Iudicium ignorantie securus. Nesciebas videlicet cum voce extra modum absone & magna illud Fabianum, dandum aliquid Comædo quoque proclamares, hanc esse Rhetoris mentem ut balbutienti adhuc puero parumper Comædus adiungatur, qui legere doceat, suis quasque litteras sonis enunciari faciat, circa quasdam earum delicias non ferat. Hoc esse in honestis domibus, in oratoris futuri institutione comicæ industriæ terminos definitos: plus yltra nihil licere: cum puer deposti-*

ta togula prætexta caligatus domi apparebit, tū vero celerrimè abigendum histrionem ne vitiorū frequens imitatio transeat in mores. O artem eximiam, quæ in literis suauiter appellandis immoratur! ô necessariam disciplinam, quam ad id Fabius adhibet, quod audiendis mulieribus, si Tullio fides, maiori cum venustate discitur! ô ingens ad eloquentiam præsidium, & admirabili Dei providentia hominibus concessum munus, quod si puero desit, potest à nutrice laudabiliter expleri! Quid hic agitis adolescentes, quid expectatis? quin sedetis in theatro noctes & dies, Rhetoricæ studiosi? docent enim nobiles illi magistri quemadmodum pusiones blandissimè pappare & lallare possint, qui proximus est ad eloquentiam gradus. Concrepuit tympanum, Panurgus ad spectaculum inuitat; accurrite, vocis flexiones audituri, quas vehementer improbat Fabius; visuri gestus & motus corporis, quibus Cicero vendibili oratori interdicit: exclamationibus permouendi quas in Æschine risit Demosthenes: & per hæc ad illam flexanimam, & omnium reginam eloquentiam compendiosa via pertingetis: Superi te perdant, circulator vanissime, ita non modo nequam & flagitiosus es, sed etiam facultatis præstantissimæ, & optimæ iuuentutis inimicus.

Quod si profana in re, in auctore peruulgato tantum confessum dolis & fallaciis circumscribere conatus est, quanto capitaliore malitia sanctissimos Ecclesiæ Patres detorsit in alienam à veritate sententiam? Sed eam causæ partem non attingo ne quid de viri doctissimi qui tertius dicturus est actione detraham. Itaque dum finem di-

cendi facio, vos oro atque obtestor, Iudices, ut auditis utrimque rationes aestimetis, momentoque suo ponderetis. Negavit ille scelere villo confictos histriones: demonstratum est à me omnibus flagitiis coopertos, ne si velint quidem frugis esse posse. Spectaculorum utilitatem commemoravit: vos dicente me turpitudinem eorum estis execrati. Artem denique ut Rhetoribus necessariam magnificè ostentavit: vos ut ridiculam explosistis. Quæ fuit in Demosthene, Cicerone, Quintiliano perfugium: ab eo ignominiosè deiectus est. Non hoc nescit ille, se ab æquitate causæ penitus derelictum: sed eundem se hoc in iudicio præbet qui semper fuit, & audacem in agendo, & impudentem in persistendo. Putat ut in scena, sic in foro actioni finem plausu & strepitu esse imponendum: aut certè ut in fabulis fieri solet, ex turbulento & implicato negotio sperat emergere latam sodalibusque suis conversionem. Eam qua machina sit allaturus, equidem nescio: nam præstigiis apud sapientes & peritos viros quis locus esse possit? Verum quoniam suspecti semper isti esse debent de artificio: vos in gravitatis & constantiæ gradu decet consistere, donec speculam qua sibi adhuc blanditur, abiecerit. Quod ut spero clarissimorum apud antiquos ingeniorum auctoritate conficietur, cui nemo prudens unquam refragari volet: qua nescio an causæ nostræ bonitas novis rationibus demonstranda sit, certè quæ sunt à me propositæ confirmabuntur.



PHILOGVS

P V B L I C I S

P R I V A T I S Q V E

P R O F A N O R V M H O M I N V M

testimoniis grauitè Histriones

vrget ac premit.

O R A T I O X I.



I T A N T V M M O D O , Iudices,
quid perspicua veritas, & æquitatis
ratio postulet, spectari debuit, non
video quàm necessarium fuerit huic
me iudicio apparere hominem & ad

istas forenses actiones perquam ineptum, & ab
iis longo temporis interuallo, atque ipso studio-
rum genere penitus alienum. Nam si tota lis ra-
tionibus penditur atque æstimatur, eas recens
Modestini clarissimi viri oratio in conspectum
vestrum summa cum fide & eloquentia protulit.
Sin autem auctoritate & aliorum præiudicio res
tanta conficitur, nemini qui mentem non amise-
rit obscuram hac in causa puto esse veterum vo-

luntatem. Fingamus enim hanc in aulam conuenisse ex omnibus orbis terræ partibus, è præteritis ætatibus & sæculis spectatæ sapientiæ & grauitatis senatores, & causa spectaculorum vtriusque quo vidistis modo perorata, discessionem postulari; quis sanus dubitet vtriusque pars non tantum melior, sed etiam maior futura sit? Enimvero licet aduersarius aliquorum nomina quos suffragatores videri volebat magna cum ambitione ediderit; quàm multos tamen sibi oppositos præteriret animaduersum est; & in explicatis examinationisque Ciceronis & Fabij sententiis quàm parum fidei meretur, deprehensum. Verùm quoniam audacia mentientis in eorum animis dominari solet qui anticipatam veri speciem non habent, iis autem quibus iam olim lux veritatis affulsit eius recordatio iucundissima est: certè causa bipartito diuisa, & tractatis iam ante rationibus, ea pars quæ in testimoniis versatur nullius incommodo debet explicari. Id enim ubi confectum fuerit, nihil causari poterit aduersarius qui turpiter obmutescat: nihil amantes theatrorum prætere cur ab illis non abstineant: Iudices autem cum ipsi doctrinæ veteris reuocationem amplectentur, tum maximè gaudebunt ab omnibus intelligi controuersiam hanc esse vndique prætentatam atque perspectam. Atque eam provinciam ab oratore accepi, non quod plurima lectione & doctrina, sed quod minimo eius vestroque fastidio possim in ea commorari. Nam commutatis dicendi vicibus, & is qui iam defatigatione ingrauescebat recreabitur; & vos quibus orationis longitudo satietatem attulisset recente

ad hanc partem , vt nouam aliquam causam venietis Et hanc quoque testimoniorum productionem quia diuinis humanisque , sacris & profanis continentur , duobus actoribus visum est tradere conficiendam : ne quid aut ignorantia mea causæ detrahat , aut importunitas fatigatis iam auribus offensionem conciliet. Quo fit vt maior mihi vestræ , Iudices , humanitatis spes obo-riatur , quòd & eadem quæstio disputatur quam summa cum beneuolentia audire incœpistis , & ab aliis actoribus , aliaque ratione agitur quàm vt vobis offensionem & fastidio futura videatur. Accidit enim percommode ad varietatem conciliandam quæ delectationis mater est , vt ex officio submissius agere debeamus , & aliena dicta prolatis auctorum verbis enuncianda sint. Quare illa exundans facundia quæ in aliquo amplificationis genere exardescit , qua me non inficior olim delectatum , & à nobis hoc loco non requiretur , & latebit sub illa literatura , & rerum antiquarum recensione , à qua obtundi solet & eneruari. Si tamen hebetes illos aculeos interdum in oratione videritis excitari , & vt se dabit occasio in aduersarium emitti , peto à vobis , Iudices , vt eos non eloquentiæ , quam funditus repudiare deliberatum est , sed iustissimo dolori concedatis , qui sæpè infantiissimis ea dicta quæ disertis non respuant , subministrat.

Quis enim sine stomacho ferre possit istum , *Falso ianescio quem , qui nihil scire se profiteatur quàm etauit ad quod tractat in scena , cornicum quod aiunt , ocu- uersarius los velle configere , & in hoc confessu doctis vel natura vo- le imponere vt quod suis ipsi quotidie oculis a- ce probari*

*spectacu-
la.*

trum vident, album esse persuadeat? ut malitiosorum paucorum productione verborum apertissimarum scriptorum mentem interuertat, & ad se transferat? ut totam antiquitatis historiam, vnanimum sapientium omnium consensum, communem plurimarum gentium & propè humani generis vocem refutet & confundat? ut naturæ, Deus sancte quo illa progreditur impudentia! naturæ inquam ipsi sua inurat flagitia, & in ea obscenitatum suarum cupiditatem insitam esse glorietur. Nam dicta tua recognoscas oportet, Panurgus (sic enim te appellatum existimo, & fortasse viderem in te Roscium reuixisse vis videri, qui cuius discipuli nomen assumpseris) Num tu extrema oratione proclamasti quod altè animo meo insidit, naturæ ipsius voce spectacula scenica instituta fuisse & approbata? Benè est; annuisti. Quod probas argumento? populorum omnium consensu. Quorum? Græcorum, Romanorum. Dic præterea. Sapientissimi fuerunt illi, & orbis vniuersi victores. Heus Thraso, ubi alij? omnes ostentasti subsistis in duobus de quorum sapientia dicam postea: de imperij amplitudine minimum laboro. Nam quocunque pedem inferant idem serper populus est, eædem leges, eadem instituta neque vlli nouum est ciuem Romanum qui Gæcidibus aut ad Euphratē habitet, Romano modo viuere. Itaque quid tandem essent scenæ & theatra, vel te ipso teste, nescierunt Ægyptij, quorum magnitudinem admirabiles pyramides, sapientiam obscura literarum mysteria, antiquitate prædicata illa, quanquam falso, diis regnantibus seculorum millia declararunt. Spectaculorum v

*Populi pe-
ne omnes
scenica spe-
ctacula-
ignorarunt.*

luptate caruerunt Assyrij, qui tentatis bello vicinis primi imperium fundauerunt : Amazones quę corporum imbecillitatem animorum magnitudine superarunt: Phœnices & Tyrij qui navigatione inuenta & ex culta orbem nominis sui fama, patriam orbis diuitiis impleuerunt : In ludis occupata non erat Carthago vetus, cum Amilcares & Annibales suos in orbis imperium mittebat: Chaldæi autem pro theatro cœlum, pro ludionibus astra maluerunt, quorum perpetuos cursus & conuerfiones haud paulo vtilius quam Græci chori sui strophas, & antistrophas annotarunt.

Illam animi relaxationem vt Reipubl. necessariam iactauit aduersarius : estne credibile in assidua contentione fuisse Persas Orientis dominos, Medos, Armenios, Ponticos : aut in Septentrione Scotos, Britannos, Orcadum incolas; ad meridiem Arabes, Æthiopas, Maurusios, apud quos nullum spectaculorum vestigium reperitur? Putatisne Parthos reges æquis oculis theatrorum turpitudinem visuros, qui Crasso superato, librum obscœnitæ refertum in eius impedimentis inuentum, per triumphum duxerunt, vt ostenderent non se de gloria Romanorum, sed de luxuria triumphare? Quid? histrionum fraudes callebant. Hispani illi veteres, quibus Sertorij cerua prodigium fuit? Quid? ludionum exercitatio nota erat Gaditanis antiquæ simplicitatis hominibus, qui cum supplicationes Neroni Cæsari decretas audirent : quod Pythia vicisset, credebant formidoloso bello teterrimos aliquos hostes qui Pythij dicerentur ab eo superatos. Ita Romano Imperatori decus apud exteras nationes non sua

ipſius vita, ſed barbarorum error faciebat. Sed v
 à veteribus non recedam, quis credat Palæſtinos
 aut Ammonitas gentes bellicoſiſſimas theatris
 vacuiſſe cum duriffima ſeruitute Iudæos oppri
 merent Dei præſidio deſtitutos? Niſi forte Iudi
 crum appellatur ſpectaculum cum excœcatur
 Samſon ridenti populo expoſitus, ſaltationis ſua
 exordiū ſibi crudeliſſimisque victoribus fecit lu
 ctuoſum. Ipſi vero Hebræi in ſumma pacis & oti
 tranquillitate, in Regum clariſſimorum pacato
 imperio, in admirabili opum omnium copia non
 ludebant? non benè beateque viuebant? at nemo
 apud illos ſpectacula celebrata eſſe ſomniauerit
 Nam quod Elias, yt eleganter iam olim monuit
 Cyprianus, auriga eſt Iſraëlis, non patrocinator ſpe
 ctandis Circenſibus: in nullo enim is circo cucurrit. E
 quod Dauid in conſpectu Dei choros egit, nihil adiu
 nat in theatro ſedentes Chriſtianos fideles; nulla enim
 obſcænis motibus membra diſtorquens deſaltanti
 Græce libidinis fabulam. Nabla, æra, tibia, & citha
 ra Deum cecinerunt, non Idolum. Hanc Remp. cum
 nomino, Iudices, inſtitutam à Deo rectionem
 ſtatuum politicorum formam & exemplum, Re
 gnorum legem nomino: quam inſtinctus à Deo
 Dux & Propheta conſtituit, ſanctiſſimi viri gu
 bernarūt. Ea dum præceptis diuinis vacauit, dum
 cœleſtibus vixit legibus, dum in ſuis principibus
 Moſem, in Moſe Deum agnouit, quæ illi vnquam
 defuit aut proſperitas ad gloriam, aut affluentia
 ad diuitias, aut honeſta voluptas ad delectatio
 nem? In ea autem choros muſicos, orbis ſaltato
 rios, inſtrumenta muſica omne genus, conuiuia
 feſtorum publicorum hilaritatem, vindemiales &

Hebræo
 populo
 multi Iudi
 conceſſi,
 theatrorū
 in ſcriptu
 ra nulla
 mencio.
 Cyprian. l.
 de ſpectac.

tonfarum ouium ferias ænigmatum quæ sitas solutiones, sapienter propositas sententias, sagittariorum etiam exercitationes reperio: spectaculorum & artis scenicæ ne umbrâ quidem deprehendo. Mutata est apud Hebræos Principum administratio, & à Iudicibus Prophetisq; gubernacula ad Reges traducta; defecerunt ab optimi numinis cultu ad vicinorum Gentilium insaniam: victa deinde gens iniuriam suam vlciscente Deo, euersum sanctissimum templum, vastata prouincia, captiui Babylonem deportati Chaldæorum more vixerunt. In patriam postliminio restituti, Machabæos Pontific spreuere, & ad Græcorum mores, gymnasiis etiam erectis, & inducta natalis sacramentum deflexerunt: tamen illis temporum inclinationibus, morum deprauationibus, legum corruptelis. cum prima Sinæ Montis instituta vix iam in sacris libris conseruarentur, numquam apud eos theatra legimus introducta. Tantum in iis flagitij ponebant, vt cum praua omnia concupiscerent, porcinam solam & Græca spectacula recusarent.

Eadem quoque viguit apud Gallos maiores nostros ludorum despicientia, quandiu sui iuris, sueque virtutis homines Europam omnem armorum suorum terrore commouerunt Nam vt Massilienses transeam qui teste Valerio Maximo, nullum adiutum in scenam mimis dederunt, quorum argumenta maiore ex parte stuprorum continent actus, ne talia spectandi consuetudo, etiam imitandi licentiam sumeret: in tota Gallorum natione proficitur Iulianus Imperator sua tempestate nullam in theatris petulantiam, neq; in scenam cordacem admissum fuisse. Narrat etiam Cappadocem quendam diu

Galli veteres ea

spectacula conemptui habuerunt.

Valer. Max. l. i.

Iulian. in Misopog.

Antiochenis innutritum deliciis exilio tandem solum commutasse, & in Galliam delatum saltandi artem edocere voluisse; attonitos primum verbi, deinde rei nouitate Gallos in regiam conuenisse magna frequentia ut hominem coram Rege, pellitisque proceribus saltatorios versantes orbes aspicerent: id verò spectaculum bellicosissimis animis tam inutile, tamque ridiculum visum esse ut magno omnium risu sibilisque; Corymbem abegerint. Erant tum fortissimæ nationi spectaculo cælorum hostium capita ad oppidorum portas affixa; habebat Druidas virtutis magistros quorum fortem & virilem Philosophiam prius laudabat Laertius, quàm Græcorum sapientiam. Tū enim uerò gens aspera, audax, bellicosa, ut ait Iustinus prima Alpium post Herculem victrix superabat Illyricum & Pannoniam, Ligures subigebat, Mediolanum condebat: transgressa in Asiam occupabat Ilium, Reges Attalicos Bythinorumq; vexabat. Illi tum Galli theatrorum ignari, Rom. quorum spectaculis gloriari, fundebant ad Alliam: Romanam sub libra vendebant. Illi Græcos spectaculorum auctores duce Brenno, Macædonas potentissimos tum Græciæ populos duce Belgio ipsorum etiam Rege Ptolemæo cui à fulmine cognomen fuit, interfecto, depopulabantur. Atq; utinam nobilissima illa terrarum portio aut nunquam Romanis seruiisset, aut institutorum suorum tena in eorum delicias nativam continentiam non frangisset! nunquam te Augusta Treuironum fur barbarus ter quaterq; continuatis euerfionibus vastasset. Hanc enim nobilissimæ opulentissimæ civitatis cladem, imo totius imperij vulnus quo

Iustinus l.

24.

ipse oculis vsurpauit, cui causæ putatis assignare Saluianum? Romanis moribus, id est, perditis, & inter cætera insanæ Circensium theatrorumque cupiditati, quæ plebis infelicissimæ reliquias in eam adduxerat dementiam vt vrbe iam euerfa atque inflammata theatra ludicra postularent à Principibus, exercenda videlicet super bustum & cineres, super ossa & sanguinem peremptorum. Reuiuiscat nunc ille Gallicanorum flos & magister Episcoporum, & attritam bellis, pestilentia, rerum necessariarum penuria & caritate Galliam videat scenicis vbique tympanis personare; aspiciat plebem tributorum vestigaliumque onere oppressam, pannosos cerdones, pistores farina oblitos quibus ad victum tenuissimum vix comparata sufficiunt diaria dodrantis vnus aut alterius, asses quatuor, redditum hebdomadis histrionico ianitori erogare, vt sedem in sphæristerio mercentur, ibique ad multam vesperam desidere otiosos, ieiunæ coniugis, eiulantium liberorum immemores, crastini securos. Quanto potiori iure de nobis, quam de Treuiris eximium illud dicturus est. *Affiduitatem calamitatum, augmentum criminum fuisse: creuisse scelera his ipsis quibus coërcebantur, & pœnam ipsorum criminum, non aliud quam matrem esse vitiorum.* Illis ergo remediis sanè acribus & violentis cum Romana, vt sic dicam, Gallia curari non posset, in Francorum potestatem ditionemque transiit, vt resectis peregrinarum voluptatum deliciis, diæta quadam ad antiquam integritatem reuocaretur. Quis enim putet Reges eos qui à Germania in has regiones primi commigrarunt

Saluian.
l. 6. de
Prouid.

*Cassiod.**l. I. 2. ep.*

40.

*Reges Frā-
ci histrio-
nes eiece-
runt.*

inanibus iocis delectatos fuisse, cum Clodouæ à Theodorico Italia Rege quasi nouum aliquod & ingens munus citharædum acceperit? Quæ in consequentium temporum historia non animaduertit vix mentionem histrionum fieri, nisi cum ex aula, & Regno exacti scribuntur? quod summa cum laude fecerunt inter cæteros duos fortissimi principes D. Ludouicus, & ante illum Philippus Augustus, quorum iste vestium suarum exuium nunquam histrionibus, sed mendicis erogasse perhibetur: imo potius eos regno eiecisse vt otiosi & perquam inutilis negotij magistros. Patrum autem nostrorum memoria Carolus Nonus vt deploratissimorum temporum licentiæ aliquem modum imponeret, in comitiis Aurelianensibus edicto cauit choreas publicas mimos, funambulos diebus festis exerceri dum sacra in templis mysteria peraguntur; funditus profecto sublaturus si sæculum ad honestatem, subditos ad pietatem, errantes ad religionem adducere potuisset. Adderem istis omnibus laruas & personas scenicæ suppellestilis partem non contemnendam, quibus vt facies, sic flagitia tegi videntur, Francisci primi edicto sub pœna capitis, Parisiensi deinde & Rhotomagensi Senatusconsulto imposita grandi pecuniæ mulcta ex omnium manibus excussas; nisi me alio vocaret institutum, & à vobis postulare cogerer quam vere naturæ ipsius vocem appellarit aduersarius duorum tantum populorum consentientem ad delicias voluntatem?

*Ludi scenice tardè
Romam.*

Sed quoniam ingens aliquid & humano penè augustius sonant illa Græcorum & Romanorum

nomina: lubet hoc etiam animi causa propugnaculum oppugnare. Credidisti hæc tibi concessum, Panurge, apud Romanos, Græcosque in usu & pretio fuisse spectacula. De hoc etiam volo controuersari. Sume Romanos. De usu non disputo: ludos theatrales apud eos in pretio fuisse pernego. Quanquam & si aliquaparte usum tibi eripiam quid oppones? imo si Augustinus eripiat, affirmetque illas theatricas artes diuinitatem Romanam non nouisse: quæ si ad oblectamentum voluptatis humanæ quærentur vitio morum irrepent humanorum. Quando enim ludos Romæ scenicos putas institutos? certè anno ab V. C. 389. C. Sulpicio Petico, C. Licinio Stolone Coss. antea Circensibus contenti fuerant Romani: qui homines Deus Immortalis! Reges septem, Consules, Dictatoresque fortissimi ut Publicolæ, ut Manlij, Cossi, Camilli, Cincinnati. Quale autem exordium ludis illis fuit? ut placandi cœlestis numinis gratia compositis carminibus vacuas aures populus præberet. Quid deinde? crescente industria inuentus rudi, atque in composito motu corporum iocunda gestis dedit: eaque res Ludium ex Hetruria accersendi causam præbuit, Postea autem? Paulatim ludicra ars ad satyrarum modos perrexit. Nimirum ab illis græca tragœdia sumpserat exordium. Ex his profecto verbi significatio deducta est, ut Platon *ἡγεμονικόν* Aristoteles *ἡγεμονικόν* usurparint pro alicuius existimatione lædenda: & Nonius Marcellus è Grammaticorum schola non inscius obscenum & maledicum eadem affirmarit. A satyris primus omnium lata Poëta, Linus ad fabularum argumenta spectantium oculos & animos tran-

inueni

sunt, corrup-
tis Reip.
moribus.August. l.
2. de Ciuit.
Dei c. 13.

Valer.

Max. l. 2.
ex T. Linio
l. 7.

stulit. Quando illud? C. Claudio Cæci F. J. Sempronio Tuditano Coss. anno V.C. 513. Tu autem Spectacula vocabis quibus Poëta vni suorum carminum actor in theatro cantat? quod aliquandiu fecit Liuius qui tamen cum sapientis populo reuocatus vocem obtudisset, adhibito pueri tibicinis concentu gesticulationem tacitus peregre. Venit ea ferè consuetudo vsque ad Plautum qui Catone Censuram gerente anno V.C. 569. mortuum accepimus. Cui aliquanto postea successit Terentius, quem scimus ludis Megalensibus anno 587. Andriam docuisse Coss. C. Sulpicio Gall. M. Claudio Marcello. Qua etiam tempestate licet Plautus præcessisset, inuerecundā penitus appellare non ausim scenam Romanam: Siquidem prius Terentio non licuit fabulam in vulgus præferre, quam eam M. Fuluius, M. Acilius Glabrio Aedilibus Curulibus domi recitasset. Quod minus P. Mutio Tarpæ Ciceronis ætate legimus commendatum. Utinam hoc more apud honestas religiosas aures scenici isti nostri fabulas suas prauatim ante deponerent quam eas populo in theatro cantitarent! Inuideo vobis Hispani, quibus etiam in ludo seriis & grauibz esse licet, cuius apud vos religiosè modestèque scena haberi catur, multa etiam indicta, propositaque pœsi quod verbum temerè histrio effutierit, quod non ante à magistratu expensum probatumque sit. Redeo ad Romanos apud quos tantum.

Prius expensa à magistratu Comædiæ quam in publicum prodirent.

Punico bello secundo musa pinnato gradu

Intulit se bellicosam in Romuli gentem feram

quo fabularum auctores vt Plautus, vt Næuius quo Ennius, Cæcilius, & alij floruerunt: Itaque

iam tu mihi ex populo Romano antea cuncta tempora, id est, heroica, & verè Romana detrahas oportet: quibus scenæ usum qualis postea visus est, Romæ nullum fuisse confirmant historiae. Illius autem Reip. puram castamque pueritiam, exceptit adolescentia paulum corruptior, quæ non obscurum futuræ aliquando nequitiae specimen dabat. Scitis enim, Iudices, quæ urbanitate Cato ille antiquus populum in Censuræ petitione prensaret. Ægrè, inquit, habet Respublica opus est severior medicus; create me Censorem. Hoc in campo Martio comitiis centuriatis dicebat Cato; hoc communi delatæ Censuræ suffragio populus approbabat, regnante in scena Plauto, saltatione in iuventutem introducta, græcanicis artibus primū urbem afflantibus. Quem enim alium morbum contraxisse tum potuit Romana Respublica, sub Cn. Scipione, sub Sempronio Graccho, sub M. Catone, Fabiis, Claudiis, Marcellis? ante hæc tempora Romam in valetudine laborasse quis conquestus est? quis eius vel febriculam deprehendit? Totis ergo quatuor, & amplius sæculis viguit salubritate Romanæ fortitudinis; corroborata est variis Italicorum bellorum successibus optimi corporis temperatio, viguit usque ad Plautum & Nævium succus ille & sanguis incorruptus primigeniæ virtutis: admissio theatro sanitas illa paulatim defluxit, Græcorum institutorum admiratione, diuitiarum peregrinarum amore sensim humores perniciosissimos collegit: à quibus annis tandem ingrautescentibus obruta, perditâ, sepulta est. Hic ego posteriora cū prioribus sæculis nolo conferri: hoc tantum postulo, ut cum Ro-

manos theatris deditos audietis, non cinctutos
 los Cethegos, non Fabios Verrucosos, non as-
 ros callo Cincinnatos, non Curios in ligneo ca-
 no feruentia rapa vorantes cogitetis, sed ignau-
 fimum Africani superioris filium, sed Metellos
 Hispania conuiuantes, sed Pompeij troffu-
 vullos delicatos qui vulnus in facie, vt morte
 metuebant: ne posteriora Imperatorum, ne
 tempora, sed portenta commemorem.

*Apud Ro-
 manos im-
 probi soli,
 & abiecta
 plebs ludis
 delectati
 sunt.*

Itaque iam à me quæritur num Romani salte-
 deterioris notæ magnoperè spectacula scen-
 coluerint atque æstimarint? Antequam respo-
 deam peto à te, Panurge, quid populi Roma-
 nomine intelligas? otiosam-ne in triuiis turba-
 clientes sportulis inhiantes, mendicos audac-
 los qui vocem concionibus, manum seditioni-
 bus, linguam periuriis locabant, rusticos ad co-
 mitia ventitantes, libertinos & Marcos Dam-
 in tribubus vrbanis temere collocatos? hos ve-
 ciues Romanos si populi Romani nomine app-
 las, vicisti. Nam populus ille Iuuenale Satyri
 indignante duas tantum res anxius optabat, *Pan-*
& Circenses: & verè pronunciauit Cicero, *Populus*
ac vulgus imperitorum ludis magnoperè delectari. S-
 illum esse Populum Romanum, victorem om-
 nium gentium, ex illis hominibus conflatos e-
 . *Romanos rerum dominos gētemque togatam* si put-
 nobis persuadere planus es, & circulator, qui
 ambiguo ludis. Romanum ergo populū Senat-
 equestri ordine, plebe vniuersa, tot Consularibu-
 Censoriis, Triumphalibus, Patriciis viris Rom-
 natis; ornamento gentium clarissimarum ciuita-
 donato, municipiis illustribus, coloniis fidelis-

mis, Latinis focis, Regibus amicis, nationibus fœderatis constare intelligimus: quem ego populum ludorum scenicorum amantem fuisse inficior. Nam si eius imperij Principes, si lux & flos sapientiæ in eo populo delibatus theatra contempserunt, si condemnarunt, si euerterunt, quis dubitet quin eorum sententia pro totius populi voce & sensu accipienda sit? Reclamas Panurge, an exclamas? ignosces enim si gestus histrionicos non satis perspicio. Prouocas fortasse ad eos, quos indicasti, potentes, nobiles, diuites, quibus cara fuerunt spectacula. Benè mones, sunt enim tua digni memoria: & quoniam vt es indoctus, plures, vt arbitror, non nosti, habeme in tanto suffragatorum tuorum numero quasi nomenclatorem. An ego amicius, vtilius, gloriosius officium tibi deferre possum? Itaque illis quos nominasti adiunge paucos istos è multis: Milonem Clodij interfectorem, qui vno ædilitatis anno patrimonia tria in ludos impendit. Iunium Messalam, *qui patrimonium suum scenicis dedit, hæredibus abnegauit.* Neronem Cæsarem, qui sæpius in scena sceptrum gestauit histrionicum, quam in Senatu Imperatorem gessit: melius Canacem parturientem effinxit in theatro, quam ordines duxit in bello. Non enim quid in arte histrionica flagitij sit & dedecoris vllus satis conciperet, nisi & Nero fuisset histrio, & Epirotam quendam Tragœdum æmulum suum, in Isthmiis spectante populo interfecisset. Adde Caium Cæsarem, qui *scenicos ludos & assidue, & varij generis multifariam fecit.* Qui vidente vniuerso populo in ipsis spectaculis Nestorem pantomimum osculaba-

*Ascon. in
Milonia-
nam.*

*Vopiscus
in Carino.*

tur: qui ne publicis quidem spectaculis temperabat quo minus & tragædo pronuncianti concineret, & gestum histrionis quasi laudans vel corrigens palam effingeret. Sed quis polypus tam fuit vnquam varius quam hoc, penè dixi, Imperator qui inter iocos Apellem tragædum flageliis discidit, collaudans subinde vocem deprecantis, quasi in gemitu praduicē.

Caue prætermittas Lentulum Senatorem Populi Romani qui laureolam tam aptè repræsentabat in scena, vt satyrico iudice dignus vera cruce videretur. Domitianum quoque Augustum apud quē præcipua gratia floruit Paris Pantomimus, licet eū idem Iuuenalis allatraret indignareturque quod eius fauore præfectos Pelopea faceret, Philomela Tribunos. Neque tibi Heliogabali auctoritatem inuidebo, qui multos quorum cor; ora placuerant de scena, & circo, & arena, in aulam traduxit, Ipse cātauit, saltauit, ad iibias dixit, tuba cecinit, pandurizauit, organo modulatus est. Atque idē amplissimam Præfecti Prætorij dignitatē contulit saltatori qui Romæ histrionicā fecerat. Quid murmuras histrio? subirasci videris. Ne metue, plura de Heliogabalo nō dicām: non enim ad artem tuam pertinet, quod in singulis vrbib⁹ singulos, Romæ autē quatuordecim vrbi præfectos lenones omnes turpissimos & vltimæ professionis homines constituere decreuerat. Nec vero id magis nouum nobis apparet, quā promissus equo Caij Caligulæ cōsularus. Quod si eiusmodi hominū suffragatio turpis tibi videtur, quid facias historię quæ ita retulit, veterū monumētis qui ea scripserūt, oculis hominū qui tū viuebant, cum talia fierent? Nos poëtæ nō sumus, gesta narramus, non quæ geri debuerunt.

Bonos ergo viros, quos ciues Roman. omni iure possis appellare maius in theatrorum causa produci. Assentior. Do tibi Pop. Rom. corculum Scipionem Nasicam, cui vt optimo ciuium, Senatus admittendæ in urbem Matris Deum prouinciam commisit. Is est qui perpetuos in theatro fieri gradus omni grauitatis probitatisq; suæ contentione prohibuit. Nam cum Censores Messala, & Cassius lapideum in vrbe theatrum extruendum curarent, Nascica vir consularis triumphalis intercessit, eoq; auctore ex S. C. tanquam inuii & nociturum publicis moribus destructum est. Audis Panurge, necessitatem spectaculorum oratione tua tantoperè predicatam? Notabis etiam illud quod Piso tradidit, ab eo tempore quo illi Censores fuerunt, pudicitiam apud Rom. fuisse subuersam: vt scias natalem theatrorum stellam esse pudori pestilentem, neq; nisi super castitatis ruina theatra posse fundari. Ac ne existimes vnus hominis eum fuisse sensum, (quanquam semel totum Roman. senatum produxi Nasicæ consentientem) auctor est Tertull. saepe Censores renascentia cum maxime theatra destruxisse, moribus consulentes, quorum scilicet periculum ingens de lasciuia prouidebant. Professor Imperatorum optimum; Nescio an Traianum noueris. Hic Pantomimos & effeminas artes, & indecora saculo studia damnauit. Reuocauerat in scenā Nerua histriones ante ab ipso Domitiano, quis credat? eiectiones: Traianus iterum eiecit, utrumque recte, inquit Panegyristes, nam & restitui oportebat quos sustulerat malus Princeps, & tolli restituitis. In his enim quæ a malis bene fiunt, hic tenendus est modus vt appareat auctorem displicuisse non factum. Quin &

Optimi
autem ci-
ues eos se-
per con-
tempserūt.

Linus l.
48.

Tertull. l. de
spect. c. 10.

Plin. in v.
neg.

ipse Nerua, vt ab alio scriptore proditur, nouo cō-
 filio ad imminuendos sumptus quēdā spectacula
 simul cū sacris & Circensibus ludis sustulit. Ad-
 do non dissimilem Alexandro, Alexandrum Mam-
 mæ filium principem sanctissimum qui volupta-
 tes scenicas in conuiuio nunquam habuit: Scenicis

Lampr. in nunquam aurum, nunquam argentum, vix pecuniam
Alexan- donauit: pretiosas vestes quas Heliogabalus, dederat,
dro Seuero. etiam sustulit cum eos seruorum domesticorum more
 alendos diceret. Iulianus Imperator magno vir in-

Iulian. in
Misopog.

genio, etsi multa in religionē peccaret, tamen aut
 esse, aut haberi volebat Philolophus. Eius autē di-
 cteria in Antiochenos mimis, saltatoribus, & vni-
 uersē spectaculis omnibus impensē addictos fal-
 sa sunt, & acuta. Hæc enim cum contemneret,
 eamq; ob rem inurbanus voluptariis hominibus
 videretur, ita se defendit homo non infacetus, si
 quid in moribus suis durum & agreste videatur, il-
 lud non sibi, sed Pedagogo suo fraudi esse debere,
 quia is puerum adhuc, quem Imperatorem fore,
 & Antiochiam aliquādo venturum, diuinare non
 poterat, ita docuit; ne fineret se ab æqualibus in
 theatra deduci, neq; vlla eius spectaculi cupidita-
 te teneretur; ludos Circenses & fortio rem histrio-
 nica saltationem in Homero melius, vtiliusq; pos-
 se spectari; theatra non adeunda, ne aspicienda
 quidem: theatra inquam ignobilissimum & turpif-
 simum vitę genus: neque enim fas est quenquam
 domi temperatē esse, si foris dissolutus sit, thea-
 trisq; deletetur. quamobrem sic institutus insu-
 per apud Gallos, Germanosq; nationes bello quā
 voluptatibus aptiores educatus arceō à theatris,
 inquit, me ipsum per summam stultitiam, neq; in au-

*lam admitto scenam, nisi noui anni calendis: idq; præ
 animi mei stupore quasi pauper agricola tributum a-
 liquod pendens iniquo domino: ac tum quoq; cum illuc
 introiui videor eis defungi. Hæc diceret Iulianus
 vir ingenij quàm animi melioris, nisi Romanam
 grauitatem spectaculorum amor dedeceret? Per-
 mitteresne in his subscelliis sedere Ciceronem homi-
 nem sanè ingenio & rebus gestis Principem, Con-
 sularem & Patrem patriæ: nam & hunc virum bonum
 fuisse Quintil. tuus probare non veretur, &
 scenæ seruasse cum urbanus foret, aliunde disces.
 Vult igitur ipse amari constantiam suam ab Attico.
 Cur ita? quia ludos spectare non placet. Est enim
 ὁ πόθος cum velim vitare omnium deliciarum sus-
 picionem repente ἀναφύει, non solum delicate, sed
 etiam inepte peregrinanti. Vide ineptam peregrina-
 tionem quæ ad theatra deducit vis etiam scire quam
 ea sit inutilis & contemnenda? Põpeij ludos, qui-
 bus theatrum suum dedicabat, apparatu magnifi-
 centissimos, varietate distinctos, diuturnitate spe-
 ctabiles M. Marius M. Tullij amicus videre fuerat
 dedignatus. Quid hic orator? Si tu inquit, hæc qua
 ceteri mirantur contemnenda duxisti, & cum per va-
 letudinem posses, venire tamen noluisti, utrumq; letor,
 & sine dolore corporis te fuisse, & animo valuisse, cum
 ea quæ sine causa mirantur alij, nelexeris. Quæ enim
 causa ludos illos faceret mirabiles? an apparatus?
 at eius expectatio tollebat omnem hilaritatem, quo
 quidem apparatu non dubito quin æquissimò animo
 carueris. Quid enim delectationis habet sexcenti muli
 in Clytemnestra? aut in Equo Troiano arcerarum tria
 millia? aut armatura varia peditatus & equitatus in
 Iliaca pugna? quæ popularem admirationem habuerunt,*

*Cicero l. 2.
 ad Attic.
 ep. 1.*

*Cicero l. 7.
 fam. ep. 1.*

delectationē tibi nullam attulissent. An actorū concinnitas? at in scenam honoris causa redierant y quos ego honoris causa de scena decessisse arbitrabar. Delicia verō tua noster *Æsopus* eiusmodi fuit ut ei desinere per omnes homines liceret. Hæc cū apud M. Ciceronē lego, atq; is hominem illum animo valere profitetur qui apparatissima spectacula totius Italiæ concursu celebrata videre contēpserit, reuoco in memoriā festiuium Abderitarū morbum, quem inter latinā istam grauitatē, interiici quasi diuerbium aliquod recreandis animis non inutile, patiemini. Narrat enim *Lucianus* Archelaū Poētā ea tempestate celebrem, *Andromedam* docuisse apud Abderitas, eamq; fabulā ab iis ardentissimis animis sūma ætate spectatam. Itaq; à theatro rediisse omnes febri assidua & flagrante æstuantēs, subitoq; è mentis statu dimotos cursitasse per urbem velut acturos tragædicos, & iambicis versibus, tragædorumq; vociferationibus totum oppidum impleuisse. Occurrebant parētes filiis, cognati alienis, inimicis inimici, in *Andromedas* & *Perseos*, & *Medusas* transformati: salutationes, negotia, conuiuia in iambos transfusa erant. Interdiu paratragædiari, nocte *Emmeliā* saltare videbantur: tota vrbs theatrū erat, histriones vbiq; sine larua macilenti, sine fūco dementēs. Quis tū hospes non timuit & ipse tragædiam facere? quis peregrinus *Euripidis* carminibus salutatus non refugit? quis septē dies sanē actuosos quibus mali catastasis viguit nō est execratus? ventū est tandē ad *Catastrophē*, sed nō sine sudore ac sāguine. Siquidē aliis immodicus sudor totis vndiq; artub⁹ expressus, aliis largē profluens è naribus sāguis reddidit

*Lucian. de
historia
scribenda.*

fanitatē. Quę, vt arbitror, nō illepidā est eorū imago qui ad scenicas istas voluptates tā ardentē adhiñiunt, quos corpore quidē fortasse, sed nō animo valere putamus. Artem verō histrioniam quid aliud quā Abderiticū morbum appellare possumus, eo vehētiorem quo diuturniorem?

Quāquam illi quidem ægri, hi autē sani & valentes insaniunt; illos morbi necessitas, hos spectatorum voluntas agit ad dementiam: Sed vt Romanos reducam in proscenium, non reiicies opinor, Panurge, testem Plinium quem vocant iuniorem: ille si nescis & Consulatum gessit Traiani beneficio, & sæculi sui magnū lumen, testiuissimum ingenium fuit. Hic licet de theatris non agat, vide tamen quid de Circensibus ludis existimet, quos scenicis non paulum honestiores Græci ipsi iudicarunt, qui viros Principes viderunt in olympico puluere decurrentes. Ait se inter pugillares & libellos tranquillē Circensiū tempus exegisse, quia in eo spectaculi genere *nihil est nouum nihil varium, nihil quod non semel spectasse sufficiat: quo magis miror tot millia virorum tam pueriliter identidem* *Plin. Iun. lib. 9. ep. 6.*

cupere. Et id quidem non vulgo solum iucundissimum est, sed etiam grauib. hominib. quos ego cum recordor in re inani, frigida, assidua tam insatiabiliter desiderare, capio aliquam voluptatem quod hac voluptate non capiar. Ac per hos dies libentissime ocium meum in literis colloco, quos alij ociosissimis occupationibus perdunt. Adeo parcebat tempori vir literarum & virtutum amantiſſimus, cuius auunculus ne in gestatione quidem & itineribus libris abſtinebat, vt ab ineruditis voluptatibus, & ociosissimis occupationibus animū rebus optimis imbuendum

summa cum delectatione auocaret. Verum non videntur tibi fortasse satis graues, & decoctę Philosophiæ Cicero atq; Plinius. Senecam igitur audi Romanorum *φιλοσοφῶντων*. Nihil est tam damnosum bonis moribus quam in spectaculo aliquo desidere: tunc enim per voluptatem facilius vita subripuit. Quid me existimas dicere? auarior redeo, ambiciosior, luxuriosior. Ecce illam virtutis scholam, Panurge, quam omnibus Academiis & Porticibus anteponis: illam benè viuendi disciplinam quæ sacris omnibus concionibus te auctore antestat.

*Romana
leges de infamia
histrionibus
irrogata.*

Et hæc quidem artes tragoediæque tuas spectant sapientissimorum hominum pronunciata: Quid si vos ipsos conuenio, Panurge, si dedecus & infamiam vestris iniustam personis, censoria nota, Senatus consultis, legibus Romanis huic expono multitudini (nam toties in Iudicium oculos incurrunt, quoties illi Romani iuris libros peruolunt) perges ne dicere, quos edicta Imperatorum, responsa prudentum, leges publicæ, decreta senatus omnibus ignominia maculis turpificant: eorum artem Populo Romano placuisse? Stas in gradu, histrio: expallescis? iam non velitor, causa iugulum peto: exhorrescis? eo te incautum & alia omnia sperantē adegit Deus vt Romanorum faceres mentionem. Quid de arte tua, quid de te in iure Romano statuatur, ignoras? ô te cæcum! ô rudem, & malitiosè imperitum! Sciebas tu quidem, sed ne quid officeret actioni tuæ dissimulandum putauisti? ô te semper impudentem! cui in circulis & triuiis laudari satis est: qui Prologum, quo artem tueris tuam, quocunq; circumfers, & omnibus Tragoediis applicas, dignum patella o-

periculū: raturū imperitorū acclamationē plenū esse testimoniū veritatis. Iam tibi res non est cū Cerdonū & Cauponum stupore, cum ebriosorum vociferationibus, cū ociosorum plausu: quę isto loco dixisti, quę populō persuadere soles, ea reuincenda sunt. In oratoria illa tua diuisione negasti personas à nobis vestras vituperari, eumq; locum celerius penē dicendo præteruictus es, quā ego referendo. Huc te reuoco, hīc cogo insistere & histiones *infamiae maculis* vt loquitur ille, *asperfos* considerare. Et quoniā non minus verba legum, quā auctoritas sancta esse debent, ne quid immutare, aut affingere me putes, bona Iudicum venia, ex tabulis ea recitari iubebo. Meministis, Iudices, Romanam scenam prius satyricis versibus quā tragicis dedecoratā fuisse. Audite quid aduersus eiusmodi ciues decreuerint antiquæ illæ XII. Tabularum leges, veteris sapientiæ medulla. Recita legem XII. Tabularum à M. Tullio explicatam.

Nostre XII. Tabulae cum per paucas res capite san-
xissent, in his hanc quoque san: iendam praeauerunt, Si
quis occiderit, siue carmen condidisset quod infamiam
facere flagitium-ue alteri. Praclare. Iudiciis
enim ac magistratuū discrepationibus legitimis pro-
positam vitam, non Poetarum ingeniis habere debe-
mus, nec probrum audire nisi ea lege vt respondere li-
ceat, & iudicio defendere. Quæ res quia Græcis
Comœdiæ ipsius auctoribus minus indigna vi-
debatur apud eos fuit: etiam lege concessum vt quod
vellet Comœdia nominatim de quo vellet, diceret. Pla-
to autem popularium suorum errorem longè sa-
pientiori decreto castigat, prohibetq; Comicum
illum Poëtam aut versuum cuius, suis generis

Cic. l. 4. de
Rep.

August. l.
2. de ciuit.
cap. 9.

Plato l. 2.
de legib.

scriptorem quacunq; tandem ratione vllius è ciuibus famam lædere qui secus faxint statim ac si rie mora eius Comœdię actores iubet eiici in exilium, aut mulctæ nomine tres minas ei Deo pendere cui ludus fuerit consecratus. Verùm ne in exordiis hæreamus quæ diuturna esse non permittit Liuius Andronicus, ex quo scenæ ratio ad agendum atq; exhibendum traducta est, quid de ipsis actoribus Romani censuerunt? lege Censorium de scenicis iudicium à D. August. comprobatum.

August. 1. *Romani quamuis iam superstitione noxia premerentur ut illos Deos colerent, quos videbant sibi voluisse*
2. de Ciuib. *scenicæ turpitudines consecrari, sua tamen dignitatis*
cap. 13. *memores ac pudoris actores talium fabularum nequaquam honorauerunt more Græcorum, sed sicut apud*

Ciceronem idem Scipio loquitur, Cum artem ludicram scenamq; totam probro ducerent, genus id hominum non modo honore ciuium reliquorum carere, sed etiam tribu moueri notatione Censoria voluerunt. Preclara sanè & Romanis laudibus annumeranda prudentia. Sed vellem seipsa sequeretur, se imitaretur. Ecce enim rectè quisquis ciuium Romanor. esse scenicus elegisset, non solum ei nullus ad honorem dabatur locus; verum etiam Censoris nota tribum tenere propriam non sinebatur. O animum ciuitatis laudis an-

Histriones *dum Germanæque Romanum! Idem à Tito Liui,*
tribu mo- *idem à Valerio Maximo historicis proditum est,*
uentur ne- *histriones moueri tribu, & stipendia non facere. Hoc*
que faciunt *autem miror tam breuiter dici, quod nulla satis*
stipendia. *oratione potest explicari. Nam cum Romanę tribus vilissimis opificibus, ac sceleratissimis hominibus refertæ essent, artem scenicam ipsa vilitate humiliorem, histriones autem omniū hominum*

nequissimos habitos fuisse oportet, quorum nominane in urbanas quidem tribus referri potuerunt. Hic ego libens te accusauerim, Apollinaris Sidoni: tu dicebas Romam communem esse patriam, in qua soli barbari & serui peregrinarentur: tertium genus è scenicis facere debuisti, qui sic peregrinantur vt ciues nunquam esse possint; sic plerique ciues nascuntur, vt per artem in patria sua peregrinari cogantur. Enimuero qui magis barbari Romanis quam Thraces, Galli, Hispani? at ex iis non modo ciues, sed imperatores etiam Roma suscepit. Qui magis remoti quam Gaditani? at Cornelium Balbum Gadibus ortum, Romani non ciuem modo suum, sed etiam Consulem fecerunt. Quis magis seruus quam bello captus, seruatus, ductus in triumphum? At P. Ventidius ex ea humilitate in tantam surrexit gloriam vt aliquando de Parthis triumpharit. Et quidem seruum hominem sola domini voluntas, & vindicta Prætoris libertum facit, & ciuem Romanum: sed eo numquam aspirare licet histriوني. Qui natus fuerit in Græcia, Cilicia, Ponto, Armenia Romani Imperatoris beneficio ciuis Romanus esse potest; histrio qui Formiis qui Capuæ, qui Tusculi, qui Romæ in ipsa imperij sede natus sit ex liberis & ingenuis, non potest Romana ciuitate donari. Cn. Flavius Scriba populi suffragio ad Ædilitatem prouectus est ea lege vt scripturam desineret. Neque dubito, licet exempla modo non suppetant, quin aliqui nota censoria gradu moti, posteaquam vitæ honestate, & clavis facinoribus priorem illam maculam deleuerunt, in pristinum dignitatis gradum Censorum

iudicio sint reuocati, Scenicos vero non tantum dum scenam exercent, sed etiam si exiguum aliquod tempus exercuerint, natalibus restituileges vetuerunt. Id profecto quam iustis de causis fiat, non difficile peruidebit, qui & vitæ illorum turpitudinem, & officij, si sic appellare licet, inutilitatem, consideraue- rit. Cur enim tantæ ciuitatis & imperij iure gaudeant ij, qui nullis pro Rep. periculis, nullis laboribus perfunguntur? Stipendia non faciunt histriones, nunquam manu aut consilio iuuant exercitum, hostem non vident nisi quem persona fecit: vrbes non expugnant nisi in theatro adumbratas: nulla inuadunt castra nisi quæ poëta descripsit: armantur in hospitalibus, æstuant in popinis, sudant in lectis, pugnant pro meretricibus, nunquam nisi ebrij coronantur. Quid illis ergo cum iure regni cuius onera non sustinent; cum maiestate imperij quam vitæ sua dedecorant; cum vrbis pomærio à quo hostem arcere non possunt?

Histriones Cur inquam ciuium Romanorum priuilegiis
seruorum vtantur ij qui seruorum loco habentur, qui non
loco Roma sinuntur legiones Romanas, & Aquilas militares
habiti. consortio suo funestare? Nam traditum est à Mar-
l. quadam cello Iurisconsulto *Militē aequè puniendum capite,*
delicta. D. *si artem ludicram fecerit, ac si in seruitutem se veni-*
de Pœni. *passus sit.* Est etiam in iure definitum. *Senatoris*
filiam, neptem, proneptem libertino, vel ei qui artem
ludicram exercuit, cuiusue pater, mater-ue id fecerit,
legitimè nubere non posse. Senatoris filiam quæ corpore
questum vel artem ludicram fecerit, aut indicio pu-
blico damnata fuerit, impunè libertino nubere: nec ho-
norem ei seruati quæ se in tantum fœdus deduxerit,

Scimus etiam ex Suetonio *coercitionē in histriones magistratibus omni tēpore & loco lege vetere permis-*
sam fuisse. Quam licet Augustus Cēsar iis ademerit, *præterquam in ludos & scenam:* responderitque aliquando *immunes verberum histriones esse;* legimus tamen histriones aliquot virgis ab eodem cæsos ob culpas alioqui leuiiores. Cædebatur in atrio Imperatoriæ domus Hilas Pantomimus: circumducebatur per trina theatra iussu Imperatoris Stephanio Togatarius tundentibus valentissimis liētoribus. Tacebat sua uis illa vox, Ciuis Romanus sum: soli plagarum crepitus, & Præconis flagitia commemorantis clamor audiebatur. Quis tum ingemuit præter vapulantes? quis ad ludicrum non risit spectaculum præter histriones? Quam iucundam putas fore ciuitati Comœdiam si te, Panurge, pari modo Iudices ludistuis facerent præfultorem? Tiberius autem histrionum flagitiis seditionibusque nimium fatigatus illam virgarum medicinam tanto malo imparem ratus: primum *arte penitus interdixit, quia & mulieres ignominia afficiebant, & turbas dabant.* Deinde Senatus consulto Italia expulit questus *multa ab iis in publicum seditiosè, fœda per domos tentari.* Alias quoque cum ad Senatum ea de re referret, decerni curauit, *Ne domos Pantomimorum senator intropiet; ne egredientes in publicum Equites Romani cingerent; aut alibi quam in theatro spectarentur, & spectantium immodestiam exilio mulctandi potestas Prætoribus fieret.* Videte, Iudices, quam sit ars illa extinguendis seditionibus, continendo populo, ocio utiliter occupando idonea. Spectate domos ipsas hospitem turpitudine pollutas senatoriam

Tacit. l. i.

Annal. &

l. 4.

Histriones

eiekti ob

seditiones.

abollam, & patricios mulleos inquinare. Considerate quantum agentis histrionis occurfus aut aspectus ciuib⁹ Romanis dirus esset & ominosus: siquidem ne singuli seruū habere cogerentur qui obuiū submoueret (quemadmodum à Vestalibus carnifices & meretrices per licτόrem abigebātur) cum in theatrum compingebant, tanquam in ergastulum, vt in sola scena spectaretur: in scena inquam, loco tam turpi vt tanto minus ibi homo esse discat, quanto fuerit magis vir bonus. Contrarium autem Domitianus, vt est ante à me indicatum, facere coactus est, licet Paridem adamaret, & magna mala homo flagitiosissimus non improbaret. *Is enim histrionibus introduxit scenā, intra domum quidem exercendi artem iure concesso.* Hæc, inquam, est ars illa pacis & tranquillitatis publicæ conseruatricis, hi sunt homines otij nostri defensores, quos publicè priuatimque turbas cientes ne pessimi quidem Imperatores ferre potuerunt: qui si domi artem exercent, quæ flagitia priuatis parietibus non occultant? si theatra celebrant, quibus seditionibus & populi factionibus campum non aperiunt? Posteriores quoque Imperatores pari consensu in histrionibus è publico eiciendis, ne statuas quidem ipsorum in foro spectari permiserunt. Recita Rescriptum Theodosij, & filiorum de statu is histrionum.

August.
l. 1. de Con-
sensu Eu.
c. 33.

l. Si quis 4.
de specta-
culis tit.
40.

Impp. Theodosius, Aycadius, & Honorius Rufino P. P. Si quis in publicis porticibus, vel in his ciuitatum locis in quibus nostra solent imagines consecrari, pictura Pantominum veste humili, rugosis sinibus agitatore, aut vilem offerat histrionem, illico reuellatur: neque vnquam posthac liceat in loco hone-

sto, inhonestas adnotare personas. In aditu vero Circi, vel in Theatri prosceniis vt collocentur non vetamus. Sed ne omnia commemorare velle videar, quæ sunt in hoc genere infinita, vnum adiiciam quod vestra, Iudices, interest recordari: in iis videlicet causis ob quas filius à parente exhæredari potest, hanc à Magno Iustiniano constitui, Si præter voluntatem parentum inter arenarios & In Aui-
 mimos se filius sociauerit, & in hac professione per-
 manserit. Deus sancte! potest-ne vlla reperiri ar-
 ctior sanctiorque in natura rerum coniunctio
 quam filij cum parente? at eam dissoluit ars hi-
 strionica. Imaginem suam, sui particulam, sua
 viscera ob illud vnum facinus legitimè pater ode-
 rit, perdat, dissipet? viuo filio orbus pater, pa-
 tre diuite egens filius esse possit, si in histrionia
 perseueret! ô scelus! ô portentum infra mortuos
 amandandû! Nam quæ mundi regio, quæ plaga
 terrarû eos recipiet, si leges, & Principum edicta
 spectantur? Romæ habitabunt? quo loco si eos
 priuatis domibus Tiberius, scena & theatro Do-
 mitianus excludit? morabuntur in Italia? at id
 Senatus vetabit. In exercitu ergo militabunt? at
 legiones Romanæ tantum dedecus non admit-
 tent. Latebunt igitur in sinu parentum vndecun-
 que eiekti & extrusi? at nullum ibi perfugium
 est filiis omnes turpitudinû maculas in familiam
 inferentibus. Quod si monstra diris omnibus &
 execrationibus deuouemus, quod tetrius mon-
 strum fingi potest quam vt homo quispiam eius
 filius non sit, à quo est in lucem editus: eius vrbis
 ciuis esse non possit, in qua natus est: in illis ca-
 stris parentes suos videat, in quibus stipendia non

facit: Romæ solum natale vertat in barbariem, sine domino seruus, domi suæ inquilinus, hospes in patria, eiectus è tribu, laudatus in scena?

*Comædorū
& histrionum eadē
est ars &
conditio.*

Teneri aduertarium, ludices, crebra coloris mutatio admonet: quem certè iamd. u pœnitet Romano nomine artis suæ humilitatem & infamiam tegere voluisse. Et hæc fortasse oratio longior vilâ est, quod vobis trita & peruulgata commemoravi. Sed veniam ab humanitate vestra postulat causæ ipsius necessitas, imperitia populi, histrionum impudentia, quæ scriptis legibus & grauissimorum hominum testimoniis fuit reuincenda. Eorum tamen nonnulli hunc etiam exitum repererunt, ut in se negent ea cōuenire, quæ pro veris agnoscunt: siquidem mimi non sunt ipsi, & viles aliqui planipedes, sed Comædi, & è prætoris histrionum cohorte quorum vox & opera Regi & aulæ fuit in deliciis. Hæc cum dicunt, cum augustum Comædorum nomen pronunciant inclinante in aurem pileo, mysticem mulcentes, producto vestigio, luum illud *Æqualis astris gradior*, meditari videntur. Quibus ego subtile istud effugium facile intercludam si per vos, & leges Romanas licuerit, quas sine fūco & fallacia more maiorum repræsentabo. Recita Prætoris edictum de iis qui notantur infamia.

Prætoris verba dicunt, infamia notatur qui artis ludicre pronūciandi ne causa in scenam prodierit. Explica quid scenæ nomine intelligatur ab Vlpiano.

*Vlpian.
l. 6. ad edictum.*

Aut Prætor, qui in scenam prodierit infamis est. Scena autem est, ut Labeo definit, quæ ludorum faciendōrū causa quolibet loco ubi quis consistat, moueatur, ne spectaculū sui præbitoris posita sit, in publico pri-

tuato-ue, vel in vico: quo tamen loco passim homines spectaculi causa admittantur. Eos enim qui quæstus causa incertamina descendunt, & omnes propter præmium in scenam prodeuntes, famosos esse, Pegasus, & Nerva filius responderunt. Itaque si illi à scena se abstinere, si sui spectaculum non præbent, si ad eorum theatra nulli homines admittuntur, si quæstus causa nihil faciunt; sunt comædi quamlibet, & si volunt comedones: bibant modo cum Eupolide suo quicquid Alcibiades propinabit.

Venio tandem ad Græcos, quibus si non iucundissima fuisse spectacula, & artificum Dionysiacorum operam non honestam & utilem visam esse dixero, mentiar, Iudices. Licet enim Tatianus Assyrius non doctiori quam veriori oratione demonstret pulcherrimarum rerum inuenta quibus falso Græci gloriantur, aliis nationibus accepta referri debere; huius tamen negotij inuentio- nem, amplificationem, magnitudinem quanta maxima unquam fuit, Græcis hominibus volens libensque concedo. Nam ut modo prætermittam quæ hanc in rem allata sunt à Modestino, narrat historia Romana multos artifices è Græcia venisse cum M. Fulvius ludos quos Ætolico bello vouerat, exhiberet Sentio Posthumio, & Q. Martio Coss. anno v. c. 568. Deinde in triumpho L. Mummi de Achæis & Corinthiis Græcos ludos spectaculo fuisse in vrbe anno ab ea condita 608. Marcellum quoque Syracusis expugnatis scenicos artifices Romam transtulisse quasi opima de Græcis spolia: qua populi Romani indignatione non dicam, ne Græcos effugere videar,

*Apud
Græcos in
pretio fue-
runt Dio-
nysiaci ar-
tifices &
eorum spe-
tacula.*

Cassiod.
l. 3. ep. 51.

exquisita mētionē Romanorum. Denique ut apparet quam altē in Græcia labe illa infederit, quamque pertinax in ea fuerit amor ludorum, Cassiodori Senatoris æuo, Gothorum Regibus Italiam obtinentibus, Thomati cuidam aurigæ ex orientis, id est Græciæ, partibus aduenienti, cum is patria derelicta Italici sedes fouere delegisset imperij, annonā ē fisco Regio est assignata, cum talis elogij præfatione. *Quantum histrionibus rara constantia, honestumque votum, tanto pretiosior est, cū in eis probabilis monstratur, affectus. Carum est enim homini reperisse ubi aliquid se laudabile non putauerat inuenire.* Ita multis sæculis ut phœnicem, sic histrionem vnum virum bonum natura vix paraturit. Habet igitur aduersarius illam Europæ partem in qua se efferat: triumphet cum Græcis theatrorum institutoribus, & ambitiosam illam naturæ vocem, sola ex omnibus orbis terræ nationibus Græcorum prædicatione coercet.

Athenien- At quorum hominum Deus immortalis! in
ses præci- quibus perpetua leuitas, infinita loquacitas, iner-
pue libidi- tissimum & desidiosissimum otium, vsitato apud
nibus dedi- cæteras gentes proverbio deridetur: quorum sa-
ti homines pientiam pallio & barba tenus prodeuntem sola
theatra ad- superbiloquentia fecit admirabilem: Quorum
amarunt. semidei ut Socrates, ut Plato, (istis autem nominatis quæ prætermisſū existimare possumus!) fœdissimo in pueros amore exarserunt. Quam naturæ contumeliam non tantum exercuit Solon, sed etiam quasi honestam legibus sanxit: cau-uitque ut ea liberis libera esset, seruis autem minimè permetteretur. Taceo Tribadum impudentissimam nequitiam & cætera libidinū portenta
quæ

quæ sine flagitio commemorari non possunt, illi honestè facere se iactabant: hoc tantum habere, Iudices, egregij illius legislatoris temporibus Thespim poëmata sua plaustris vexisse: unde ortam Tragœdiam & Comœdiam velificante morum labe, & castitatis integra perpiciæ ad illud quod scimus incrementum peruenisse. Pudit tamen aliquando Græcos inuenti sui, vt miseras matres monstrofi partus: cum Olympiadis 85. anno r. Comœdias agi vetuerint. Sed continentia suæ breui pœnitentes anno extremo eiusdem Olympiadis legem aduersus Comœdos latam abrogarunt. Eximie profectò, & magna morum cum legibus consensione. Nam quomodo fieri poterat, vt qui in illam intemperantiam effusi essent, Comœdiam non amarent, aut qui theatris delectarentur, non profligatissime viuerent? At Heroës illos Græcos duos Atrei filios, duos Aiaces, Vlysses, Diomedem, Nestorem, ea non vexabat libidinis insania, qui tamen ludis funebribus ad Patrocli bustum iucundissime se exercebant: non se Dorico bello Codrus pro patria deuouit, verè honorum Regum vltimus, vt sua potestate in Solonem Archontem delapsa pudoris & naturæ lex lege lata abrogaretur. Maiora longè spectabat Theseus cum Atticorum ex oppidis duodecim in vnam urbem *conuelli* faceret, ei que ciuitati Dex virginis nomen inderet, magna deinde Panathenæa institueret, quam vt populus totos dies in theatris desideret, vel famosi illi *Athenienses* ad nihil aliud vacarent nisi aut dicere, aut audire aliquid noui. Non formidabat histrionum vociferationem Philippus, sed fulmina

*Lacedæ-
monij stu-
dium
theatrorū
in Athe-
nienſibus
condemna-
uit.*

Oratorum: non mirabatur deſidiam theatrorum
Xerxes tota Aſia in Græciam armatus, ſed cur-
ſum, luſtam, pancratiū, & vniuerſas quinquen-
tij exercitationes arborum frondibus compenſa-
tas: Non erant illi tanto terrori Athenæ ſuis ſedi-
bus dimotæ; quanto trecenti Lacones Thermo-
pylarum anguſtias animis ſuis oppilantes. Illi, in-
quam, Lacones flos Græciæ, qui Athenienſes iu-
re optimo ridebant, quòd quàm pecuniam nauib-
us fabricandis deberent impendere eam theatris
aſſignarent: illi Lacedæmonij apud quos non vox
in ſcena, ſed membra in campo, non thymele in
orchestra, ſed generoſa in præliis ſaltatio; non cor-
pora in lupanaribus, ſed animi in Phiditiis exer-
cebantur. Theatra igitur Græci frequentarunt.
qui? Athenienſes, apud quos Epicurus ſcholam
tenuit; Paulus Apoſtolus vix auditus eſt. Vixe-
runt Dionyſiaci artiſces, vbi? in ea vrbe in qua
Phocion capitis damnatus eſt, Phrynice meretrix
abſoluta. Flagitia ſua publicè docuerunt ludio-
pes, vbi? Athenis, vbi Socrates cicutam bibit,
Cleon & Critias imperarunt. Regnauerunt hi-
ſtriones, quo loco? Athenis, vnde ob ingenium Al-
cibiades, ob dignitatem Themisto-
cles, ob virtutem Ariſtides Oſtraciſmo ſunt eie-
cti. Coronis & præmiis donati ſunt ſcenici, à quibus?
ab Athenienſibus, qui Demetrii Phalerei ſtatuas euerterunt,
equarum Phidolæ, Cleoſthenis Cimonis iconi-
cas dedicarunt. At enim cur theatris & hiſtrioni-
bus apud populum ſapientem tantus honos habi-
tus eſt? quid? ſapientem appellas populum quem
Demosthenes, vnā facit e belluis à Minerua te-
merè adamatis? quid? bonum atque honeſtum

ēligi potuit in ea vrbe quæ hinc armis circumsonabat, & bellico strepitu, inde mercatoribus & nauticis ē tota Græcia quiescens redundabat? Quid? veræ virtutis gustum habere potuit misera & ieiuna plebs, cuius aures vndique Philosophorum mera somnia, eaq; inter se contraria garrientium clamoribus obtundebantur? quæ mente atque animo Rhetorum calliditate obscurato, sine deliberatione, sine iudicio, protensis manibus psephismata faciebat? Nam solos cogitare Socrates, Platonēs, Zenonēs: putare in ea vrbe in qua iudicia exercuerunt Areopagitæ perniciosos ciues consistere non potuisse, hominis est rerum Græcarum, imò certè humanarum stolidè imperiti.

Cur ergo illic amati histriones? profectò non ob eorum pudorem & sanctimoniam, vel Aristoteles *Cur hi- striones sint ut plurimum improbi.* teste locupletissimo: quem suis verbis loquentem audire vos, Iudices, vehementer cupio. Est enim & in hominis ingenio pondus, & in Philosophi indagatio ratio, & in vtriusque auctoritate veritas. Recita quæde histrionum improbitate scribit Aristoteles. Arrige aures Pamphile.

Cur Dionysiaci artifices ut plurimum improbi sunt? Aristot. in *Quia rationis & sapientia minimè participes sunt: ut qui pene semper in artibus ad vitam necessariis occupentur. Præterea quia maximam vitam partem in intemperantiâ traducunt, alteram in indigentia: Quorum extremorum utrumque ad improbitatem gignendam est idoneum. Quam sententiam Taurus Philosophus, ut est à Gellio proditum discipulo suo adolescenti diuini per scriptam misit quoridie lectitandam: ratus ea vna nimis acrem & parum honestum Comædorum, & Tibicinum amorem,* *Problem. sect. 30. q. 10. Gellius l. 20. c. 3.*

quo is laborabat, posse comprimi. Eadem ferme dicuntur à Cassiodoro, ne Græcum auctorem in comitatum relinquamus: cum is Tribuno voluptatum gubernandorum histrionum committit prouinciam. Selige præcipua quædam ex formula tribuni voluptatum.

Cassiod. l.
7. ep. 10.

Quamuis artes lubricæ honestis moribus sint remota, & histrionum vita vaga videatur efferrî posse licentia; tamen moderatrix prouidit antiquitas ut in totum non effluerent, cum & ipsæ iudicem sustinerent. Temperentur & hæc legum qualitate negotia, quasi honestas imperet inhonestis, & quibusdam regulis viuant qui viam rectæ conuersationis ignorant. Student enim illi non tantum iucunditati suæ, quantum aliene letitiæ; & conditione peruersa cum dominatum suis corporibus tradunt, seruire potius animas compulerunt. Quapropter Tribunum te voluptatum nostra facit electio, ne quod ad letitiam constat inuentum, tuis temporibus ad culpas videatur fuisse transmissum. Cum fama diminutis salua tua opinione versare. Castitatem dilige cui subiacent prostitute: ut magna laude dicatur, virtutibus studuit, qui voluptatibus miscbatur. His sapientiæ oraculis si adiungimus corroboratam tot postea sæculis nequitiam, aucta impunitate flagitia, superiorum temporum præ hac ætate, penè dicam, innocentiam: quis veterum dicta requirenda existimet, ut profligata histrionum vita nobis cognita sit atq; perfectæ?

*Cum Græci
potius quā
Romani
scenicos
honerarent.*

Sed ut rem definiamus, cur ex omni scelerum importunitate concretos homines summis honoribus non indignos existimarunt Græci, Romanis alia omnia sentientibus? Fatendum est, Iudices, id maximè à prava de Diis opinione profectum.

Nam quia aduersus eos religiosi videri volebant, erantque semper illorum alicui consecrata spectacula, imò sæpè propudiosa eorum facta scenicis fabulis exhibebantur. *consentaneum non putabant, vt loquitur Augustinus, cum easdem artes, eosdemque scenicos ludos etiam Diis suis acceptos viderent, illos, per quos agerentur, infamium loco ac numero de putare.* Id verò Magnus vir in Romanorum institutis concoquere non poterat, vt omnem deformandorum Deorum potestatem poëtis facerent, qui tamen ab existimatione ciuium abstinere iuberentur: vtque spectaculis Deos honorare se dicerent, qui scenicos spectaculorum actores nec plebeiam tribum, quanto minus senatoriam curiam tenere permetterent. Idem Tertulliano, idem Arnobio visum est, imminui à Romanis dignitatem Deorum, *res turpissimas Diis consecrando quas Censor animus respuat, & quarum actores inhonestos esse ius Romanum, & inter capita computari.* Arn. l. 7. *indicaui infamia.* Non probant hi quidem efficitas in theatris Deorum libidines, cum Græcos ea parte, qua illorum actoribus aditum ad honores reliquerunt, Romanis eosdem ignominia notantibus anteponunt. Sed vtrosque apud æquiores Iudices in ius vocant: alteros quod fabulas probarent, earum actores à societate ciuium remouerent: imo verò poëtas fabularum scriptores colerent, *cum rectum non videatur vt poëticorum fignentorum & ignominiosorum Deorum infamentur actores, honorentur auctores:* alteros autem quod inuerecundius quidem, sed conuenientius & fabularum, & actorum propudiis Deos crederent honorari. Ad scrupulosum illum vanæ religionis cul-

August. l. 2 de Cinit. cap. 10.

August. l. 2. de Cinit. cap. 14.

tum accessit ipsa Græcorum poëtarum industria; præsertim ex quo Cimon expeditione Persica feliciter perfunctus Tragædorum certamen instituit Olympiade 77. Ipsi enim uerò omnibus eloquentiæ artisque suæ neruis sibi gloriam, ciuibus delectationem parare connitentibus; qualem concursum ad eximios nobilium ingeniorum partus fieri ab elegantibus & otiosis hominibus oportebat? Quæ res enim alia Socratem Euripidis studiosum fecit, & in eius tragædiis summi Philosophi animum defixit & intendit, quàm tragicæ poëseos maiestas, & singuli versus pro singulis testimoniis reputati? Quis autem ad Empedoclis Agrigentini, Cratetis Thebani, Diogenis Sinopensis, Iouis Chij nobilium Philosophorum theatra, tanquam ad lyceum aut Porticum accedere non debuit, si quas illi scripserunt tragædias, recitari publicè voluerunt? Itaque artem ex superstitione quasi necessitatem ornamentis locupletauit poëtarum solertia, ut utraque illecebra, cuius est incredibilis potestas in hominum animos, currentem per se multitudinis curiositatem incitaret. Quod genus scriptionis ferè neglectum est à Romanis, qui gloriam factis quàm verbis comparare satius duxerunt: atque illa ipsa quæ gloriôsè gererent historica fide conscribi, quàm poëticiis anibagibus obscurari maluerunt.

Sentio me, Iudices, ad eum locum deuenisse, in quo actioni meæ terminos scitis esse constitutos. Nec enim ad sacros Ecclesiæ Patres transire fas est; nec ea causæ pars quæ ex illorum testimoniis conficitur, eruditissimo viro qui modo dicturus est, sine præuaricationis periculo potest detrahi.

Itaque hic mihi finiendum est perfuncto qua potui fide testificationibus antiquorum; quibus, nisi omnia me fallunt, è patentissimo naturæ campo quem gloriosus hic miles occupare se putabat, in exiguas vnius nationis, atque ne integræ quidem angustias compulsus est. Quod si absque illa spectaculorum luxuria benè constituta regna diu vigerunt: si bonis legibus imbutæ Respublicæ illa semel admissa, quasi omnibus virtutis neruis elisis in perniciem & exitium corruerunt: si Romæ apud probos contemptui, apud improbos non constanter in amore fuerunt theatrorum voluptates: si in Græcia solam Atheniensium plebeculam ut stupidas animantes tenuerunt; quis non videt quàm illud otianti genus sit inutile ciuitatibus, exitiosum moribus, legibus contrarium? Eosne, Iudices, excipietis quos proprii parentes eiecerunt? sine infamia suis in urbibus habitare non possunt, & in hac vestra honorificè residebunt? Eligite modo quorum similes in eorum causa esse velitis, an otiosorum Græculorum, aut Persarum, Ægyptiorum, Hebræorum, Gallo- rum & ipsorum optima ex parte Romanorum: liberamne contrà leges vagandi licentiam concessuri, an impositas à legibus pœnas irrogaturi sitis? Meditâmini sententiam dignam vestris auribus, hoc loco, vestra virtute. Hoc expectant omnes boni, hoc verentur improbi, hoc iam diu optat Respub. ut se importunissimorum hominum sceleribus & turpitudinibus liberetis.



GRATIANVS
CANONVM
ECCLESIASTICORVM
ET SANCTORVM
PATRVM DICTIS ATQVE
 decretis histriones penitus
 profligat.

ORATIO XII.



ANQVAM in ludicro ad a-
 ram Promethei decursu, mi-
 hi, licet impari, lampada tra-
 dis Philologe, & nō nihil cun-
 ctantem ad extremam actio-
 nis vestræ partem exequen-
 dam, non verbo potius, quàm
 exemplo excitas & impellis. Equidē satis animad-
 uertebam illata Græcanicæ superstitionis men-
 tione, refricari memoriam eius erroris, quem
 non incredibili coniectura persuadere voluit ad-
 uersarius. Sed ita me sibi totum deuinxerat ora-
 tio tua conferta omnigenæ eruditionis varietate,

vt officij animique mei penitus obliuiscerer, me-
que huc non ad agendam, sed ad audiendam cau-
sam venisse gauderem. Simul ita mihi persuade-
bam cum sensim & pedetentim progrediens in
hunc locum delapsus esses, tibi ad eum tractan-
dum voluntatis aliquid fore, cui ad salutandum
aptè & ex arte industria non defuisset. Quod si
& lassitudini vestræ, & Iudicum fastidio sic con-
sultum voluistis, vt in hæc membra causa distri-
bueretur; alteri certè committenda fuit, qui &
plurima lectione, & maxinā polleret eloquen-
tia. Quis enim præuaricationis non accuset, si
cum testes producere debeam, honestissimos ex
ignoratione præteream? cui autem ridiculum nō
videatur ab infantissimo homine viros ingenio-
sissimos & eloquentissimos in iudicium adduci,
& de re ad virtutem & religionem pertinente sen-
tentiam testimoniumque rogari? Quibus incom-
modis nisi ea qua decreui ratione mederi me, Iu-
dices, vosque actores permittitis, iam nunc pro-
fecto rem totam desinere deliberatum & consti-
tutum est. Nam quia singulos in medium profer-
re non possum, vna ista denunciatione contentos
vos esse cupio, ex antiquis Ecclesiæ Patribus qui
spectaculorum scenicorū mentionē induxerit, ea
cōprobasse neminē, omnes verbis grauissimis cō-
demnassee. Deinde ne quas imperitia mea illorum
eloquentiæ tenebras offundat, quod Philologus
in adducendis legibus, id in eorum proferendis
testimoniis obseruare me oportet, vt ea ex scri-
ptō quamlibet prolixa, nulla addita, detractaue
littera, recitentur. Cum enim de re proposita in-
terrogentur absentes, necesse est eos ex tabulis

respondere : cum autem altercationes sustinere non possint, quo prolixius dicent sententiam, eo certius clariusque de ipsorum voluntate cōstabit. Illud demum quod in me desiderari sentio, quod mihi negavit ignorantia, disertissimorum hominum admirabili facundia tegetur. Et quoniam semidocto noua & magna videri solent omnia, si quid fortasse contritum apud vos, & commune affe o : vel inscientiæ meæ excusationem accipite, vel Senecam non tam Lucilio suo, quam mihi, sapientiæ voce istud ipsum quod ago imperantē attendite. *Istis dicentibus, quousque eadem? Responde. Ego debeo dicere, quousque eadem peccabitis? Remedia ante vultis quam vitia desinere: Ego vero eo magis dicam, & quia recusatis perseuerabo. Tunc incipit medicina proficere, vbi in corpore alienato dolorem tactus expressit. Dicā etiam inuitis profutura.*

*Dicta Sā-
etorum Pa-
trum ma-
gnū au-
toritatis
pondus
apud nos
habere de-
bent.*

Sed ne vobis iniuriam facere videar, qui de vestra humanitate tantoperè dubitem, & quasi desperem; ad nostram controuersiam aggredior Iudices, eamque vobis clarè spectandam propono. Equidem accusationis partes expletas esse video: nihil habeo quod addam aut ad Modestini rationes, aut ad profana testimonia Philologi oratione producta: reliqua pars litis in veterum Ecclesiæ Patrum sententiā inquirenda vertitur: Quid de Scenicis cū actoribus, tū actionibus, quid de arte ipsa, quid de spectatores quorū gratia res ea comparata est, existiment, inter nos controuersamur. Non iam simpliciter de rei æquitate, sed de Ecclesiasticorum Doctōrum sensu atque iudicio quæritur. Atque illa sic à me proposita sunt, non tantum vt intelligat aduersarius quid hac oratio-

ne complecti velim; sed etiam vt hoc sermonis
aditu suo se præsidio deiectum esse cognoscat.
Nam quia vidit homo nō incautus grauiā sibi fo-
re Sanctorum Patrum, si proferrentur, testimo-
nia: confugit ad illud vanæ religionis perfugiū, vt
diceret initiata fuisse ritibus Ethnicis theatra, de-
dicatos ludos inanibus deorū simulacris, quibus
ideo tantū Christianis hominibus antiqui Præsu-
les interdicerent, quod ij sine inficiatione sanctis-
simæ religionis spectari non possent. Quæ ratio si
Christiani nominis antesignanos sola mouit vt
spectacula condemnarent: infirmum profecto
telum est quod ex instructissimo Ecclesiæ arma-
mentario aduersus scenicos depromitur. Sin au-
tē idololatriæ ratio turpitudinis adiuncta est, ea-
que & primis illis coryphæis iusta non modo, sed
etiam necessaria visa cur theatra execrarentur, &
ad nostra tempora nimis pertinaci successu pro-
pagata: quid est causæ cur illorum testimonia non
aduocemus, aut ea parum aduersarios lædere &
cruentare censeantur? Qua enim fronte in hoc
iudicio stabunt histriones cum ex ipsis aris & sa-
cris excitari contra se videbunt infultos nobi-
lissimarum sedium Antistites, martyrio purpu-
ratos Heroës, ingenij, eloquentiæ, & quod ma-
ximum est, sanctitatis Principes: quorum claris-
sima cum in terris viuerent auctoritas Ecclesia-
stica consecratione mirum quantum aucta & cō-
firmata est? Ij sunt, Iudices, Catholicorum dog-
matum interpretes, Christianæ virtutis regula,
Ecclesiasticarum legum latores. Eorum est pri-
uatis in Ecclesiis populum quid agat edocere, in
Conciliis Generalibus quid Ecclesia vniuersa cre-

*Laceda-
monij stu-
dium
theatrorū
in Athe-
nienſibus
condemna-
runt.*

Oratorum: non mirabatur deſidiam theatrorum Xerxes tota Aſia in Græciam armatus, ſed curſum, luſtam, pancratium, & yniuerſas quinquertij exercitationes arborum frondibus compenſatas: Non erant illi tanto terrori Athenæ ſuis ſedibus dimotæ; quanto trecenti Lacones Thermopylarum anguſtias animis ſuis oppilantes. Illi, inquam, Lacones ſlos Græciæ, qui Athenienſes iure optimo ridebant, quòd quàm pecuniam nauibus fabricandis deberent impendere. eam theatris aſſignarent: illi Lacedæmonij apud quos non vox in ſcena, ſed membra in campo, non thymele in orchestra, ſed generoſa in præliis ſaltatio; non corpora in lupanaribus, ſed animi in Phiditiis exercebantur. Theatra igitur Græci frequentarunt. qui? Athenienſes, apud quos Epicurus ſcholam tenuit; Paulus Apoſtolus vix auditus eſt. Vixerunt Dionyſiaci artiſices, ubi? in ea vrbe in qua Phocion capitis damnatus eſt, Phrynice meretrix abſoluta. Flagitia ſua publicè docuerunt ludiones, ubi? Athenis, ubi Socrates cicutam bibit, Cleon & Critias imperarunt. Regnauerunt hiſtriones, quo loco? Athenis, vnde ob ingenium Alcibiades, ob dignitatem Themiſtocles, ob virtutem Ariſtides Oſtraciſmo ſunt eiecti. Coronis & præmiis donati ſunt ſcenici, à quibus? ab Athenienſibus, qui Demetrii Phalerei ſtatuas euerterunt, equarum Phidolæ, Cleoſthenis Cimonis iconicas dedicarunt. Atenim cur theatris & hiſtrionibus apud populum ſapientem tantus honos habitus eſt? Quid? ſapientem appellas populum quem Demoſthenes, vnam facit è belluis à Minerua temerè adamatis? quid? bonum atque honeſtum

ēligi potuit in ea vrbe quæ hinc armis circumso-
nabat, & bellico strepitu, inde mercatoribus &
nauticis ē tota Græcia quisquiliis redundabat?
Quid? veræ virtutis gustum habere potuit misera
& ieiuna plebs, cuius aures vndique Philosopho-
rum mera somnia, eaq; inter se contraria garrien-
tium clamoribus obtundebantur? quæ mente at-
que animo Rhetorum calliditate obscurato, sine
deliberatione, sine iudicio, protensis manibus
psephismata faciebat? Nam solos cogitare Socra-
tes, Platones, Zenones: putare in ea vrbe in qua iu-
dicia exercuerunt Arcopagitæ perniciosos ciues
consistere non posuisse, hominis est rerum Græ-
carum, imò certè humanarum stolidè imperiti.

Cur ergo illic amati histriones? profectò non ob
eorum pudorem & sanctimoniam, vel Aristotele *Cur hi-*
teste locupletissimo: quem suis verbis loquentem *striones*
audire vos, Iudices, vehementer cupio. Est enim *sint ut plu-*
& in hominis ingenio pondus, & in Philosophi in- *rimum im-*
dagatione ratio, & in vtriusque auctoritate veri- *probi.*
tas. Recita quæde histrionum improbitate scri-
bit Aristoteles. Arrige aures Pamphile.

Cur Dionysiaci artifices ut plurimum improbi sunt? *Aristot. in*
Quia rationis & sapientiæ minimè participes sunt: *Problem.*
ut qui pene semper in artibus ad vitam necessariis oc- *sect. 30. q.*
cupentur. Præterea quia maximam vitæ partem in *10.*
inemperantiâ traducunt, alteram in indigentia: Quo-
rum extremorum utrumque ad improbitatem gignen-
dam est idoneum. Quam sententiam Taurus Phi- *Gellius l.*
losophus, ut est à Gellio proditum discipulo suo *20. c. 3.*
adolescenti diuiti perscriptam misit quoridie le-
ctitandam: ratus ea vna nimis acrem & parum
honestum Comædorum, & Tibicinum amorem,

quo is laborabat, posse comprimi. Eadem ferme dicuntur à Cassiodoro, ne Græcum auctorem incomitatum relinquamus : cum is Tribuno voluptatum gubernandorum histrionum committit prouinciam. Selige præcipua quædam ex formula tribuni voluptatum.

Cassiod. l.
7. ep. 10.

Quamuis artes lubricæ honestis moribus sint remota, & histrionum vita vaga videatur efferrî posse licentia ; tamen moderatrix prouidit antiquitas ut in totum non effluerent, cum & ipsæ iudicem sustinerent. Temperentur & hæc legum qualitate negotia, quasi honestas imperet inhonestis, & quibusdam regulis uiuant qui viam rectæ conuersationis ignorant. Student enim illi non tantum iucunditati suæ, quantum aliene lætitiæ ; & conditione peruersa cum dominatum suis corporibus tradunt, seruire potius animas compulerunt. Quapropter Tribunum te voluptatum nostra facit electio, ne quod ad lætitiā constat inuentum, tuis temporibus ad culpas videatur fuisse transmissum. Cum fama diminutis salua tua opinione versare. Castitatem dilige cui subiacent prostitute : ut magna laude dicatur, uirtutibus studuit, qui uoluptatibus miscebatur. His sapientiæ oraculis si adiungimus corroboratam tot postea sæculis nequitiam, aucta impunitate flagitia, superiorum temporum præ hac ætate, penè dicam, innocentiam : quis ueterum dicta requirenda existimet, ut profligata histrionum vita nobis cognita sit atq; perfectæ?

Cum Græci
potius quàm
Romani
scenicos
honorarint.

Sed ut rem definiamus, cur ex omni scelerum importunitate concretos homines summis honoribus non indignos existimarunt Græci, Romanis alia omnia sentientibus? Fatendum est, Iudices, id maximè à praua de Diis opinione profectum.

Nam quia aduersus eos religiosi videri volebant, erantque semper illorum alicui consecrata spectacula, imò sæpè propudiosa eorum facta sceni- *August. l. 1.*
 cis fabulis exhibebantur. *consentaneum non puta-* *2 de Cinit.*
bant, vt loquitur Augustinus, cum easdem artes, cap. 10.
eosdemque scenicos ludos etiam Diis suis acceptos vi-
derent, illos, per quos agerentur, infamium loco ac nu-
mero de putare. Id verò Magnus vir in Romanorum
 institutis concoquere non poterat, vt omnem de-
 formandorum Deorum potestatem poëtis face-
 rent, qui tamen ab existimatione ciuium abstinere
 iubentur: vtque spectaculis Deos honorare
 se dicerent, qui scenicos spectaculorum actores
 nec plebeiam tribum, quanto minus senatoriam
 curiam tenere permetterent. Idem Tertulliano,
 idem Arnobio visum est, imminui à Romanis di-
 gnitatem Deorum, *res turpissimas Diis consecrando*
quas Censor animus respiciat, & quarum actores inho-
nestos esse ius Romanum, & inter capita computari *Arn. l. 7.*
iudicauit infamia. Non probant hi quidem effi-
 citas in theatris Deorum libidines, cum Græcos
 ea parte, qua illorum actoribus aditum ad hono-
 res reliquerunt, Romanis eosdem ignominia no-
 tantibus anteponunt. Sed vtrosque apud æquio-
 res Iudices in ius vocant: alteros quod fabulas
 probarent, earum actores à societate ciuium re-
 mouerent: imo verò poëtas fabularum scriptores
 colerent, *cum rectum non videatur vt poëticorum fi-*
gmentorum & ignominiosorum Deorum infamentur *August. l. 1.*
actores, honorentur auctores: alteros autem quod in- *2. de Cinit.*
uerecundius quidem, sed conuenientius & fabu- *cap. 14.*
larum, & actorum propudiis Deos crederent ho-
norari. Ad scrupulosum illum vanæ religionis cul-

tum accessit ipsa Græcorum poëtarum industria; præsertim ex quo Cimon expeditione Persica feliciter perfunctus Tragædorum certamen instituit Olympiade 77. Iplis enim uerò omnibus eloquentiæ artisque suæ neruis sibi gloriam, ciuibz delectationem parare connitentibus; qualem concursum ad eximios nobilium ingeniorum partus fieri ab elegantibus & otiosis hominibus oportebat? Quæ res enim alia Socratem Euripidis studiosum fecit, & in eius tragædiis summi Philosophi animum defixit & intendit, quàm tragicæ poëseos maiestas, & singuli versus pro singulis testimoniis reputati? Quis autem ad Empedoclis Agrigentini, Cratetis Thebani, Diogenis Sinopenfis, Iouis Chij nobilium Philosophorum theatra, tanquam ad lyceum aut Porticum accedere non debuit, si quas illi scripserunt tragædias, recitari publicè voluerunt? Itaque artem ex superstitione quasi necessitatem ornamentis locupletauit poëtarum solertia, vt vtraque illecebra, cuius est incredibilis potestas in hominum animos, currentem per se multitudinis curiositatem incitaret. Quod genus scriptionis ferè neglectum est à Romanis, qui gloriam factis quàm verbis comparare satius duxerunt: atque illa ipsa quæ gloriosè gererent historica fide conscribi, quàm poëticiis anibagibus obscurari maluerunt.

Sentio me, Iudices, ad eum locum deuenisse, in quo actioni meæ terminos scitis esse constitutos. Nec enim ad sacros Ecclesiæ Patres transire fas est; nec ea causæ pars quæ ex illorum testimoniis conficitur, eruditissimo viro qui modo dicturus est, sine præuaricationis periculo potest detrahi.

Itaque hic mihi finiendum est perfuncto qua potui fide testificationibus antiquorum; quibus, nisi omnia me fallunt, è patentissimo naturæ campo quem gloriosus hic miles occupare se putabat, in exiguas vnius nationis, atque ne integræ quidem angustias compulsus est. Quod si absque illa spectaculorum luxuria benè constituta regna diu vigerunt: si bonis legibus imbutæ Respublicæ illa semel admissa, quasi omnibus virtutis neruis elisis in perniciem & exitium corruerunt: si Romæ apud probos contemptui, apud improbos non constanter in amore fuerunt theatrorum voluptates: si in Græcia solam Atheniensium plebeculam ut stupidas animantes tenuerunt; quis non videt quàm illud otianti genus sit inutile ciuitatibus, exitiosum moribus, legibus contrarium? Eosne, Iudices, excipietis quos proprii parentes eiecerunt? sine infamia suis in vrbibus habitare non possunt, & in hac vestra honorificè residebunt? Eligite modo quorum similes in eorum causa esse velitis, an otiosorum Græculorum, aut Persarum, Ægyptiorum, Hebræorum, Gallorum & ipsorum optima ex parte Romanorum: liberamne contrà leges vagandi licentiam concessuri, an impositas à legibus pœnas irrogaturi sitis? Meditamini sententiam dignam vestris auribus, hoc loco, vestra virtute. Hoc expectant omnes boni, hoc verentur improbi, hoc iam diu optat Respub. ut se importunissimorum hominum sceleribus & turpitudine liberetis.



GRATIANVS
CANONVM
 ECCLESIASTICORVM
 ET SANCTORVM
 PATRVM·DICTIS ATQVE
 decretis hiftriones penitus
 profligat.

ORATIO XII.



ANQVAM in ludicro ad a-
 ram Promethei decursu, mi-
 hi, licet impari, lampada tra-
 dis Philologe, & nō nihil cun-
 ctantem ad extremam actio-
 nis vestræ partem exequen-
 dam, non verbo potius, quàm
 exemplo excitas & impellis. Equidē satis animad-
 uertebam illāta Græcanicæ superstitionis men-
 tione, refricari memoriam eius erroris, quem
 non incredibili coniectura persuadere voluit ad-
 uersarius. Sed ita me sibi totum deuinxerat ora-
 tio tua conferta omnigenæ eruditionis varietate,

vt officij animique mei penitus obliuiscerer, me-
que huc non ad agendam, sed ad audiendam cau-
sam venisse gauderem. Simul ita mihi persuade-
bam cum sensim & pedetentim progrediens in
hunc locum delapsus esses, tibi ad eum tractan-
dum voluntatis aliquid fore, cui ad salutandum
aptè & ex arte industria non defuisset. Quod si
& lassitudini vestræ, & Iudicum fastidio sic con-
sultum voluistis, vt in hæc membra causa distri-
bueretur; alteri certè committenda fuit, qui &
plurima lectione, & maxima polleret eloquen-
tia. Quis enim præuaricationis non accuset, si
cum testes producere debeam, honestissimos ex
ignoratione præteream? cui autem ridiculum nō
videatur ab infantissimo homine viros ingenio-
sissimos & eloquentissimos in iudicium adduci,
& de re ad virtutem & religionem pertinente sen-
tentiam testimoniumque rogari? Quibus incom-
modis nisi ea qua decreui ratione mederi me, Iu-
dices, vosque actores permittitis, iam nunc pro-
fecto rem totam desinere deliberatum & consti-
tutum est. Nam quia singulos in medium profer-
re non possum, vna ista denunciatione contentos
vos esse cupio, ex antiquis Ecclesiæ Patribus qui
spectaculorum scenicorū mentionē induxerit, ea
cōprobasse neminē, omnes verbis grauissimis cō-
demnasse. Deinde ne quas imperitia mea illorum
eloquentiæ tenebras offundat, quod Philologus
in adducendis legibus, id in eorum proferendis
testimoniis obseruare me oportet, vt ea ex scri-
ptō quamlibet proluxa, nulla addita, detractaue
littera, recitentur. Cum enim de re proposita in-
terrogentur absentes, necesse est eos ex tabulis

respondere : cum autem altercationes sustinere non possint, quo prolixius dicent sententiam, eo certius clariusque de ipsorum voluntate cōstabit. Illud demum quod in me desiderari sentio, quod mihi negavit ignorantia, disertissimorum hominum admirabili facundia tegetur. Et quoniam semidocto noua & magna videri solent omnia, si quid fortasse contritum apud vos, & commune affe o : vel inscientiæ meæ excusationem accipite, vel Senecam non tam Lucilio suo, quam mihi, sapientiæ voce istud ipsum quod ago imperantē attendite. *Istis dicentibus, quousque eadem? Responde. Ego debeo dicere, quousque eadem peccabitis? Remedia ante vultis quam vitia desinere: Ego vero eo magis dicam, & quia recusatis persēuerabo. Tunc incipit medicina proficere, ubi in corpore alienato dolorem tactus expressit. Dicā etiam inuitis profutura,*

*Dicta Sā-
ctorum Pa-
trum ma-
gnū au-
toritatis
pondus
apud nos
habere de-
bent.*

Sed ne vobis iniuriam facere videar, qui de vestra humanitate tantoperè dubitem, & quasi desperem, ad nostram controuersiam aggredior Iudices, eamque vobis clarè spectandam propono. Equidem accusationis partes expletas esse video: nihil habeo quod addam aut ad Modestini rationes, aut ad profana testimonia Philologi oratione producta: reliqua pars litis in veterum Ecclesiæ Patrum sententia inquirenda vertitur: Quid de Scenicis cū actoribus, tū actionibus, quid de arte ipsa, quid de spectatōribus quorū gratia res ea comparata est, existiment, inter nos controuersamur. Non iam simpliciter de rei æquitate, sed de Ecclesiasticorum Doctōrum sensu atque iudicio quæritur. Atque illa sic à me proposita sunt, non tantum vt intelligat aduersarius quid hac oratio-

ne complecti velim; sed etiam vt hoc sermonis aditu suo se præsidio deiectum esse cognoscat. Nam quia vidit homo nō incautus grauiā sibi fore Sanctorum Patrum, si proferrentur, testimonia: confugit ad illud vanæ religionis perfugiū, vt diceret initiata fuisse ritibus Ethnicis theatra, dedicatos ludos inanibus deorū simulacris, quibus ideo tantū Christianis hominibus antiqui Præsules interdicerent, quod ij sine inficiatione sanctissimæ religionis spectari non possent. Quæ ratio si Christiani nominis antesignanos sola mouit vt spectacula condemnarent: infirmum profecto telum est quod ex instructissimo Ecclesiæ armamentario aduersus scenicos depromitur. Sin autē idololatriæ ratio turpitudinis adiuncta est, eaque & primis illis coryphæis iusta non modo, sed etiam necessaria visa cur theatra execrarentur, & ad nostra tempora nimis pertinaci successu propagata: quid est causæ cur illorum testimonia non aduocemus, aut ea parum aduersarios lædere & cruentare censeantur? Qua enim fronte in hoc iudicio stabunt histriones cum ex ipsis aris & sacris excitari contra se videbunt infulatos nobilissimarum sedium Antistites, martyrio purpuratos Heroës, ingenij, eloquentiæ, & quod maximum est, sanctitatis Principes: quorum clarissima cum in terris viuerent auctoritas Ecclesiastica consecratione mirum quantum aucta & confirmata est? Ij sunt, Iudices, Catholicorum dogmatum interpretes, Christianæ virtutis regula, Ecclesiasticarum legum latores. Eorum est priuatis in Ecclesiis populum quid agat edocere, in Conciliis Generalibus quid Ecclesiæ vniuersa cre-

dat, decernere. Eorum scripta tanto consensu recepit, tam fideliter conseruat, tanta cum reuerentia legit populus Christianus, vt vnus illorum dicto vnico, & breui sententia in omnem se partem flecti patiatur: rectè arbitratus quicquid ab illis sapientiæ Christianæ fontibus emanauit, purum & salutare futurum. Ipsa vero Theologia quæ via ac ratione traditur, licet commentationis exquisitæ priuilegio auctorum dicta possit ad calculos reuocare; tamen contra vnus è Sanctis Patribus auctoritatem venire, religiosum habet; pluribus autem contradicere sacrilegio & insanix proximum. Quæ quidem eo consilio dicuntur à me, Iudices, vt cum illi contra scenicos artifices loquentur, non Liuios & Herodotos, non Senecas & Tacitos, non Homeros & Platones, quibus sæpè non credere iubet religio, sed Ecclesiæ magistros, orbis Christiani oracula, Deo instinctos homines, dicta ad sacrarum literarum auctoritatem, quantum homini fas est, accedentia vos audire credatis. Te vero, Panurge, sperare nolo me in illa vna idololatria, aut fabularum obscenitate semper habitaturum: sed quando & te vt mendacem, oportet esse memorem, & me vt Iurisconsultum Pontificium pollere memoria, illa, quæ temerè per orationem sparsisti, mendacia, reuinci audies. Ita mirabuntur Iudices & te tam multa vno spiritu mentiri potuisse, & esse aliquos in opinione sapientiæ qui eiusmodi præstigiis circumscribantur. Nihil è meo sensu depromam, non exaggerabo dicta sapientum: si quid tibi tuique studiosis ingratum protulero, non mihi sed Præsulibus sanctissimis, sed Con-

ciliis amplissimis , sed Ecclesiasticæ disciplinæ assignari volo , qualis tum in orbe viguit , cum cœli ciues Ecclesia nutriebat.

Itaque ut in omen amplioris victoriæ id quod à te ultro conceditur, quoniam negari non potest, assumam ; in turpi vanorum Deorum superstitione mecum profiteris spectaculorum tuorum amorem & insaniam esse fundatam. Id enim conceptis verbis à Cypriano & Tertulliano scriptum fuisse dixisti. Sed addis eam rationem in hæc tempora non conuenire, quibus simulacrorum cultus interiiit. Putas-ne tantam originis sceditatem mutatione temporum potuisse deleri ? Videtur-ne tibi quod infamium numinum cultui dedicatum & institutum est, ritè & conuenienter ad Christianos mores transmitti ? Quo tu iure ludos scenicos potius, quam Romana lætisternia, mysteria Eleusinia, sacra Isidis, hecatombas, auguria, in Christi fidem introduces ? Si etiam Tertulliani ætate Dæmon in theatro quasi in suo habitabat, ibique inuentam Christianam mulierem iustissimè occupabat, quis eum ab illa possessione deiecit ? quis ab antiqua domo Græcorum Romanorumque omnium admirabili consensu tradita cupidum & tenacem dominum exturbauit ? quibus suffimentis expiata scena, quibus ritibus consecrata, ab Dæmonum cultu ad sanctissimæ religionis vsum, quod de fanis & delubris legimus, traducta est ? Alia, inquis, sunt tempora. An etiā mutata rerū natura est ? an alea, an adulteria, an sacrilegia, rapinæ, incendia vetita esse desierunt ex quo Christiana religio nostras consuetudines innouauit ? Quæ est autem illa ætatum in-

*Speſtacu-
la ſcenica
originem
ducunt ab
Idolola-
tria.*

tercapedo? quæ tanta temporum conuersio? nostrum, opinor, sæculum cum Pyrrho & Camillo comparas, & Tertullianum Soloni & Euandris æqualem facis: puerorum more qui si pagi sui limites exceßerint, continuo se in barbaras & ignotas terras delatos esse arbitrantur. Saluiantum, nam & hunc appellasti, ad quæ tempora referendum censes? Profecto ad Christiana, post Theodosios & Constantinos, post Valentinianos & Honorios: cum omnes Imperij Romani plagæ Christi fide resonarent, cum Ecclesia Gallicana doctrina & sanctitate floreret, cum Idolorum nomina vix iam in libris & chartis legerentur. At is exaggerationem illam, vt vocas, Romanorum suorum, hoc est perfectiorum quam nostra tempestate existant, Christianorum auribus intrudēbat; cuius quādo tu partē expressisti, totam à me non inuitus accipies: vt Gallicanus istetam boni nominis Antistes primus è sacra cohorte procedat in campū. Recita Saluiani amplificationem de Christi fide in spectaculis eiurata.

Saluian.

l.6. de Pro-
uid.

Quæ recordia est & amentia vt putemus risum & gaudium tantū non esse, nisi Dei in se habeat iniuriā? Iniuriā vtiq; & maximā. In spectaculis enim quadam apostasia fidei est; & à symbolis ipsius, & cœlestibus sacramentis lethalis prauaricatio. Quæ est

*In specta-
culis quæ-
dam apo-
stasia fidei
est.*

*enim baptismo salutari Christianorum pri- na confes-
sio? quæ scilicet? nisi vt renunciare se Diabolo, ac pom-
pi eius, atq; spectaculis & operibus protestetur? Quo-
modo igitur, o Christiane, spectacula post baptismum
sequeris, quæ opus esse Diaboli confiteris? Renunciasti
semel Diabolo, & spectaculis eius; ac per hoc necesse est
prudens & sciens dum ad spectacula remeas, ad Dia-*

bolum redire te cognoscas. Virique enim rei simul renunciaſti, & vnum vtrumque eſſe dixiſti. Si ad vñ reuerteris, ad vtrumque remeaſti. Diabolus eſt in ſpectaculis, pompis ſuis; ac per hoc cum redimus ad ſpectaculum, relinquinus fidem Chriſti. Si quid ſimile eſſet apud Barbaros ubi Circenſes, theatra, ubi ſcelus diuerſarum impuritatum, minore culpa ſacræ offenſionis erraretur: eiſi eſſet impuritas viſionis, præuaricatione tamen non erat ſacramenti. Nos verò quid reſpondere pro nobis poſſumus? Tenemus ſymbolum & euertimus: conſitemur munus ſalutis pariter & negamus. Ac per hoc ubi eſt Chriſtianitas noſtra, qui hoc tantummodo ſacramentum ſalutis accipimus, vt maiore poſtea præuaricationis ſcelere peccemus? Poſſem alios eiſdem ſententiæ Patres appellare: ſed vnus ita ſenſiſſe videatur Saluianus. An ſeptem & viginti ſupra ducentos Episcopii qui Sextæ Synodi quam Trullanam vocant, canones Imperante Iuſtiniano Rhinotmetro ediderunt, Chriſtianis temporibus vixiſſe cenſendi ſunt? At ij perſonas ſcenicas à Chriſtianorum manibus extorquent, quia illa profanorum numinum reliquias ſapiunt. Recita decretum Concilij Sexti in Trullo de ſaltationibus, & perſonis hiſtrionicis.

Eas quæ nomine eorum qui falſo apud Græcos Diſc Concil. 6. nominati ſunt, vel nomine virorum ac mulierum in Trullo. ſiunt ſaltationes ac myſteria, more antiquo & à vita Can. 62. Chriſtianorum alieno, amandamus & expellimus; ſtatuentes vt nullus deinceps vir muliebri veſte induatur, vel mulier veſte viro conueniente: ſed neque comicas vel ſatyricas, vel tragicas perſonas induat: neque execrandi Bacchi nomen vnquam

*Larua co-
mica à
Damonis
impostura
procedunt.*

in torcularibus exprimentes innocenti, neque vi-
num in doliis effundentes risum moueant: igno-
rantia vel vanitate ea quæ à Damonis impostu-
ra procedunt, exercentes. Eos ergo qui deinceps,
aliquid eorum quæ scripta sunt, aggredientur,
ubi ad horum cognitionem peruenerint, si sint qui-
dem clerici, deponi iubemus; si vero laici, segregari.

*De specta-
culorum
scenicorum
obscœnita-
tem pluri-
mi Eccle-
sia Patres
invehun-
tur.*

Sed hæc modo prætermittamus quæ liberali ad-
uersariorum confessione concluduntur; ad aliud
vituperationis caput iamdiu festinat oratio. Ge-
scenicorum stit enim ea vobis expōnere quæ de spectaculo-
rum scenicorum obscœnitate & nequitia viri gra-
uissimi omnibus eloquentiæ Christianæ neruis
persuaserunt. Quæ quidem in re pictores eximios
imitari mihi videntur, qui Therſites & similis de-
formitatis monstra tanta & tam exquisita arte re-
præsentant, vt qui viuæ spirantes omnium ocu-
los offendunt, in tabula summa cum voluptate
spectentur. Sic homines illi sanctissimi theatra
impuritatū omnium sentinam & cloacam tan-
ta cum facundia nostris animis obiciunt, vt quæ
ipsa in se sine scelere, & virtutum omnium perni-
cie spectari non possunt, ea in istorum scriptis
summa cum pietate & religione videantur. Au-
dite, Iudices, eloquentiæ fulmen, Africæ lumen,
Carthaginensem antistitem sanctitate celebrem,
martyrio purpuratum. Recita Cypriani testimo-
nium de theatrorum lasciuia.

*Cyprianus
l. de spe-
taculis.*

*Vt ad scenæ iam sales inuerecundos transitum faciã,
pudet referre quæ dicuntur, pudet etiam accusare quæ
sunt, agentium strophas, adulterorū fallacias, mulie-
rum impudicitias, scurriles iocos, parasitos sordidos,
ipſos quoque patres familias rogatos, modo stupidos,
modo*

modo obscænos, in omnibus stolidos, certis nominibus, *Theatrum*
 inuerecundos. Et cum nulli hominum aut generi aut pudoris pu-
 professioni ab improbis isto sermone parcatur, ab om- blici lupa-
 nibus tamen ad spectandum conuenitur. Commune de- narium.
 decus delectat vel recognoscere vitia, vel discere. Con-
 curritur in illud pudoris publici lupanarium, ad ob-
 scœnitatis magisterium; ne quid in secreto minus aga-
 tur quàm quod in publico discitur, & inter ipsas leges
 docetur, quicquid legibus interdicitur. Quid inter hæc
 Christianus fidelis facit cui vitia non licet nec cogi-
 tare? Quid oblectatur simulacris libidinis, ut in ipsis
 deposita verecundia audacior fiat ad crimina? Discit
 facere, dum consuescit videre. Quid loquar comicas
 inutiles curas? quid illas magnas tragica vocis insa-
 nias? quid neruos cum clamore missos? hæc etiam si non
 essent simulacris dicata, obeunda tamen spectacula
 non essent Christianis fidelibus: quoniam etsi non ha-
 berent crimen, habent tamen in se maximam & pa-
 rum congruentem fidelibus vanitatem. Ista nisi Lati-
 nè intelligeres, Panurge, in nostra tempora nimis
 aptè quadrare monstrarem Atq; vtinam Græcos
 fontes vel summis labris dégustasses, deducerem
 te non sine summa animi tui voluptate, si quid bo-
 ni sapere velles, ad aureum eloquentiæ flumen,
 Chrysostomum, cuius nomen infra meritum est,
 supra famam eloquentia. Is nouam in Oriente
 Romam vitæ sanctitate, & admirabili doctrina
 excoluit urbem ab omnibus simulacris, & Genti-
 lium ritibus semper immunem: in ea Pontificem
 gessit Imperatoribus Romanis orbe toto Idolo-
 rum superstitionem præcipitantem impellenti-
 bus, & perditam prosternentibus. Itaq; quicquid
 in populo reprehendit, id profectò Christianis

temporibus in vrbe Christianis cerimoniis dedicata, à populo Christianis mysteriis initiato, eximius Christianæ Religionis doctor factum esse conqueritur. Quid autem sæpius, quid vehementius insectatur quàm theatra? in qua magis concione vel legenda exhorrescimus, quàm cum totum eloquentiæ fulmen in scenicos, in turpitudinem theatrorum, in spectatorum adulteria emittit? Nolite vereri, Iudices, ne omnia illius in hanc rem dicta cum fastidio persequar: sed aliqua saltem decerpere & orationis dulcitus luadet, & cogit officium. Itaq; cum diuinus ille orator Antiochenæ plebi Euangelium Matthæi explicaret, euenit vt tū temporis scenicum exhiberetur spectaculum, quo mulieres in Euripo natantes inducebantur. Audite admirabilē tantæ & talis impudiciæ censorem. Recita Chrysostomi inuectionem in meretrices publicè in theatro natantes.

Chrysost.

homil. 7. in

Matth.

Aqua illa pelagus quoddam est immane luxuria, quo non corpora submerguntur, sed naufragium inferitur animabus. Nam illa quidem in medijs aquis nuda ludit natatur: tu verò de sub imi spectans gradu in libidinis profunda demergeris. Huiusmodi enim diaboli retia, non tam in illam descendentes aquam, ibiq; se volutantes capiunt, quàm sursum sedentes. Multo quippe hi sanius suffocantur, quàm Pharaon ille quondam cum curribus suis, equitibusque submersus est.

Perniciem theatrorū nominant voluptatē.

Atque utinam animas undis illis supernatantes vestris oculis possem obuiocere, non aliter profecto apparent quàm Egyptiorum corpora, quæ fluctibus voluebantur. Sed illud est multo sane periculosius, quod eiusmodi perniciem nominant voluptatem, & immane illud perditionis pelagus, Euripū delectationis

appellant: cū certe facilius aliquis ac tutius *Aegeum* mare transeat & *Tyrrhenum*, quam illius spectaculi horrenda discrimina. Nam primo quidem per totam noctem expectatione nimis anxia, talium *Diabolus* corda sollicitat: deinde id quod tam cupide fuerat expectatum ostendit, quo continuo eos ligat ducitque captiuos. Neq; enim si mixtus meretrici non es, immunitatem te putes esse peccati, cum totum illud voluntate commiseris. Nā si ab huiusmodi concupiscentia possideris, ingenti flamma profecto succenderis. Sin verò hec aspicienda nihil pateris, culpa nihilominus tenebris obnoxius, factus scilicet scandalum ceterorū, & talium adhortatio voluptatum, tuamq; faciem ipse confundis, animamque cum facie. Regredere ad propriæ nobilitatis insigne, & immensum illud gehennæ pelagus flumenq; igneum fuge, id est, pestiferam illam piscenam theatri. Hac est enim quæ spectatores suos in flammeum illud pelagus mergit quæq; profundum illius ignis accendit. Si enim ille qui absque his irritamentis videt fœminam, interdum tamen ad concupiscendum trahitur, & tantummodo videndo mœchatur, qui non solum videt, sed etiam totam undecumque nudam, & lasciuientem videt, qui non millies libidinis captiuus efficitur. Quid est *Histrion*? cur tamdiu iratum agis & indignantem: Video quid cogites: per calumniam te peti existimas, quasi meretricios illos *Euripos* in sphaeristeriis tuis fluere accusem. Hoc non dico, *Panurge*, hoc conficere non proposui: Sed vnam ab Ecclesiasticis concionatoribus in theatris Idololatriam reprehendi clamas: ego impudicitiae quoque crimen ab illis intendi confirmo. Possum ne eius rei locupletiorē aduocare testem *Chrysostomo*, aut urbem

magis, ut sic loquar, Christianam nominare Antiochia, in qua Christianum nomen ortum, à qua in reliquas terrarum oras propagatum est, quæ Iulianum Cæsarem illum desertorem palam in theatro conuiciis verberauit? Magna vis est naturæ, Iudices: erubescit Histrio de patribus suis: damnat magisterium, quod non imitatur: reperi- tum est aliquid in theatro, à quo ipsi actores ab- horreant. Sed esto sanè, id impudicus aliquis ar- tífex oculis hominum semel tantum obiecerit: nonne & alias turpitudinum formas inflectatur Antiochenus orator? Certè, qui theatra Babylo- nicam fornacem & Ægyptium scortum vocare non veretur. Recita quæ de aliis scenæ obscœni- tatibus à Chrysostomo differuntur.

Chrysost.
hom. 38. in
Matth.

Quis est ille theatralium hominum adeo magnus so- nitus? quis tantus tumultus? qui Diabolici clamores? qui vestitus satanicus? alius cum adolescens sit, cri- men nutrit & naturam aspectu, vestitu, incessu, cete- risque huiusmodi effœminando, ad teneriuscula ima-

Histrio-
num vesti-
tus satani-
cus.

ginem puella deducere contendit. Alius è contra cum sit senex, nouacula pilos & pudorem omnem abrasus, cinctus assistens, ad dicendum, ac faciendum omnia paratus est. Mulieres autem nudo, atque aperto capi- te populum absque rubore alloquuntur, tantaque pre- meditatione impudentiam asciscunt, tantamque las- ciuiam in audientium, atque videntium animos in- fundunt, ut uno omnes animo radicatus modestiam è mentibus suis euellere, dedecore muliebrem naturam afficere, perniciofa voluptate cupiditates suas imple- re conari videantur. Cuncta enim simpliciter quæ ibi fiunt turpissima sunt, verba, vestitus, tonsura, incessus, voces, camus, modulationes, oculorum euerfiones, ac

motus, tibia, fistula, & ipsa fabularum argumenta: omnia, inquam, turpi lascivia plena sunt. Dic ergo, quando à tanta fornicationis cupidine, quam tibi Diabolus insudit, te ipsum recipies atque resipisces? Non enim ignoramus quot ibi fornicationes peragantur, quot adulteriis matrimonia maculentur, quot viri muliebria patiantur, quot iuvenes effæminentur. Cuncta iniquitatis summa, cuncta prodigiorum, cuncta impudentia plena sunt. De hoc, opinor, credamus Chrysostomo, neque innumera quæ lulentam illam Camarinam apud sanctissimos scriptores indicant, moueamus. Illud est Sapiens & plenum verecundiæ Saluiani consilium. Recita Saluiani sententiam de scenæ flagitiis non commemorandis, ut sibi gratulentur Histriones eximiam in agendo impudentiam, quam ne referre quidem lex modestiæ patiatur.

Alia crimina singulas sibi fermè in nobis vindicant portiones, ut cogitationes sordide animas, ut impudici aspectus oculos, ut auditus improbi aures: ita ut cum ex his unum aliquid errauerit, reliqua possint carere peccatis. In theatris verò nihil horum reatu vacat; quia & concupiscentiis animus, & auditu aures, & aspectu oculi polluantur. Quæ quidem omnia tam flagitiosa sunt, ut etiam explicare ea quispiam atque eloqui saluo pudore non valeat. Quis enim integro verecundiæ statu dicere queat illas rerum turpium mutationes, illas vocum & verborum obscœnitates, illas motuum turpitudines, illas gestuum fœditates? Quæ quanti sint criminis vel hinc intelligi potest, quod religionem sui interdiciunt. Nonnulla quippe etiam maxima scelera quæ incolumi honestate referuntur, & nominari & argui possunt, ut homicidium, latrocinium,

Saluian. l. 6. de Pron.

Nulla pars hominis reatu vacat in theatris.

adulterium sacrilegium, ceteraq; in hunc modum. Sole theatrorum sunt impuritates quæ honestè non possunt accusari: ita noua in arguenda harum turpitudinum probrositate res euenit arguenti, ut cum absq; dubio honestus sit qui accusare ea velit, honestate tamen integra ea loqui & accusare non possit. Quibus hæc auribus accipitis, Iudices? quis clamor tali silentio, quæ accusatio illa cessatione potest esse vehementior? adulterium, inquit Saluianus, honestè nominari potest & argui, scenæ procacitas & nequitia non potest. Fuit-ne vnquam omni hominum memoria in priuatis domibus quicquam matrimoniorum sanctitate pretiosius? vllum-ne flagitium consiliis sapientium, Regum legibus, populorum omnium consensu seuerius punitum est, etiam ante periuria, & sacrilegia, quàm adulterium? quo ex fonte plures cædes, tumultus, seditiones emanant quàm ex toro geniali polluto? quid aliud Regna florentissima euertit quàm macula vxori alienæ illata? hæc petulantia Græcos armavit in Troiam, Regnum Mycænarum euertit, Tarquinius Roma eiecit. Adulterij nomine audacia, impudentia, crudelitas, parricidium, continetur; & plus aliquid in theatro spectatur. Aude nunc, Histrio Tragædiarum tuarum grauitatem nobis venditare: dic paucorum vitio libidinem in eas irrepisse: da hominibus nō superstitiosis corrigendas, qui totas vndecunq; vno spongiæ ductu obliterent. Nam si potuit aliter fieri scena modestior, cur eam vnus aliquis è tot Poëtarū, Histriorum, spectatorum millibus sub Christianis Imperatoribus, post tot tantasq; Antistitum religiosissimorū obiurgationes non emendauit: cur Patrū

Falso dixit aduersarius paucorum culpalascentiam in theatra innotuam.

aliquis nō defendit, aut certē in rebus indifferētib^{us} numerauit? Nā qui leuissimē de theatrorū voluptate loquutus est Cassiodorus, fateri cogitur non malū per se inuentū fuisse temporū vitio deprauatū. *Ætas subsequens, inquit, miscens lubrica, priscorū inuenta traxit ad vitia, & quod honesta causa delectationis repertum est, ad voluptates corporeas precipitatis mōtibus impulerunt.* Ceteri omnes & in origine vitiū & in vsu flagitium deprehenderunt. Rides enim superstitionem meam qui pretextatis illis verbis, qui venereis osculis, qui riuālium zelyptia offendar. Ita sum factus, Panurge, adeo mihi tener animus & imbecillis est, vt talia me terreant. Tibi robustior mens est; turpia omnia vt turdum deuoras, libidinum pulegium vt muriam concoquis. Fruere sanē, dum ego cum Cyprianis, Hieronymis, Chrysostom. Augustinis, Saluianis, Gregoriis, & Tert. superstitionis hominibus, & nullius animi, scrupulosiores delicias cōsectabor.

Imo, virtutis res est, inquis: nam theatra vt publicæ probitatis scholæ aperiuntur. Ignosces, histrio, si mihi sodalibusque meis nondum in mentem venit talem scholam tenere, aut vestram frequentare. Nesciebam ludum dari in sphæristeriis literario meliorē. Sed antequam id ago, permitte ne superstitiones meos, tanquam oracula Sibyllina, aut lineos libros consuli? Quid autem illic à vobis doceri monēc? quid Augustinus cum theatra *caueas turpitudinum, & publicas professiones flagitiorum appellat?* Quid Tertullianus cum theatrū *proprie sacrarium Veneris, Liberi quoque domum esse ait, quæ duo demonia conspirata & coniurata inter se sunt ebrietatis & libidinis.* Quid noster Chrysosto

Cassiod. l.
4. Variar.
epist 51.

Virtutem
in theatris
edoceri
quā tem
erē ias
et arit ad
uersarius.
Aug. l. 1.
de Cinit.
Dei c. 32.

Tert. l. de
spect c. 10.

Chrysost. mus cum carcerem theatris conferens, imo longè
 hom. 62. ad præferens, in illo demonstrat modestiam & piete-
 pop. Ant. tem percipi; in theatro verò contraria esse omnia
 & hom. 41. asseuerat, in quo reperitur risus, ineptitudo, Dia-
 in acta A- bolicus fastus, effusio, temporis impendium, & super-
 postol. flua dierum consumptio, male cupiditatis inductio,
 adulterij meditatio, fornicationis gymnasium, intem-
 perantia schola, turpitudinis exhortator, risus mate-
 ria, inhonestatis exempla. Sed ut arbitror suspecta
 habes quæ ex tabulis non recitantur. Audio: vox
 pragmatici desideratur. Recita quæ de isto turpi-
 tudinis magisterio censuit Cyprianus.

Cyprian. In theatris conspicies quod tibi & dolori sit, & pu-
 ep. 2. ad dori. Cothurnus est tragicus prisca carmine facinora
 Donatum. recensere: de parricidiis & incestis horror antiquus
 expressa ad imaginem veritatis actione replicatur, ne
 seculis transeuntibus exoleseat, quod aliquando com-
 missum est. Admonetur atas omnis auditu, fieri posse
 quod factum est. Nunquam cui senio delicta moriun-
 tur: nunquam temporibus crimen obruitur: nunquam
 scelus obliuione sepelitur. Exempla sunt quæ esse iam
 facinora destiterunt. Tunc delectat in mimis turpitu-
 dinum magisterio vel quod domi gesserit, recognosce-
 re, vel quid gerere possit audire. Adulterium discitur
 dum videtur; & lenocinante ad vitia publica aucto-
 ritatis malo quæ pudica fortasse ad spectaculum ma-
 trona procefferat, de spectaculo reuertitur impudica.

Leones sūt Consiste hic lector, ne iterum ad illas obscœnita-
 ij magi- tum species relabaris. Atq; totum hunc locum li-
 stratus qui benter silentio præteruectus essem, Iudices, nisi ad
 scenicos in Cyprianū causa reuocasset. Vereor enim ut alicui
 urbem ad- vestrum litem intendere videar, quod olim homi-
 mittunt. nes isti vobis deceptis in urbem obrepserunt, &

suum illum, quo de loquimur, ludum instituerunt. Hoc publicæ auctoritatis lenocinium vocat Cyprianus: Lenones ait esse magistratus qui id permittant, aut imperent. Neque enim Dordalus aut Ballio meretrices locarent in theatro, nisi rectorum ciuitatis voluntate meretrices in theatrum deducerentur. O leges Iuliæ! o magistratum sanctitas! quibus matronarum pudor & virginum verecundia Reip. voce commissæ est. O Histrionum infamia! quæ populi Principes cum affluit, de repente mutat in lenones. Quid? ea matrona quæ Lucretia processit ad theatrum si vel animo Helena rediit, magistratu lenocinante corrupta est? Quid? ætas adolescentior vtriusque sexus si quid indignum oculis atque auribus excepit, ab ipsis parentibus prostituta est? Quid? urbis Optimates cōiuges ipsi suas voluptate vendunt, & quod Iudex ridens à meretrice fieri videt in theatro, hoc de sua vxore cogitari facit à cerdone? & vni sibi post tale spectaculum coniugem arrogat, ac non potius in Reip. Platonice communitatem transmisit? Vos videritis, Iudices, quæ securitate venereas hæc merces in urbem recipiatis, lucri certè honestus odor ex quæstu lenonio esse non potest. Perge porro lector. Recita Lætantij de eodem impuritatis magisterio testimonium.

Lætant.

l. 6. diuin.

Institut.

c. 20.

Docent

Quid de mimis loquar corruptelarum præferentibus disciplinam, qui docent adulteria, dum fingunt, & simulatis erudiunt ad vera? Quid iuuenes aut virgines faciant, cum & fieri sine pudore, & spectari libenter adulteria ab omnibus cernunt? Admonentur utique quid facere dum possint, & inflammantur libidine, quæ aspectu maxime gunt.

concitatur: probantque illa dum vident, & adherentibus vitis corruptiores ad cubicula reuertuntur. Nec pueri modo quos prematuris vitis imbui non oportet; sed etiam senes quos peccare iam non decet, in talē vitiū semitam dilabuntur. Nimis profecto capax ea est schola quæ neminem excludit: quæ sine discrimine pueros cum senibus admittit, ut nullam ætatem vitiū scditate non polluat. Sed hic nimis hæreo quasi soli luxuriæ ludus ille pateat.

Rebus pu- Affirmasti, Panurge, Rebus publicis necessariam
blicis ne- esse ludorum voluptatem, eaque popularium se-
cessariam ditionum fluctus placari. Putas-ne id tibi concess-
esse ludorū surum Chrysostomum? Quid horres ad istius no-
voluptatē minis iterationem? aurum vel in aliena nuncu-
aduersario patione amare debes. Si tibi dolet eius oratio;
negatur. quid times? hominē supersticiosū appella, & elu-
fisti. Recita, pragmaticæ, quid auditoribus respō-
deat quærentib⁹ sint-ne theatra fūditus euerēda.

Chrysost. Quid igitur vis, inquires, an ut ludorum omnium
hom.; 8. in claudamus locum, & tibi obtemperantes omnia eueria-
Matth. mus? Quid eueriamus dixisti? Nonne cuncta iā euer-
sa sunt? Nam unde credis nuptiarum insidiatores pro-
fiscici? Nonne ab huiusmodi scenis? unde illos qui
domos ac thalamos aliorū sfodiunt? nonne ab orchestra
illa? An non hinc vxoribus viri molestissimi, & viris
mulieres contemnenda fiunt? Itaque is mihi videtur
Omnia euerire qui theatra petit qui tyrānica cupidi-
euerit qui tati vires nimio nutrit favore. Quid igitur, inquis, an
theatra pe- leges omnes eueriemus: quibus hac cōstituta sunt? Imo
tir. vero his theatralibus ludis eueris nō leges sed iniqui-
tatem eueretis, ac omnē ciuitatis pestem extinguetis,
Hinc enim seditiones excitantur, hinc tumultus oriū-
tur. Qui enim his ludis aluntur omnes vocem ventris

*causa collocant, qui dicere & facere omnia promptissimi sunt: hi maxime solent rumoribus populos inflammare, & tumultum in ciuitates immittere. Malefici autem nonne à theatralibus ludis multi efficiuntur? Nam ut uniuersū populū ad hac possint inflāmare, ut tripudiantes suas consequantur voluptates, ut modestas mulieres meretricibus cōmixtas corrūpant, ad tātum maleficij genus perueniunt, ut ne ab ossibus quidem mortuorum abstineant. Quid dicam quod ad diabolicas has sodalitates, innumeras multi consumunt pecunias? Quid de lascinia? quid de alijs malis? Animaduertis totū illud esse, qui uniuersam uitam hominū Vtinā iam eueris, cum ad hac ceteros horteris: non me qui omnes diruta es huiuscemodi ludos omitteōdos censeo Diruemus igitur sent thea-
 omnium loca ludorum? inquires. utinam iā diruta es- tra.
 sent! Quāquā quod ad nos attinet, iā pridem desolata iacent. Eadem nostrū omnium vota sunt, Chrysostome, ad eandem pestilentis illius ludi euerfionem conspiramus. Vtinam infamis illa turpitudinis schola, vitiorum omnium officina, scopulus castitatis & modestiæ, charybdis innocentæ, perniciēs iuuentutis, senum dedecus, naturæ contumelia, ruina Reipub. Magistratuum turpe lenocinium ab urbibus nostris exterminetur! utinam tartareus fœdæ libidinis Phlegeton, & incestus Babylonice fornacis ardor, ab iis, proh dolor! qui vulgo sapere creduntur, succensus extinguere-
 tur! ô antiqua tempora! ô ætates aureæ! in quam cœli partem concessistis? ô veneranda patrum sanctitas ubi subsides, ubi lates dum isti Veneris emissarij orbem Christianum omni fœditate cō-
 maculant, leges publicas euertunt, priuatas domos pessundant, deflorant adolescentiam, senē-*

Et uti illudunt, plebem exhauriunt, magistratus in suas partes attrahunt? Redite sæcula sine ludis hisce iucunda, sine theatris tuta, sine lasciuiæ incitamenti beata! aut certè migremus ad Barbaros, apud quos rudis & cruda castitas est, quia scenæ cupedias non degustant. Quis enim apud nos modo innocentiam sperare audeat, id est, theatrorum euersionem, quam illustres Ecclesiæ antesignani à suis impetrare non potuerunt? Recita decretum Concilij Constantinopolitani de spectaculis abolendis.

Concil. 6. *Omnino prohibet hæc sancta & vniuersalis synodus in Trull.* eos, qui dicuntur mimi, & eorum spectacula: deinde *can. 51.* venationum quoque spectationes, easque quæ sunt in scena saltationes perfici. Si quis autem præsentem canonem contempserit, & se alicui eorum, quæ sunt vetita, dederit, si sit quidem clericus, deponatur: si vero laicus, segregetur. Valent hæc quidem ad declarandam Antistitum illorum sententiam, sed quam inutiliter ac frustra sancita sint, ostendit altè insita in Christianorum moribus deprauatio, quæ neque id genus decretis euelli potuit, neque doctorum aliorum obiurgationibus emendari.

*Mimorum
spectacula
prohibita.*

Nam cum oculis ipsi vsurparent quanta virtutum strages in campis illis venereis ederetur, satis non habebant periculum demonstrare, nisi etiam omni ope anniterentur populum suæ curæ commissum ab huiusmodi licentia reuocare. Audite, Iudices, magni Augustini plenam sapientiæ & grauitatis orationem, qua sanctas & puras Christianorum voluptates, cum insania spectaculorum comparat: quam quidem collationem fusi-
sius alio loco prosequi animus est: hic istam quasi

promulsi dem accipite. Recita Augustini admonitionem de insidiis, quas in spectaculo tendit aduersarius.

Plures noueritis capere aduersarium per voluptatē quam per timorem. Nam quare quotidie miscipulam spectaculorum, insaniam studiorum ac turpium voluptatū proponit, nisi ut his delectationibus capiat quos amiserat, ac letetur, denno, se inuenisse, quos perdiderrat? Quid nobis opus est ire per multa? Breuiter admonēdi estis quid spernere, & quid diligere debeatis. Fugite, dilectissimi, spectacula, fugite caueas turpissimas diaboli, ne vos vincula teneant maligni. In theatris labe morum discere turpia, audire inhonesta, videre pernicioſa. Sed adiuuante Domino ea ex cordibus vestris fortiter repellam. Singula singulis cōparem. Illic intueretur spectatores propositū nescio quē confectū Deum Iouem & adulterantem & tonantem: hic respicimus verum Deum Christum castitatem docentē, immunditiam destruentem, salubria predicantē. Illic fingitur quod idem Iouis Iunonem habeat sororem & coniugem: hic predicamus sanctam Mariam matrem simul & virginem. Illic per mimicam turpitudinem castitas violatur: hic per castam Susannam, & castum Ioseph libido comprimitur, mors contemnitur, Deus amatur, castitas exaltatur. Chorus illic & cantio Pantomimi illicit auditum, sed expugnat sanum affectum: & quid tale nostro cantico comparandum sit, in quo dicit qui amat & cantat. Narrauerunt mihi peccatores delectationes suas, sed non ita ut lex tua, Domine. O verba melle omni dulciora! o suauem, licet ab Africa, dictionem! cui, ut iucundior appareat, aliam eiusdem materiæ, robustioris spiritus ex eadem Africa huc conuoho, & adiungo;

August.
l. 2. de sym.
bo'o ad Ca-
tech. c. 1.
& 2.
Fugienda
spectacula
ut cauea
turpissima
diaboli.

Tertull.
l. de spe-
ctac. c. 17.

Recita Tertulliani argumentum quo is conficit theatra Christianis tugienda. Non illud postulo quod ab Idololatria, sed quod ab turpitudine ducitur.

Interdi-
ctio theatri
de interdi-
ctione im-
pudicitie.

Similiter impudicitiam omnem amoliri iubemur. Hoc igitur modo etiam a theatro separamur, quod est priuatum consistorium impudicitie: ubi nihil probatur quam quod alibi non probatur. Ita summa gratia eius de spurcitia plurimum concinnata est; quam Atellanus gesticulator, quam Minus etiam per mulieres repræsentat, sexum pudoris exterminans, ut facilius domi quam scenæ erubescant: quam denique Pantomimus a pueritia patitur in corpore, ut artifex esse possit. Ipsa etiam prostibula publica libidinis hostia in scenâ proferuntur plus misera in præsentia fœminarum quibus solis latebant: perque omnis ætatis, omnis dignitatis ora transducuntur: locus, stipes, elogium, etiam quibus opus non est, prædicatur. Taceo de reliquis ea quæ in tenebris & in speluncis suis delitescere decebat, ne diem contaminarent. Erubescat Senatus, erubescant ordines omnes. Ipsa illa pudoris sui interemptrices de gestibus suis ad lucem & populum expauescentes semel anno erubescunt. Quod si nobis omnis impudicitia execranda est, cur liceat audire quæ loqui non licet? Cum etiam scurrilitatem, & omne vanum verbum iudicatum à Deo sciamus, cur a què liceat videre quæ facere flagitium est? Cur quæ ore prolata communicant hominem, ea per oculos & aures admissa non videantur hominem communicare: cum spiritui appareant aures & oculi, nec possit mundus præstari, cuius apparitores inquinantur? habes igitur & theatri interdictionem de interdictione impudicitie. Nescio quis me modo Africæ genius occupet: ita mihi

& tertius ex eadem plaga terrarum sese obicit. Non est reiiciendus, Iudices, nostrū agit pædagogum, mores nostros grauiter & sapienter in-
format. Et licet nonnumquam videri possit seue-
rior, quicquid tamen à nobis exigit, eius vitæ,
quam profitemur, terminis continetur. Selige
ex Clemente Alexandrino quæ in rem quam agi-
mus conferre possunt, quæ de modestia in conui-
uiis, de risus moderatione, de verborum obscæ-
nitate non admittenda disputat.

Omne turpè spectaculum, omnemque turpem audi-
tionem, & ut semel dicam, turpem omnem sensum in-
temperantiæ, quod quidem est vera sensus priuatio,
maximè oportet nos exscindere, quæ in oculis & in au-
ribus tui illat & effæminat, voluptatem cauētes. Fra-
torum enim cantuum, & flebilium Carica musæ mo-
dorum varia veneficia intemperanti & prauo musica
artificio mores corrumpunt, ad huius comessationis
affectionem trahentes. Rerum autem ridicularum, vel
ridendarum potius actionum imitatores exigēdi sunt
à nostra republica. Cum enim verba omnia à cogita-
tione & moribus emanent, fieri non potest, ut verba ali-
qua emittantur ridicula, quæ non procedant à moribus
ridiculis. Si ergo qui risum mouent sunt exterminādi
à nostra repub. longè abest ut nobis permittatur risum
mouere. Absurdum enim esset, quorum auditores esse
prohibitum est, inueniri eorum imitatores.

At turpiloquio autem & nos omnino abstinere oportet, & eos qui illo utuntur os obstruere & aspectu seue-
riore, & vultus auersione, & ea quæ vocatur subsan-
natione, & sapè etiam asperiori oratione. Cum autem
turpia æquè in audiendo versentur, atque in spectādo, quæ pueri
diuinus pedagogus eadem ratione pueris luctantibus,

Clementis
Alexand.
in pedag.
l. 2. c. 4.

Intempe-
rantia ve-
ra sensus
priuatio.
c. 5.

Mimi à
Rep Chri-
stiana ex-
terminan-
di.

c. 6.

Ab obscæ-
nis ridēdis
audiendis-
que pueri
abstineant.

ne aures eorum offendantur, pudicos & modestos sermones, veluti quadam aurium munimenta adhibere, ne possit ad frangendam animam peruadere & pulsatio fornicationis. Oculos autem dirigit ad rerum honestarum spectaculum: melius esse dicens labi pedibus, quam oculis.

c. 7.

Etatis
instabili-
tas adoles-
centes ar-
cet à con-
uiujs &
spectacu-
lis.

In summa adolescentes & adolescentula ab eius-
modi conuiujs omnino abstineant, ne labantur in iis
quæ non conueniebant. Inusitata enim auaritiones, &
indecora spectacula, dum in eis adhuc fluctuat fides,
mentem eorum euenilant: etatis autem instabilitas eos
adiuuat, ut ad cupiditates ferantur precipites. Quin
etiam nonnunquam aliis cause sunt offensionum, dum
florem etatis, qui est maximè lubricus & periculosus,
ostentant. Vobis, adolescentes, loquitur Clemens,
vos Christianus ille Pædagogus instituit: vos cō-
uiujs interesse non vult, in quibus intemperantiæ
periculum est: quid de theatris præcipere po-
test, quæ libidinis vbique tenent impressa vesti-
gia? ferre nequit niueum illum pueritiæ vestræ
florem impuro Veneris vngue decerpi, sed inta-
ctum Deo seruari desiderat. Id ut facilius con-
ficiat, abstinendum ait à conuiujs, sed non omni-
bus: à verbis obscænis, quod non difficile: à risu
petulante & immoderato, quod plausibile: à tur-
pibus spectaculis, quibus cætera continentur,
quod penitus necessarium est. Atque id ipsum
ut fusius, sic apertius, vestræ indolis adolescenti
suadet Gregorius Nazianzenus princeps ingenij
& sanctitatis, cuius non iniucunda vobis puto
fore carmina, quia & his auctorum testimonijs
varietatem conciliabunt, & Musam ætati vestræ
conuenientem excitabunt. Recita Gregorij Na-

Greg. Na-
zianz. Iā-
bico 3. ad
Seleucum.

zianzeni

zianzeni Iambos ad Seleucum de vitandis spectaculis.

Quin illud etiam maxime obserues velim;
 Theatra quem dant, circus, & iruces fere
 Cantum, malorum que horreas spectaculum:
 Et vana vita, gaudij & lernam improbi,
 Hominum indecora studia, lasciuie gregis:
 Qui castitate turpe nil dempta putant.
 Probi administri! quidam enim hoc artis loco
 Habent, ut animos turpia ob quaque efferant,
 Scurra, feriri queis mos pugnorum iectibus:
 Quibus ante capitis sectus est crines pudor.
 Schola fœditatis omnis & lasciuie;
 Queis artis est pars perpeti, & facere omnia
 (Idque ante visus omnium) qua non licet.
 Quid canticorum turpium morbos loquar,
 Versusque nervos pectoris qui emolliunt?
 Quid tibiaeque, quid choros bacchantium
 Quibus ampla miseri pensitant quoque premia?
 Hæc sunt ne laude, sunt ne visus ac gaudio
 Ad digna potius lacrymis & luctibus?
 Dominatur illic risus, ac stuprum subit
 Natura, flamma crescit & libidinum.
 At fœditatis improbi quoque construunt
 Theatra, morbus abdite ut non iam amplius
 Grassetur, arti præmium ut constet mala.
 Hæc execrare, pupulas nec tu infice
 Quodcunque labem visui accersit, fuge,
 Oculos ut ipse virgines serues tuos.

Theatrum
 lasciuie &
 fœditatis
 schola.

Hæc vni Seleuco cecinisse doctum illum pœ-
 tam existimatis, an vobis vniuersis, adolescentes?

quorum eadem est & viuendi ratio, & obligatio castitatis? Nam si Gregorius excitaretur è cineribus & sepulchro, imò si cæteri à me laudati viuerent in terris, grauius ne quicquam ad execrationem spectaculorum, sanctius ad commendationem integritatis, iustius ad ætatis educationem iuuentuti proponerent quàm theatra scholam esse lasciuia, consistorium impudiciæ, adulteriorum officinam, imò adulteriis ipsis flagitiosiora? in iis per oculos atque aures patentissimas animi fenestras, cantus & saltationes, per versus impurissimos, & gestus omni fœditate solutiores totâ libidinem in intima pectorum introduci? Vos hortarentur atq; obsecrarent per nascentis adnuc ætatis florem, per futuræ aliquando vitæ dignitatem, per spem parentum & ciuitatum vestrarum, per ipsum virtutis nomen, & decus puritatis, ne scenicarum libidinum maculis mentes vestras inficere, ne in sacrarium Veneris, in gymnasium fornicationis pedem inferre velitis. Nimis esse quod hoc à vobis fieri sperarint histriones: eos culpa non vacare qui vel inuitati sint. Nam à qua improbitatis & nequitia specie alieni putantur, qui spectandis histrionibus digni iudicantur? Plura certè in hanc rem afferrent qua sunt eloquentia, & odio in illam humanitatis pestem sed & ista bonæ vestrae spei. egregia que indoli satis superque fuerint, & dudum monuit Saluianus hæc silentio tegi honestius, quàm vtilius publicari.

*Ab impro-
bitatis
schola trā-
situr ad
magistros
ipsos hi-
striones.*

Quamobrem ab ipsa schola fœditatis omnis & lasciuia, ad doctores video mihi esse transeundum: venio ad vos, Panurge, iam mihi res est cum personis vestris, quas, si culpa carent, ab omni

Vituperatione liberas fore verè dixisti. Sin autem omnibus flagitiis contaminati, omnibus sceleribus cooperti estis, quid superest nisi ut vos omni turpificatos infamia in ignotum nobis orbem Poneropolim iudices deportari iubeant? Aspicias me illis oculis quibus Rolandi furias nuper, ut aiunt, non inscitè expressisti. Terres me hic subsisto; ultra non audeo. Flagitia tua in hoc iudicio non exponam, quia infinita sunt; nec id loci huius sanctitas patitur: quia quæ fiunt à vobis, utile est nesciri fieri posse ab hominibus: nec eam recensionem causa postulat, quia capitalis non est, in eos qui caput iampridem, hoc est probitatem & famam amiserunt. Sed ea quæ in oratione mea non pono, ex aliis quæ omni necessitate afferre cogor, difficile non erit concludere. Quis enim non videt nisi ingens aliquod malum ab Ecclesia damnari non potuisse? quis nescit sacris profanisque legibus infamiam non irrogari nisi iis qui magno se scelere obstringant? quis non sentit ex hæredem paternorum bonorum non posse iudicari filium, nisi qui lethalis noxæ reus teneatur? hæc antequam vobis explico, Iudices, non erit opinor alienum ab instituto venerandum illum fabularum doctorem in cathedra spectare, os, manus, habitum, totiusque corporis statum accuratè considerare. Recita descriptum à Tatiano Iunioris histrionem in scena.

Quales tandem sunt discipline vestre? quis non irrideat populares & solemnes conventus vestros qui majorum demonum occasione celebrati, ad ignominiam redigunt homines? Vidi quendam sæpenumero, & visum admiratus postea contempsi, ut pote qui aliter in

Tatian.

orat. contra

Græcos.

Histrion a-
gens in sce-
na.

animo sentit, foris autem quod non est mentitur, perquam delicate gloriantem, & variis modis luxuriantem, dum parim oculis micat, parim manibus gesticulatur, lutofo vultu insaniens, nunc Veneri, nunc Apollini similis, vnus omnium Deorum accusator, superstitutionis epitome, praeclararum actionum calumniator, hypocrita cadum, adulterij promotor, insane auaritia commendator, cinedorum doctor, condemnandorum auctor. Talem inquam vidi, qui interim a nemine non laudabatur. Ego verò mendacissimum hominem & impietatem eius, & studia abominatus sum. At vos ab istis duci, regique sustinetis, & alios qui non probant quae faciitis, indignè calumniamini. Hiare nolo, licet multis canentibus: nec inclinantem & mouentem se prater naturam imitari volo. Quid obsecro sit apud vos egregium aut admiratione dignum? Ob cœna verba naso resonante effuriunt, & motus indecentes mouentur, & adulteriorum in scena magistros filiae & filij vestri spectant. Honestas scilicet auditoria vestra sunt; omnes nequitia nocturne, & quod obscene dictum demulcere potest, auditores alta voce promulganur. Eodem orationis schemate spectandum proponit histrionem Tatiani magister Iustinus, qui Orestem agat voce grandi & huiusmodi, horribilis & magnus apud stultos & ligneis pedibus, commentitioque venire, & absurda veste, vultuque monstri simillimo. Et quanquam omni exceptione maiores sunt diuini illi scriptores, ne tamen in re seria ludere, & ridendos hominibus ex ingenio meo dare videar histriones, eiusdem formae imaginem ab inimico mutuam accipere non videtur indignum. Recita Luciani descriptionem histrionis in scena agentis.

Iustinus
Epist. ad
Zenam &
Serenum.

*Ipsam Tragædiam primum ab habitu contem-
 platur cuiusmodi sit, quam turpe & minime iucundum
 spectaculum homo longitudine deformi, atque incom-
 posita exornatus, altis calceamentis ingrediens, caput
 larua minaci obductum habens, tum per amplo ore
 hians, quasi spectatores esset deuoraturus. Mito as-
 citia pectora, & ventres factitios, adiunctam, & ar-
 te compositam corporis crassitudinem, ne longitudine
 discors compositio intenui corpusculo magis reprehen-
 denda veniat. Deinde indecora histrionis vociferatio,
 iam se ipsum inclamantis, iam verberantis, aliquando
 etiam iambicos versiculos cantillantis, & quod tur-
 pissimum est, grauissimas calamitates modulantis, ac
 sola voce semetipsum reprehendendum exhibentis.*

Tales igitur admirabilis doctrinæ antecessores
 quo minervali ad docendum inuitat Ecclesia, in
 quo honoris gradu constituit? Recita decretum
 de iis qui aliquid donant histrionibus.

*Donare res suas histrionibus vitium est immane,
 non virtus. Illa sanies Romæ recepta, & fauoribus au-
 eta, tandem collabefecit bonos mores, & ciuitates per-
 didit, coegitque Imperatores sapius eos expellere. Mi-
 rabile profectò salarium, quo visus es gloriari Pa-
 nurge, cum histriones Romæ locupletatos fuisse
 monstraſti. Nam vnum omnibus sæculis Ros-
 cium è publico aliquam pecuniæ vim accepisse
 memorabas cum ageret, tanquam vilem aliquem
 mercenarium. Æsopus autem quo ex quæstu pa-
 tinam illam suam conſlarit, non explicasti. Hono-
 ris autem locum & dignitatis quem sacris legibus
 acceperunt? Ante omnia infamiam ciuilibus le-
 gibus constitutam, calculo etiam suo confirmat
 Ecclesia, & eos ne ad accusationem quidem ad-*

Lucian.

Dial. de

Saltatio-

ne.

Ridiculus

histrionis

habitus.

Histrioni-

bus ali-

quid dona-

re vitium

est.

August. tr.

100. in

Ioan. & re-

fertur dist.

86.

Scenici ut infames ab accusatio- ne prohi- bentur. 4. *g. 1. defini- mus.* 5. *Omnes et- iam.* *Idem sta- tuitur can.* 143. *Conc.* *Carthag.* mittit. Recita ea de re decretum Nicolai Papæ ad Michaëlem Imperatorem.

Omnes etiam infamia maculis aspersi, id est, histriones ac turpitudinibus subiecta persona, hæretici etiam, sine pagani, sine Iudæi, ab accusatione prohiben- tur. O admirabilem hominum copulationem ! ô mirificam sectarum coniunctionem ! Pagani & scenici, Iudæi & Comædi, hæretici & histriones eodem sunt apud magnum Pontificem loco, eun- dem faciunt ordinem, in eadem cymba infamiæ fluctibus agitantur Iudicio supremi Ecclesiæ An- tistitis ethnici & histriones nominibus certè ali- quantum, re autem & impietate nihil differunt. Sed hoc parum fuerit nisi etiam ab honoribus ar- ceantur. Vtenim in iure civili Constantinus, no- tatis, & quos scelus vitæque turpitudine inquinat, di- gnitatis portas patere non sinit: sic maiestatis suæ in- tegrîtatisque haud paulo studiosior Ecclesia nul- la penitus scenicorum communione se patitur profanari. Recita Canonem Apostolorum, de eo qui scenicam in matrimonium duxerit.

Qui sceni- cam duxe- rit a sacris ordinibus excludi- tur.

Canon. A- post. 18. & habetur dist. 34. c. *Si quis vi- duam.*

Qui viduam duxit, aut eicetam, vel meretricem, vel ancillam, vel quampiam scenicam, non potest esse Episcopus, aut Presbyter, aut Diaconus, aut omnino ex eorum numero qui ministerio sacro deseruiunt. Quis enim ferat tali lecto coniunctos vasa sacra & tre- menda mysteria pollutis manibus atrectare ? Quid autem tandiu circumrodo ? Quin istas Ec- clesiæ strumas, Christianitatis vomicas, à piorum cœtu, à fidelium societate ostendo fuisse deiectas atque exterminatas ? Recita decretum Concilij Arelatenfis de agitatoribus, & theatricis.

Histriones excommu- nicantur.

De agitatoribus qui fideles sunt, placuit eos quan- diu agitant à communione separari.

De theatricis, & ipsos placuit, quandiu agunt, à communione separari. Per Deum immortalem quid hic agitis hominum insolentissimi? quid hic queritis bipedum sceleratissimi? vos ut spuriam sobolem execratur Ecclesia parens illa mitissima, vobis templorum aditu interdicat, vos diuinorum mysteriorum participes facere abnuat, ne suorum quidem consortio & familiaritate dignatur: & in urbem hanc admitti, inter nos viuere, lætari, ludere postulatis? qui enim estis? unde profecti? Moabitas atque Ammonitas legis antiquæ interdicto ut execratos & detestabiles populos in Ecclesiam Domini intrare nefas erat: ipadonem & ex scorto natum eadem lex arcebat à templo: vos Christiani Senatus consulta à basilicis nostris eiciunt, ut non minus sacrilegi quàm Ammonitæ, non minus molles quàm euirati, non honestiores quàm vulgo quæsitæ videamini. Quid? adulteros, parridas, dardanarios, parietum perfossores, si modo salutaribus aquis tincti sunt, sinu suo complecti non refugit Ecclesia: vos quam vitam viuitis, quam artem facitatis, quos à suo corpore, ut putridos artus, & corrupta membra auellit & obtruncat? hæretici rebellant in parentem, è familia eiectioni sunt: Iudæi nascentem suffocare voluerunt, exterminati sunt: Pagani omni suppliciorum diritate & sæuitia crescentem vexauerunt, extincti sunt. Vos nulla vi, nullis insidiis, non armis, non prauis opinionibus eam impugnare videmini, & tamen à suorum communione & iuribus filiorum deturbat. Quæ, malum! estis portenta hominum, post baptismum Ethnici, Christum adorantes Iudæi, in recta fide hæretici? Quæ vos

Conc. Arel.
lat. 1. can.
4.
Can. 5.

nota distinguit à cæteris? Præputium? nunquid circumcisi sunt Pagani? Vnius Dei cultus? Quid aliud loquuntur Iudæi? aditialis aquæ lauatio? qua gloriantur hæretici. Tota Catholicorum credulitas? quam Schismatici retinent. Cum Ecclesia Romana coniunctio? unde vos ipsa ignominiosè amputat & absce lit. Quis ergo vobis in vrbe nostra dabitur locus, in quo artis vestræ, qualiscunque tandem illa est, ludum instituatis? Sacer? at profanas voluptates exercetis. Profanus ne? At virtutis scholam appellatis. Serius ad agendum? at solum luditis. Idoneus voluptati?

*Admittendi si agunt
pœnitentiam.*

Conc. Carthag. can. 49 habetur de Consec. dist. 1. can. scenici.

quis enim? Domus ad aleam, caupona ad crapulam, lupanar ad vncem? hæc alibi quærite: hic Christiano more viuatur. Quid autem, inquis, agendum vt Christiani videamur? Nihil. vos enim quamdiu agitis, Ecclesia Christiana non agnoscit, receptura profectò si artem desinitis. Recita decretum Concilij Carthaginensis de Scenicis pœnitentiam agentibus.

Vt Scenicis & Mimis, & reliquis eiusmodi personis, vel apostatis, pœnitentiam agentibus, & se ad Deum conuertentibus, gratia, vel reconciliatio non negetur. Et quoniam Rëgiorum illi Comædorum nomine gloriari solent, vt execrationes istas in plebeios aliquos histriones traiciant, adde quæ ad hunc Canonem opportunè scripsit Ioannes Zonaras.

Ioannes Zonaras in Canon.

Nulla est inter Comædos & histriones distinctio.

Scena, imitatio dicitur, qui ergo nunc seruos, nunc Imperatores, nunc alia personarum genera imitantur, Ex hoc numero qui artem coram Imperatoribus fastitarent, leges ciuiles in honore habuerunt. Qui verò in publico catu, plebeculaque con-

uentibus histrioniam exercerent, risumque astantium simulata imitatione captarent, ignominia notare. Hic verò canon omnes sine discrimine, pœnitentiâ egere affirmat; quippe qui & ipsi dissolute vitam agant, & aliis petulanter ac effuse viuendi causam præbeant. Quæ ex oratione neque istos è sacra domo esse apparet, cum neque Regem comitentur, neque regis alantur stipendiis, sed meros planipedes quæstum ex plebeculæ deliciis facientes; neque si regij & honesti forent, ab sacrorum Canonum seueritate eximendos. Photius autem Constantinopolitanorum Præsul'um fortasse doctissimus, posteaquam Canonem modo à me productum, Romani Iuris additione explicuit, nulla Regionum Scenicorum facta mentione, problema subiungit, vestris, Iudices, auribus non indignum. Quod hoc loco non referrem, nisi fugisset Philologum, Scenæ vocabulum ex Vlpiano enarrantem. Ait ergo, Infames esse quicunque quæstus causa in certamen descendunt, & propter præmium in scenam prodeunt. Verum qui se ad artem ludicram locat, si non prodit, non notari infamia: qui autem se locat ut cum bestiis depugnet, et si reapse non pugnet, tamen notari. Huius verò discriminis germanam affert rationem Nomocanonis explicator Theodorus Balsamon Antiochenæ sedis Patriarcha. Recita Balsamonis commentarium quo illam Photij quæstionem dissoluit.

*Photius. in
Nomocanone Tit.*

13. cap. 22.

Quæret fortasse quispiam quapropter qui operam suam in artem ludicram locauit, neque exhibuit, non notetur: qui verò ut cum bestiis depugnaret se locauit, Photij Notametsi non pugnarit famosus fiat? In arte ludicra ip-

Theod.

Balsam. in

Photij No-

mocan.

Ipsa tra- sum factum, non autem propositum infamiam irrogat.
gædiarum Quod manifestum sit ex eo quod is etiam qui non mer-
exhibiitio cedis, sed gloria solius causa eam saltitat, infamis
histriones est. In eo verò qui cum bestiis pugnat, non factum ip-
facit infame- sum, sed propositum odiosum est. Nam Reges etiam,
mes. atque milites generositatis ostentanda gratia cum be-
 stiis depugnant. Ac propterea quidam qui turpibus lucrì
 causa vitam suam prodidit, tamen si non pugnavit fa-
 mosus sit, qui verò rei ludicra facienda causa pecu-
 niam cepit sic eam non fecerit, non notatur. Ista qui-
 dem, Iudices, dubitare vos cogerent, istine arti-
 fices ab arte sua, an ars ipsa ab artificibus infamiam,
 & dedecus accipiat: nisi vtrisque simul optime
 convenire sciretis. Et quanquam ieiunis istis
 legum productionibus assuevistis, tamen ante-
 quam ad eas redeo, placet Chrysost. eloquentia
 vestros animos paulisper recreare. Is iucundissi-
 mè deridet Principes qui scenicorum spectaculo-
 rum donatione per infames illos homines hono-
 rari se putarent: leges autem civiles arguit quæ sce-
 lerum omnium licentiam scenicis largiuntur, cui-
 libet aliorum hominum generi præcidunt. Recita
 Chrysostomi auream hac de materia orationem.

Chrysost. Theatra congregant, & meretricum choros illic in-
hom. 12. in ducentes, & pueros scortantes, & qui iniuria ipsam
I. Epist. ad afficiunt naturam totum populum in loco superiore fa-
Corinth. ciunt considerare. Sic civitatem recreantes, sic magnos
 Reges quos semper propter trophæa, & victorias ad-
Theatrorum mirantur, coronantes. Atqui quid est hoc honore frigi-
voluptate dius? quid voluptate illa iniucundius? Ex his ergo
nihil iniu- queris factorum tuorum laudatores? & cum saltato-
cundius. ribus, mollibus, & mimis vis, dic quaeso, laudari? Et
 quomodo non fuerit extrema dementia? Inbenter

enim eos rogarem. Est ne graue & indignum leges naturæ euertere, & illicitos & nefarios inducere concubitus? omnes dicunt esse graue & indignum. Videntur quidem certè hoc quoque punire flagitium. Quid ergo illos inducis cinedos & exoletos? Neque solum inducis, sed etiam innumerabilibus, & ineffabilibus honoras muneribus? alibi eos qui talia audent puniens: hic autem tanquam de Rep. bene meritis & pecunias insumis, & publicis impensis eos alis. At sunt, inquit, infames. Quid ergo eos erudis? cur per infames Reges honoras? cur ciuitates enecas? cur autem in eos tam multa impendis? Nam si sunt infames, infames oporteret expelli. Nam cur eos fecisti infames? an ut laudans, an ut qui eos condemnaueris? ut qui condemnaueris scilicet. Deinde ut qui condemnaris qui dem eos facis infames: cur is autem eos visurus tanquam qui sint honesti bonaque fama, & existimationis, & admiraris, & laudas, & applaudis. Hæc à Chrysostomo non attuli ut exoletos & meretrices in hunc confessum reuocem: sed ut iniucundam theatrorum voluptatem esse, ut condemnatos ab ipsis admiratoribus histriones, ut infames expelli debere commonstrem. Redeo ad ius: sed Valentiniani senioris cōstitutionem omitto, quia sacris hominibus non placet. Concedit ille quidem ut Scenici & Scenicæ in vltima vitæ linea sacro tincti lauacro, si fortasse periculum euasis- sent, nulla posthac in theatralis spectaculi conuentione reuocarentur, quia legibus Ecclesiasticis cautum fuisse probaui, ne Christiani theatralibus populi voluptatibus vacarent. Sed illud vitæ periculum ad eo diligenter examinari, tam apertè cognosci, vult antequam cœlestis aqua sacramenti

Per infames illos
ciuitates
enecantur.
Rescriptū
Valenti-
niani Se-
nioris l. i.
de Scenic.
C. Theod.
Non nisi
incerto
moris pe-
riculo hi-
striones
lim bapti-
zari per-
missi.

infundatur, vt iam beneficio eripiat, quod necessitati denegare non potest. Alterum quidem rectè, ne Christianorum cœtus tam fœdis sodalibus inquinetur. Alterum autem seuerè nimis ne dicam impiè; quasi flagitiosos mores non nisi cum vita exuere debeant histriones. Vtrumque tamen ad institutum meum eximiè: quia ostendit & scenicum in Christianorum numerum allegi non debere; & qui verè Christianus sit, histrionem posse esse neminem.

*Ab his
strionibus
ad eorum
spectatores
proceditur.*

Sed prætermisso in præsentia Imperatore, ad sacras insulas, & iura ab Ecclesiæ patribus constituta reuertor. Non potuit, vt opinor, è vestra, Iudices, memoria elabi nobilissima pars actionis Pannurgi istius, qua literariæ iuuentuti perpoliendæ necessariam esse histrionum operam conficere tentauit. Ex ea disciplina & Græcum Demosthenem prodiisse & Romanum Ciceronem, non homines, sed ipsam mediis fidiis eloquentiam. Cui nodo cuneum perquam idoneum attulit Modestinus: sed quoniam Reip. plurimum interest scire non tantum literarum studiis nihil conferre, sed etiam adolescentum moribus mirum in modum obesse artem histrionicā, illustris Antistitis sententiam rogemus de histrione pucros ad agendum informante. Recita Cypriani responsionem Euchratio factam.

Cypr. Ep. 61. ad Eucherium. Pro dilectione tua, & verecundia mutua consulendum me existimasti, frater carissime, quid mihi videatur de Histrione quodam, qui apud vos constitutus in eiusdem adhuc artis suæ dedecore perseuerat, & refertur dist. 2. de Consecr. Magister & Doctor non erudiendorum, sed perdendorum pucrorum, id quod male didicit ceteris quoque

insinuat: Antalis debeat communicare nobiscum? Pu- *Histrion*
to nec Maiestati diuina, nec Euangelica disciplina magister
congruere, ut pudor & honor Ecclesie tam turpi & in- *perdendo-*
fami contagione foedetur. Nam cum in lege probi- *rum pueror-*
beantur viri induere muliebrem vestem, & maledi- *rum.*

Et eiusmodi iudicentur: quanto maioris est criminis
non tantum muliebria indumenta accipere, sed & ge-
stus quoque turpes, & molles, & muliebres magisterio
impudica artis exprimere? Vtilem, Panurge, do-
ctrinam, & ardentem expetendam! cui perdiscen-
dæ non vna sufficiat Massilia, non vnæ Athenæ:
sed vrbes singulæ Gymnasia magnis impensis ex-
truant, & vos grandi salario conducant oportet.
O dedecus Reip. ! ô pestes iuuentutis ! ô perni-
cies castitatis ! vestram artem ut percipiant qui
per leges, per sapientum consilia ne spectare qui-
dem debent? yde num codex Theodosianus in *Cod. Theo.*
recta iuuentutis informatione decernat, ne spe *de stud.*
etacula frequentius adeant. Disce quid Aristoteles *urb. Reet.*
Philosophorum sapientissimus, ne Platonem qui- *lib. i.*
dem excipio, legislatori præcipiat pueris vetan- *Pueri à*
dum. Collige quæ de hac puerorum institutione *theatris re-*
in Politicis scribit Aristoteles. *monendi.*

Ratio postulat ut qui hac ætate sunt, ab auditioni- *Aristot. l.*
bis & spectaculis illiberalibus longè arceantur. Cum *7. Politic.*
igitur vniuersè legum scriptor verborum obscœnita- *cap. 17.*
tem ex ciuitate si quid aliud eicere debeat: tum ma-
ximè ab puerorum oculis auribus ne remouere ne quid
tale vel loquantur vel audiant. Quoniam autem tale
aliquid proloqui vetamus, perspicuum est etiam pi-
eturis, ac tabulas indecoras & deformes spectare per
nos non licere. Dem igitur operam magistratus ne qua
sit vel statua, vel tabula picta, quæ tales actiones imi-

retur. Iunioribus verò neque iamboſ neque comœdias ſpectare vlla lege permitti debet. Interpoſui Philoſophum ne Chriſtianorum Patrum acerbitatem criminareris. Quanquam non defugies, vt arbi-
tror, Gregorij Nyſſeni, hominis minimè aſteri de theatris tuis iudicium, deque iis qui iuuentu-
tem ad ſpectacula pertrahunt. Is enim bellum il-
lud quod animo & mente cum vitiis gerimus con-
cinnè deſcribens, hoſtium exploratorem ait eſſe
oculorum ſpectaculum, quod in noſtras copias
furtim ſe ſe inſinuet: collocatos deinde in inſidiis
eos qui amicitiaſ ſpecie ad theatra deducant. Re-
cita venuſtam eloquentis Theologi allegoriam.

*Si ad ſpectaculum per voluptatem emolliuſ fuit
ſenſus, & figura ſimulacrum cogitationem ſubiit per
oculos: tunc expugnatur quidem mens eorum qua ſunt
intus Imperatrix, vt qua nihil habeat virile, aut iuue-
nile, ſed ſit effœminata & diſſoluta: & magna magnus
proditorum ex populo cogitationum cogitur circa ex-
ploratorẽ. Qui prætextu amicitia� & beneuolentiæ eum
cui perſuadetur attrahunt ad peccati exitium, ij ſunt
qui in via inſidiãtur, laudatores voluptatis, qua deducunt
ad theatra, qui mali indicant facilitatem: & per
ea qua faciunt prouocant ad imitationem, ſe fratres,
& ſorores nominantes ad perniciem eorum qui in-
erunt.*

Gregor.
Nyſſenus
hom. 8. in
Eccl.

Sed quid ago? dum pueritiam hominibus iſtis,
non potius quàm ouem lupo, credendam eſſe
conficio, à magiſtris ad auditores de labor impru-
dens. Neque iſtud ſi temerè accidit, extra cauſam
atque inſtitutum meum iacet Iudices. Æquum
eſt enim vt cùm de arte, & eius doctõribus plera-
que dicta ſint, auditores eius diſciplinæ quales

esse debeant, inquiramus Totam igitur in primis *Matronas*
 adolescentiam, in utroque sexu ad vitia nimium *sine mari-*
 proclivem laudatorum virorum auctoritas semel *torum vo-*
 penitusque abducit ac diuellit. De matronis quid *luntate*
 sentire possunt vindices sanctitatis, cum leges ip- *spectare*
 sæ Imperatoris iustam repudij causam esse de- *non licet.*
 cernant, si vxor *theatralibus ludis marito probi-* *Cod. de Re-*
bente gaudeant. Adeo nullum est matrimonij vin- *pucl. l. 8.*
 culum, postquam aures atque oculi prostituti *Iudices*
 sunt. Habet & suæ imaginis curam Imperator, *omnino ab-*
 atque ei cui sacras vices, delegat sensus illos ca- *st. nere in-*
 stos atque integros esse iubet. Quid igitur vetat? *bentur.*
 vt *Nullus omnino Iudicum aut theatralibus ludis,* *Cod. Theo.*
aut Circensium certaminibus, aut ferarum cursibus *de spectac.*
vacet. Rectè profectò & sapienter, tum ne tem- *l. 2.*
 pus iuri dicundo necessarium in leuissimas volu-
 ptates insumatur: tû ne Iudices quæ scelera in fo-
 ro puniunt, ea in theatro spectare, & aspectu suo
 probare cogantur. Hanc autem vitæ castimo-
 niam optima lege vobis imperatam, nullo facto
 certius persuadebitis in medullis vestris penitus
 infixam esse, Iudices, quàm si perditos istos fla-
 gitiorum patratores ne in vrbe quidem vestra re- *Ecclesiast.*
 fidere patiamini: neque tam quid effrenata plebe- *personis*
 culæ cupiditas, quàm quid personarum vestra- *penitus in-*
 rum dignitas, & officii ratio postulet, attendatis. *terdicitur*
 Sed vt ad Canones reuertar, quid illi sapius, quid *spectacu-*
 studiosius viris cultui diuino dedicatis imperant; *lis.*
 quàm spectaculorum abstinentiam? Recita de- *Conc. A-*
 cretum Concilij Agathensis de conuiujs & spe- *gath. can.*
 ctaculis euitandis. *39 & re-*

Presbyteri, Diacones, Subdiacones, vel deinceps fertur dist.
quibus ducendi uxores licentia non est, etiam aliena- *34.*

rum nuptiarum erulent comminua: nec his coetibus admisceantur ubi amatoria cantantur, & turpia, aut obsceni motus corporum choris & saltibus efferruntur: ne auditus, & obitus sacris mysteriis depuati turpium spectaculorum atque verborum contagione polluantur. Quid enim Dei legato cum pompis Diaboli? quid votorum nuncupatori cum risu & ludicris? quid tremendam immolanti victimam cum veneris versiculis & gestibus impudicis? Nimirum sacrificanti præco inclamabit hoc age, cuius oculos, aures, animum obscenarum cogitationum agmina obsidebunt? Diurno precum penso satisfaciet ea qua Deum decet reuerentia, qui mollia poëtæ carmina in memoriam altè immiserit? Supremum numen pro humano genere interpellabit ille quasi sequester, qui voluptatis autoramento dæmoni se addixerit! At enim in eas tendiculas potest imprudens aliquis incurrere, & ad conuiuium inuitatus, de mensa in theatrum deduci. Nemo iam potest eam prætereundam ignorantiam: eiusmodi bellaria canistris non reconduntur. Quisquis ad splendas illas epulas aduocatur, tam pulmēti gnarus est, quàm cibi, Recita tamen quæ à Laodicenis patribus ea de re statuuntur.

*Conc. Laodice-
dicenum.
can. 54. &
habetur
dist. ult. de
Consecr.* Quod non oportet sacros, vel Clericos in nuptiis vel conuiuiis aliqua spectacula contemplari; sed priusquam ingrediantur thymelici surgere, & secedere. Est enim ea condiendarum dapum ratio tam insulsa, vt Socrates ipse in Platonis conuiuiis rogatus an esset in aulam saltatricula, aut histrio introducendus, sapienter responderit: Esse illud indoctorum & agrestium hominum, qui non habent in mensa quod loquantur. Videtur autem Sextum

Concilium

Concilium magis expressum aliquid nobis offerre. Recita eadem de re decretum Concilij Trulani.

*Ne cui liceat eorum qui in sacerdotali ordine enumerantur, vel Monachorum, ad Circensium certamina ascendere, vel scenicos ludos sustinere. Sed & si quis clericus ad nuptias vocetur, quando ad deceptionem comparata ludicra ingressa fuerint, surgat, & discedat: patrum nostrorum sic inbente doctrina. Si quis autem eius rei conuietus fuerit, vel cesset, vel deponatur. Et eam quidem pœnam ab posterioribus hisce Præsulibus Laodicensi Canonì adiunctam auget, & explicat iuris ciuilibus constitutio à Photio relatâ, quæ Episcopum vel clericum alex, aut spectaculorum studiosum à sacro ministerio se-
iungi imperat, annonariis pensionibus priuari; & si in insana illa cupiditate perstiterit, ciuitatis suæ curiæ cum bonis suis mancipari; aut si facultatibus careat, fieri apparitorem. Apparitorem Deus sancte! ex Episcopo curiæ mancipatum ex clerico? Quæ est ista Ouidio ignota Metamorphosis? quæ in officina nouæ illæ hominum species cuduntur? Etiam-ne spectatoribus suis laruas fabricant histriones, vt qui Episcopus ingressus fuerat exeat apparitor? vt pastoralis baculus in virgam, annulus in tutelam, birrus in sagulum commutetur. Videre mihi videor homines pallio tunicaque talaribus nuper venerandos, attonsa in coronæ modum coma, famulis & pedissequis nobiliter comitatos; iam togula stringente femina succinctos, cum sordido pileolo, & inclinante in humerum sinistrum bacillo ex ebreno, vel procedentium in publico festo clericorum anteaambu-*

Concil. 6.
can. 24.

Ludicra
ad deceptionem
comparata.

Photius in
Nomocan.
Tit. 9. cap.
17.

Scenici vt mittit. Recita ea de re decretum Nicolai Papæ
infames ab ad Michaëlem Imperatorem.

accusatio- Omnes etiam infamia maculis aspersi, idest, histrio-
ne prohi- nes ac turpitudinibus subiectæ persona, hæretici et-
bentur. 4. iam, siue pagani, siue Iudæi, ab accusatione prohiben-
 q. 1. defini- tur. O admirabilem hominum copulationem! ô

mus. 5. mirificam sectarum coniunctionem! Pagani &
Omnes et- scenici, Iudæi & Comædi, hæretici & histriones
iam. eodem sunt apud magnum Pontificem loco, eun-

Idem fla- dem faciunt ordinem, in eadem cymba infamiæ
ruitur can. fluctibus agitantur Iudicio supremi Ecclesiæ An-

143. Conc. tistitis ethnici & histriones nominibus certè ali-
Carthag. quantum, re autem & impietate nihil differunt.

Sed hoc parum fuerit nisi etiam ab honoribus ar-
 ceantur Vt enim in iure ciuili Constantinus, no-
 tatis, & quos scelus vitæque turpitudine inquinat, di-
 gnitatis portas patere non sinit: sic maiestatis suæ in-

Qui sceni- tegritatisque haud paulo studiosior Ecclesia nul-
cam duxe- la penitus scenicorum communione se patitur
rit à sacris profanari. Recita Canonem Apostolorum, de eo
ordinibus qui scenicam in matrimonium duxerit.

excludi- Qui viduam duxit, aut eiectam, vel meretricem, vel
tur. ancillam, vel quampiam scenicam, non potest esse E-

Canon. A- piscopus, aut Presbyter, aut Diaconus, aut omnino ex
post. 18. & eorum numero qui ministerio sacro deseruiunt. Quis

habetur enim ferat tale lecto coniunctos vasa sacra & tre-
dist. 34. c. menda mysteria pollutis manibus attrectare?

Si quis vi- Quid autem tandiu circumrodo? Quin istas Ec-
duam. clesiæ strumas, Christianitatis vomicas, à piorum

cœtu, à fidelium societate ostendo fuisse deiectas

Histriones atque exterminatas? Recita decretum Concilij
excommu- Arelatenfis de agitatoribus, & theatricis.

nificantur. De agitatoribus qui fideles sunt, placuit eos quan-
 diu agitant à communione separari.

*De theatricis, & ipsos placuit, quandiu agunt, à Conc. Arel.
 communione separari. Per Deum immortalem quid lat. 1. can.*
 hic agitis hominum insolentissimi? quid hic quæ- 4.
 ritis bipedum sceleratissimi? vos ut spuriam sobo- *Can. 5.*
 lem execratur Ecclesia parens illa mitissima, vo-
 bis templorum aditu interdicat, vos diuinorum
 mysteriorum participes facere abnuat, ne suorum
 quidem consortio & familiaritate dignatur: & in
 urbem hanc admitti, inter nos viuere, lætari, lu-
 dere postulatis? qui enim estis? unde profecti?
 Moabitas atque Ammonitas legis antiquæ inter-
 dicto ut execratos & detestabiles populos in Ec-
 clesiam Domini intrare nefas erat: ipadonem &
 ex scorto natum eadem lex arcebat à templo: vos
 Christiani Senatus consulta à basilicis nostris ei-
 ciunt, ut non minus sacrilegi quàm Ammonitæ,
 non minus molles quàm euirati, non honestiores
 quàm vulgo quæsitæ videamini. Quid? adulteros,
 parricidas, dardanarios, parietum perfores, si
 modo salutaribus aquis tincti sunt, sinu suo com-
 plecti non refugit Ecclesia: vos quam vitam vi-
 uitis, quam artem facitatis, quos à suo corpore,
 ut putridos artus, & corrupta membra auellit
 & obtruncat? hæretici rebellarunt in parentem, è
 familia eiecti sunt: Iudæi nascentem suffocare vo-
 luerunt, exterminati sunt: Pagani omni suppli-
 ciorum diritate & sæuitia crescentem vexau-
 erunt, extincti sunt. Vos nulla vi, nullis insidiis,
 non armis, non prauis opinionibus eam impugna-
 re videmini, & tamen à suorum communione & iu-
 ribus filiorum deturbat. Quæ, malum! estis porten-
 ta hominum, post baptismum Ethnici, Christum
 adorantes Iudæi, in recta fide hæretici? Quæ vos

nota distinguit à cæteris? Præputium? nunquid circumcisi sunt Pagani? Vnius Dei cultus? Quid aliud loquuntur Iudæi? aditialis aquæ lauatio? qua gloriantur hæretici. Tota Catholicorum credulitas? quam Schismatici retinent. Cum Ecclesia Romana coniunctio? unde vos ipsa ignominiosè amputat & absceidit. Quis ergo vobis in vrbe nostra dabitur locus, in quo artis vestræ, qualiscunque tandem illa est, ludum instituatis? Sacer? at profanas voluptates exercetis. Profanus ne? At virtutis scholam appellatis. Serius ad agendum? at solum luditis. Idoneus voluptati?

*Admittendi si agunt
pœnitentiam.*

Conc. Carthag. can. 49 habetur de Consec. dist. 2. can. scenicis.

Ioannes Zonaras in Canon.

Nulla est inter Comædos & scenicos Histriones distinctio.

quis enim? Domus ad aleam, caupona ad crapulam, lupanar ad venerem? hæc alibi quærite: hic Christiano more viuatur. Quid autem, inquis, agendum vt Christiani videamur? Nihil. vos enim quamdiu agitis, Ecclesia Christiana non agnoscit, receptura profectò si artem desinitis. Recita decretum Concilij Carthaginensis de Scenicis pœnitentiam agentibus.

Vt Scenici & Mimici, & reliquis eiusmodi personis, vel apostatis, pœnitentiam agentibus, & se ad Deum conuertentibus, gratia, vel reconciliatio non negetur. Et quoniam Regionum illi Comædorum nomine gloriari solent, vt execrationes istas in plebeios aliquos histriones traiciant, adde quæ ad hunc Canonem opportunè scripsit Ioannes Zonaras.

Scena, imitatio dicitur, qui ergo nunc seruos, nunc Imperatores, nunc alia personarum genera imitantur, mædos & scenicos nominantur. Ex hoc numero qui artem coram Imperatoribus factitarent, leges ciuiles in honore habuerunt. Qui vero in publico catu, plebeculeque con-

uentibus histrioniam exercerent, & sumque astantium simulata imitatione captarent, ignominia notare. Hic verò canon omnes sine discrimine, pœnitentiâ egere affirmat; quippe qui & ipsi dissolute vitam agant, & aliis perulanti ac effuse viuendi causam præbeant. Quæ ex oratione neque istos è sacra domo esse apparet, cum neque Regem comitentur, neque regiis alantur stipendiis, sed meros planipedes quæstum ex plebeculæ deliciis facientes; neque si regij & honesti forent, ab sacrorum Canonum seueritate eximendos. Photius autem Constantinopolitanorum Præsulum fortasse doctissimus, posteaquam Canonem modo à me productum, Romani Iuris additione explicuit, nulla Regionum Scenicorum facta mentione, problema subiungit, vestris, Iudices, auribus non indignum. Quod hoc loco non referrem, nisi fugisset Philologum, Scenæ vocabulum ex Vlpiano enarrantem. Ait ergo, Infames esse quicumque quæstus causa in certamen descendunt, & propter præmium in scenam prodeunt. Verum qui se ad artem ludicram locat, si non prodit, non notari infamia: qui autem se locat ut cum bestiis depugnet, et si reapse non pugnet, tamen notari. Huius verò discriminis germanam affert rationem Nomocanonis explicator Theodorus Balsamon Antiochenæ sedis Patriarcha. Recita Balsamonis commentarium quo illam Photij quæstionem dissoluit.

*Photius. in
Nomoca-
none Tit.*

13. cap. 22.

Quæret fortasse quispiam quapropter qui operam suam in artem ludicram locauit, neque exhibuit, non notetur: qui verò ut cum bestiis depugnaret se locauit, tamen si non pugnarit famosus fiat? In arte ludicra ip-

Theod.

Balsam. in

Photij No-

mocan.

Ipsa tra- sum factum, non autem propositum infamiam irrogat.
gædiarum Quod manifestum sit ex eo quod is etiam qui non mer-
exhibitio cedis, sed gloria solius causam facit, infamis
histriones est. In eo verò qui cum bestiis pugnat, non factum ip-
facit infam- sum, sed propositum odiosum est. Nam Reges etiam,
mes. atque milites generositatis ostentanda gratia cum be-
 stiis depugnant. Ac propterea quidem qui turis lucrì
 causa vitam suam prodidit, tamen si non pugnarit fa-
 mosus sit, qui verò rei ludicra facienda causa pecu-
 niam cepit sicam non fecerit, non notatur. Ista qui-
 dem, Iudices, dubitare vos cogerent, istine arti-
 fices ab arte sua, an ars ipsa ab artificibus infamiam,
 & dedecus accipiat: nisi utrisq; simul optime
 conuenire sciretis. Et quanquam ieiunis istis
 legum productionibus assueuistis, tamen ante-
 quam ad eas redeo, placet Chrysost. eloquentia
 vestros animos paulisper recreare. Is iucundissi-
 mè deridet Principes qui scenicorum spectaculo-
 rum donatione per infames illos homines hono-
 rari se putarent: leges autē ciuiles arguit quæ sce-
 lerum omnium licentiam scenicis largiuntur, cui-
 libet aliorum hominum generi præcidunt. Recita
 Chrysostomi auream hac de materia orationem.

Chrysost. Theatra congregant, & meretricum choros illic in-
hom. 12. in ducentes, & pueros scortantes, & qui iniuria ipsam
1. Epist. ad afficiunt naturam totum populum in loco superiore fa-
Corinth. ciunt considerare. Sic ciuitatem recreantes, sic magnos
 Reges quos semper propter trophæa, & victorias ad-
Theatrorū mirantur, coronantes. Atqui quid est hoc honore frigi-
voluptate dius? quid voluptate illa iniucundius? Ex his ergo
nihil inin- queris factorum tuorum laudatores? & cum saltato-
cundius. ribus, mollibus, & mimis vis, dic quæso, laudari? Et
 quomodo non fuerit extrema dementia? libenter

enim eos rogarem. Est ne graue & indignum leges naturæ euertere, & illicito: & nefarios inducere concubitus? omnes dicent esse graue & indignum. Videntur quidem certè hoc quoque punire flagitium. Quid ergo illos inducis cinados & exoletos? Neque solum inducis, sed etiam innumerabilibus, & ineffabilibus honoras muneribus? alibi eos qui talia audent puniens: hic autem tanquam de Rep. bene meritis & pecunias insumis, & publicis impensis eos alis. At sunt, inquit, infames. Quid ergo eos erudis? cur per infames Reges honoras? cur ciuitates enecas? cur autem in eos tam multa impendis? Nam si sunt infames, infames oporteret expelli. Nam cur eos fecisti infames? an ut laudans, an ut qui eos condemnaueris? ut qui condemnaueris scilicet. Deinde ut qui condemnaris qui dem eos facis infames: curris autem eos visurus tanquam qui sint honesti bonaque fama, & existimationis, & admiraris, & laudas, & applaudis. Hæc à Chrysostomo non attuli ut exoletos & meretrices in hunc confessum reuocem: sed ut iniucundam theatrorum voluptatem esse, ut condemnatos ab ipsis admiratoribus histriones, ut infames expelli debere commonstrem. Redeo ad ius: sed Valentiniani senioris cōstitutionem omitto, quia sacris hominibus non placet. Concedit ille quidem ut Scenici & Scenicæ in vltima vitæ linea sacro tincti lauacro, si fortasse periculum euasis-
sent, nulla posthac in theatralis spectaculi conuentione reuocarentur, quia legibus Ecclesiasticis cautum fuisse probaui, ne Christiani theatralibus populi voluptatibus vacarent. Sed illud vitæ periculum ad eo diligenter examinari, tam apertè cognosci vult antequam cœlestis aqua sacramenti

Per infames illos
ciuitates
enecantur.

Rescriptū
Valenti-
niani Se-
nioris l. i.
de Scenic.

C. Theod.

Non nisi
incerto
mortis pe-
riculo hi-
striones
lim bap-
tismi per-
missi.

infundatur, vt iam beneficio eripiat, quod necessitati denegare non potest. Alterum quidem rectè, ne Christianorum cœtus tam fœdis sodalibus inquinetur. Alterum autem seuerè nimis ne dicam impiè; quasi flagitiosos mores non nisi cum yta exuere debeant histriones. Vtrumque tamen ad institutum meum eximiè: quia ostendit & scenicum in Christianorum numerum allegi non debere; & qui verè Christianus sit, histrionem posse esse neminem.

Ab histrionibus ad eorum spectatores proceditur.

Sed prætermisso in præsentia Imperatore, ad sacras infulas, & iura ab Ecclesiæ patribus constituta reuertor. Non potuit, vt opinor, è vestra, Iulces, memoria elabi nobilissima pars actionis Pa-nurgi istius, qua literariæ iuuentuti perpoliendæ necessariam esse histrionum operam conficere tentauit. Ex ea disciplina & Græcum Demosthenem prodiisse & Romanum Ciceronem, non homines, sed ipsam medius fidius eloquentiam. Cui nodo cuneum perquam idoneum attulit Modestinus: sed quoniam Reip. plurimum interest scire non tantum literarum studiis nihil conferre, sed etiam adolescentum moribus mirum in modum obesse artem histrionicā, illustris Antistitis sententiam rogemus de histrione pueros ad agendum informante. Recita Cypriani responsionem Euchratio factam.

Cypr. Ep. 61. ad Eucherium. Pro dilectione tua, & verecundia mutua consulendum me existimasti, frater carissime, quid mihi videatur de Histrione quodam, qui apud vos constitutus in eiusdem adhuc artis suæ dedecore persenerat, & refertur *Magister & Doctor non erudiendorum, sed perdendorum puerorum, id quod male didicit ceteris quoque*

insinuat: Antalis debeat communicare nobiscum? Puer Histrio
 to nec Maieitati diuine, nec Evangelica disciplina magister
 congruere, ut pudor & honor Ecclesia tam turpi & in- per dendo-
 fami contagione foedetur. Nam cum in lege prohi- rum puer o-
 beantur viri induere muliebrem vestem, & maledi- rum.

Et i eiusmodi iudicentur: quanto maioris est criminis
 non tantum muliebria indumenta acciperè, sed & ge-
 stus quoque turpes, & molles, & muliebres magisterio
 impudica artis exprimere? Vtilem, Panurge, do-
 ctrinam, & ardentem expetendam! cui perdiscen-
 dæ non vna sufficiat Massilia, non vnæ Athenæ:
 sed vrbes singulæ Gymnasia magnis impensis ex-
 truant, & vos grandi salario conducant oportet.
 O dedecus Rep. ! ô pestes iuuentutis ! ô perni-
 cies castitatis ! vestram artem ut percipiant qui
 per leges, per sapientum consilia ne spectare qui-
 dem debent? vide num codex Theodosianus in
 recta iuuentutis informatione decernat, ne spe
 Etacula frequentius adeant. Disce quid Aristoteles
 Philosophorum sapientissimus, ne Platonem qui-
 dem excipio, legislatori præcipiat pueris vetan-
 dum. Collige quæ de hac puerorum institutione
 in Politicis scribit Aristoteles.

Cod. Theo.

de stud.

urb. Reft.

lib. i.

Pueri à

theatris re-
mouendi.

Ratio postulat ut qui hac ætate sunt, ab auditioni- Aristot. l.
 bus & spectaculis illiberalibus longè arceantur. Cum 7. Politic.
 igitur vniuersè legum scriptor verborum obscœnita- cap. 17.
 tem ex ciuitate si quid aliud eicere debeat: tum ma-
 ximè ab puerorum oculis auribus-ue remouere ne quid
 tale vel loquantur vel audiant. Quoniam autem tale
 aliquid proloqui vetamus, perspicuum est etiam pi-
 cturis, ac tabulas indecoras & deformes spectare per
 nos non licere. Dant igitur operam magistratus ne qua
 sit vel statua, vel tabula picta, quæ tales actiones imi-

tetur. Iunioribus verò neque iambos neque comœdias spectare ulla lege permitti debet. Interposui Philosophum ne Christianorum Patrum acerbiter criminareris. Quanquam non defugies, ut arbitror, Gregorij Nysseni, hominis minimè austeri de theatris tuis iudicium, deque iis qui iuuentutem ad spectacula pertrahunt. Is enim bellum illud quod animo & mente cum vitiis gerimus concinnè describens, hostium exploratorem ait esse oculorum spectaculum, quod in nostras copias furtim se se insinuet: collocatos deinde in insidiis eos qui amicitiae specie ad theatra deducant. Recita venustam eloquentis Theologi allegoriam.

Si ad spectaculum per voluptatem emollitus fuit sensus, & figura simulacrum cogitationem subiit per oculos: tunc expugnatur quidem mens eorum quae sunt intus Imperatrix, ut quae nihil habeat virile, aut iuvenile, sed sit effœminata & dissoluta: & magna magnus proditorum ex populo cogitationum cogitur circa exploratorem. Qui pretextu amicitiae & benevolentiae cum cui persuadetur attrahunt ad peccati exitium, ij sunt qui irvia insidiatur, laudatores voluptatis, quae deducunt ad theatra, qui mali indicant facilitatem: & per ea quae faciunt prouocant ad imitationem, se fratres, & sorores nominantes ad perniciem eorum qui inierunt.

Gregor.
Nyssenus
hom. 8. in
Eccl.

Sed quid ago? dum pueritiam hominibus istis, non potius quàm ouem lupo, credendam esse conficio, à magistris ad auditores de labor imprudens. Neque istud si temerè accidit, extra causam atque institutum meum iacet Iudices. Æquum est enim ut cum de arte, & eius doctoribus pleraque dicta sint, auditores eius disciplinae quales

esse debeant, inquiramus Totam igitur in primis *Matronas*
 adolescentiam, in utroque sexu ad vitia nimium *sine mari-*
 procliuem laudatorum virorum auctoritas semel *torum vo-*
 penitusque abducit ac diuellit. De matronis quid *luntate*
 sentire possunt vindices sanctitatis, cum leges ip- *spectare*
 sæ Imperatoriæ iustam repudij causam esse de- *non licet.*
 cernant, si vxor *theatralibus ludis marito prohi-* *Cod. de Re-*
bente gaudeant. Adeo nullum est matrimonij vin- *pub. l. 8.*
 culum, postquam aures atque oculi prostituti *Iudices*
 sunt. Habet & suæ imaginis curam Imperator, *omnino ab-*
 atque ei cui sacras vices, delegat sensus illos ca- *stinere in-*
 stos atque integros esse iubet. Quid igitur vetat? *bentur.*
 vt *Nullus omnino Iudicum aut theatralibus ludis,* *Cod. Theo.*
aut Circensium certaminibus, aut ferarum cursibus *de spectac.*
vacet. Rectè profectò & sapienter, tum ne tem- *l. 2.*
 pus iuri dicundo necessarium in leuissimas volu-
 ptates insumatur: tû ne Iudices quæ scelera in fo-
 ro puniunt, ea in theatro spectare, & aspectu suo
 probare cogantur. Hanc autem vitæ castimo-
 niam optima lege vobis imperatam, nullo facto
 certius persuadebitis in medullis vestris penitus
 infixam esse, Iudices, quàm si perditos istos fla-
 gitiorum patratores ne in vrbe quidem vestra re- *Ecclesiast.*
 fidere patiamini: neque tam quid effrenata plebe- *personis*
 culæ cupiditas, quàm quid personarum vestra- *penitus in-*
 rum dignitas, & officij ratio postulet, attendatis. *terdicitur*
 Sed vt ad Canones reuertar, quid illi sapius, quid *spectacu-*
 studiosius viris cultui diuino dedicatis imperant; *lis.*
 quàm spectaculorum abstinenciam? Recita de- *Conc. A-*
 cretum Concilij Agathensis de conuiujs & spe- *gath. can.*
 ctaculis euitandis. *39 & re-*

Presbyteri, Diacones, Subdiacones, vel deinceps fertur dist.
quibus ducendi uxores licentia non est, etiam aliena- *34.*

Concilium magis expressum aliquid nobis offerre. Recita eadem de re decretum Concilij Trulani.

*Ne cui liceat eorum qui in sacerdotali ordine em-
merantur, vel Monachorum, ad Circensium certami-
na ascendere, vel scenicos ludos sustinere. Sed & si quis
clericus ad nuptias vocetur, quando ad deceptionem
comparata ludicra ingressi fuerint, surgat, & disce-
dat: patrum nostrorum sic inbente doctrina. Si quis
autem eius rei convictus fuerit, vel cesset, vel depona-
tur. Et eam quidem pœnam ab posterioribus his-
ce Præsulibus Laodicensi Canonì adiunctam au-
get, & explicat iuris ciuilis constitutio à Photio
relata, quæ Episcopum vel clericum alex, aut
spectaculorum studiosum à sacro ministerio se-
iungi imperat, annonariis pensionibus priuari; &
si in insana illa cupiditate perstiterit, ciuitatis suæ
curiæ cum bonis suis mancipari; aut si facultati-
bus careat, fieri apparitorem. Apparitorem Deus
sancte! ex Episcopo curiæ mancipatum ex cleri-
co? Quæ est ista Ouidio ignota Metamorpho-
sis? quæ in officina nouæ illæ hominum species
cuduntur? Etiam-ne spectatoribus suis laruas fa-
bricant histriones, vt qui Episcopus ingressus fue-
rat exeat apparitor? vt pastoralis baculus in vir-
gam, annulus in tutelam, birrus in sagulum com-
mutetur. Videre mihi videor homines pallio tu-
nicaque talaribus nuper venerandos, attonsa in
coronæ modum coma, famulis & pedissequis no-
bilitèr comitatos; iam togula stringente femina
succinctos, cum sordido pileolo, & inclinante in
humerum sinistrum bacillo ex ebèno, vel proce-
dentium in publico festo clericorum antambu-*

Concil. 6.
can. 24.

Ludicra
ad dece-
ptionem
compara-
ta.

Photius in
Nomocan.
Tit. 9. cap.
17.

lones, vel curialium iudicum accensos & silentia-
rios, ciuitate tota illam metempsychosin : & me-
tensomatismum admirante. Vides tu illum spe-
cie digna imperio, erecto corpore, acribus oculis,
facie liberali? ante menses aliquot Præsulem ges-
sit, nunc canes abigit è templo & mendicantes. Is
autem qui alio die, nudius quintus decimus erat,
irrausit in foro dum bona defuncti sub hasta ven-
deret, primarum partium clericus fuit. Ille qui vi-
cinum heri tuum vadabatur, opimis antea præ-
bendis fruebatur. Vnde tanta mutatio? à thea-
tris. Quis homines illos exaugurauit? amor Hi-
strionum. Malum enim uero factum! indigni vi-
dentur ea contumelia. Quid facias? ita Canones
puniant spectaculorum studiosos. Cur enim ab
eo non abstinent quod & contemnere facile est,
& spectare inhonestum?

Quod si Christianæ plebis patres & magistros
ab illa virtutum pernicië abhorre iubent anti-
qua concilia; quid de ipso populo par est ab iis
decerni, cuius à vita & moribus nullam sanctita-
tis partem abesse voluerunt? Recita decretum
Concilij Carthaginensis.

Conc. Car-
thag. can.
15.

Idem
Christia-
nis omni-
bus semper
est interdi-
ctum.

*Vt sacerdotum filij secularia spectacula, nec pera-
gant, nec spectent, hoc autem omnibus Christianis sem-
per est interdictum, ut ab iis abstineant, & ubi sunt
blasphemie & maledicta non accedant. Hæc statuta
sunt cum in ipso coniugio dignam aris & infulis
castimoniam excolebant Christiani: nunc autem,
proh pudor! vix eam cœnobiorum opertis, alta-
rium religione, votorum professione tueri possu-
mus. Affer quæ in hunc locum Zonaras Cano-
num enarrator adiungit.*

Qui mimorum equorumque spectaculis, aliisque
huiusmodi ludicris occupantur, neque intemperantia in Can.
crimen effugient, neque integritatis & castimonie te-
stimonio commendabuntur. Nec verò mirum si hac
vite degende ratio à filiis Sacerdotum exigatur.
Nam & Christianis omnibus ne ad ea loca ubi blas-
phemia sunt, accedere liceat, interdictum fuit. Blas-
phemia verò nomine ea quæ licenter ac inuerecundè
sunt, significauit. Ob illa quippe fideles quasi tempe-
rantia integritatisque contemptores ab infidelibus
blasphemantur. Certè ab Octauio Minutiano Chri-
stianis obiiicit contumeliam legimus quod thea-
tris non interessent. Quamobrem iure mihi opti-
mo videtur Chrysostomus eos à templis arcere
velle tanquam impios & profanos qui frequenta
re spectacula non dubitarent; negatque veneran-
dorum mysteriorum participationem cum illa
petulantia posse consistere. Selige quædam è no-
bili oratoris Antiocheni myrothecio.

Theatro-
rum spe-
ctatores à
templo ar-
cendi.

Equidem arbitror multos ex his qui heri nos desti-
tuerant, & ad iniquitatis spectaculi decesserant, ho-
die presentes esse. Optarim autem istos qui sint palam
nosse, ut eos à sacris vestibulis arceam: non ut perpe-
tuo foris maneant, sed ut correcti denuo redeant. Et
quid hic, inquiunt, adeo magni sceleris commissum
est, ut ab istis sacris cancellis arcendi sint? Imo quod
delictum his grauius queris? cum seipsum planè adul-
terio contaminarint, impudenter ac rabientium more
canum ad sacram hanc mensam irruunt. Non metuis,
non expauescis dum oculis quibus illic lectum qui est
in orchestra spectas, ubi detestanda adulterij fabula
peraguntur, iisdem hanc sacram mensam intueris ubi
tremenda peraguntur mysteria? dum iisdem auribus

Chrysost.
hom. 3. de
Dauid &
Saule.

audis & scortum obscœnè loquens, & Prophetam.

*Quicquid
in theatris
geritur per-
niciēs est.*

Apostolumque ad arcana scriptura introducētem? dum eodem corde & lethalia sumis venena, & hanc hostiam sanctam, ac tremendam? An non hæc sunt vitæ subuersio, coniugiorum corruptele, bella, pugneque & rixa in domibus? Quicquid illic geritur non est oblectatio, sed perniciēs sed pœna, sed supplicium. Quid prodest illa temporaria voluptas, dum hinc perpetuus nascitur dolor, dumque nocte pariter ac die à concupiscentia stimulatus omnibus molestus es & inuisus? Excute igitur te ipsum, reputans qualis fids ab Ecclesia rediens, rursus qualis à spectaculis, atque hos dies cum illis conferas. Quamobrem equidem horror rogoque ut prius confessione ac pœnitentia, aliisque remediis omnibus à peccato ex theatricis spectaculis contracto se se perpurgent; atque ita diuinos audiam sermones. Austerus es Chrysostome, qui non malorum hominum conscientiam in re leui confaucias: qui theatralem delectationem ad remittendos animos institutam facis sine causa perniciosam. Quid est superstitiosum esse, si hoc non est? aut si scelus in theatris vllum est, agentes certè commaculat; ad spectatores non peruenit. Hæret tamen in proposito Chrysostomus, Iudices; viros etiam sapientes & corroboratæ virtutis reos facit, si theatra frequentant. Cur ita? quia infirmioribus exemplo nocent Recita Chrysostomi ad istud conficiendum efficax argumentum.

*Spectato-
res exem-
plo saltem
nocent ce-
teris.*

*Chrysost.
hom. 39. in
Matth.*

Sed ego, inquires, ostendam nihil multis ludos eiusmodi obfuisse. Imò verò id maximè nocet, quod frustra & incassum tempus consumis, & scandalum aliis offers. Nam etsi tu quodam excelsi animi robore nihil inde tibi mali contraxisti: attamen quoniam alios

imbecilliores exemplo tui spectaculorum studiosos fecisti, quomodo non ipse commisisti, qui causam committendi aliis praeuisti? Qui enim ibi corrumpuntur tam viri quam mulieres, omnes corruptionis crimina & causam in caput tuum transferunt. Nam quemadmodum si non essent qui luderent: sic quoniam uterque sunt causa peccatorum quae committuntur, ignem patiuntur. Quare quamuis animi tui modestia effecisti, ut nihil tibi inde obfuerit, quod ego fieri posse non arbitror: quoniam tamen alij causa ludorum multa peccarunt, graues propter hoc poenas lues. Quamuis etiam multo modestior esses, si nullo modo eo pergeres. Num vos terret sacer ille orator, qui fieri non posse arbitrat ut quis à theatro non vulneratus excedat? Quamquam si rectè iudicare volumus, idem est dicere coniectum in fornacem exuri, volutantem in niue candefieri, qui ad picem adhærescat, inquinari. Sed hoc quasi per transennam ostendit; aliud hac oratione concludit, illum decoctæ sapientiæ hominem, qui fabulas ut rem indifferenter spectet, ita iunioribus exemplo nocere, ut quas à theatris maculas contraxerint, eas illi in se recipiant. Quid quod alio loco peccata histri-
*Spectato-
res causa
sunt thea-
traliū
criminū.*

num omnia spectatoribus assignat, quia hi eorum causa existunt? Recita quæ hanc in rem disputat magnus orator.

Quando animi illi atque ridiculi blasphemum ac turpe quid dixerint, tunc potissimum quique stolidiores soluantur in risum: inde applaudentes magis, inde etiam illos lapidibus magis exagitare debuerant: qui fornacem sibi ignis horribilis ex huiusmodi voluptate succendunt. Qui enim laudant ista dicentes, ipsi eis hæc exercere persuadent: & idcirco ipsi potius propter

Chrys. ho.
6. in Mat.

hac merentur supplicium. Si enim nullus esset talium spectator, ac fauor, nec essent quidem qui aut dicere illa, aut agere curarent. Quando vero vos cernunt & artes proprias, & ipsa exercendi quotidiani operis loca, & illum quem ex his paratis quaestum, & prorsus omnia simul vanissimi illius spectaculi amore deferere: audiori ad hac & illi intentione rapiuntur, studiumque his maius impendunt. Et hac dico non ut illos à crimine videar vindicare: sed ut discatis initium & caput iniquitatis huius vos esse potissimum, qui totam prorsus diem in tam ridicula, tamque perniciose voluptate consumitis, & honestum coniugij nomen atque reuerendum in illud negotium publicatis. Non enim tam ille delinquit qui ea simulat, quam tu qui hoc fieri iubes. Nec solum iubes, sed etiam exultatione, risu, plausu adiunas quae geruntur, omnibusque prorsus modis diabolicam hanc confones officinam. Quàm verè & ad saeculi nostri mores aptè conuenienterque ista dicantur, Iudices, non diffitebuntur, si quis interroget, ludiones. Quis enim nostrum eos non audiuit de spectatorum petulantia conquerentes, per quos honesti esse si maxime velint, non possint? Quoties iussi mimorum lasciuiam tollere, tragœdias emaculare, in aliquod modestæ argumentum seipsum componere: responderunt, auditores sibi cum ista fecerint, defuturos? E diuerso maxima theatri cultorum pars plusquam scurrilem mimorum obscenitatem cum bonis omnibus condemnat: atque se spretis illis ad solam fabularum grauitatem, honestum videlicet animi laxamentum, adire. O boni! cui verba illi Veneris poculum libant, propinant, quæ vos vsque ad saecula exhauritis: illi vendunt

Non tam
delinquit
qui mala
simulat,
quam qui
iubet &
laudat.

flagitia; vos emitis: illi profligant pudicitiam; vos exuitis. *Vna res*, ut dixit Plautus, *Omnes compacto rem agitis, quasi in Velabro olearii*. Nam conceptæ in histrionis animo libidines clara voce, & erudito gestu, tanquam curru in subiectos auditorum cuneos delatæ, auidis auribus, & obuiis mentibus excipiuntur. Atque ut animantes aliquæ vento grauidatæ perniciissimos fœtus parere dicuntur: sic animi illi commoto per vocem aëre prægnantes, quam celerrimè partus scelerum immaturos ex se profundunt atque eiiciunt. Nolite enim putare, quod hætenus visus est Græcus Ecclesiastes indicare, auditores aliena tantum aut sociorum, aut histrionum turpitudine maculari: sua quemque Venus, sua vexat infania: sed auditores eadem quæ & ludiones. Recita Saluiani ea de re sententiam.

Spektatores in se contrahunt flagitia quæ vident.

Alia omnia mala agentes polluunt, non videntes, Salu. l. 6. vel audientes. Siquidem etsi blasphemum quendam de Provid. audias, sacrilegio non pollueris, quia mente dissentis. Et si interuenias latrocinio, non inquinaris actu, quia abhorres animo. Sola spectaculorum impuritates sunt quæ vnum admodum faciunt & agentium, & aspicientium crimen. Nam dum spektantes hæc comprobant, ac libenter vident, omnes ea visu audituque agunt, ut verè in eos Apostolicum illud peculiariter cadat: quia digni sunt morte non solum qui faciunt ea, sed etiam qui consentiunt facientibus. Itaque in illis Ire ad ludi imaginibus fornicationum, omnis omnino plebs animos histriomofornicatur: & qui fortè ad spectaculum puri venenum, fornicant, de theatro adulteri reuertuntur. Non enim tunc carum est. tantummodo quando redeunt, sed etiam quando veniunt, fornicantur. Nam hoc ipso quod aliquis rem

obscœnam cupit, dum ad immunda propevat, immundus est. Quod hominis eloquentissimi dictum non ut vanam Rhetorum exaggerationem, sed ut exactam ad Theologorum amussim, sententiam, cupio & vobis Iudices, & huic populo persuaderi. Licet enim Comœdia, si rei naturam spectes, in neutram partem valeat: quod Panurgo huic non inuitus concedo: quia tamen histrionum improbitate, & perditorum temporum consuetudine in deteriorem deducta est, ut vix iam sine Veneris illecebris vlla peragatur, quis ad tale spectaculum sine noxæ periculo accedit? quis est animo aduersus lasciuiam tam obfirmato ut eius impetus & præuidere audeat, & prouocare? quis castitatem sartam & textam ab omni detrimento seruare speret, cum in peccati periculum sciens & volens incurrit? ô importunos histriones! ô homines publico gaudio infestos! qui non malam rerum naturam scœdissimè corrumpunt; qui nostram innocentiam expugnant voluptatem cauponantes, Absque iis esset, tutam hodie integritatem, theatra casta, puram & liquidam delectationem haberemus. Nunc autem infamium ioculatorum proteruia in eam ignominiam lusus nostri deuenerunt, ut pene, sine scelere apud eos ridere nemo possit, ut honestis omnibus clausa censeantur theatra quæ solis honestis patere debuerant. Iam ab iis excluditur teneritas puerorum: verecundiæ matronarum, & Iudicum gratuitati raro conceduntur: Clericorum sanctitatem, & Christianorum religionem profanare putantur: non magis Basiliscus in nos, quàm noster in histrionem oculorum coniectus lethalis est. Et

eam generis humani labem tolerari à vobis sperant ludices ; in vestra ciuitate theatrum aperiri postulant , quòd si esset erectum , nisi vestra me fallit integritas , in perpetuum euerteretis.

Et nos tamen , inquit , spectatores tenemus etiam contempta Ecclesia oppido multos & honestos. Tripudias , Panurge , in nostro dedecore : triumphas in bonorum gemitu , in Dei contemptu , in salutis incuria. Calamitati temporum insultas , & qui profligata pietate iram numinis aduersum nos concitasti , dererum nostrarum statu perditò , dissipatoque lætaris. Ita ludebant ætate Saluiani Romano imperio subditæ , & Christiano nomine cohonestatæ regiones , cum eas barbarorum furor ferro & flamma , Deo vindicante delebat. Recita vehementem Saluiani lamentationem.

*Lugendū
est cum in
Dei con-
temptum
cō. uertit
ad theatra.*

Nos Ecclesiis Dei ludicra anteponimus : nos altaria spernimus , theatra honoramus. Omnia denique amamus , omnia colimus : solus nobis in comparatione omnium Deus vilis est. Hoc probat : quid si eodem die festiuitas Ecclesiastica , & ludì publici agantur , quæro ab omnium conscientie quis locus maiores Christianorum virorum copias habeat , cauea-ne , ludì publici , an atrium Dei ? Et templum magis omnes sectentur , an theatrum ? dicta Euangeliorum magis diligant , an thymelicorum ? verba vitæ , an verba mortis ; verba Christi , an verba mimi ? Non est dubium quin illud magis amemus quod anteponimus. Omni enim feriale ludicrorum die , quamlibet Ecclesia festa fuerint , non solum ad Ecclesiam non veniunt qui Christianos se esse : sed si qui inscij forte venerint dum in ipsa Ecclesia sunt , si ludos agi audiunt Ecclesiam derelin-

*Saluian l.
6. de Pron.*

quant. Spernitur Dei templum, vt concurratur ad theatrum. Ecclesia vacuatur, Circus impletur. Christum in altari dimittimus, vt adulterantes visu impurissimo oculos ludicrorum turpium fornicationis pascamus. Et ideo rectissime ad nos Dominus Deus dicit: Propter spurcitiam exterminati estis exterminio. Hæc sunt concionantis fulmina, an Prophetæ oracula? sua tempora describere sic potuit sine præfensione nostrorum? fame & frigore conficiuntur rustici: res urbanæ publicanorum iniustitia pessundantur: nulla non familia in auditibus oneribus opprimitur: litēs palam & publicè pretio iudicantur: homicidia claro meridie in urbium plateis perpetrantur: templa ipsa atque aræ vix à sacrilegio se defendunt: quod bellis ciuilibus superfuit, externa consumunt: dumque lacrymis & corporum vexatione Deum placare deberemus, spurci planipedes iocis & libidinibus nos distingere gloriantur; vt plus ipsi ad calamitates augendas, quàm miseriæ sensus ad minuendas posse videantur. Hæc fierent, Iudices, si probè intelligeremus quantum in spectaculis insit mali: eam in nos vilissimis arde lionibus traderemus potestatem si vena vlla paternæ pietatis in nostris pectoribus viueret? admiraremur frequentem theatrorum consessum, si pium Augustini animum gereremus? Is enim uerò luctu & lacrymis eos prosequitur, qui id agunt quod tu, Panurge, iactabas. Audi hominis non ingeniosioris quàm religiosioris plenum commiseratione sermonem. Recita tu Pragmaticæ quantum Augustinus miserandos eos putet, qui postposito Dei cultu, desident in spectaculis.

Credendum est charitatem vestram non ab aliud ho- *August. in*
dierno die copiosius conuenisse, nisi vt oretis pro eis *Psal. 50.*
quos absentes facit alienus & perversus affectus. Ne-
que enim loquimur de Paganis, neque de Iudais, sed
de Christianis. Neque de his adhuc Catechumenis,
sed de multis etiam baptizatis, à quorum luvacro ni-
hil distatis, & eorum tamen cordi dissimiles estis.
Quàm multos enim hodie fratres nostros cogitamus &
plangimus ire in vanitates & insanias mendaces, ne-
gligere quo vocati sunt, qui si forte in ipso Circo aliqua
ex causa expauescant, continuo se signant, & stant il-
lic portantes in fronte, vnde abscederent si hoc in corde
portarent. Deprecanda est misericordia Dei vt donet
intellectum ad ista damnanda, & affectum ad fugien-
da, & misericordiam ad ignoscenda. Opportune ergo
de pœnitentia Psalmus hodie cantatus est. Loquemur
& cum absenibus. Erit ad eos vox nostra, memoria
vestra. Nec vt saucios & languidos negligatis: sed
vt facilius sanetis, sani permanere debetis. Corrigite
arguendo, consolamini alloquendo, exemplum prabe-
re bene viuendo. Aderitis qui adfuit & vobis. Non
enim vobis iam ista pericula prætergressis fons mise-
ricordie Dei præcisus est, qua venistis venient, qua
transistis transibunt. Molestum est quidem, & nimium
periculosum imo perniciosum, & pro certo exitiabile
quod scientes peccant. Ita mitissimus Antistes co-
rum miseratur vicem, quorum frequentia gau-
dent histriones; ita de eorum salute sperari posse
admonet, quos errore pernicioso peccare confite-
tur: ita demum auditores suos laudat, quia ludo-
rum spectatores esse dedignantur, hæc denique
fierent, si Canonum sanctitas seruaretur, qui
diebus festis prohibent vlla spectacula celebrari?

Recita decretum Concilij Carthaginensis ne in
 Conc. Car- Dominico & in reliquis Sanctorum festis spectacula
 thag. Can. villo modo peragantur.

67. Illud quoque præterea petendum est vt theatralium
 ludicrorum spectacula in Dominico, & reliquis festis
 Festis die- diebus à fide Christianorum arceantur, Maxime quia
 bus specta- in sancti Pasche octaua turba magis in Hippodro-
 cula prohi- mia quam in Ecclesiam conueniunt, debent præfiniri
 bentur le- ipsorum dies transferri quando euenerint : nec debet
 gibus tum ullus Christianus cogi ad hæc spectanda, Cui Patrum
 sacris tum religioni prolixè respondisse Principes docent ex
 profanis. constitutiones apud Photium, quibus cauetur
 Photius in die Dominico, neque iudicio agi, neque scenicum
 Nomocan. spectaculum, aut arenariam venationem, aut Circen-
 tit. 7. c. 4. se certamen celebrari. Quin & si natalis Imperatoris
 in Dominicum diem incidat spectacula differri Qui
 spectaculis Dominico interfuerit, & qui apparitor
 legem iransgressus sit, eum militia priuari, eiusque
 patrimonium proscribi. O laudabilem Pontificum
 & Imperatorum concordiam ! ô spectabilem sa-
 cræ politicæque potestatis in conseruanda reli-
 gionis integritate conspirationem ! Rogant Præ-
 tules vt tollendis spectaculis fidei Christianæ con-
 sulatur : vetant Augusti sacros dies, imo natales
 etiam suos theatris occupari. Petunt illi ne Chri-
 stiani spectare ludos aliqua necessitate cogantur :
 hi proposita pœna prohibent. verorumque mens
 eadem est, religionem Christianam ludorum pu-
 blicorum permissione violari ? qui diebus illis
 contempta, vt fatentur, Ecclesia theatris assi-
 deant, Christianos non videri. Nimirum primi
 religionis Antistites recolendis salutis humanæ
 mysteriis solennitates indixerunt, vt saluri peni-

tus: contraria celebrarentur? illis feriis Christum nascentem aut suscitatum repræsentarunt, vt inimica & inuisa Christo sectaremur? voluerunt Christi sacramento initiatos à litibus, à mercimoniis, ab opere seruii per id tempus vacare, vt peccatis & libidinibus vacaretur? Filius Virginis, aut ipsa Virgo theatri luxuria honoratur? immania Martyrum supplicia scenicis iocis & ludicris recognoscuntur? eam Christus aperuit viam cum vocaret ad cælum; eam sequuti sunt qui nunc æuo fruuntur sempiterno?

At enim postquam religioni per eos dies vacatum est, quis honestam animi relaxationem prohibeat? *Dedicatus es Christiane* (liceat enim exclamare cum Tertulliano) *si & in sæculo voluptatem concupiscis; imo nimium stultus, si hoc existimas voluptatem. Dicam velim: non possumus viuere sine voluptate, qui mori cum voluptate debebimus?* Sed esto: his hominum moribus sit aliqua concedenda; honestam vocas à scenicis in theatro? Da conuenientiore. Pila, follis, ambulatio, colloquium sine scelere esse possunt. Quod ne citra veterum auctoritatem concedere videar, audi Chrysostomum eiuscemodi ludicra suauiter probantem: & vel hinc discere si quid in ludis scenicis condemnauit id ab eo non animi durtia & superstitione factum, sed à ludorum conditione virtutem omnem profligante profectum. Recita Chrysostomi de honesta remissione consilium.

Sumite saltem exemplum vobis à Barbaris qui omnia huiusmodi spectaculorum turpitudine carent? Chrysost. hom. 38. in quam rationem pro vobis afferetis, si, qui adscripti *Matth.* estis in cælis Angelorum atque Archangelorum socij

Habent Christiani unde maiores quam à theatris hauriant voluptates.

ac coheredes, multo peiores hac in re Barbaris ipsi inueniamini? Præferim cum queas multa aliunde tibi solatia comparare. Nam cum recreare animum uolueris poteris hortos petere, fluentes rivos conspiceret, ingentes lacus considerare, amœna cernere loca, cicadas audire canentes, in templis Martyrium conuersari; unde præcipua tibi corporis suauitas iribuetur, atque ad animam tuam eximia perueniet utilitas, unde singularem capies voluptatem; quoniam nullus dolor, nulla mœstitia consequitur. Habes uxorem, non cares liberis, abundas amicis, quæ omnia dilectionem honestam, & emolumenta nonnunquam solent præbe-

Barbari re. Quid enim liberis suauius? quid uxore casta, theatrales deratogue merito dulcius? Barbari quidem ipsi cum delectatione de theatralibus his ludis, & importuna delectatione nes irridet. fabularum audissent; dixisse feruntur verba omnibus institutis Philosophia dignissima. Prudenter enim Romanos dixerunt, quasi liberis atque uxoribus careant, tales sibi excogitasse voluptates, quibus verbis ostendebant nihil uxore modesta, nihil liberis posse esse suauius. Hic ego non subsisterem nisi esset & fastidio periculum: sed ad eum locum meum vos deducerem ubi admirabilis orator voluptatem

Hom. 69. cam quæ ab hominum Deo dicatorum aspectu in *Matth.* & consortio percipitur, cum ea confert quam iuuenes voluptuarij in theatris inuenire conantur. Mirum dicta tantam inter illas differentiam ab experientissimo viro constitui, quanta est inter modulantes Angelos, & porcos in stercore grunniētes: si quidem illorum ore Christus, istorum diabolus loquitur. Præterea sic disputat in theatro flammam libidinis excitari, quæ spectatorem excruciat: prauos animi motus corroborari, qui dies

noctesque pungunt ac lancinant venustæ meretricis aspectu in proscenio, non æquè elegantem uxorem contemni, inde rixas dissidia, cædes nonnumquam oriri. E diuerso modestam Religiosorum hominum consuetudinem mederi perturbationibus, sopire discordias; animo pacem & tranquillitatem adferre, sine qua nemo ab eis digreditur: quaiucunditate nulla potest esse maior. Inde conficit *theatralem chorum malorum omnium, illum verò piorum esse bonorum fontem atque originem.* In altero ex ouibus lupos fieri, in altero è lupis in agnos conuerti. Quis nostrum inter agnos censerì non malit, quàm inter lupos; licet illi horum iniuriis sint obnoxij? Sed huius fortasse congressus non placet austeritas: petuntur spectacula. Ea nobis ostendet Carthagenensis orator. Ignoscite iudices, si vos tam diu alienis distineo: Religio est Cyprianum præterire non salutatum. Eo flumine quid potest esse alius æstuanti, quid tali ripa amœnius fatigato? Vbique aureus, vbique lacteus manat: hic mel purum, lac merum est. Age Pragmatice, infer in mensam extrema tragemata: doce ex Cypriano quomodo sapientium animi reficiantur, & nos ipsos longa quidem, sed elegantissima oratione refice.

*Fugienda sunt ista Christianis fidelibus, ut iam Cyprian. 2.
frequenter diximus, tam vana, tam perniciofa, tam de spect.
sacrilega spectacula, & oculi nostri sunt & aures
custodiende. Cito in hoc assuescimus quod audimus
scelere. Habet Christianus spectacula meliora si velit: habet veras & profuturas voluptates, si se recollect.
gerit. Et ut omittam illa quæ nondum contemplari potest, habet istam mundi pulchritudinem quam videat*

atque miretur: solis ortum aspiciat, rursus occasum
 mutuis vicibus dies noctesque reuocantem: globum
 Luna, temporum cursus incrementis suis, decremen-
 tisque signantem; astrorum micantium choros, & à
 summo de summa mobilitate fulgentes: anni totius per
 vices membra diuisa, & dies ipsos cum noctibus per
 horarum spatia digestos: & terra molem libratam
 cum montibus, & profusa flumina cum suis fontibus,
 extensa maria cum suis fluctibus atque littoribus. In-
 terim constantem pariter summa conspiratione nexi-
 busque concordia: extensum aerem medium tenuitate
 sua cuncta vegetantem, nunc imbres contractis nubi-
 bus profundentem, nunc ferenitatem resecta raritate
 reuocantem, & in omnibus istis incolas proprios in ae-
 re auem, in aquis piscem, & in terra hominem. Hec,
 inquam, & alia opera diuina, sint Christianis fide-
 libus spectacula. Quod theatrum humanis manibus ex-
 tructum istis operibus poterit comparari? Magnis li-
 cet lapidum molibus exstruatur, crusta sunt montium;
 & auro licet recta lacunaria reluceant, astrorum ful-
 gore vincentur. Nunquam humana opera mirabimur
 quisquis se cognouerit filium Dei. Deicit se de cul-
 mine generositatis sue, qui admirari aliquid post
 Deum potest. Scripturis, inquam, sacris incumbat
 Christianus fidelis, ibi inueniet condigna fidei spe-
 ctacula. Videbit instituentem Deum mundum suum,
 & cum ceteris animalibus, hominem illam admira-
 bilem fabricam, melioremque facientem. Spectabit
 mundum in delictis suis; iusta naufragia, piorum
 premia, impiorumque supplicia: maria populo sicca-
 ta, & de petra rursus maria populo porrecta: spectabit
 de caelo descendentes messes, non de areis: inspiciet flu-
 mina transitus suos refranatis aquarum agminibus
 exhibentia.

Videbit in quibusdam fidem cum igne luctantem, religionem superatas feras, & in mansuetudinem conuersas; intuebitur & animas ab ipsa morte reuocatas: considerabit etiam de sepulchris admirabiliter ipsorum consummatorum iam vitas corporum reductas: & in his omnibus iam maius videbit spectaculum, diabolum illum qui totum detriumphauerat mundum, sub pedibus Christi iacentem. Quàm hoc decorum spectaculum fratres? quàm iucundum, quàm necessarium? intueri semper spem suam, & oculos aperire ad salutem suam. Apparatissimum profectò spectaculum, & si corporeis oculis videri posset, ipsam vniuersam naturam in sui admirationem excitaturum. Sed quid hominibus istis facias, qui cum pietatis gustum non habeant, puras & sinceras animi delectationes ignorent, iucunditatem omnem corporum quasi titillatione metiuntur? Rident insani homines, (si tamen homines qui ad voluptatem cum brutis animantibus communem se se prosternunt atque abiiciunt) cum à nobis laudari accipiunt in rebus aspectabilibus, quid est quasi mentis curriculum nobile ingenij exercitationem: in veritatis inuentione suauissimum animorum pastum: meras delicias in eruditis, atque honestis colloctionibus: ludum & remissionem in contentione studiorum. Miseros putant atque infelices quibus Bibliothecæ sint pro theatris, libri pro collusoribus, orbis vniuersus & omnes præteritorum sæculorum historiæ pro spectaculis, pro lucro scientia. Existimat omnis illa plebs quam videtis beatius sibi esse cum helluatur in popinis, luxuriat in agris, perpotat in sodalitatibus, cachinnatur in theatris, inter Bacchum &

tia ad contemptum intolerabilem esse peruentum. Hoc clamant vestris in subselliis, Iudices, hoc vobis non repugnantibus asseuerant, ut cum in omni libidinum sceditate se volutarint, scelerum suorum colluuiem temporibus nostris imputent, & peccandi ex impunitate facilitatem inter sæculi mores annumerent. Id quàm verè existiment non disputo: existimare autem clarè demonstrat histriorum singularis confidentia quos pudicum non est in vestro stare conspectu, petere ut sibi theatra, hoc est, libidinis officinam aperire liceat, sperare à vobis illud quod leges Imperatoriæ, quod instituta Ecclesiæ titulis penè omnibus condemnant, quod sanctissimi Patres accusant, quod boni omnes execrantur. Hæc verò eorum fiducia quam existimationi vestræ maculam inurat, si non videtis, Iudices, in ea deuenimus tempora quæ ipsi describunt. Sin autem res tanta prudentiam vestram non fugit, quid expectatis ut istorum nequitix improbitati fautorum, otiosorum importunitati vna sententia resistatis? Quin excitatis illos auitæ religionis igniculos quos isti sopitos arbitrantur? Quin reuocatis antiqua tempora si exciderunt, aut conseruatis si hæcenus steterunt? Exerite, exerite, per Deum immortalem, veteris disciplinæ robur: sentiant omnes in sæculi nostri visceribus altè infixum esse castæ religionis amorem: nemo putet vobis iudicia tenentibus sanctitatem Ecclesiæ fuisse corruptam. Hominum sceleribus sæculi mores non metimur, sed impunitate. Nam malè agendi voluntas priuatum malum est iudicium conuiuentia Reipublicæ totius corruptio. Hæc ut

re non parum immutatos ; apud veteres in illis Praefinis Venetisque factionibus, meram fuisse insaniam : tempestate autem sua sublatis partium studiis, fautorum vociferationibus, impudentia factionis, concessu Imperatoris, ipso etiam spectante ac probante, maiore cum modestia & grauitate currus in hippodromo solitos agitari. Quamobrem Deo sacratis hominibus fraudi non fore si aliquando & rarius in eo spectaculi genere versentur : cum interdicto Canonico non hi simplices & moderati, se illi antiquorum turbulentis & insolentibus ludis prohiberi censeantur. *Et haec quidem de equorum curriculis nonnulli dixerunt. De mimis autem & ludis scenicis nullam penitus diuisionem fecerunt, sed saltationes scenicas, & mimorum in thymelo spectacula indistinctè prohiberi omnes asserunt.* Quem sacrarum legum rigorem inflectere homines cætero quin non austeri debuissent : si illa quæ tam sæpè prædicatur in histriionum moribus & comædiis mutatio accidisset. Quænam ergo noua sanctitatis aura nostros peruasit artifices, ut quod in tota Gentilium antiquitate, quod in ipso adolescentis Ecclesiæ flore ac robore, quod ætate Balsamonis compressa ludorum aliorum licentia, in theatris perpetuo bonorum omnium consensu improbatum nunquam euelli potuit, eius flagitij fibras omnes corruptissimo sæculo, perditum homines stirpitus eradicarent ? quis credat cum rudis adhuc antiquitas in omnem se partem flecti sineret, Ecclesiæ constitutiones ut Dei effata, minæ anathematum ut cæli fulmina demissis animis excipiebantur, histrionica modum impudentiæ poni non potuisse :

nunc cum à paterno vigore pietas Christiana deli-
ciuit, cum veteres ipsos Græcos Romanosq; vitiiis
& libidinibus prouocamus, cum sacros Canones
aut ignorantia negligimus, aut impietate non fe-
renda volentes scientesque perrumpimus: illam v-
nam nequitie speciem tot sæculis corroboratam,
in curiosissimis hominum sensibus visu atque au-
ditu tam altè infixam, à vagis & flagitiosis adoles-
centibus omni animorum corporumque conten-
tione quotidie diligenter actitatum, fuisse vlla
ex parte correctam honestioremque redditam?

Non est mihi credite, Iudices, in eo posita *Contem-*
temporum conuersio, rerumque mutatio quam *ptus Cano-*
isti magnoperè prædicant: vitiiis vetustate auctis *num sæculi*
confirmatisque, veterum Patrum auctoritatem, *perniciēs*
Canonum sanctitatem, Ecclesiæ disciplinam, *& dedecus*
decreta Conciliorum, religionis honorem admo- *est.*
nent antiquari. Præteriisse dicunt ea tempora
quibus sacri Episcoporum conuentus leges con-
derent moribus profuturas: quibus qui Christia-
ni & esse & haberi vellent Conciliorum statutis
obtemperarent: quibus priuatarum sedium An-
tistites subditos suos ab omni peccandi occasio-
ne vita & oratione reuocarent. Permittunt à no-
bis appellari sæcula illa aurea, florem humani ge-
neris, medullam Christianitatis, miracula vir-
tutum, Ecclesiam de vitiiis omnibus triumphan-
tem. Demus id modo reuocata peccandi licentia
cui Præsules sanctissimi moderabantur, contem-
ni nunc eorum voces, elisos omnes Ecclesiasti-
cæ disciplinæ neruos, sacrorum Canonum vim
& robur penitus concidisse. Deus immortalis! vbi
gentium sumus? inter quos homines viuimus? que

Venerem, propitio Mercurio; quàm vobis, Iudices, cum animos vestros aut in otio cum libris, aut in colloquio cum æqualibus rerum sublimium contemplatione reficitis. Date veniam si postulo quo aduersus illos animo esse possitis? nam ira excandescere contra deceptos, & mera naturæ suæ ignoratione peccantes, humanum non est. Eorum autem misereri, & adeo perniciosum errorem condonare, qui non aliam experiri velint voluptatem, quàm qua lutulentæ & infames bestię perfruantur, indignum profecto est, & à ratione penitus derelictum. Quamobrem aut falsam opinionem dedoceri eos oportet; aut dedecoris & insanix instrumentum à perditorum manibus eripi. Istud est auctoritatis sapientiæque vestræ, Iudices: illud autem, quia homines esse nolunt, oratione mea conficere posse despero.

*Canonum
& Patrum
auctorita-
tem pueri-
liter elu-
dant thea-
tri amato-
res.*

Nam vt se dat occasio de illorum grege paulum honestioribus, aliqua ex iis quæ modo audiuiſtis Conciliorum & Patrum, hoc est sanctitatis ipsius & grauitatis recitamus testimonia, quibus theatrorum obscœnitas & turpitudine monstratur: aperitur peccati magnitudo & salutis periculum spectatoriſus propositum: ingentia rei publicæ æquæ ac priuatæ damna in spectaculis contracta describuntur. Cumque cœlestibus illis oraculis omni cum animorum demissione obtemperare deberent, quid respondent homines acuti, & ingeniosi? quod nequitix suæ integumentum prætendunt? illis temporibus effusas fuisse in omni petulantia tragœdias: tum necessaria extitisse aculeata patrum dicta vt à lu-

brica & præcipiti via Christiani abducerentur. Nunc in histrionum comœdiis aut nihil aut perparum inesse lasciuia. Canonum seueritatem iamdiu mitigatam; eos olim terruisse qui cubito mungerent. Verbo vno, mutata tempora: mores minus iam esse superstitiosos. Itaque cum hoc dicunt, tuum illud, Panurge, de reprehensa ab antiquis Patribus sola ludorum idololatria, necum demoliuntur: deinde cum aliquam vobis partem honestatis assignant, famam suam omnem, existimationemque disturbant. Cui enim bono histriones boni, cui honesto tragœdiæ honestæ, cui non perditio theatra expetenda videantur? Nam quod affirmant de refrænata inhibitaque comicorum verborum, gestuum, argumentorum petulantia, vereor vt id vobis, Iudicēs, persuadere possint, quibus hominum proteruia satis superque cognita est: à me certè nunquam impetrabunt vt credam admirabilem illam theatralium morum sanctitatem nostris temporibus reseruata fuisse, quàm paucis ante sæculis scriptores adhuc optimi requirebant, Theodorum opinor Balsamonem sæculo post reparatum orbem circiter duodecimo scitis floruisse: Propius igitur à nobis abest, quàm ab antiquis patribus, non tantum Chrylostomo, aut Tertulliano, verumetiam postremo eorum qui sunt à me producti Cassiodoro. Hic autem professione melior quàm fide, eruditione quàm pietate notior, Conciliorum decreta quibus clerici omnes & Monachi à ludis tum Circensibus, tum Scenicis spectandis iubentur abstinere, sic explicat, vt ex aliorum potius sensu, quàm ex suo Circenses asserat suo tempo-

*Non sunt
histriones
nostri anti-
quis mode-
stiores.*

*Theo. Bal-
samon. in
Can. 24. c.
51. Sextæ
Synodi.*







